



This is a digital copy of a book that was preserved for generations on library shelves before it was carefully scanned by Google as part of a project to make the world's books discoverable online.

It has survived long enough for the copyright to expire and the book to enter the public domain. A public domain book is one that was never subject to copyright or whose legal copyright term has expired. Whether a book is in the public domain may vary country to country. Public domain books are our gateways to the past, representing a wealth of history, culture and knowledge that's often difficult to discover.

Marks, notations and other marginalia present in the original volume will appear in this file - a reminder of this book's long journey from the publisher to a library and finally to you.

### Usage guidelines


Google is proud to partner with libraries to digitize public domain materials and make them widely accessible. Public domain books belong to the public and we are merely their custodians. Nevertheless, this work is expensive, so in order to keep providing this resource, we have taken steps to prevent abuse by commercial parties, including placing technical restrictions on automated querying.

We also ask that you:

- + *Make non-commercial use of the files* We designed Google Book Search for use by individuals, and we request that you use these files for personal, non-commercial purposes.
- + *Refrain from automated querying* Do not send automated queries of any sort to Google's system: If you are conducting research on machine translation, optical character recognition or other areas where access to a large amount of text is helpful, please contact us. We encourage the use of public domain materials for these purposes and may be able to help.
- + *Maintain attribution* The Google "watermark" you see on each file is essential for informing people about this project and helping them find additional materials through Google Book Search. Please do not remove it.
- + *Keep it legal* Whatever your use, remember that you are responsible for ensuring that what you are doing is legal. Do not assume that just because we believe a book is in the public domain for users in the United States, that the work is also in the public domain for users in other countries. Whether a book is still in copyright varies from country to country, and we can't offer guidance on whether any specific use of any specific book is allowed. Please do not assume that a book's appearance in Google Book Search means it can be used in any manner anywhere in the world. Copyright infringement liability can be quite severe.

### About Google Book Search

Google's mission is to organize the world's information and to make it universally accessible and useful. Google Book Search helps readers discover the world's books while helping authors and publishers reach new audiences. You can search through the full text of this book on the web at <http://books.google.com/>



BERKELEY  
LIBRARY  
UNIVERSITY OF  
CALIFORNIA

87/85







2


3

4

5



LOAN STACK



**THEOLOGIA**  
**DOGMATICA ET MORALIS.**

606

---

*Propriété.*

---

# **THEOLOGIA**

## **DOGMATICA ET MORALIS**

**AD USUM SEMINARIORUM,**

**AUCTORE**

**J. J. FRAIGNIER**

**S. THEOLOGÆ PROFESSORE IN SEMINARIO LÆDONENSI**

**(DIOECES. SAN-CLAUDIENSIS).**

---

**Opus revisum et auctum à Professoribus ejusdem Seminarii.**

---

**DE EXPOSITIONE THEOLOGICA.**

**DE DOGM. IN GENERE, — IN SPECIE : DE TRINITATE, DE PROVIDENTIA,  
DE SACRAM. IN GEN.**


**LÆDONE,  
IN MAJORI SEMINARIO.**


**PARISIIS,**

**APUD J. LECOFFRE ET SOCIOS, BIBLIOPOLAS,**

**Via vulgò dictà du Vieux-Colombier, 29.**

**MDCCCLV.**





BK1751  
F7  
v. 4

# DE EXPOSITIONE THEOLOGICA.

---

Theologia, ut diximus in notionibus præviis, est *scientia Religionis*.

Religio autem est : *collectio mediorum quibus homo à Deo dirigitur ad finem ultimum*.

Undè tota expositio theologica versatur circa cognitionem mediorum quæ Deus instituit ut homo ad suum finem dirigatur.

Cùm autem cognitio mediorum supponat cognitionem finis, præviè nobis inquirendum est: utrùm homo habeat finem ultimum, et quisnam sit iste finis ; deindè ulterius examinandum utrùm Deus instituerit, et quænam instituerit media ad dirigendum hominem ad finem ultimum.

Harum quæstionum solutio, ut videre est, expositioni theologicæ logicè præmittenda est.

## QUÆSTIO I.

UTRUM HOMO HABEAT FINEM ULTIMUM; ET, IN HYPOTHESI  
AFFIRMATIVA, QUISNAM SIT ISTE FINIS?

*Prænot.* — Hoc verbum *finis ultimus* in duplici sensu intelligi potest, scilicet 1º de fine *facti*, et significat bonum ad quod voluntas ultimò tendit, 2º de fine *juris*, et designat ens ad quod homo ultimò ordinatur, et tendere debet. Hic agitur de fine *juris*.



Pro diversis respectibus sub quibus consideratur, finis ultimus hominis definiri potest 1° *ens ad quod homo ultimò ordinatur*. — Ens ad quod homo ordinatur: In mundo per sapientiam infinitam disposito, inferiora ad superiora ordinantur, et entia superiora sub illo respectu considerata dicuntur *finis* inferiorum. Sic creaturæ inferiores ad hominis bonum ordinantur, et homo dicitur *finis*, saltem mediatus, creationis. — Ordinatur ultimò: Ens enim ordinari potest ad plures fines, ità inter se dispositos, ut gradatim tendant ad finem extremum; *ultimus* appellatur finis ad quem ordinantur fines intermedii.

Finis ultimus definiri potest 2° *bonum cujus possessio homini confert eum perfectionis et beatitudinis gradum cujus est capax*.

Quibus positis,

Ad 1<sup>am</sup> quæst. part., scilicet: *Utrùm homo habeat finem ultimum?*

*Resp.* Homo habet finem ultimum. Secùs 1° homo esset inutilis; inutile enim dici debet ens quod nullam habet destinationem. Secùs 2° omnes hominis actiones essent moraliter indifferentes; siquidem actionis bonitas oritur ex ejus coordinatione, et malitia ex ejus oppositione cum fine.

Habet finem ultimum in duplici sensu definito, seu

1° Homo ordinatur ad ens superius: hæc est enim lex sapientiæ divinæ, quæ hominem creavit, ut inferiora ad superiora ordinentur, ut patet ex relationibus existentibus inter omnia entia creata.

2° Homo destinatur ad possessionem boni per quod perficiatur et beatificetur; — per quod perficiatur:

facto enim constat Deum creasse hominem perfectibilem ; Deus ergo vult hominem perfici, alioquin perfectibilitas esset homini inutilis ; proindè hominem destinavit ad possessionem boni quo perficiatur ; — per quod beatificetur : siquidem Deus indidit omnibus hominibus desiderium constans et invincibile perfectæ beatitudinis ; ergo Deus hominem destinavit ad possessionem boni beatificantis, alioquin hominem deciperet, quod impossibile est.

Ad 2<sup>m</sup> quæst. part., scilicet: *Quisnam sit finis ultimus hominis?*

*Resp.* Finis ultimus hominis est Deus, quatenus cognoscendus per visionem intuitivam, et amandus per amorem beatificum ; seu, quod idem est, quatenus summa Veritas, supremumque Bonum.

*Prob. per part.* — 1<sup>a</sup> p. Finis ultimus hominis est Deus :

Res ita est, si Deus hominem ultimò non ordinaverit, imò non potuerit ordinare ad creaturam ; si sola possessio Dei possit hominem plenè perficere et beatificare. Atqui

1<sup>o</sup> Deus non ordinavit hominem ad creaturam : Nam 1. Prov. 16, 4 : *Universa (proindè hominem) propter semetipsum operatus est Dominus.* 2. I Cor., 10, 31 : *Sive ergo manducatis, sive bibitis, sive aliud quid facitis, omnia in gloriam Dei facite.* Undè sic : omnes actus hominis ad Deum dirigendi sunt ; ergo Deus, non verò creatura, est finis ultimus hominis, exigit enim ordo ut motus et actus entis ad finem dirigantur.

Imò Deus non potuit ordinare hominem ad creaturam : Quia 1. Deus debet in actibus sibi proponere

finem ultimum seipso dignum; porro creatura non esset finis ultimus Deo dignus, cùm Deus possit sibi proponere finem dignitate infinitè superiorem, scilicet seipsum. Quia 2. finis est medio superior; ergo, si Deus hominem ultimò ordinasset ad creaturam, actionem suam creatricem, ac proindè semetipsum ad creaturam ordinasset, proindè submisisset; quod repugnat infinitæ Dei dignitati.

2<sup>o</sup> Sola possessio Dei potest hominem plenè perficere et beatificare. Hæc propositio supponit Deum ab homine posse possideri; — affirmat possessionem Dei posse hominem perficere et beatificare; — solam Dei possessionem posse perficere et beatificare hominem. Vera est proindè, si hæc tria sint certa. Atqui,

1. Homo potest Deum possidere: Intellectus possidet objectum suum per cognitionem, et voluntas per amorem; porro intellectus humanus potest cognoscere Deum, et voluntas humana potest amare Deum: hæc facto constant.

2. Possessio Dei potest hominem perficere et beatificare. — Potest perficere: perficiuntur enim facultates per possessionem objecti earum naturæ accommodati. Ergo intellectus perficitur per cognitionem veritatis; proindè summum perfectionis gradum sibi possibilem acquirere potest per cognitionem Dei qui est summa Veritas. Item perficitur voluntas per amorem boni, proindè ultimum perfectionis gradum sibi possibilem attingere potest per amorem Dei, seu summi Boni. — Potest beatificare: homo enim beatificatur per possessionem boni perfectè satiantis appetitum ejus facultatum; porro per cognitionem Dei, summæ Veritatis,

satiari potest appetitus intellectûs ad veritatem; per amorem Dei, Boni supremi, appetitus voluntatis ad bonum.

3. Sola possessio Dei potest hominem plenè perficere et beatificare: Plena enim non est perfectio et beatitudo, cui aliquid addi potest. Porro perfectioni et beatitudini acquisitæ per possessionem creaturæ aliquid addi potest; cùm, ex unâ parte, homo possit Deum possidere per cognitionem et amorem, ut suprâ diximus; cùm, ex alterâ parte, perfectio et beatitudo manans ex possessione Dei sit essentialiter major quàm perfectio et beatitudo orta ex possessione creaturæ.

2<sup>a</sup> p. Finis hominis est Deus, *quatenûs cognoscendus et amandus* :

Nam 1<sup>o</sup> homo ordinatur ad Deum, ut modo humano ipsius gloriam procuret; porro per cognitionem et amorem tantùm homo potest gloriam Dei humano modo procurare. — Et primò quidem, per hos actus Deum glorificat humano modo. Siquidem proclamat Deum esse summam Veritatem, supremumque Bonum, per actus facultatum hominem intrinsecè constituentium, scilicet per intellectum et voluntatem. — Per alios autem actus, nisi procedant ab intellectu et voluntate, potest quidem Deum glorificare, sed more entium ratione et voluntate privatorum, non verò modo humano.

2<sup>o</sup> Ut Deus perficiat et beatificet hominem, requiritur ut ab homine possideatur. Porro homo Deum possidere non potest, nisi per cognitionem, quæ conjungit intellectum cum Deo, summâ Veritate, et per amorem quo conglutinatur cum Deo, supremo Bono.

3<sup>a</sup> p. Finis hominis est Deus, quatenus cognoscendus per visionem intuitivam, et amandus per amorem beatificum:

Ad quod intelligendum, duplex distingui potest cognitio, seu visio Dei, abstracta scilicet, et intuitiva. Cognitio *abstracta* est cognitio Dei per notiones, quales habemus in hac vitâ, medio revelationis et rationis: dicitur abstracta, quia notiones per quas Deum videmus quasi abstrahuntur à substantiâ divinâ. Cognitio autem *intuitiva* est visio Dei immediata, seu facie ad faciem, non verò per notiones intermedias.—Item duplex amor distinguitur, scilicet 1. amor manans ex cognitione abstractâ; 2. amor visione intuitivâ productus, qui dicitur amor *beatificus*, quia ex eo procedit beatitudo Dei, Angelorum et Beatorum. Quibus positis,

Affirmamus 1<sup>o</sup> finem ultimum hominis esse Deum, quatenus potest cognosci per visionem intuitivam; seu, quod idem est, hominem destinari ad visionem intuitivam.

Pr. 1<sup>a</sup>. Script. I Joan., 3, 2: *Nunc filii Dei sumus, et nondum apparuit quid erimus. Scimus quoniam cum apparuerit, similes ei erimus, quoniam videbimus eum sicuti est.* I Cor., 13, 12: *Videmus nunc per speculum in ænigmate: tunc autem facie ad faciem; nunc cognosco ex parte, tunc autem cognoscam sicut et cognitus sum.* Ergo 1. beati in alterâ vitâ erunt similes Deo, quoniam videbunt eum sicuti est; id est, *similes* (non æquales) Deo quoad visionem Dei, porro Deus seipsum videt intuitivè. Ergo 2. in alterâ vitâ jam non videbimus Deum per speculum in ænigmate, sed modo perfectiori, id est, facie ad faciem. Ergo 3. non videbimus

Deum ex parte, sed eum cognoscemus sicut ab eo cognoscimur, porro cognoscimur intuitivè.

*Pr. 2<sup>a</sup>. Fide Ecclesiæ.* Dogma vitæ æternæ continetur in Symbolo Apostolorum; dogma vitæ venturi sæculi, in symbolo Nicæno. Hanc veritatem homo fidē divinā credere tenetur. Ergo certum est hominem destinari ad visionem intuitivam, si hæc verba *vita æterna, vita venturi sæculi*, designent visionem intuitivam. Atqui hoc constat consensu omnium theologorum et fide Ecclesiæ.

*Pr. 3<sup>a</sup>. Doctrinā Eccles.* Benedictus XII, in Bulla *Benedictus Deus*, et Concilium Florentinum in Decreto unionis docent *animas purgatas in cælum mox recipi, et intueri clarè ipsum Deum Trinum et Unum.*

Affirmamus 2<sup>o</sup> finem ultimum hominis esse Deum, quatenus amandus est amore beatifico; seu, hominem destinari ad amorem beatificum.

Siquidem amor Dei sequitur ex cognitione Dei, et cum naturā visionis debet habere proportionem. Proinde ex visione intuitivā, quæ est modus cognitionis perfectissimus, necessariò sequitur amor intensissimus, qui à theologis appellatur *amor beatificus*.

*Corollaria.* Ex dictis sequitur 1<sup>o</sup> Deum, quatenus cognosci et amari potest, seu quatenus est Veritas et Bonum, esse necessariò finem hominis. Hæc enim relatio hominis ad Deum necessariò sequitur ex naturā Dei et hominis.

2<sup>o</sup> Visionem intuitivam et amorem beatificum non esse finem essentialem et debitum homini. Homo enim posset Deum cognoscere et amare, ac proinde finem obtinere, per cognitionem abstractivam et amorem huic

cognitioni respondentem. Proinde destinatio ad visionem intuitivam et amorem beatificum est indebita, et supernaturalis, seu excedens capacitatem naturalem hominis.

3<sup>o</sup> Perfectionem et beatitudinem homini possibles præcipuè constitui visione intuitivâ et amore beatifico.

— Dicimus : *præcipuè* ; nam beati in cœlis, non solum fruuntur visione intuitivâ et amore beatifico, sed donantur adhuc aliis perfectionibus secundariis, v. g. immortalitate, claritate, agilitate corporis, etc., de quibus alibi.

## QUÆSTIO II.

UTRUM DEUS INSTITUERIT MEDIA AD DIRIGENDUM HOMINEM AD SUUM FINEM ; ET, IN HYPOTHESI AFFIRMATIVA, QUÆNAM SINT ISTA MEDIA ?

Ad 1<sup>am</sup> q. part., scilicet : *Utrum Deus instituerit...*?

*Resp.* Affirmativè.

*Prob.* 1<sup>a</sup>. Omnium entium evolutio et perfectio pendet à quibusdam conditionibus ; aliis verbis, omnia entia per media propria diriguntur ad suum finem. Ergo à pari perfectio hominis, seu obtentio ejus finis, pendet etiam à quibusdam conditionibus, seu mediis, nisi contrarium constet : Deus enim præsumitur agere secundum leges generales. Porro contrarium non constat.

*Prob.* 2<sup>a</sup>. Gen., 13, 1 : *Ego.... sum.... merces tua magna nimis.* Luc., 13, 24 : *Contendite intrare per angustam portam...* Matth., 11, 12 : *Regnum cœlorum vim patitur, et violenti rapiunt illud.* Ibid., 19, 17 : *Si autem vis ad vitam ingredi, serva mandata.* Undè sic : vita æterna, seu visio intuitiva, est merces, ergo supponit

meritum; supponit violentiam contra inimicos salutis, observationem mandatorum; proinde obtentio finis pendet à conditionibus. Ergo.

**Prob. 3<sup>a</sup>.** Juxta fidem et doctrinam Ecclesiæ, hi soli vitam æternam consequi possunt, qui omni macula peccati sunt exempti; proinde obtentio visionis intuitivæ supponit vitiationem peccati, vel purificationem à peccato; proinde pendet à conditionibus. Ergo.

Ad 2<sup>m</sup> q. part., scilicet: *Quænam sint ista media?*

**Resp.** Media quibus Deus hominem ad suum finem dirigit respondent naturæ finis quem enti à se creato assignavit, et triplici facultatum generi quibus hominem dotavit.

1<sup>o</sup> Deus, summa Veritas, hominem creavit *intelligentiâ* præditum, eum destinavit ad visionem intuitivam. Hominem *intelligentiâ* præditum ad suum finem dirigit Deus medio legum, quæ humanæ intelligentiæ veritates credendas imponunt. Hinc Apostolus ad Hæbr. 1, 6: *Sine fide impossibile est placere Deo*, proinde salutem obtinere. Et Conc. Trid., sess. 6, cap. 7: *Sine fide nulli unquàm contigit justificatio*, proinde salus.

2<sup>o</sup> Deus, Bonum supremum, hominem creavit *voluntate et activitate* præditum, eum destinavit ad amorem beatificum. Hominem voluntate et activitate præditum ad suum finem dirigit Deus medio legum quæ facienda proponunt. Ait enim Christus, Matth., 5, 20: *Nisi abundaverit justitia vestra plus quàm Scribarum et Phariseorum, non intrabitis in regnum cælorum*. Et, ibid., 7, 13: *Omnis arbor quæ non facit fructum bonum, excidetur et in ignem mittetur*. Et, ibid., 19, 17: *Si vis*



*ad vitam ingredi, serva mandata.* Similiter et Apostolus, Rom., 2, 13: *Non auditores legis justi sunt apud Deum, sed factores legis justificabuntur.* Idem definiit Conc. Trid., sess. 6, can. 21: *Si quis dixerit Christum Jesum hominibus datum fuisse ut Redemptorem cui fident, non etiam ut Legislatorem cui obediant, anathema sit.*

Ex dictis constat hominem à Deo ad finem ultimum dirigi medio regularum sive intelligentiæ, sive voluntati et activitati suæ impositarum. Circa regulas prædictas versatur totum theologicæ scientiæ objectum.

Cùm autem regulæ prædictæ in diversas species distinguantur, expositio theologica in diversas dividitur partes, quæ speciales accipiunt denominationes pro diversis regularum speciebus. — Regulæ quæ hominis intelligentiæ veritates credendas imponunt dicuntur *dogmaticæ*, et pars theologiæ quæ prædictas regulas exponit dicitur *theologia dogmatica*. — Regulæ quæ voluntati et activitati humanæ facienda proponunt, in diversas etiam classes dividuntur: aliæ oriuntur immediatè à Deo, et pars theologiæ quæ de istis pertractat dicitur *theologia moralis* strictè sumpta. Aliæ oriuntur à Deo mediatè, seu imponuntur per potestates divinitus ordinatas, scilicet per potestatem ecclesiasticam et per potestatem civilem. Istarum cognitio sub multis respectibus pertinet etiam ad theologiam moralem, ut in decursu theologicæ expositionis patebit; sed, cùm istæ leges sint objectum scientiarum specialium, scilicet Juris canonici et Juris civilis, de his per accidens tantummodò tractabimus.


Hinc ultimò expositio theologica duas complectitur

partes, *dogmaticam* scilicet et *moralem*, quarum prior de regulis intelligentiæ, posterior de regulis voluntati et activitati humanæ impositis agit.

*Nota.* Regulæ, sive dogmaticæ, sive morales, omnes quidem simul attingunt et debent dirigere facultates hominis; nihilominus, ratione finis utrique regularum generi proprii, inter se differunt. Siquidem regulæ dogmaticæ ultimò directionem præbent intelligentiæ, dum regularum moralium finis ultimus sit directio voluntatis et activitatis humanæ.

*Utriusque generis regulæ considerari possunt in genere et in specie. Undè dicendum 1º de dogmate 1. in genere, 2. in specie; 2º de morali 1. in genere, 2. in specie.*





---

# DE DOGMATICA.

---

## I. DE DOGMATE IN GENERE.

---

Dogmatica definiri potest : *scientia regularum actûs fidei.*

Undè sub titulo præsentì dicendum de proprietatibus generalibus actûs fidei ejusque regularum.

Porro actus fidei ejusque regulæ considerari possunt *absolutè et relativè.* Undè titulus triplex : 1° de actu fidei absolutè considerato, 2° de regulis actûs fidei absolutè consideratis, 3° de relationibus generalibus actûs fidei cum suis regulis.

---

### CAPUT I.

#### DE ACTU FIDEI ABSOLUTÈ CONSIDERATO.

Sub titulo præsentì tractandum : 1. de naturâ et conditionibus ; 2. de possibilitate ; 3. de proprietatibus absolutis actûs fidei.

#### ARTICULUS I.

##### De naturâ et conditionibus actûs fidei.

##### § 1. — De naturâ actûs fidei.

Quær. *Quænam sit natura actûs fidei?*

*Resp.* Fides in genere est : *adhæsiō firma mentis cui-dam veritati propter testimonium.*

Fides hoc sensu generali sumpta diversa est pro diversis testimoniis quibus innititur assensus. Est *divina*, *ecclesiastica*, *humana*, prout testimonium per quod determinatur adhæsiō mentis est divinum, ecclesiasticum, humanum. — De fide merè humanā agere non intendimus.

Fides *divina* est habitualis aut actualis, prout spectatur ut *virtus* aut *actus*.

Fides *habitualis* est : virtus supernaturalis et infusa quā mens inclinatur ad adhærendum firmiter veritatibus à Deo revelatis et pro talibus certò cognitis, propter testimonium revelantis Dei summè veracis.

Dicimus : fides habitualis est — *virtus* : seu habitus disponens et inclinans ad bonum ; — *supernaturalis* : quoad originem, in se, quoad finem, ut alibi probabitur ; — et *infusa* : id est non acquisita per actus repetitos hominis, sed immediatè à Deo in animā per operationem supernaturalem deposita ; — *quā mens inclinatur* : virtus enim naturā suā inclinat ad bonum ; — *ad adhærendum* : fides enim est adhæsiō mentis ; — *firmiter* : id est absque ullā suspitione, dubitatione voluntariā ; — *veritatibus à Deo revelatis* : siquidem solæ veritates à Deo revelatæ possunt esse objectum fidei divinæ ; — *et pro talibus certò cognitis* : veritas enim divinitus revelata non potest fieri objectum fidei divinæ, nisi de divinā hujus veritatis revelatione certò constet ; — *propter testimonium Dei revelantis* : alioquin non adesset fides divina.

Fides *actualis*, seu actus fidei est : assensus super-

naturalis firmissimè datus veritatibus à Deo revelatis, et pro talibus certò cognitis, propter testimonium revelantis Dei summè veracis.

Fides divina actualis dividitur 1<sup>o</sup> in fidem *merè divinam* et in fidem *catholicam*. In eo utraque convenit, quòd utriusque objectum sit veritas à Deo revelata, cui mens adhæret propter testimonium Dei revelantis. Fides autem merè divina à fide catholica differt in eo quòd pro fide merè divina sufficiat certitudo de revelatione veritatis credendæ, qualis v. g. adesse potest in *revelatione immediatâ*; dùm pro fide catholica non sufficiat talis certitudo, sed insuper requiratur propositio veritatis per Ecclesiam.

Dividitur 2<sup>o</sup> in implicitam et explicitam. Dicitur *explicitus* actus fidei quo mens adhæret cuidam veritati distinctæ et in se consideratæ, v. g. credo Sanctorum communionem. *Implicitus* autem dicitur actus fidei quo mens adhæret veritatibus revelatis generatim, non autem in se et distinctè consideratis. Sic qui dicit: credo quidquid revelavit Deus et docet Ecclesia catholica, elicit actum fidei implicitæ de omnibus veritatibus revelatis, etiam de his quas fuisse revelatas ignorat.

Fides *ecclesiastica* est: firma mentis adhæsiō cuidam veritati, non quidem in verbo Dei contentæ, sed ab Ecclesiâ infallibiliter definitæ, propter testimonium infallibilis Ecclesiæ.

§ II. — De conditionibus actûs fidei.

De conditionibus 1<sup>o</sup> fidei divinæ catholicæ, 2<sup>o</sup> fidei simpliciter divinæ, 3<sup>o</sup> fidei ecclesiasticæ.

PUNCT. I. *De conditionibus fidei catholicæ.*

Aliæ sunt *extrinsecæ* et *præviæ*, aliæ sunt *intrinsecæ* et *constitutivæ*.

*I. De conditionibus extrinsecis et præviis.*

*Quær. Quænam sint conditiones extrinsecæ et præviæ actûs fidei catholicæ?*

*Resp.* Duæ requiruntur conditiones præviæ.

*1<sup>a</sup> Cond.* Requiritur convictio legitima de sequentibus veritatibus : Existit Deus, Deus est verax, hominibus locutus est, verbum Dei continetur in Scripturis et Traditione, Deus constituit auctoritatem quamdam infallibilem ut verbum suum hominibus transmittetur et explicaretur, Ecclesia catholica est illa auctoritas divinitus instituta ; — quæ convictio in mente producit, extraordinariè per immediatam operationem Dei, ordinariè per motiva rationalia quibus prædictæ veritates fiunt credibiles.

*Prob. per part.* Requiritur convictio de veritatibus superiùs enuntiatis : Fides enim catholica non est, nisi mens credat veritatem ab Ecclesiâ propositam esse divinitus revelatam ; porro convictio sufficiens ut mens adhæreat huic propositioni « *veritas ab Ecclesiâ proposita est divinitus revelata* » supponit præviâ convictionem de cæteris notionibus superiùs enuntiatis. — Requiritur convictio legitima : Fides enim debet esse rationabilis, seu mens absque ratione et imprudenter credere non debet, juxta illud Apostoli Rom., 12, 1 : « *Rationabile obsequium vestrum.* » — Quæ convictio potest extraordinariè in mente produci per immediatam Dei operationem : hoc negari non potest, quin arbitra-

riò limitetur summa Dei potentia.—Ordinariè prædicta convictio in mente producit per motiva rationalia quibus prædictæ veritates fiunt credibiles: hoc facto constat. Aliundè ista motiva rationalia in se habent efficaciam determinandi convictionem, et trahendi mentis assensum, ut vidimus ubi *de locis theologicis*.

*Observ.* 1<sup>o</sup> Motiva rationalia credibilitatis non excludunt operationem gratiæ, quæ suam efficaciam propriam potest addere vi motivorum ad determinandum mentis assensum veritati credendæ.

2<sup>o</sup> Rationes et argumenta quibus probantur notiones fidei præviæ possunt percipi modo plùs minùsve completo, plùs minùsve claro et scientifico, pro captu intellectuali subjecti à quo elicitur actus fidei.

3<sup>a</sup> *Cond.* Requiritur causa supernaturalis excitans et adjuvans mentem ut adhæreat debito modo veritati credendæ; quæ causa est, partim fides habitualis in eis qui fidem habitualement habent, semper et in omnibus gratia actualis.

*Prob. p. part.* Requiritur causa supernaturalis: Ad quemlibet enim actum requiritur causa proportionata naturæ actûs producendi. Porro actus fidei debet esse supernaturalis, cùm actus fidei sit medium ad finem supernaturalem; proindè, cùm actus fidei superet vires naturales hominis, non potest elici, nisi excitante et adjuvante causâ supernaturali. — Quæ causa est, partim fides habitualis, in eis... Fides enim habitualis est habitus inclinans ad actum fidei; porro inclinatio est, saltem quoad partem, causa actûs. — Semper et in omnibus gratia actualis est causa: hoc evidens est quoad homines qui non habent habitum fidei; siqui-



dem ad eliciendum actum fidei requiritur causa supernaturalis, porro nulla alia, præter gratiam actualem, in istis hominibus operari potest, cum ex hypothesi, absit fides habitualis. Hoc est etiam verum quoad homines qui fidem habitualement habent; siquidem inferius, ubi *de Gratiâ*, probabitur hominem non posse sine gratiæ interioris auxilio ne fidei quidem initium habere.

*II. De conditionibus intrinsicis et constitutivis.*

*Quær. Quænam sint?*

*Resp.* Aliæ requiruntur ex parte subiecti, aliæ ex parte objecti, aliæ ex parte motivi.

*1º Ex parte subiecti:* Requiritur adhæsiō firma, duplicem includens actum, libertatis scilicet et intelligentiæ.

*Prob.* Requiritur adhæsiō: hoc evidens est, ex definitione actûs fidei; — adhæsiō firma, seu excludens omne dubium: alioquin adesset merum dubium aut mera opinio, prout propositio contradictoria menti appareret æquè probabilis, plus minusve probabilis; — includens actum libertatis: objectum enim fidei, quatenus sumitur ut objectum fidei, debet esse obscurum, ut infra dicitur; proinde, cum assensus præstari nequeat propter evidentiam rei, determinandus est actu libero voluntatis; — includens actum intelligentiæ: siquidem requiritur actus voluntatis liber, porro actus voluntatis propriè dictus supponit cognitionem præviam, secus esset actus instinctivus, non verò liber.

*2º Ex parte objecti:* Objectum fidei catholicæ debet esse: veritas in verbo Dei (in Scripturâ aut Traditione) contenta, veritas obscura et ab Ecclesiâ proposita tanquàm à Deo revelata.

*Prob. p. p. 1<sup>a</sup>.* Objectum debet esse : veritas in verbo Dei contenta, seu à Deo revelata : Alioquin non adesset fides divina, solas enim veritates à Deo revelatas mens potest credere propter testimonium Dei.

*2<sup>a</sup> p.* Veritas debet esse *obscura*; id est veritas, cui assensus debetur propter revelationem, debet esse obscura et inevidens : Siquidem 1. fides debet esse libera et meritoria, proindè requirit imperium voluntatis ; porro nec libertas, nec proindè meritum locum haberent, si de veritate adesset evidèntia, quæ necessariò rapit assensum. 2. D. Paulus, Hæbr., 11, 1 : *Est autem, inquit, fides sperandarum substantiarum rerum, argumentum non apparentium.* Undè S. Gregorius papa, hom. 26 in Evang. n. 8 : *Profectò liquet quia fides illarum rerum argumentum est quæ apparere non possunt : quæ etenim apparent jam non habent fidem, sed agnitionem.* Idem Greg., hom. 26 n. 1 : *Fides non habet meritum cui humana ratio præbet experimentum.* Et S. Athanasius, contr. Apollin. l. 2, de salut. advent. Christi, n. 11 : *Neque enim fides evidenter apparens fides dici poterit ; verum fides est quæ quod impossibilia est (apparenter) in potentiâ... esse credit.* Item S. Aug. et alii PP.

Controvertitur autem utrùm objectum fidei necessario debeat esse obscurum, seu utrùm possit esse objectum fidei veritas revelata quæ aliundè evidenter cognoscitur cognitione naturali ?

Docent Thomistæ actum fidei esse impossibilem, nisi veritas sit omninò obscura, non quidem absolutè, sed relativè ad subjectum à quo eliciendus est actus. Juxta eos fides et scientia non possunt stare simul in

eodem intellectu circa idem objectum. Cæteri autem theologi, quorum sententia probabilior nobis videtur, sentiunt fide divinâ credi posse veritatem revelatam, quæ aliundè evidenter cognosceretur. Licèt enim subjectum per scientiam percipiat veritatem, huic veritati potest assentire unicè propter Dei revelantis auctoritatem, abstrahendo à suâ scientiâ. In hoc etiam casu, quamvis veritas sub uno respectu sit scientificè clara, sub altero respectu, seu quatenùs est objectum fidei, permanet obscura, saltem quoàd factum revelationis. Siquidem testimonia quibus probatur existentia veritatis revelatæ, nunquàm reddunt hanc veritatem evidenter veram, sed tantùm evidenter credibilem.

3<sup>a</sup> p. Veritas debet ab Ecclesiâ proponi tanquàm revelata, aliis verbis, veritas debet proponi ab auctoritate ecclesiasticâ cujus infallibilitas circa veritatem definitam rejici nequeat absque hæresi. Siquidem ut veritas quædam de fide divinâ catholicâ sit credenda, requiritur ut divina hujus veritatis revelatio certò innotescat per medium infallibile et universale, seu pro omnibus hominibus constitutum. Porro sola Ecclesia catholicea gaudet tali privilegio, ut vidimus ubi *de Ecclesiâ*.

*Observ.* Hæc veritatis publica propositio per Ecclesiam sequenti modo semper fieri debet. Requiritur judicium publicum, quo tanquàm divinos ac revelationem continentes proponantur fontes è quibus depromitur veritas credenda. Hoc sufficit, si clarus et apertus sit sensus veritatis in fontibus expressæ. Alioquin, si veritatis sensus sit obscurus et ambiguus, insuper definiendus est, tum fide universali Ecclesiæ, tum positivâ decisione.

**3° Ex parte motivi :** Mens debet adhærere veritati, quia Deus eam revelavit et ipse summa Veritas est.

**Explic.** Debet adhærere, quia Deus veritatem revelavit: fides enim est adhæsiō testimonio; *fides ex auditu*, ait Apost. Rom., 10, 16; — et quia Deus summa Veritas est: testimonium enim valorem desumit ex veracitate testantis.

**Prob.** Requiritur istæ conditiones ex parte motivi. Siquidem 1. fatentibus omnibus, de essentiâ fidei divinæ catholicæ est ut mens adhæreat veritati propter tale *motivum*. 2. In hypothesis contrariâ, præstaretur assensus vel propter rationes intrinsecas argumenta rationalia quibus probatur veritas, vel propter testimonium humanum, vel propter testimonium Ecclesiæ. Porro in primo casu adesset tantum actus scientificus, in secundo actus fidei humanæ, in tertio actus fidei ecclesiasticæ, minimè verò actus fidei divinæ catholicæ.

PUNCT. II. *De conditionibus fidei simpliciter divinæ.*

**Quær.** *Quænam sint conditiones fidei simpliciter divinæ?*

**Resp.** Eædem sunt quæ conditiones fidei divinæ catholicæ sequentibus mutatis: 1° Convictio de notionibus fidei simpliciter divinæ præviis in mente producit per actionem extraordinariam circumstantiarum mirabilium in quibus fit revelatio privata. 2° Non requiritur propositio veritatis per Ecclesiam, cum subjectum sit aliundè certum de divinâ veritatis revelatione.

PUNCT. III. *De conditionibus fidei ecclesiasticæ.*

**Quær.** *Quænam sint?*

*Resp.* Eædem sunt quæ conditiones fidei catholicæ sequentibus mutatis: 1<sup>o</sup> Quoàd conditionem intrinsecam ex parte objecti requisitam: Fidei ecclesiasticæ objectum debet esse, non quidem veritas revelata, sed veritas infallibiliter definita ab Ecclesiâ catholicâ. 2<sup>o</sup> Quoàd conditionem ex parte subjecti requisitam: Subjectum debet adhærere veritati, non propter divinam veritatis revelationem, sed propter infallibile testimonium Ecclesiæ.

*Corol.* Ex dictis concludimus: Ergo sunt actus fidei omnes et soli actus qui prædictis conditionibus vestiuntur.

## ARTICULUS II.

### De possibilitate actûs fidei.

De possibilitate actûs fidei 1. divinæ catholicæ, 2. simpliciter divinæ, 3. ecclesiasticæ.

#### PUNCT. I. De possibilitate actûs fidei divinæ catholicæ.

*Quær.* Utrûm actus fidei catholicæ sit possibilis?

*Resp.* Affirmativè.

*Prob.* 1<sup>a</sup>. Hic actus à Deo præscribitur; ergo possibilis est, alioquin dicendum foret Deum impossibilia jubere, quod damnatum est ut hæreticum à Conc. Trid. sess. 6, cap. 11.

*Prob.* 2<sup>a</sup>. Possibilis est actus fidei catholicæ, si realiter poni possint omnes conditiones tûm præviæ, tûm constitutivæ. Atqui,

1<sup>o</sup> Convictio legitima de notionibus fidei præviis haberi potest: tûm per immediatam Dei operationem, ut evidens est; tûm vi propriâ rationum quibus istæ

notiones præviæ probantur, siquidem ex dictis, ubi *de Locis theologicis*, sequitur istas veritates esse evidenter credibiles, seu probari posse modo plùs quàm sufficienti ad rapiendum assensum hominis sensati.

2<sup>o</sup> Causæ supernaturales superiùs indicatæ possunt inclinare et adjuvare mentem ad credendum: sub titulo *de Gratiâ* probabitur existentia et explicabuntur proprietates gratiæ habitualis, fidei habitualis quæ cum gratiâ habituali infusa accipitur, et gratiæ actualis, quæ vel sola, vel fidei habituali unita, reddit hominem *capacem actûs fidei*.

His conditionibus positis, positâ aliundè existentia objecti fidei, mens huic objecto firmiter adhærere potest. Ex unâ enim parte, probatis notionibus fidei præviis, sequitur veritates ab Ecclesiâ propositas esse revelatas, et rationabile esse ipsis assensum præstare. Ex alterâ parte actio fidei habitualis et auxilium gratiæ actualis sufficiunt ut mens possit adhærere veritati cum certitudinis gradu et supernaturalitatis modo requisito ad constituendum actum fidei divinæ propriè dictum.

Diximus: « *Positâ aliundè existentia objecti fidei.* » Facto autem existunt veritates quæ possunt esse objectum fidei. Siquidem 1. existunt veritates à Deo revelatæ, quæ continentur in Scripturâ et Traditione, ut constat ex dictis ubi *de Locis theologicis*. 2. Istæ veritates habent obscuritatem pro fide requisitam: multæ enim non sunt intrinsecè evidentes, sunt in se perobscuræ. Insuper omnes sunt obscuræ quatenùs per revelationem manifestatæ; cùm revelationis factum, probatum quidem argumentis extrinsecis sufficientibus ad trahendum assensum hominis sensati, nequeat tamen probari

ita ut appareat intrinsecè evidens. 3. Inter veritates quæ in Scripturâ et Traditione continentur multæ tanquàm de fide credendæ proponuntur ab infallibili auctoritate ecclesiasticâ. Et 1. Ecclesiam multas proponere veritates de fide credendas, facto constat; 2. Ecclesiam gaudere infallibilitate et indefectibilitate, constat etiam ex dictis ubi *de Ecclesiâ*.

Positis omnibus conditionibus hucusquè enuntiatis, mens potest adhærere veritatibus in verbo Dei contentis, propter divinam revelationem et summam Dei revelantis veracitatem. Hoc evidens est.

Ergo possibilis est actus fidei divinæ catholicæ.

PUNCT. II. *De possibilitate actûs fidei simpliciter divinæ.*

Quær. *Utrum actus fidei simpliciter divinæ sit possibilis?*

Resp. Affirmativè. Etenim, cùm fidei simpliciter divinæ conditiones sint, exceptis duabus differentiis superius enuntiatis, eadem quæ conditiones fidei divinæ catholicæ, ad probandam possibilitatem hujus actûs, sufficit probare 1. Deum posse in mente producere convictionem de facto revelationis per circumstantias extraordinarias in quibus fit revelatio; 2. tali convictione in mente subjecti existente, propositionem veritatis ab Ecclesiâ esse inutilem: porro utrumque evidens est. Ergo.

PUNCT. III. *De possibilitate actûs fidei ecclesiasticæ.*

Quær. *Utrum hic actus sit possibilis?*

Resp. Affirmativè. Siquidem, cùm hujus fidei conditiones sint eadem quæ conditiones fidei catholicæ,

exceptis 1. quod ecclesiasticæ fidei objectum sit veritas in verbo Dei non contenta, et 2. quod assensus præstari debeat propter Ecclesiæ testimonium infallibile circa veritatem definitam, sufficit ad probandam possibilitatem actûs de quo agitur ut constet de infallibilitate Ecclesiæ circa veritates quæ possunt esse objectum fidei ecclesiasticæ. Porro hanc Ecclesiæ infallibilitatem probavimus ubi *de Ecclesiâ*.

### ARTICULUS III.

*De proprietatibus absolutis actûs fidei.*

PUNCT. I. *De proprietatibus absolutis actûs fidei divinæ catholicæ.*

**Quær. Quænam sint?**

*Resp.* Istæ proprietates sunt diversæ, prout actus fidei consideratur sub respectu 1. originis, naturæ et finis, 2. subjecti, 3. motivi, 4. objecti.

I. Sub respectu *originis, naturæ et finis*, actus fidei est *supernaturalis*. — Supernaturalis est : 1. respectu *originis*. Siquidem homo fit capax actûs fidei per actionem fidei habitualis et auxilium gratiæ actualis; proinde habitus fidei et gratia actualis dici possunt causæ præcipuæ actûs fidei; proinde actus fidei supernaturalis est ratione causæ, originis. 2. Supernaturalis est *in se*: actus enim desumit nomen causæ principalis, porro causa actûs est supernaturalis. 3. Supernaturalis est respectu *finis*: actus enim fidei ordinatur ad visionem intuitivam, finem supernaturalem.

II. Sub respectu *subjecti*: Actus fidei est 1<sup>o</sup> *liber*: suprâ probavimus. 2<sup>o</sup> Est *certus*, certitudine facti; id



est, mens adhæret veritati absque ulla dubitatione: superius etiam diximus actum non esse actum fidei, sed merum dubium, meram opinionem, si quædam adesset mentis hæsitatio.

III. Sub respectu *motivi*: Si perpendantur actûs fidei conditiones præviæ et elementa intrinseca, tria motivis nituntur, scilicet: 1. præambula remota, seu convictio de notionibus præviis quas, ex dictis, supponit convictio de infallibilitate Ecclesiæ; 2. præambulum proximum, seu adhæsiō propositioni per Ecclesiam factæ de veritate tanquàm revelatâ; 3. actus ipse fidei, id est assensus mentis tûm ipsimet facto revelationis, tûm veritati revelatæ. Porro,

1<sup>o</sup> Præambula remota nituntur argumentis ex ratione petitis et sufficientibus ut inducatur mens ad affirmandam absque errandi formidine relationem inter iudicium et objectum. Ista præambula sunt proindè 1. *certa objective*, 2. *certa, certitudine humanâ*, nam certitudo quam parit motivum ejusdem naturæ est quàm istud motivum.

2<sup>o</sup> Præambulum proximum nititur auctoritati Ecclesiæ proponentis veritatem tanquàm revelatam. Proindè præambulum istud est: 1. *certum*, cûm Ecclesia gaudeat privilegio infallibilitatis in doctrinâ et indefectibilitatē in fide; 2. *certum, certitudine ecclesiasticâ*, cûm mens adhæreat propositioni propter auctoritatem Ecclesiæ.

3<sup>o</sup> Ipse actus fidei in se spectatus nititur testimonio divino. Proindè actus fidei est 1. *certus*, cûm Deus nec falli nec fallere possit; 2. *certus, certitudine divinâ*, cûm motivum assensus sit testimonium Dei summè veracis.

*Notanda*: 1<sup>o</sup> Certitudo actûs fidei divinæ dici potest in quodam sensu major quàm certitudo humana; id est si mens, quod impossibile quidem fatemur, teneatur dicere falsam aliquam propositionem revelatam, aut aliquam veritatem naturaliter cognitam, ab illa potius rejicienda foret veritas naturalis quàm veritas certò revelata. Siquidem certitudo, si gradus admittere posset (quod expendere nolumus), crescere deberet pro valore motivorum; atqui testimonium divinum valore multò præstat cuilibet alio certitudinis motivo.

2<sup>o</sup> Prædicta certitudo, quoad motivum divina, suo caractere proprio duo afficit, factum ipsum revelationis, et ipsam veritatem revelatam. 1. Ipsum factum: testimonium enim divinum primò sese affirmat tanquàm factum divinum; 2. veritatem ipsam: nam, si testimonium sit verum, eo ipso stabilitur veritas revelata; factum proinde revelationis, et ipsa veritas per revelationem manifestata includuntur in testimonio divino quod est motivum actûs fidei.

IV. Sub respectu *objecti*: Actus fidei est *verus* et *supernaturalis*, id est, dogmatibus fidei respondent objecta realia et supernaturalia, quibus competunt omnes proprietates positivæ et negativæ quæ in actu fidei de ipsis affirmantur. Siquidem actus fidei est certus, ergo verus. Aliundè, si objectum actûs fidei non esset reale et verum, Deus homines falleret, quod blasphemia est, et absurditas inducens scepticismum universalem.

*Observ.* 1<sup>o</sup> Hucusquè dictis explicari potest quomodo præambula remota, quæ sunt objectum adhæSIONIS in principio merè scientificæ, quomodo præambulum proximum, quod est objectum actûs fidei in principio

simpliciter ecclesiasticæ, fiant posterius actus fidei divinæ propriè dicti. Siquidem positis istis præambulis, adducitur mens ad credendum tanquàm revelatum, ac proindè tanquàm objectum fidei divinæ, quidquid proponit Ecclesia; porro omnia motiva quibus nituntur prædicta præambula sunt è numero veritatum quas docet et fidei proponit Ecclesia catholica.

2<sup>o</sup> Præcedentium notionum ope dari potest analysis fidei, quoàd causas et quoàd motiva. 1. Respectu *causarum*: Causa primaria impulsiva et directiva actûs fidei est gratia; causa efficiens est voluntas libera auxilio gratiæ adjuta; causa instrumentalis est intelligentia per gratiam illuminata. 2. Respectu *motivorum*: Motivum cui nituntur præambula remota est ratio individua et collectiva; motivum præambuli proximi est testimonium Ecclesiæ; motivum actûs fidei propriè dicti, seu adhæSIONIS facti revelationis et veritati revelatæ, est ipsa revelatio, seu testimonium divinum.

PUNCT. II. *De proprietatibus actûs fidei simpliciter divinæ.*

Quær. *Quænam sint?*

Resp. Eædem sunt quæ proprietates actûs fidei catholicæ, omissis tamen iis quæ spectant præambula remota et præambulum proximum.

PUNCT. III. *De proprietatibus actûs fidei ecclesiasticæ.*

Quær. *Quænam sint?*

Resp. Ad eas assignandas, certitudini divinæ actûs fidei catholicæ sufficit substituere certitudinem ecclesiasticam, quæ actui de quo agitur sola competere potest. Hoc præsertim puncto differunt proprietates actûs fidei ecclesiasticæ et fidei catholicæ.

## CAPUT II.

### DE REGULIS ACTUS FIDEI...

Actus fidei, ut supra vidimus, est actus voluntatis et intelligentiæ. Sub priori respectu consideratus, reducitur ad classem actuum liberorum, et quidquid infra, sub titulo *de Morali in genere*, dicemus de actu humano in genere, de regulis actus humani, de relationibus actus humani cum suis regulis, pariter congruit actui fidei. Insuper sub titulo *de Legibus in individuo*, ubi de *Officiis hominis erga Deum* explicabuntur regulæ speciales actus fidei. Nunc ergo unum intendimus, scilicet exponere regulas generales actus fidei, quatenus est actus intelligentiæ.

Prædictæ regulæ considerari possunt 1<sup>o</sup> quoad originem, 2<sup>o</sup> in se, 3<sup>o</sup> quoad effectus. Unde triplex quaestio.

QUEST. I<sup>a</sup>. *Quænam sit origo regularum actus fidei?*

Resp. Istæ regulæ essentialiter deducuntur ex præcepto et ex ipsâ naturâ fidei. Quod patebit earum expositione.

QUEST. II<sup>a</sup>. *Quænam regulæ fluant ex præcepto et ex naturâ actus fidei?*

Resp. 1<sup>a</sup> Reg. Prohibetur quilibet actus intellectualis, modo certo aut tantum simpliciter probabili, immediate vel mediate contradicens veritatibus quæ sunt objectum fidei divinæ vel ecclesiasticæ. Nam 1<sup>o</sup> præceptum vi cuius homo tenetur assentire positivè veritatibus revelatis, aut ab Ecclesiâ infallibiliter definitis, à fortiori prohibet ne mens opponat iudicia prædictis veritatibus contradicentia. 2<sup>o</sup> Eliciendo actus divinæ

revelationi contradicentes, homo implicite negaret summam Dei veracitatem.

2<sup>a</sup> Reg. Quando præscribitur actus fidei, adimpleri debent omnes conditiones requisitæ ut actus in suâ naturâ constituatur. Alioquin actus positus non esset actus qualis præscribitur, et violaretur præceptum.

QUÆST. III<sup>a</sup>. *Quinam sint effectus regularum actus fidei?*

*Resp.* 1<sup>o</sup> Ex regulis actus fidei *immediate* sequitur obligatio actus intellectuales conformandi prædictis regulis.

2<sup>o</sup> Ex eis *mediate* sequuntur effectus sequentes :  
1. Per leges dogmaticas adunatur intelligentia humana intelligentiæ divinæ, adunantur inter se intelligentiæ humanæ. Leges proinde dogmaticæ sunt vinculum obligatorium quo religantur in unicâ societate intellectuali homines cum Deo, et homines inter se. 2. Ablatâ mentis humanæ independentiâ absolutâ, damnatâ cogitationum et opinionum effrenatâ licentiâ, contradictionum, errorum et schismatum fons per leges dogmaticas ocluditur.

---

### CAPUT III.

DE RELATIONIBUS ABSECTIS ACTUS FIDEI, SEU POTIUS ACTUS  
INTELLECTUALIS, CUM SUI REGULIS.

Ex dictis in *Cap. II* sequitur, non solum actum fidei propriè dictum, sed etiam in quodam sensu omnes actus intellectuales componendos esse juxta regulas actus fidei. Unde sub titulo præsentis tractandam est

de relationibus absolutis actûs intellectualis, et non simpliciter actûs fidei, cum suis regulis.

Ex istis relationibus deducuntur 1<sup>o</sup> actûs intellectualis proprietates morales, 2<sup>o</sup> proprietates relativæ ad meritum et ad finem.

## ARTICULUS I.

### De proprietatibus moralibus actûs intellectualis.

Sub respectu morali actus intellectualis potest esse indifferens, vel bonus, vel malus.

*Actus indifferens* est: actus qui nec conformis est cum regulâ fidei, nec ab illâ discrepat; aliis verbis, est actus qui non cadit sub regulis fidei.

*Bonitas* moralis actûs intellectualis consistit in conformitate et convenientiâ actûs intellectualis cum regulis fidei; *malitia* autem in discrepantiâ, seu difformitate ab istis regulis.

Bonitas aut malitia est *materialis* vel *formalis*, prout actus, bonus aut malus, respectivè ad regulam consideratur *materialiter*, id est, abstracto actu voluntatis libero, vel *formaliter*, seu in quantum voluntarius est et liber.

De moralitate formali agemus ubi *de Morali in genere*, et quidquid sub hoc titulo dicetur pariter conveniet actui intellectuali in quantum includit voluntarium liberum. Illum ergo solummodò consideramus quatenus est actus intelligentiæ, proindè de solâ moralitate materiali tractare intendimus.

QUEST. I<sup>a</sup>. *Utrum dentur actus intellectuales de se indifferentes; et quinam sint?*

Resp. Ad 1<sup>um</sup>: Dantur actus intellectuales de se in-

differentes, seu de quibus nihil statuunt regulæ fidei, v. g. actus merè scientifici.

Ad 2<sup>um</sup> : Indifferentes sunt actus de quibus nihil statuunt regulæ fidei.

QUÆST. II<sup>a</sup>. *Utrùm dentur actus intellectuales boni; et quinam sint?*

Resp. Ad 1<sup>um</sup> : Dantur actus intellectuales boni, dantur enim actus conformes regulis fidei.

Ad 2<sup>um</sup> : Sunt boni actus qui verè cum regulis congruunt.

QUÆST. III<sup>a</sup>. *Utrùm dentur actus intellectuales mali; et quinam sint?*

Resp. Ad 1<sup>um</sup> : Dantur actus intellectuales mali; adsunt enim actus regulis fidei contradicentes. Hoc aliundè sequentibus constabit.

Ad 2<sup>um</sup> : 1<sup>o</sup> Illicita est, quatenus immediatè opposita fidei, propositio *hæretica*.

Hæretica autem est propositio opposita veritati quam certò constat esse de fide.

Porro in genere sunt de fide : propositiones quæ immediatè continentur in verbo Dei, et ab Ecclesiâ propositæ fuerunt tanquàm de fide credendæ.

Prædictis conditionibus satisfaciunt, ac proindè sunt de fide :

1. Propositiones quæ clarè et expressè continentur in verbo Dei, seu in Scripturâ aut Traditione. (Veritas dicitur clarè contenta in Traditione, quandò de fide divinâ tenetur ab universâ Ecclesiâ ; v. g. septenarius Sacramentorum numerus.)

2. Propositiones quæ synonymis aut saltem æquivalentibus quoàd sensum terminis exprimunt alias pro-

positiones aliundè clarè et immediatè in verbo Dei contentas.

3. Propositiones quæ nihil aliud sunt quàm expositio, seu evolutio immediata *extensionis* alterius propositionis aliundè clarè revelatæ. Sic v. g. hæc propositio: *S. Matthæus accepit Spiritum S.* est de fide, quia immediatè exponit et evolvit extensionem subjecti hujus alterius propositionis: *Omnes Apostoli* (quorum unus erat S. Matthæus) *acceperunt Spiritum S.*, quæ est clarè revelata.

4. Propositiones quæ nihil aliud sunt quàm clara et immediata evolutio *comprehensionis* alterius propositionis aliundè clarè revelatæ. Sic v. g. hæc propositio (supposito quòd aliundè jam non sit positivè revelata): *Christus est æternus*, esset de fide, quia immediatè exponit comprehensionem attributi hujus alterius propositionis clarè revelatæ: *Christus est Deus*.

5. Propositiones quæ, licèt implicite et subobscurè contentæ in Scripturâ aut Traditione, clarè et explicitè definitæ fuerunt ab auctoritate ecclesiasticâ, cujus infallibilitas circa materiam definitam absque hæresi negari nequeat.

Prædictis conditionibus non satisfaciunt, ac proindè non sunt de fide divinâ catholicâ :

1. Conclusiones theologicæ propriè dictæ, deductæ ex duabus præmissis revelatis, antequàm ab Ecclesiâ definiantur. — Dicimus: *conclusiones propriè dictæ*; id est conclusiones quæ non sunt meræ expositiones propositionum immediatè revelatarum, in quibus tanquàm singulare in universali, vel minùs explicitum in magis explicito necessariò continentur; sed illæ quæ



ex præmissis, à quibus virtualiter saltem distinguuntur, per verum ac syllogisticum ratiocinium reipsà deducuntur. — Post definitionem Ecclesiæ istæ conclusiones sunt de fide divinā.

2. Non sunt de fide ante definitionem Ecclesiæ : conclusiones theologicæ deductæ ex duabus præmissis, quarum una est revelata, altera lumine naturali cognita. — Positā definitione Ecclesiæ, controvertitur, non quidem utrū veritas proposita sit credenda, sed utrū veritas esset de fide divinā. Quidquid sit de hac controversiā, nemini dubium est hanc veritatem de fide divinā credendam esse, si Ecclesia eam proponeret tanquā de fide divinā credendam.

2<sup>o</sup> Illicita est, propter *medialam* oppositionem cum fide divinā, *propositio erronea*.

Erronea autem est propositio opposita propositioni *mediatē* revelatæ et certæ in materiā fidei.

Porro *certa* est in materiā fidei, quælibet conclusio theologica deducta ex unā vel duabus præmissis revelatis. Quod triplici modo constare potest : 1. evidentiā, 2. concordi theologorum consensu, 3. definitione Ecclesiæ veritatem pro *certā* tenendam proponentis.

3<sup>o</sup> Illicita est, propter oppositionem *probabilem* cum fide divinā, quælibet propositio ab Ecclesiā sequentibus censuris notata : *hæresi proxima, sapiens hæresim, vel hæreseos suspecta*.

Propositio *hæresi proxima* est ea quam major et sanior theologorum pars judicat esse hæreticam, quatenus contradicit Scripturæ vel Traditioni, etsi tamen prædicti theologi non audeant eam absolutē pronuntiare hæreticam, quia aliqui graves theologi contendunt ipsi censuram hujusmodi inuri non debere.

*Not.* Duæ notæ sequentes spectant propositionem quæ propriè utriusque sensûs, catholici et heterodoxi, capax est.

Propositio dicitur *sapiens hæresim*, quandò, tum ratione ipsorum propositionis verborum, tum ratione circumstantiarum, probabile est eam involvere sensum hæreticum.

Dicitur *hæreseos suspecta*, quandò habitâ ratione verborum et circumstantiarum, sufficiens quidem præbetur fundamentum ad suspicionem et timorem aliquem *absque temeritate* de auctore concipiendum, non verò ad iudicandum probabiliter quòd auctor sit hæreticus.

4<sup>o</sup> Illicita est propter rationes superiùs enuntiatas, quælibet propositio ab Ecclesiâ notata sequentibus cén-  
suris: *proxima errori*, *sapiens errorem*, *suspecta de errore*. — De his tribus notis iudicandum est relativè ad propositionem erroneam, sicuti de tribus præcedentibus relativè ad propositionem hæreticam.

*Nota.* De propositione *malè sonante* et propositione *piarum aurium offensivâ* eodem ferè modo dicendum, quo de propositione *sapiente hæresim*, aut *suspectâ de hæresi*. Notæ *malè sonans* et *piarum aurium offensiva*, indicant tamen oppositionem paulò minùs probabilem cum veritate revelatâ, quàm notæ præcedentes.

Præcipuum autem discrimen inter notas de quibus nn. 3 et 4 locuti sumus et notas præsentis in eo jacet, quòd priores respiciant propositiones oppositas veritatibus dogmaticis, dùm notæ *malè sonans* et *piarum aurium offensiva* ordinariè inurantur propositionibus oppositis veritatibus moralibus.

5<sup>o</sup> Illicita est propositio *temeraria*. Dicitur autem

*temeraria* propositio quæ, nullâ sufficienti ratione nixa, pugnat contra receptam et communem sententiam Patrum, aut theologorum.

6<sup>o</sup> Illicita est, et includit in se malitiam hæreseos propriè dictæ, quælibet propositio opposita alicui revelationi privatæ certò cognitæ, emissa ab eo cui revelatio facta est. Dicimus: propositio emissa *ab eo cui revelatio facta est*. Etenim, si propositio contradictoria ab alio emitteretur, esset tantum plus minusve temeraria, pro valore testimoniorum per quæ transmissa fuit revelatio privata; nunquam verò hæretica esset, cum revelatio privata non contineatur in verbo Dei, seu in Scripturâ aut Traditione.

7<sup>o</sup> Illicita est quælibet propositio immediate aut mediate, modo certo vel probabili opposita alicui propositioni quæ, licet non contineatur in verbo Dei, infallibiliter definita fuit ab Ecclesiâ.

*Observ.* Propositiones ab Ecclesiâ damnatæ censuris superiùs expositis notantur, quandò considerantur sub respectu oppositionis cum veritate revelatâ. — Sequentes notæ propositionibus inuruntur, ratione oppositionis cum virtute aut præcepto speciali. Quamvis earum expositio directè non pertineat ad thesim nostram, hanc nihilominus non prætermittimus, ut completæ sint notiones de censuris theologicis.

Sub respectu superiùs enuntiato propositiones sunt: scandalosæ, schismaticæ, seditiosæ, blasphemæ, impiæ.

Propositio *scandalosa* dicitur, quæ dat occasionem ruinæ spiritualis, sive inclinando ad peccatum, sive avertendo à virtutum exercitio.

Propositio *schismatica* est ea quæ viam scissioni unitatis Ecclesiæ aperit. Proindè schismaticæ sunt: 1. propositiones quibus fideles ab obedientiâ superioribus ecclesiasticis debitâ, ac præcipuè R. Pontifici, totius unitatis centro, removentur; 2. propositiones quibus negaretur R. Pontificem esse caput Ecclesiæ et Christi vicarium, ipsi inesse potestatem leges ecclesiasticas ferendi; 3. propositiones quibus legitimis Pastoribus denegaretur obedientia, licèt absque ullâ exclusione auctoritatis ipsis à Christo concessæ.

Propositio schismatica dicitur *simpliciter schismatica*, quandò nullam includit hæresim; hujus generis sunt propositiones 3<sup>o</sup> loco relatæ. Aliæ 1<sup>o</sup> et 2<sup>o</sup> loco expositæ sunt *schismatico-hæreticæ*, quia et schisma promouent et hæresim continent.

Propositio *seditiosa* ea est quæ ab obedientiâ principibus civilibus debitâ removet, aut ad tumultus in republicâ excitandos conducit.

Propositio *blasphema* ea est quæ contra Deum, vel B. Virginem, aut Sanctos, aut res sacras injuriam continet, sive illis quasdam denegando perfectiones, sive illis indebitos tribuendo nævos, sive illis desiderando aut imprecando malum vel carentiam alicujus boni.

Propositio *impia* ea est quæ debitum Deo cultum, debita parentibus et consanguineis, superioribus ac benefactoribus honorem, obsequia gratitudinemque aufert aut imminuit.

Sub titulo *de Morali in genere* agetur de moralitate formali.

ARTICULUS II.

De proprietatibus relativis ad meritum et ad finem.

Cum proprietates relativæ ad meritum supponant moralitatem formalem, cum proprietates relativæ ad finem supponant meritum; de his etiam dicemus ubi de *Morali in genere*.

---

## H. DE DOGMATE IN SPECIE.

---

Si, juxta D. Thomam, *omnia pertractantur in sacra doctrinâ sub ratione Dei, vel quia sunt ipse Deus, vel quia habent ordinem ad Deum, ut ad principium et finem* (1); maximè sub ratione Dei pertractanda est ea pars theologiæ, quæ propriè versatur circa notionem Dei, quatenus Deus est objectum fidei.

Porro Deus considerari potest 1<sup>o</sup> *in se*, 2<sup>o</sup> *quoad proprietates*, 3<sup>o</sup> *quoad attributa*. — Item attributa divina examinari possunt 1. *in se*, seu *quoad existentiam*, 2. *in actu*.

Hic non agimus de Deo *in se* considerato, nec de proprietatibus et attributis divinis *in se*, de quibus alibi dictum est; sed tantum de divinis attributis consideratis *in actu*, seu *de Actibus divinis*.

Duplicis autem generis actus divini distinguuntur, scilicet actus *ad intra*, et actus *ad extra*.

### I. DE ACTIBUS DIVINIS AD INTRA,

525

### DE TRINITATE.

Hæc est summa dogmatis de Trinitate: *In Deo, Unitas substantiæ, Trinitas personarum*; aliis verbis: *In Deo*

(1) Sum. theol. 1 p. q. 1, art. 7.

*tres sunt personæ distinctæ, scilicet Pater, Filius, Spiritus Sanctus; personæ æquales sibi que consubstantiales.*

Dicimus 1<sup>o</sup> *personæ* : Persona autem in genere est *substantia rationalis, individua et sui juris*. — Substantia : quod existit in se, et substat proprietatibus ; — rationalis : ratione prædita ; — individua : singularis, particularis ; — sui juris : completa, à nullo alio terminata, et quæ sic conservat dominium et attributionem operationum et modificationum. Hoc caractere ens rationale constituitur persona (1).

Dicimus 2<sup>o</sup> *distinctæ* : seu, quarum una non est alia.

Dicimus 3<sup>o</sup> *æquales et consubstantiales* : id est, unam eandemque sibi communem habentes substantiam divinam identitate numericâ. Tres non sunt unum identitate solummodò specificâ, ità ut sint tres naturæ divinæ ; sed identitate numericâ, ità ut tribus personis una et tota communis sit natura divina (2).

Trinitatem personarum in Deo negant Judæi. — Errores, quibus apud Christianos impugnatum fuit sanctissimum Trinitatis mysterium, ad triplicem clas-

(1) Hoc verbum : *persona*, quale sic generaliter definitur, sensum habet incompletum et incomprehensibilem quandò de divinis prædicatur. Cùm quæritur, ait S. August. de Trin. l. 3, c. 8, *quid tres ? Magnâ prorsus inopiâ humanum laborat eloquium. Dicitum est tamen tres personæ, non ut illud diceretur, sed ne taceretur*. Illud SS. Patres contra Sabellium acceperunt, ad excludendum errorem hujus hæresiarchæ docentis Patrem, Filium et Spiritum S. vacua esse nomina, modos nudaque attributa unius substantiæ, unius monadis.

(2) Istæ voces : *substantia, essentia, natura divina*, sæpius ut synonymiæ usurpantur.

sem reduci possunt; præcipuos tantum indicabimus.

1. Circa trinitatem personarum errarunt, II sæculo Valentiniani et Cataphrygæ, III sæc. Sabelliani; quorum hæresim renovârunt sæc. XVI Sociniani, et nostris temporibus Rationalistæ. 2. Circa personam Filii errarunt Ariani. 3. Spiritus S. personam impugnarunt Macedoniani et Græci schismatici (1).

Circa Trinitatem agendum 1<sup>o</sup> de existentia, 2<sup>o</sup> de proprietatibus.

---

## CAPUT I.

### DE EXISTENTIA.

*Quæ. Utrum admittenda sit Trinitatis existentia?  
res. Utrum probari possit Trinitatis existentia?*

Ordinariè duplex adhibetur probationum genus, probatio per rationem, et probatio per auctoritatem. Utrum autem duplex illud probationum genus veritati de quâ nunc agitur applicari possit, sequentium questionum solutione constabit. Undè: 1<sup>o</sup> utrum Trinitatis existentia possit demonstrari per rationem, 2<sup>o</sup> utrum per auctoritatem?

### QUESTIO I.

*Utrum Trinitatis existentia possit demonstrari per rationem?  
res. Quid valeat ratio circa dogma Trinitatis?*

*Resp. Quatuor datæ sunt solutiones:*

(1) Cum in nostro seminario Lædonensi, sicut hodie in plerisque Seminariis, specialis existat cursus Historiæ ecclesiasticæ, longiorem errorum et hæreseon expositionem in nostrâ theologiâ ordinariè omittimus;



1<sup>a</sup>. Trinitas non existit, quia per rationem demonstratur ejus impossibilitas.

2<sup>a</sup>. Ratio propriis viribus potest assurgere ad notionem Trinitatis, illamque demonstrare.

3<sup>a</sup>. Posita notione Trinitatis præviè acceptatâ à revelatione, ratio naturalis potest propriis viribus demonstrare existentiam Trinitatis.

4<sup>a</sup>. Ratio sibi derelicta, nec impossibilitatem Trinitatis probare, nec ad hujus dogmatis notionem ac demonstrationem pervenire potest.

Falsæ sunt tres prædictæ solutiones. Ultimæ solutionis veritas constabit refutatione præcedentium.

1<sup>a</sup> *Solutio*. Trinitas non existit, quia per rationem demonstratur ejus impossibilitas.

*Refut.* Ad demonstrandum per rationem impossibilitatem hujus dogmatis, adversarii probare deberent Trinitatem contradicere unitati essentiali in Deo, aut repugnare summæ Dei perfectioni. Atqui neutrum probari potest.

Non prius : Adesset equidem contradictio, si Trinitas et Unitas affirmarentur de Deo sub eodem respectu considerato. Sed Trinitas affirmatur de personis, Unitas autem de essentiali.

Non posterius : Quin Trinitatis dogma repugnet infinitæ Dei perfectioni, è contra per Trinitatem optimè completa percipitur Dei perfectio. Siquidem, posito dogmate Trinitatis, admittenda est in Deo secunditas infinita, cum divinis facultatibus producantur actus substantiales, personales, infiniti; dum, in hypothesi contrariâ, actus divini nihil aliud essent quam meræ modificationes attributorum à quibus procedunt.

Ergo ratione demonstrari non potest impossibilitas Trinitatis.

2<sup>a</sup> *Solutio*. Ratio propriis viribus potest pervenire ad notionem et demonstrationem Trinitatis.

*Refut.* Falsitas hujus systematis probatur directè, indirectè.

*Prob. Directæ.*—*Prob. 1<sup>a</sup>*. Si ratio pervenire posset ad notionem Trinitatis, vel per argumentationem à priori, vel per argumentationem à posteriori. Atqui,

1<sup>o</sup> Non per argumentationem à priori: In hoc consistit ratioe inandi modus de quo agitur, scilicet, cognitio ratione essendi alicujus rei, concluditur existentia rei. Porro ex Asseitate (quæ est ratio essendi in Deo) rectè deducuntur perfectiones divinæ, v. g. æternitas, immutabilitas; minimè verò concludi potest Trinitas personarum in unica substantiâ divinâ. Nulla per rationem cognosci potest relatio inter Asseitatem et Trinitatem.

2<sup>o</sup> Non per argumentationem à posteriori: Juxta illum argumentandi modum, posito effectu, ratio spontè assurgit ad causam. Porro è mundi existentia, rectè concluditur in Deo esse Intelligentiam, Voluntatem, Sapientiam, etc.; minimè verò concludi potest in Uno Deo tres esse personas; hoc enim nullo modo requiritur in opere divino creationis.—Equidem in creaturis aspicitur unitas simul et triplicitas; sed 1. ista quædam trinitas in creaturis non est trinitas personalis; 2. Trinitas in Deo non est necessaria ut Deus creare possit entia trina simul et una.

*Prob. 2<sup>a</sup>*. Matth. 11, 27: *Nemo novit Filium nisi Pater, neque Patrem quis novit nisi Filius, et cui voluerit Filius revelare.* Joan. 1, 18: *Deum nemo vidit*

*unquam : unigenitus Filius qui est in sinu Patris , ipse enarravit. Ergo cognitio Trinitatis solâ divinâ revelatione haberi potest.*

*Prob. 3<sup>a</sup>. SS. PP. unanimi ore confitentur Trinitatem exsuperare captum intellectûs humani. Specialiter S. Athanasius ad istud Matth. : Nemo novit Filium nisi Pater.... sic Arianos insequitur : Quid igitur impii his de rebus, quas scrutari nefas est, effutire non uerentur : illi, inquam, qui et homines sunt, nec vel ipsam rerum terrestrium naturam possunt evolvere? Imò, quæ vel ipsos spectant, ipsi explicent nobis, nûm videlicet suam ipsorum naturam percipere queant. S. August. de symb. ad catech. c. 9, loquens de Trinitate : Ceterum, inquit, illud quod est ineffabile, incomprehensibile est, nec verbis Angelicis explicari potest, quantò magis humanis? Et l. 1<sup>o</sup> de Trin. c. 16, n. 9 : Quis disputandi modus, quænam tandem vis intelligendi atque potentia, quæ vivacitas rationis, quæ acies cogitationis ostendet.... quomodò sit Trinitas? Similia docent SS. Ambrosius, l. 1 de fide ad Gratian.; Hilarius, de Trin. l. 2, n. 9; Fulgentius, l. 2 ad Trasimund. c. 1; Bernardus, de consid. l. 3, c. 8, etc.*

*Prob. Indirecta. Falsa est adversariorum opinio, si nullius sint momenti argumenta quibus nititur. Porro res ita est.*

*Objiciunt : 1<sup>o</sup> Plato cognovit Trinitatem. Ergo ratio humana potest propriis viribus pervenire ad notionem Trinitatis.*

*R. ad Ant. Plato cognovit Trinitatem :*

*1<sup>o</sup> Valor hujus assertionis est maximè dubius (1).*

(1) « On n'a commencé à attribuer une Trinité à Platon qu'au

2<sup>o</sup> Qui Trinitatem in operibus Platonis detegere conantur non concordant de terminis hujus Trinitatis (1).

3<sup>o</sup> Etiam admissa Trinitate Platonica, ista Trinitas essentialiter differt à Trinitate Christiana. — Hæc est, juxta opinionem probabiliorem, Trinitas Platonica : 1<sup>re</sup> terminus, *Summus Deus* (Pater), 2<sup>re</sup> term. *Logos* (Verbum), 3<sup>re</sup> term. *Anima mundi*. Porro tres termini hujus triadis essentialiter differunt à terminis Trinitatis christianæ. Siquidem 1. tres termini prædicti communem non habent substantiam identitate numericâ ; non sunt æquales. 2. Juxta Platonem, materia est necessaria, et Deo cœterna ; proindè Deus supremus non est infinitus. 3. Per Verbum (*logos*), Plato designat ideas divinas. Idæ, juxta quosdam philosophi græci interpretes, sunt realitates distinctæ, indépendentes ab intelligentiâ divinâ. Juxta alios, idæ sunt mære modificationes intelligentiæ divinæ. Porro, quidquid sit de hac controversiâ, *Logos* Platicum non est per-

second siècle de l'ère chrétienne, cinq cents ans environ après Platon. L'antiquité tout entière garde le silence sur cette prétendue Trinité. Le juif Philon est le premier qui ait commencé à l'attribuer au philosophe grec. » M. Jules Simon, *Histoire de l'école d'Alexandrie*, t. I, p. 317.

(1) Ainsi, au deuxième siècle, Alcinoüs voit dans Platon une sorte de Trinité dont les trois personnes sont : 1. l'Intelligence suprême, cause du monde ; 2. l'Intelligence de l'âme, ordonnatrice du monde ; 3. l'Âme du monde elle-même. Mais Alcinoüs considère-t-il ces trois personnes comme un seul Dieu ? C'est fort douteux. — Au commencement du troisième siècle, Numénius d'Apamée distinguait trois personnes divines : 1. le Père du monde, c'est-à-dire le premier principe, l'unité, le souverain bien ; 2. l'Auteur du monde ; 3. enfin le Monde lui-même. Mais, selon Proclus, Numénius considèrait ces trois personnes comme trois dieux. » M. Maret, *Théodicée*, page 234.

sona, neque infinitum ; imò non procedit à Deo Supremo, saltem juxta priores interpretes. Ergo essentialiter differt à Verbo, secundà personà SS. Trinitatis. 4. *Anima mundi* non est persona ; non est infinita, cùm sit creata.

Etiam dato *anteced.* Neg. *conseq.* Certum est enim Platonem, more antiquorum philosophorum, longinquas suscepisse peregrinationes, invisisse Aegyptios, qui relationes cum Hæbreis habuerant. Nihil proinde mirum Platonem, saltem si quamdam habuerit, accepisse notionem Trinitatis ex veritatibus per traditionem transmissis.

*Objic.* 2º Philosophi Alexandrini cognoverunt Trinitatem. Hanc notionem habuerunt per rationem solam. Ergo.

*Ad maj. R.* Alexandrini cognoverunt quamdam triadem. *Conced.* Cognoverunt Trinitatem Christianam. *Neg.* Siquidem Trinitas Plotiniana, omnium magis completa, essentialiter differt à Trinitate Christiana. — Hæc est enim Trinitas Plotiniana. Ex Uno (*to en*) primo terminò, infinito, procedit per emanationem mens (*nous, logos*), ex quà eodem modo procedit Anima (*psuchè*). Secundus terminus (*mens*) est minus perfectus quàm primus (*to en*) ; magis verò perfectus quàm tertius (*psuchè*). Undè tres termini non sunt æquales : primus solus est infinitus ; secundus (*mens*) non procedit ab Uno per modum generationis ; tertius (*anima*) non procedit simul ab Uno et mente. Ergo.

*Ad min. R. Neg.* Plotinus enim vivebat tertio post Christum sæculo, Alexandriæ, ubi tunc doctrinam catholicam profitebantur eminentissimi Christianorum philosophi. Hanc proinde doctrinam potuit cognoscere, imò necessario cognovit.

*Objic.* 3<sup>o</sup> In operibus Mercurii Trismegysti mentio est de Trinitate, eam Mercurius per solam rationem cognoscere potuit. Ergo.

*Ad maj. R. dist.* Mentio est de quâdam triade, hoc fieri potest. Mentio est de Trinitate Christianâ, *neg.* propositum quatenus plus æquo affirmativum. Siquidem verba laudata Mercurii: *Monas genuit monadem, et in se suum reflexit ardorem*, sunt ambigua, obscura, et minimè exprimunt dogma catholicum de Trinitate.

*Ad min. R. neg.* Siquidem, judicio doctissimorum, specialiter Petavii, de Trin. lib. 1, cap. 2, opus Mercurii, cui tanta vetustas adscribitur, est supposititium; et probabilissimè fuit elucubratum paulò post Apostolorum tempora, vel à Christiano, vel à Neo-platonico.

*Objic.* 4<sup>o</sup> In libris sybillinis mentio est de Trinitate. Ergo.

*Ad maj. R. dist.* Mentio est de quâdam Trinitate, transeat. Mentio est de Trinitate christianâ. *Neg.*

*Ad min. R. neg.* Siquidem, juxta plurimos eruditos, ista carmina sybillina non majoris sunt ætatis et auctoritatis quàm opus præcitatum Trismegysti. Vera carmina sybillina, de quibus loquuntur veteres, incendio perièrunt, et posteriora, è quibus desumitur objectio, circa initium secundi sæculi à christiano scripta, aut saltem interpolata fuère.

*Objic.* 5<sup>o</sup> SS. PP. per analogias ex ordine naturali sumptas, pervenerunt ad notionem Trinitatis. Ergo.

*Resp.* 1. SS. PP. jam cognoscebant ex divinâ revelatione dogma Trinitatis, quando de illo ratiocinabantur per analogias in ordine naturali sumptas.

2. SS. PP. non intendebant istis analogiis mysterium clarè demonstrare, sed ejus solummodò ostendere possibilitatem. *Si quid verò nos*, ait S. Hilarius, l. 1 de Triā. n. 19, *de naturā Dei tractantes comparationum exempla afferamus, nemo ea existimet absolutæ in se rationis perfectionem continere; comparatio enim terrenorum ad Deum nulla est... Omnis igitur comparatio homini potius utilis habeatur, quàm Deo apta*. 3. Aliundè ratio non potest ex istis analogiis concludere dogma Trinitatis. Omnes enim reducuntur ad istud principium: « in plerisque creaturis est unitas et triplicitas; » porro ex isto principio minimè deducitur: « in Deo una est essentia et trinitas personarum. »

*Objic.* 6<sup>o</sup> Dogma Trinitatis cognosci et probari potest per ratiocinium sequens: Deus est infinitus, proindè persona infinita, proindè in Deo sunt intelligentia et voluntas infinitæ; proindè ex intelligentiā et voluntate procedunt termini infiniti, proindè personales. Ergo.

*Resp.* Deus est infinitus, persona infinita, in Deo sunt intelligentia et voluntas è quibus procedunt actus infiniti; *conced.* È quibus procedunt personæ consubstantiales, *neg.* Ad istam conclusionem ratio sola pervenire non valet.

3<sup>a</sup> *Solutio.* Positā notione Trinitatis præviè acceptatā à revelatione, ratio naturalis potest propriis viribus demonstrare existentiam Trinitatis.

*Resp.* Licèt à revelatione teneamus in Deo tres esse personas, unam eandemque communem sibi habentes substantiam divinam; attamen ratio humana hanc veritatem comprehendere, proindè illam sibi demonstrare non potest.

Ergo ratio naturalis, neque Trinitatis impossibilitatem probare, neque ad hujus dogmatis notionem et demonstrationem propriis viribus pervenire potest.

## QUÆSTIO II.

Utrum SS. Trinitatis existentia probari possit per auctoritatem?

Sola auctoritas, de quâ nunc agi possit, est testimonium divinum, seu revelatio. Unde quæstio proposita æquivaleret sequenti: *utrum Trinitatis existentia probari possit per revelationem?*

Porro revelatio continetur: 1° adulterata in traditionibus paganorum; 2° in scripturâ et traditione judaicâ; 3° in scripturâ et traditione christianâ, in fide et decisionibus Ecclesiæ. Unde triplex quæstio: 1° utrum dogma Trinitatis possit probari traditionibus paganorum; 2° utrum... scripturâ et traditione judaicâ; 3° utrum... scripturâ et traditione christianâ, fide et decisionibus Ecclesiæ catholicæ?

§ I. — *Utrum dogma Trinitatis probari possit traditionibus paganorum?*

*Resp.* Equidem in traditionibus omnium ferè populorum quædam continentur obscuræ notiones de Trinitate; in nullâ verò mentio est de Trinitate christianâ.

§ II. — *Utrum dogma Trinitatis probari possit scripturâ et traditione judaicâ?*

*Resp.* Quoad *Unitatem essentiæ* in Deo, omnium consensu, hoc dogma expressè et clarè continetur in scripturâ et traditione judaicâ. Imò hoc dogma est præcipuum Religionis mosaicæ.



Quoad trinitatem personarum, sequentes emitti possunt propositiones : 1<sup>o</sup> Si agatur de *scripturâ* V. T., 1. quidam textus indicare videntur plures esse in Deo; 2. in aliis textibus mentio est de Patre et Filio; 3. in aliis apparet quædam mentio de Spiritu S.; 4. alibi numerus trium personarum insinuari videtur. — 2<sup>o</sup> Si agatur de *traditione* judaica, 1. valdè probabile est quendam Trinitatis revelationem concessam fuisse Patriarchis, Prophetis et justis V. T.; 2. probabile est etiam subobscuram de illo dogmate traditionem viguisse inter Doctos et Legisperitos; 3. certum est nullam, vel omninò imperfectam apud vulgum Judæorum exstitisse Trinitatis cognitionem.

Quæ propositiones seorsim probandæ.

#### I. De Scripturâ V. T.

1<sup>a</sup> Ppo. — Quidam textus indicare videntur plures esse in Deo:

Gen. 1, 1 : *In principio creavit Deus* (hebr. Elohim, in plurali sumptum, Dii) *cælum et terram*. Verbum *creavit* indicat unitatem substantiæ; subjectum *Elohim* in plurali, designat pluralitatem personarum; personarum divinarum, cum appellentur Dii (*Elohim*), cum aliunde peragant opus divinum, *creavit*.

Gen. 1, 26 : *Faciamus hominem ad imaginem et similitudinem nostram*. De quo Theodoretus, q. 19 in Genes. « Subjungens illud : *faciamus*, expressit numerum personarum. Similiter, eum iterum singulari numero dixit : *imaginem*, eandem esse naturam ostendit : » Idem, ante Theodoretum, observaverat Tertullian. contra Prax. c. 11.

Gen. 3, 22: *Ecce Adam quasi unus ex nobis factus est. Deus dicit: Adam quasi unus ex nobis...*, quod supponit in Deo plures esse personas.

Gen. 11, 7: *Venite igitur, descendamus et confundamus ibi linguam eorum.* Exidenter in hoc textu de pluribus personis agitur. Istæ personæ sunt divinæ, siquidem ex contextu patet Deum descendisse et confudisse linguas.

2<sup>a</sup> Ppo.—In aliis textibus mentio est de Patre et Filio:

Ps. 2, 17: *Dominus dixit ad me: Filius meus es tu, Ego hodiè genui te.* Ps. 109, 1: *Dixit Dominus Domino meo: Sede à dextris meis... Ex utero ante luciferum genui te.* Prov. 8, 22: *Dominus possedit me in initio viarum suarum... Nondùm erant abyssi, et ego jam concepta eram.* Undè sic: Deus, Dominus (Jehovah) habet Filium genitum, *Filius meus...*, *genui te...*, *possedit me.* (Ultimum hoc verbum *possedit* idem sonat quod *genuit*; Eva post partum Cœn dixerat: *possedi hominem.* Gen. 4, 1.)

3<sup>a</sup> Ppo.—In aliis textibus apparet quædam mentio de Spiritu S.

Ps. 32, 6: *Verbum Domini cœli firmati sunt, et Spiritus oris ejus omnis virtus eorum.* Ps. 103, 30: *Emittes Spiritum tuum, et creabuntur, et renovabis faciem terræ.* Spiritui S. singulari quâdam ratione attribuitur perfectio divinorum operum.

Isai. 48, 16: *Et nunc Dominus misit me, et Spiritus ejus.* Spiritus distinguitur à Domino per cepulam et, proindè Spiritus est persona distincta.

4<sup>a</sup> Ppo.—Alibi numerus trium personarum insinuari videtur.

Gen. 18, 1 : *Apparuit autem ei Dominus (Jehovah) in convalle Mambre... Cùmque elevasset oculos apparuerunt ei tres viri... Quos, cùm vidisset, cucurrit... et adoravit in terram. Et dixit: Domine, si inveni gratiam in oculis tuis, ne transeas servum tuum. De quo plures SS. Patres specialiter SS. Ambrosius, l. 1 de Caïn et Abel, Augustinus, de Trin. l. 2, etc., docent Abrahamum, cùm tres vidit et unum adoravit Trinitatis figuram conspexisse. (Unus Deus, Dominus, Domine si inveni gratiam in oculis tuis; tres personæ: quas tres viri figurabant.)*

Isaï. 6 : *Sanctus, Sanctus, Sanctus, Dominus Deus noster.* Hunc locum Patres ferè omnes contra hæreticos proferunt. Atributum *Sanctus* ter repetitum indicare videtur tres personas—unitatem verò substantiæ designat *Dominus* numero singulari.)

Similiter mysterium indicari videtur hoc versu Ps. 67 : *Benedicat nos Deus Deus noster, benedicat nos Deus.*

## II. De Traditione judaica.

1<sup>a</sup> Ppo. — Valdè probabile est quamdam Trinitatis revelationem concessam fuisse Patriarchis, Prophetis et Justis V. T.

Hoc suadent, tùm luminis copia, tùm aliorum mysteriorum prænotitia illis divinitus data; tùm testimonia SS. Patrum, inter quos SS. Cyrillus Alex. l. 1 contra Julian., Ambrosius, l. 1 de Caïn et Abel, c. 8; Augustinus, l. 2 de Trin. c. 11, hanc notitiam Abrahamo vindicant; Epiphanius verò, l. 1 adv. hæres. hæ. 8, in genere affirmat : *Una Trinitas semper in illâ singulari Divinitate nuntiata, creditaque ab illis est, qui*

*cæleris antecellerent, cujusmodi Prophetæ, atque eximîâ sanctitate præditi homines fuere* (1).

2<sup>a</sup> Ppo.—Probabile est subobscuram de illo dogmate traditionem viguisse inter Doctos et Legisperitos, saltem multos : constat tùm eorum solertiâ et studio in perscrutandis Scripturis; tùm pluribus Rabbînorum celebrium testimoniis (2).

3<sup>a</sup> Ppo. — Certum est nullam, vel omninò imperfectam apud vulgum Judæorum exstitisse cognitionem Trinitatis : quod probatur, tùm constanti errore Judæorum modernorum circa hoc mysterium, tùm doctrinâ Patrum et theologorum. Rationem affert Theodoretus,

(1) Vid. fusiùs Tournely, *de Trin.* quæst. 1, art. 2.

(2) Præter Tournely, supr. cit.; Witasse, *de Trin.* q. 1, art. 2, sect. 2; Galatin. l. 2 *de arcan. cath. verit.* c. 9; vid. D. Drach, *de l'harmonie entre la Synagogue et l'Eglise*. Inter plurima Rabbînorum testimonia, quæ in illo opere referuntur, sequentia seligimus : « Le Zohar sur le livre des Nombres, fol. 77, col. 307 : *Il a dit en outre : Il y a deux auxquels s'unit un, et ils sont trois; et étant trois ils ne sont qu'un. Il nous dit : Ces deux sont les deux Jéhovah du verset Ecoute, ô Israël... Elohénu vient s'y joindre. Et c'est là le cachet du sceau de Dieu: VÉRITÉ. Et comme ils sont joints ensemble, ils sont un dans l'unité unique.* » T. 1 op. cit. pag. 314 : « Le système cabalistique du Sépher-Yetzira (livre de la création), que les rabbins attribuent au patriarche Abraham, est entièrement basé sur le dogme de la Trinité... V. texte du Sépher-Yetzira, chap. 1, mischna 9 : *Les dix numérations de l'Infini sont une même chose, l'Esprit de Dieu : la Voix, l'Esprit, le Verbe. Et ceci est l'Esprit de Dieu.* » Commentaire de R. Aaron-le-Grand, chef de l'académie de Babylone : « La Voix, ainsi qu'il est écrit, c'est la Voix du Dieu vivant (Deuter. v. 23). L'Esprit, celui qui est nommé dans ce verset : *Toute l'armée céleste fut faite par l'esprit de sa bouche* (Ps. 53, 6). Le Verbe, ainsi qu'il est dit, *les cieux furent faits par le Verbe de Jéhovah* (ibid). La Voix ne peut jamais se trouver séparée de l'Esprit et du Verbe. » T. 1, pag. 438 et seq.

lib. de curat. græc. affect. serm. 2: *Cum in Ægypto, inquit, diutissimè versati essent Judæi, multorumque ibi deorum cultum ritu ægyptiaco didicissent, sapientissimus Deus nequaquàm illis manifestè omnia Trinitatis mysteria tradidit, ne eà cognitione multitudinis deorum occasionem sumerent, ad impietatem Ægyptiorum propendentes.* Idem docet S. Chrysostomus, homil. de incomprehens. Dei nat.

§ III.—*Utrùm existentia Trinitatis probari possit Scripturâ N. T., Traditione christianâ, fide et decisionibus Ecclesiæ.*

#### I. De Scripturâ N. T.

*Præmittenda.* Dogma Trinitatis sequentes includit propositiones: 1. In Deo, Pater, persona divina. 2. In Deo, Filius, persona divina à Patre distincta. 3. In Deo, Spiritus S., persona divina à Patre et Filio distincta. 4. Tres prædictæ personæ unicam et communem habent substantiam; seu tres sunt Unus Deus. — Undè quatuor probandæ essent propositiones. Ultimæ tamen probationem omittimus, quia 1. trium præcedentium probatione constabit tres personas unicam et communem habere substantiam; quia 2. ex omnium consensu Unitas essentialis divinæ sat clarè et expressè declaratur in N. T. — Proindè ad probandum per Scripturam N. T. dogma Trinitatis, requiritur ut ex ejus textibus deduci possit *existentia trium realitatum, quæ sint distinctæ, divinæ, personales.* Quibus positis,

Adsunt textus *generales*, seu quibus probantur tres propositiones prædictæ summatis sumptæ; adsunt et *speciales*, seu quibus unaquæque propositio seorsim probatur.

1<sup>o</sup> Textus generales.

Matth. 28, 19: *Euntes ergo, docete omnes gentes, baptizantes eos in nomine Patris, et Filii, et Spiritus Sancti.* In hoc textu affirmantur—tres realitates: *Patris, et Filii, et Spiritus Sancti.*—Realitates distinctæ: quælibet seorsim nominatur, et ab aliis distinguitur per copulam *et.*—Realitates divinæ: Et primò, Pater est persona divina, fatentur omnes. Ergo et Filius, et Spiritus S.; siquidem eorum nomine, sicut in nomine *Patris*, conferendus est Baptismus proindè remittendum est peccatum originale, porro Deus solus potest remittere peccata. —Realitates personales: Ex textu sequitur Patrem et Filium et Spiritum S. habere et conferre jura, proindè exercere actus rationales et proprios; atqui solummodò ad personam possunt competere jura, facultas jura concedendi, actus rationales et proprii, seu actus quorum agens dominium attributionemque conservet.

Joan. 14, 16: *Ergo rogabo Patrem, et alium Paracletum dabit vobis, Spiritum veritatis.* Ibid. 15, 26: *Cùm venerit Paracletus quem ego mittam vobis à Patre, Spiritum veritatis, qui à Patre procedit, ille testimonium perhibebit de me.* In his textibus affirmantur:—tres realitates: *Ego, Patrem, Paracletum.*—Realitates distinctæ: quælibet singillatim nominatur. Aliundè cuiuslibet attribuuntur operationes distinctæ. —Realitates divinæ: Pater, omnium consensu, est Deus. Ergo et Filius; siquidem eadem semper est natura patris et filii. Ergo et Spiritus S.; siquidem *à Patre procedit*, seu producit à Patre per communicationem totalem subs-

tantiae. — Realitates *personales*: Unicuique enim attribuuntur in textu actus rationales et proprii. Actus rationales: Pater dat Paracletum; Filius rogat, mittit Paracletum; Spiritus perhibet testimonium. Actus proprii: actus enim à quolibet subjecto perficiuntur et ipsi attribuuntur.

I Joan. 8, 7: *Tres sunt qui testimonium dant in cælo, Pater, Verbum, et Spiritus Sanctus; et hi tres unum sunt* (1). In hoc textu affirmantur — *tres realita-*

(1) Licet præfatus versiculus S. Joannis desideretur in pluribus sacrorum Bibliorum exemplaribus, attamen immerito eum tanquam supposititium rejiciunt recentiores biblici cum socinianis ac rationalistis. Siquidem, ait P. Perrone, tract. *de SS. Trinâ*. c. 2, « certum est ea (verba) reperiri in antiquissimâ versione Vulgata, » ut neque adversarii diffitentur; hæc citasse Patres Africanos, » quædringentos nempè episcopos sæc. Ecclesiæ V, in disputatione » cum Vandalis arianis sub Hunnerico habitâ; ea allegasse Patres » antiquissimos, Eucherium, Phæbadium, utrumque Idacium, præter » Tertullianum et Cyprianum, qui apertè saltem ad ipsa alludunt, » ut omittamus posteriores Patres; certum pariter est in antiquis- » simis codicibus græcis ea reperta fuisse, ut patet ex recensione » Hieronymiana, quam exhibet vetustissimus codex Boeticus, qui » exaratus est ex ipsis membranis quas ex dictatu sancti Hieronymi » exceperunt notarii ad eum missi à Lucio Boetico. Porro sanctus » Hieronymus professus est se ex mandato Damasi R. P. Novum » Testamentum græcæ fidei reddidisse; argumento igitur inelucta- » bili est olim in græcis codicibus palæstinensibus quibus S. Doc- » tor usus hunc versiculum exstitisse. Idem dic de complexio- » nibus Aurelij Cassiodori, qui eas confecit juxta præstantiores » codices græcos, quos præ manibus habebat. Proinde cum repe- » riatur cemma istud in Vulgata, quæ antiquissima est, utpotè ævo » apostolico confecta, quæque omnibus codicibus græcis qui super- » sunt est anterior, juxta criticæ regulas est retinendum, atque » catholicæ doctrinæ est ineluctabile argumentum. » Vid. fusiùs Tournely, *de Trin.* q. 4, art. 1, prob. 1, quart. argum.; Wirceburg. tract. *de Deo uno et trino*, disp. 5, cap. 2, quæres post art. 3; *Theolog. curs. compl.* tom. 8, col. 113 et seq., etc., etc.

tes: *Pater, Verbum, Spiritus S.*—Realitates *distinctæ*: Quælibet singillatim prædicatur. — Realitates *divinæ*: Omnium consensu Pater est Deus; ergo et Filius, et Spiritus S., siquidem *unum sunt*, proindè eandem habent essentiam.— Realitates *personales*: Cuilibet enim attribuitur actus rationalis et proprius: *Tres sunt qui testimonium dant....*

2<sup>o</sup> Textus speciales.

1<sup>a</sup> Ppo. In Deo, PATER, persona divina. Ab omnibus admittitur.

2<sup>a</sup> Ppo.—In Deo, FILIUS, persona divina à Patre distincta.

Joan. 1, 1: *In principio erat Verbum, et Verbum erat apud Deum et Deus erat Verbum... Omnia per ipsum facta sunt, et sine ipso factum est nihil.* Joan. 1, 18: *Deum nemo vidit unquam, Unigenitus Filius, qui est in sinu Patris, ipse enarrabit.* Joan. 3, 16: *Sic Deus dilexit mundum, ut Filium suum Unigenitum daret.* Marc. 14, 61: *Rursum summus sacerdos interrogabat eum et dixit ei: Tu es Christus Filius Dei benedicti? Jesus autem dixit illi: Ego sum... Quid adhuc desideramus testes? Audistis blasphemiam... Qui omnes condemnaverunt eum esse dignum mortis.* Rom. 9, 5: *Ex quibus est Christus secundum carnem, qui est super omnia Deus benedictus in sæcula.* Philip. 2, 6: *Qui cum in formâ Dei esset, non rapinam arbitratus est esse se æqualem Deo, sed semetipsum exinanivit formam servi accipiens, in similitudinem hominum factus, et habitu inventus ut homo.* Joan. 10, 30: *Ego et Pater unum sumus.* Joan. 3, 23: *Ut omnes honorificent Fi-*



*lium, sicut et honorificant Patrem : qui non honorificat Filium, non honorificat Patrem qui misit illum. Apoc. 1, 8: Ego sum... principium et finis, dicit Dominus qui est, qui erat et qui venturus est omnipotens. Col. 2, 3: In quo sunt omnes thesauri sapientiæ et intellectus. Col. 1, 16: Omnia per ipsum et in ipso creata sunt. Joan. 11, 25: Dixit ei Jesus: Ego sum resurrectio et vita; qui credit in me, etiamsi mortuus fuerit, vivet; et omnis qui vivit et credit in me non morietur in æternum.*

Undè sic : In Deo,

*Filius: Unigenitus qui est in sinu Patris... Filium suum Unigenitum. Summo sacerdoti eum interroganti: Tu es Christus, Filius Dei benedicti? Jesus respondit: Ego sum.*

*Filius, PERSONA: 1. Pater est persona, proindè Filius. 2. Filio attribuuntur actus rationales et proprii. Actus rationales: Filius... ipse enarrabit. Respondet summo sacerdoti: Arbitratus est esse se æqualem Deo. Actus proprii: siquidem ab ipso producuntur et de ipso prædicantur.*

*Filius, persona DIVINA: 1. Filius est à Patre genitus, proindè ipse Deus. 2. Appellatur Deus: Super omnia Deus benedictus in sæcula. 3. Possidet naturam divinam: Et Deus erat Verbum... Cum in formâ (natura) Dei esset... esse se æqualem Deo... Ego et Pater unum sumus. 4. Filio attribuuntur honores divini: Ut omnes honorificent Filium, sicut et honorificant Patrem. Filio attribuuntur perfectiones divinæ; v. g. æternitas: Qui est, qui erat, qui venturus est; omnipotentia: Qui venturus est omnipotens; omniscientia: in quo sunt*

*omnes thesauri sapientiæ et intellectûs. Filio attribuantur opera divina ; v. g. creatio : Omnia per ipsum facta sunt, et sine ipso factum est nihil... Omnia per ipsum et in ipso creata sunt ; miraculorum effectio : Ego sum resurrectio et vita.*

Filius , persona divina à PATRE DISTINCTA : 1. Filius necessariò distinguitur à Patre. 2. Distinctio Filii et Patris clarè et explicitè patet ex textibus: *Sic Deus dilexit mundum ut Filium suum... Filius qui est in sinu Patris, ipse enarrabit... Ut honorificent Filium , sicut honorificent Patrem. Ergo.*

3<sup>a</sup> Ppo.—In Deo, SPIRITUS S., persona divina à Patre et Filio distincta.

Joan. 14, 23 : *Paracletus autem Spiritus Sanctus, quem mittet Pater in nomine meo, illè vos docebit omnia et suggeret vobis omnia quæcumque dixerò vobis.* Act. 5, 3 : *Anania, cur tentavit Satanàs cor tuum mentiri te Spiritui Sancto? Non es mentitus hominibus sed Deo.* I Cor. 6, 19 : *An nescitis quoniam membra vestra templum sunt Spiritûs Sancti qui in vobis est?* I Cor. 12, 6 : *Et divisiones operationum sunt : idem verò Deus qui operatur omnia in omnibus. Unicuique autem datur manifestatio Spiritus ad utilitatem... Hæc autem omnia operatur unus atque idem Spiritus dividens singulis, prout vult.* I Cor. 6, 11 : *Abluti estis, sanctificati estis, justificati estis in nomine Domini nostri Jesu Christi et in Spiritu Dei nostri.* I Cor. 2, 10 : *Nobis revelavit Deus per Spiritum suum. Spiritus enim omnia scrutatur etiam profunda Dei.* Matth. 12, 28 : *Ego in Spiritu Dei ejicio dæmones.*

Undè sic: In Deo

SPIRITUS S. : patet ex quolibet textu.

SPIRITUS, PERSONA: Siquidem 1. in textibus Spiritui S. attribuuntur actus rationales et proprii. Actus rationales: *Ille vos docebit omnia... dividens singulis prout vult*. Actus proprii: siquidem isti actus ab Ipso produciuntur et ipsi attribuuntur. 2. Ananias redarguitur à S. Petro eo quòd mentitus sit Spiritui Sancto. Membra nostra, juxta Apostolum, sunt templum Spiritus Sancti. Porro hæc omnia de personâ solâ, non verò de merâ facultate affirmari possunt.

SPIRITUS, PERSONA DIVINA: Siquidem 1. appellatur Deus: *non es mentitus hominibus, sed Deo*. Juxta D. Paulum, *Deus... operatur omnia in omnibus*. Et infra, distributio gratiarum attribuitur Spiritui S. *Hæc autem omnia operatur unus atque idem Spiritus*. Ergo Spiritus S. est Deus; alioquin falsò affirmaretur Deum operari omnia in omnibus. Christus ait: *In Spiritu Dei ejicio dæmones*; porro Spiritus eandem naturam habere debet, quàm ens cujus Spiritus est. 2. Spiritus eodem ordine nominatur quo Filius, porro Filius est Deus: *Justificati estis in nomine D. N. Jesu Christi, et in Spiritu Dei nostri*. 3. Spiritui S. attribuuntur perfectiones divinæ, v. g. omniscientia: *omnia scrutatur, etiam profunda Dei*. Ipsi attribuuntur operationes divinæ, v. g. miraculorum efficientia: *in Spiritu Dei ejicio dæmones*; peccatorum remissio, et regeneratio: I Cor. 6, 11: *Abluti estis, sanctificati estis...*; collatio donorum: I Cor. 12, 4: *Et divisiones operationum sunt*. In aliis locis Spiritui S. attribuuntur inspiratio prophetarum, I Petr. 1, 11; sanctificatio, II Thess. 2, 12, et

I Petr. 1, 2; diffusio charitatis, Rom. 5, 5; resurrectio mortuorum, Rom. 8, 11; regimen Ecclesiæ, Act. 13, 2: quæ omnia sunt opera divina.

Spiritus, persona divina A PATRE ET FILIO DISTINCTA: Distincta à Patre: *Spiritus, quem mittet Pater*. Distincta à Filio: *Abluti estis... in nomine D. N. Jesu Christi, et in Spiritu Dei nostri*. Filius ipse dicit: *In Spiritu Dei ejicio dæmones. Spiritus, quem mittet Pater in nomine meo*.

## II. De Traditione christlanâ.

Cùm adversarii admittant dogma Trinitatis apud Christianos viguisse post Concilium Nicænum, id est IV<sup>o</sup> sæculo, sufficiat exponere traditionem præcedentium temporum.

Porro ista traditio constat 1. professionibus fidei, 2. confessionibus martyrum, 3. testimoniis Patrum, 4. factis, quorum alia directè, alia indirectè probant fidem primorum sæculorum.

### I. Professionibus fidei.

1<sup>o</sup> Symbolo Apostolico, quod, juxta eruditos, vim ob tenuit à primævis temporibus: *Credo in Deum Patrem... et in Jesum Christum Filium ejus unicum... Credo in Spiritum Sanctum*.

2<sup>o</sup> Fidei professione editâ à Patribus Alexandrinis, in epistolâ ad Paulum Samosatenum, in quâ, exposito fidei dogmate de Filii divinitate ac de Trinitate, testantur, itâ et prædicâsse SS. Patres, et sibi confitendum profitendumque tradidisse.

3<sup>o</sup> Professione S. Gregorii Thaumaturgi: *Unus Dominus, solus ex solo, Deus ex Deo... Filius verus veri*

*patris... Unus Spiritus Sanctus... imago Filii perfecti perfecta... Trinitas perfecta, quæ gloriâ, æternitate ac regno nec divisa est, nec alienata.*

## *II. Confessionibus martyrum.*

1° In actis martyrum Lugdunensium, qui passi sunt sub Marco Aurelio, anno 161 legitur S. Epipodius hæc verba coram præside protulisse: *Christum cum Patre ac Spiritu Sancto esse Deum confiteor.*

2° S. Polycarpus, qui, ut ait S. Irenæus, « non solum ab Apostolis edoctus (fuerat) et conversatus cum multis ex eis qui Dominum viderunt; sed etiam ab Apostolis in Asiâ, in eâ quæ est Smyrnis Ecclesiâ constitutus Episcopus. (Qui) docuit semper quæ ab Apostolis didicerat, quæ et Ecclesia tradidit, et sola sunt vera. » Hic, inquam, in oratione quam ante martyrium fudit, Patrem æternum sic compellat: *Propterea et de omnibus te laudo, te benedico, te glorifico per sempiternum Pontificem Jesum Christum, dilectum Filium tuum, per quem tibi cum Ipso in Spiritu Sancto gloria nunc et in futura sæcula sæculorum. Amen.* (Apud Euseb. l. 4 histor. c. 15.)

## *III. Testimoniis SS. Patrum.*

Sæculo I. — S. Clemens Papa, ep. I ad Cor.: *An non unum Deum habemus, et unum Christum, et unum Spiritum gratiæ in nobis infusum?* — S. Ignatius, martyr., in ep. ad Eph.: *Studete ut confirmemini in dogmatibus Domini et Apostolorum, ut omnia quæ facitis, prosperè vobis succedant carne et spiritu, fide et charitate in Filio, et Patre, et Spiritu Sancto... Subjecti estote Episcopo et vobis mutuò, ut Jesus Christus Patri secundum carnem, et Apostoli Christo et Patri et Spiritui Sancto.*

Sæc. II. — S. Justinus, in Apol. 2: *Fatemur nos talium deorum esse expertes et atheos: sed non verisimè illius Dei Patris videlicet justitiæ et castitatis, et virtutum omnium, et ab omnis vitii mixtione et labe alieni expertes; verum hunc ipsum, et qui ab eo venit... Filium, et Spiritum Sanctum colimus et adoramus.* — Athenagoras, legat. pro christianis n. 10: *Quis igitur non miretur nos, qui Deum Patrem prædicamus et Deum Filium, et Spiritum Sanctum, ita ut et unionis eorum vim, et ordinis distinctionem exponamus, impios et sine Deo homines vocari?* — S. Irenæus, l. 1 adv. hæres. c. 10, n. 1: *Ecclesia... et ab Apostolis, et à discipulis eorum accepit eam fidem quæ est in Unum Deum Patrem omnipotentem... et in Jesum Christum Filium Dei incarnatum pro nostrâ salute, et in Spiritum Sanctum.*

Sæc. III. — Clemens Alexandrinus, l. 3 Pædag. c. 12: *Laudemus unum Patrem et Filium unà cum Sancto Spiritu, qui unus est omnia, in quo omnia, per quem omnia unum... Cui gloria nunc, et in sæcula sæculorum. Amen.* — Tertul. lib. de Pudicitia, c. 21: *Est Trinitas unius Divinitatis, Pater, et Filius, et Spiritus Sanctus.*

Origenes, S. Dionysius Alex., Lactantius, S. Augustinus, unanimi ore confitentur dogma Trinitatis.

#### IV. Factis.

1<sup>o</sup> *Directè probatur fides primævorum Ecclesiæ temporum circa dogma Trinitatis sequentibus factis:*  
1. *Formâ Baptismi, quæ à primo fidei christianæ exordio semper in Ecclesiâ viguit, juxta mandatum Christi, Math. 28. — Trinâ immersione, quæ olim erat in*

usu ad expressionem Trinitatis, ut observat Tertul. contra Praxeam, c. 26: *Christus.... et novissimè mandans ut tingerent in Patrem, et Filium, et Spiritum Sanctum, non in unum. Nam nec semel, sed ter, ad singula nomina in singulas personas tingimur.* —

2. Doxologia Gloria Patri per Filium in Spiritu Sancto, quæ, recepta à primis Ecclesiæ sæculis, in fine canticorum adhibebatur. — Usu antiquissimo preces publicas offerendi rerum universarum Patri, per nomen Filii et Spiritus Sancti, ut testatur S. Justin. in Apol. 2.

2<sup>o</sup> Indirectè probatur fides Ecclesiæ factis sequentibus: 1. Dogma Trinitatis nunc admittitur, hoc dogma non fuit inventum, ergo à Christo fuit revelatum, ergo admittendum est ut veritas divina. — 2. Pagani sæpius accusabant Christianos, dicentes illos adorare tres Deos, vel ridebant de illorum Deo trinò simul et uno. In dialogo *Philopatris*, qui Luciano adscribitur, inducitur quidam Critias jurans per varios ethnicorum Deos, quos respuens Triophon, vult ut Critias juret per *Deum altè regnantem, magnum, immortalem, Filium Patris, Spiritum ex Patre procedentem, unum ex tribus, et ex uno tria. Hæc tu Jovem puta, hunc existima Deum.* Porro hæc supponunt quamdam notitiam dogmatis christiani ad paganos pervenisse.

### III. Fide et decisionibus Ecclesiæ.

Dogma Trinitatis explicitè continetur in Symbolis Apostolorum, S. Athanasii, Nicæno et Constantinopolitano. Omnia ista Symbola ab Ecclesiâ fuerunt admissa tanquàm veræ fidei confessiones. Imò Symbolum Nicænum et Constantinopolitanum contra hæreticos redacta et

recepta fuerunt à duobus Conciliis generalibus; proinde meritò, appellari possunt decisiones Ecclesiæ. Porro hæc habentur in prædictis Symbolis: Symb. Apost.: *Credo in Deum Patrem omnipotentem... et in J. C. Filium ejus unicum... Credo in Spiritum Sanctum.* Symb. S. Athanasii: *Fides catholica hæc est; ut Unum Deum in Trinitate, et Trinitatem in Unitate veneremur. Neque confundentes personas, neque substantiam separantes. Alia est enim persona Patris, alia Filii, alia Spiritus Sancti: sed Patris, et Filii, et Spiritus Sancti una est Divinitas, æqualis gloria, coæterna majestas...* Symb. Nicæn. et Cp.: *Credo in Unum Deum, Patrem omnipotentem.... et in Unum Dominum Jesum Christum, Filium Dei Unigenitum... et in Spiritum Sanctum, Dominum et vivificantem, qui ex Patre Filioque procedit...*

---

## CAPUT II.

### DE PROPRIETATIBUS (1).

Divinarum personarum proprietates sunt: una *absoluta*, aliæ *relativæ*. Per proprietatem *absolutam* intelligimus modum existendi proprium personis divinis, consideratis absolutè, seu abstractà omni relatione. Per proprietates *relativas* intelligimus modum exis-

(1) Hoc verbum *proprietas*, ut observat Suarez, *de Trin.* l. 5, in præmio, sumi potest in duplici sensu: in sensu generali, et in sensu magis stricto. Sub priori, quale nunc usurpatur, comprehendi possunt omnia quæ de divinis personis prædicantur. In sensu magis stricto, vox *proprietas* propriè applicatur *personalitati*, quæ dicitur *proprietas personæ*, ut infra videbitur.



tendi proprium divinis personis consideratis sub respectu relationum.

## ARTICULUS I.

### *De Proprietate absolutâ.*

Quælibet persona possidet totam divinam essentiâ, id est substantiam divinam, cum omnibus proprietatibus et attributis divinis essentialibus. Suprà enim vidimus quamlibet personam esse divinam; proinde unaquæque possidet substantiam divinam; proinde, cum substantia divina sit infinitè perfecta, unaquæque possidet perfectiones sive activas, sive passivas Deo essentielles.

## ARTICULUS II.

### *De Proprietatibus relativis.*

Divinæ personæ habent relationes inter se; habent relationes cum creaturis. Undè dicendum de proprietatibus relativis sequentibus ex relationibus quas divinæ personæ 1<sup>o</sup> habent inter se, 2<sup>o</sup> habent cum creaturis.

§ I. — *De propriet. relat. seq. ex relationibus quas divinæ personæ habent inter se.*

Istæ proprietates sunt aliæ *communes* tribus personis (1), aliæ *speciales*.

### PUNCT. I. *De Proprietatibus communibus.*

Duæ sunt proprietates communes, scilicet 1<sup>o</sup> æqualitas, 2<sup>o</sup> circuminsessio.

(1) Proprietates quas vocamus *communes* non sequuntur ex rela-

**I<sup>a</sup>. Æqualitas.** — Tres personæ sunt coæquales.

**Prob. 1<sup>a</sup>.** In quâlibet personâ tota est essentia divina; proindè unaquæque est infinita, proindè tres personæ sunt æquales, cùm in infinito non admittantur gradus.

**Prob. 2<sup>a</sup>.** Symb. S. Athanasii: *In hac Trinitate nihil prius aut posterius, nihil majus aut minus; sed totæ tres personæ coæternæ sibi sunt, et coæquales* (1).

**II<sup>a</sup>. Circumin sessio.** — Divinæ personæ in se mutuo inexistunt absque confusione.

**Prob. 1<sup>a</sup>.** Divinæ personæ 1<sup>o</sup> in se mutuo inexistunt: Siquidem ibi persona est, ubi ejus essentia; proindè, cùm eadem essentia divina sit in quâlibet personâ, tres personæ inexistunt in unâquâque personâ. 2<sup>o</sup> In se inexistunt absque confusione: Siquidem quælibet persona est irreductibilis.

**Prob. 2<sup>a</sup>.** Joan. 14, 10: *Non creditis, quia Ego in Patre, et Pater in me est?* Joan. 17, 21: *Sicut tu, Pater, in me, et Ego in te.* Quæ, licèt de Patre et Filio tantùm dicta sint, tamen eadem ratione de Spiritu S. vera sunt, ut communiter docent SS. Patres (2).

PUNCT. II. *De Proprietatibus spectralibus.*

**1<sup>a</sup>.** Filius à Patre solo procedit per modum intellectus, seu procedit per generationem.

**2<sup>a</sup>.** Spiritus S. à Patre Filioque procedit per spirationem.

tionem *realt* inter divinas personas, cùm deducantur ex identitate essentiae, sed tantùm ex relatione *rationis*. Vid. Suarez, l. 3, c. 2, n. 1.

(1) Præter Petavium, Wirceburg. etc., vid. Suarez, *de Trin.* l. 4, c. 13 et 16; Becan. *Summa theol.* de Trin. c. 8, q. 1.

(2) Vid. Petav. *de Trin.* l. 4, c. 16, n. 13, et l. 3, c. 9, n. 3.

3<sup>a</sup>. Filius à Patre solo mittitur.

4<sup>a</sup>. Spiritus S. à Patre et Filio mittitur.

1<sup>a</sup>. Filius à Patre solo procedit per modum intellectûs, seu per generationem.

*Prænot.* Dicimus *Filius procedit*, seu producit per totalem communicationem essentiae principii producentis; — per modum *intellectûs*; seu producit à Patre immediatè per actum intellectûs (1). — Ista Filii processio dicitur *generatio*.

Porro, juxta D. Thom. 1 p., q. 27, art. 2, generatio in genere est: *origo viventis à principio vivente conjuncto secundum similitudinem naturæ*; seu, productio viventis et similis à principio vivente per communicationem naturæ. Quo posito,

Propositio superius enuntiata sequentes includit: 1. Filius procedit à Patre, 2. procedit à Patre solo, 3. procedit per modum intellectûs, 4. ista processio est generatio.

1<sup>a</sup> Ppo. — Filius procedit à Patre.

*Prob.* 1<sup>a</sup>. In Scripturâ, Traditione, fide et decisionibus Ecclesiæ, Filius dicitur *Filius* verus Patris, Filius *genitus* à Patre, id est à Patre productus per communicationem totalem substantiæ.

*Prob.* 2<sup>a</sup>. Joan. 8, 42: *Ego ex Deo processi et veni*.

2<sup>a</sup> Ppo. — Filius à Patre solo procedit.

*Prob.* 1<sup>a</sup>. Arg. theol. 1<sup>o</sup> Infra videbitur Spiritum S.

(1) Durandus conserat processiones, sive Filii, sive Spiritûs S., esse immediatè per naturam, non verò per intellectum et voluntatem. Sed ista opinio est temeraria. Vid. Suarez, l. 1, c. 3, n. 2 et seq.

procedere à Filio, ergo Filius à Patre solo procedit; Filium procedere per modum intellectûs, Spiritum verò per actum voluntatis, porro actus voluntatis præsupponit actum intellectûs, proindè Spiritus S. præsupponit Filium.

2<sup>o</sup> In Scripturâ, Traditione, symbolis et decisionibus Ecclesiæ, tres personæ ordine sequenti nominantur, scilicet: Pater, Filius, Spiritus S. Ordo tam constans absque intentione observari non potest; porro nulla alia ratio afferri potest quàm intentio prædicandi ordinem processionum. Ergo Filius à Patre solo procedit.

*Prob. 2<sup>a</sup>. Symb. S. Athan. Pater à nullo est factus, nec creatus, nec genitus. Filius à Patre solo est, non factus, nec creatus, sed genitus.*

3<sup>a</sup> Ppo.—Filius procedit per modum intellectûs.

*Prob. 1<sup>a</sup>. In pluribus Scripturæ textibus, Filius appellatur Verbum Patris, porro verbum est immediatè ab intellectu.*

*Prob. 2<sup>a</sup>. Tradit. S. Basilii, homil. 6 in illud In principio erat Verbum, quærit Cur Verbum? et respondet: Ut perspicuum sit processisse ex mente. S. Gregorius Nazian. orat. 36: Verbum porro dicitur, quia ita se habet ad Patrem, ut sermo ad mentem. S. Aug. lib. 15 de Trin. c. 13: Verbum natum est... de Patris scientiâ, de Patris sapientiâ. Idem communiter docent alii SS. Patres (1).*

4<sup>a</sup> Ppo. — Processio Filii vera est generatio.

*Prob. 1<sup>a</sup>. In processione Filii adsunt omnes genera-*

(1) Vid. fusiùs Tournely, *de Trin.* q. 2, art. 3, concl. 1; Suarez, *supr. cit.*

tionis conditiones. Siquidem, ut suprà definimus, generatio est actus principii viventis, vi cujus propria producit per communicationem substantiæ terminus vivens secundum similitudinem naturæ. Porro hæc est processio Filii: Pater ab ævo se videns, vi propria actus intelligentiæ, veram parit imaginem sui; imaginem infinitè perfectam, cum actus intelligentiæ sit infinitè perfectus; imaginem proindè viventem, substantialem, personalem, in quâ vita et essentia divina perfectissimè reflectitur. Ergo.

*Prob. 2<sup>a</sup>. In pluribus Scripturæ locis, Filius dicitur à Patre genitus: Ego hodie genui te. Unigenitus Filius qui est in sinu Patris.*

*Prob. 3<sup>a</sup>. Symb. S. Athan.: Filius à Patre solo est, non factus, nec creatus, sed genitus.— Symb. Nicæn.: Credo... in Jesum Christum, Filium Dei Unigenitum; et ex Patre natum...*

II<sup>a</sup>. Spiritus S. à Patre Filioque procedit per spirationem, seu per actum amoris.

*Not.* Duplex distinguitur spiratio, *activa* nempe, quæ nihil aliud est quàm actus amoris, et *passiva*, seu amor productus. Quo præmisso,

Propositionis superiùs enuntiati constabit veritas, si probentur sequentes, scilicet: 1. Spiritum procedere à Patre, 2. procedere à Filio, 3. procedere per spirationem, 4. si probetur hanc processionem non esse generationem. Atqui,

1<sup>a</sup> Ppo. — Spiritus S. à Patre procedit.

*Prob. 1<sup>a</sup>. Joan. 15, 26: Cum venerit Paracletus, quem ego mittam vobis à Patre, Spiritum veritatis, qui à Patre procedit, ille testimonium perhibebit de me.*

*Prob. 2<sup>a</sup>. Symb. S. Athan.: Spiritus Sanctus à Patre, et Filio, non factus, nec creatus, nec genitus, sed procedens. Symb. Nicæn.: Credo... et in Spiritum Sanctum... qui ex Patre... procedit.*

2<sup>a</sup> Ppo. — Spiritus S. à Filio quoque procedit.

*Prob. 1<sup>a</sup>. Arg. theol. 1<sup>o</sup> Spiritus S. producit per voluntatem, seu facultatem amandi; porro voluntas communis est Patri et Filio. 2<sup>o</sup> Spiritus S. producit per spirationem activam; proinde procedit à personis quibus competit spiratio. Porro spiratio competit Filio sicut et Patri, quia nihil in Filio repugnat spirationi.*

*Prob. 2<sup>a</sup>. Joan. 16, 13: Cum autem venerit ille Spiritus veritatis, docebit vos omnem veritatem. Non enim loquetur à semetipso; sed quaecumque audiet loquetur, et quæ ventura sunt annuntiabit vobis. Ille me clarificabit, quia de meo accipiet, et annuntiabit vobis. Omnia quaecumque habet Pater mea sunt. Propterea dixi quia de meo accipiet, et annuntiabit vobis. Unde sic: 1. Filius dicit: Omnia quaecumque habet Pater, mea sunt. Ergo habet omnia quæ Pater, excepta Paternitate, seu omnia quæ non repugnant filiationi; proinde ipsi competit spiratio, cum non repugnet filiationi. 2. Spiritus S. accipit à Filio, quia de meo accipiet (1). Ergo proce-*

(1) « Quæres quare dixerit *accipiet* in futuro, et non potius *accepit* in præterito. Respondeo cum Augustino, tract. 99 in Joan. » acceptionem illam æternam esse: et continere in se eminenter » omnia tempora et ad omnia accommodari posse. *In eo, inquit, » quod sempiternum est, cujuslibet temporis verbum ponatur, » sive præteriti, sive præsentis, sive futuri, non mendaciter ponitur...* Poterat igitur dicere: *de meo accepit, de meo accepit, de meo accipiet*. Dixit tamen: *de meo accipiet*, quia loquebatur de » Spiritu S. qui tanquam legatus à Patre et Filio mittendus erat ad

dit à Filio ; siquidem una persona divina non potest accipere ab aliâ, nisi procedendo.

Joan. 13, 26 : *Cùm venerit Paracletus, quem ego mittam vobis à Patre, Spiritum veritatis qui à Patre procedit, ille testimonium perhibebit de me.* Undè : Spiritus mittitur à Filio. Porro persona divina non mittitur propriè nisi ab eo à quo procedit. Omnis enim missio est vel per imperium, vel per consilium, vel ratione processio. Atqui missio Spiritus S. dici non potest per imperium, nec per consilium, cùm Spiritus S. sit æqualis Filio. Ergo prædicta missio est ratione processio. Ergo.

Galat. 4, 6 : *Misit Deus Spiritum Filii sui in corda vestra clamantem : Abba, Pater.* Undè : Spiritus dicitur *Spiritus Filii*, vel quia est facultas, habitudo Filii, vel quia ab ipso procedit. Porro prius dici non potest ; ergo.

*Prob. 3<sup>a</sup>. Tradit. 1<sup>o</sup> Argum. Præscriptionis.* Tempore Photii admittebatur dogma processio Spiritus S. à Filio ; de hoc dogmate non fuit innovatum. Ergo illud dogma fuit à Christo revelatum.

2<sup>o</sup> SS. Patres, tùm Græci, tùm Latini qui ante Photii tempora exstiterunt clarè et expressè profitentur processionem Spiritus S. à Filio.

Ex Græcis, S. Athanasius, orat. 3. contra Arian. n. 24 : *Nec Spiritus Verbum cum Patre conjungit, sed potius Spiritus hoc à Verbo accipit... Quæcumque Spiritus habet, hoc à Verbo habet.* Et lib. de Incarnat., in

» Apostolos ; legati autem tunc solent instrui quandò mittuntur. »  
Decan. Sum. theol. de Trin. c. 6, q. 2, n. 3.

illud Psal. 33 : *Apud te est fons vitæ...*, ait : *Norat David apud Deum Patrem Filium esse fontem Spiritus Sancti*. S. Basilius, lib. de Spir. S. c. 18 : *Quia et Spiritus Christi dicitur... Denique tanquam Paracletus in se ipso exprimit Paracleti, à quo missus est, bonitatem, et in sua propria dignitate ejus, à quo processit, majestatem exhibet*. Idem docet prædictus Pater in pluribus aliis operum suorum locis, ut probatum est contra Græcos in Conc. Florentino. S. Epiphanius, in Anchorato, n. 67 : *Et Dei Spiritus à Christo, utpotè qui ab utroque procedit, id quod Christus ipse testatur : qui à Patre procedit, inquit, et hic de meo accipiet*. S. Cyrillus Alex., in epistolâ ad Nestorium, quæ lecta et approbata fuit in œcumenicis Conciliis Ephesino, Chalcedonensi, Constantinopolitano II et III, hæc habet : *Spiritus non est à Filio alienus, quandoquidem Spiritus veritatis nominatur, Christus autem veritas est ; et proinde quoque ab illo, atque à Deo Patre procedit*. Idem tradunt S. Gregorius Nyssen., S. Joan. Chrysostomus, Didymus, etc.

Ex Latinis sufficet proferre S. Hilarium, qui, l. 2 de Trin. n. 4, scribit Spiritum S. esse *ex Patre et Filio auctoribus* ; S. Ambrosium, qui explicitè docet Spiritum S. à Patre Filioque procedere ; S. Leonem, qui, ep. 4 ad Turrib. c. 1, ait : *Qui de utroque processit* (1).

*Prob. 4<sup>a</sup>. Symb. S. Athan. : Pater à nullo... Filius à Patre solo est... Spiritus Sanctus à Patre et Filio. Symb. Constp. : Credo... et in Spiritum Sanctum... qui ex Patre Filioque procedit.*

(1) Vid. fusiùs Petav. l. 7 de Trin.



**Prob. 3<sup>a</sup>.** Auctoritate Conciliorum, quæ ex utraque Ecclesiâ congregata fuere. Primum apud Barum celebratum est à Græcis simul et Latinis, sub Urbano II, an. 1097, in quo S. Anselmus evidentissimis rationibus Græcos convicit. Secundum est Lateranense IV, sub Innocentio III, an. 1213, in quo consentientibus Græcis definitum est: *Pater à nullo, Filius autem à solo Patre, ac Spiritus Sanctus ab utroque pariter absque initio semper et fine...* Tertium est Lugdunense II sub Gregorio X, an. 1274, in quo symbolum cum additione *Filioque* ter græcè et ter latinè cantatum fuit. Quartum deinde fuit Florentinum, sub Eugenio IV, an. 1439, in quo post longissimas disputationes rursus definitum est: *Spiritum sanctum ex Patre et Filio, tanquam ab uno principio et una spiratione procedere.*

**3<sup>a</sup> Ppo.**— Spiritus à Patre Filioque procedit per spirationem.

**Prob. 1<sup>a</sup>.** *Fide Eccles.* quæ specialiter exprimitur in his vers. hymn. Pentecost.:

Qui diceris Paraclitus,  
Altissimi donum Dei,  
Fons vivus, ignis, charitas,  
Et spiritalis unctio.

**Prob. 2<sup>a</sup>.** *Decis. Eccl. Conc. Lugdun. II docet: Patrem et Filium una spiratione producere Spiritum Sanctum.* Idem definit Conc. Florent. suprà citatum.

**4<sup>a</sup> Ppo.**— Ista processio Spiritus S. non est generatio, sed dicitur simpliciter *Processio*.

**Prob. 1<sup>a</sup>.** In pluribus Scripturæ locis, Filius dicitur *unigenitus*; ergo in Deo una tantum est generatio. Aliundè nusquam in Scripturis Spiritus S. vocatur Fi-

lius; nec dicitur gigni aut nasci, sed tantum procedere.

*Prob. 2<sup>a</sup>. Testim. SS. PP. inter quos S. Basilii in orat. contra Sabellian.: Filius à Patre per generationem; Spiritus verò ex Deo modo arcano et ineffabili. S. Cyrillus Alex. 1. 25<sup>o</sup> Thes. de Filio sic loquitur: Unigenitus est... quia ipse solus est fructus paternus. Et paulò infra: Non est igitur eà ratione unigenitus, quod solus existat, sed quod solus naturaliter genitus sit. Vid. Iusius testim. PP. apud Petav. l. 7, c. 13.*

*Prob. 3<sup>a</sup>. Symb. Apost.: Credo... in Jesum Christum Filium ejus unicum. Symb. Nicæn.: Credo... in Jesum Christum, Filium Dei Unigenitum. Symb. S. Athan.: Spiritus sanctus... non factus, nec creatus, nec genitus, sed procedens.*

*Explic. Hæc propositio, quæ est de fide, per solam auctoritatem potest probari; constat enim nullâ sufficienti et satis firmâ ratione demonstrari posse discrimen inter generationem Filii et processionem Spiritûs S. Sive capias, sive non capias, ait S. Augustin. l. 2 contra Maxim. c. 14, de Patre est Filius, de Patre est Spiritus Sanctus; sed ille genitus est, iste procedens: quid autem inter nasci et procedere intersit de illâ excellentissimâ naturâ loquens explicare quis possit? Næ omne quod procedit, nascitur, quamvis omne procedat, quod nascitur. Hæc scio: distinguere autem inter illam generationem et hanc processionem nescio, non valeo, non sufficio. Consonant omnes SS. Patres.*

Præmissâ autem fide, Doctores catholici hanc propositionem explicare tentârunt. Præcipuas inter hujus dogmatis explicationes, hæc est D. Thomæ et plurium sententia: Processio Spiritûs S. non potest dici genera-

tio, quia fit per voluntatem, voluntas autem naturà suà non tendit ad productionem termini similis, sed tantùm ad unionem amantis et amati. Dùm econtrà processio Filii meritò dicitur generatio, quia fit per intellectum, cujus propria vis est ut terminum sibi assimilet (1).— Quidam quoque dicant: Filius productus per potentiam generativam est infinitus; proindè per processionem Filii exhauritur in Deo potentia generativa; proindè in Deo altera generatio fieri non potest. — Diversæ dantur etiam explicationes; earum autem expositionem, utpotè longiorem, omitemus (2).

III<sup>a</sup>. Filius à Patre solo mittitur.

IV<sup>a</sup>. Spiritus S. à Patre et Filio mittitur.

*Præmittenda*: Missio est: Unius personæ à personâ ex quâ procedit destinatio ad aliquod opus ad extrâ (3). — Dicitur *passiva*, aut *activa*: prout consideratur respectu personæ missæ, aut personæ mittentis. *Personæ unius ab aliâ destinatio ad aliquem effectum ad extrâ*. In hoc sensu sumpta missio dicitur *passiva*, est autem *activa* quandò consideratur respectu personæ mittentis. — Missio potest esse invisibilis aut visibilis. Dicitur

(1) *Sum. theol.* 1 p., q. 27, art. 1 et 2, et q. 34, art. 2.

(2) Vid. fusiùs Suarez, *de Trin.* l. 11, c. 5 et seq., Petav. *de Trin.* l. 7, c. 13, Tournely, q. 2, art. 4; Wirceburg. disp. 6 *de personis* div. c. 1, art. 2, quær. 2; *Theol. curs. compl.* t. 8; Billuart, etc.

(3) Ex communi theologorum definitione colligitur missionem, partim quidem esse æternam, scilicet ratione processionum, partim verò temporalem, ratione operis ad extrâ. Sed cùm æterna processio sit de se indifferens ad mitti aut non mitti, et indeterminata, propterea missio simpliciter dici potest temporalis et in tempore fieri. juxta illud Galat. 4, 4: *At ubi venit plenitudo temporum, misit Deus Filium suum*. Vid. Suarez, l. 12, c. 1; Petav. l. 8, c. 1.

*visibilis*, quando fit in specie sensibili, v. g. missio Filii in carne humanà, missio Spiritus S. in specie columbæ, flatûs, linguarum ignearum. Dicitur autem *invisibilis*, quando fit sine specie sensibili, v. g. missio Spiritus S. interiùs sanctificantis animas per gratiam habitualement aut actualement. Quo posito,

Duæ propositiones superiùs enuntiatae probari possunt in **communi**, in specie.

**Prob. general.** Persona divina potest mitti ab illà à quà procedit, et ab illà tantùm. Ergo Filius mittitur à *Patre solo*, cùm à Patre solo procedat. Ergo Spiritus S. mittitur à Patre et Filio, cùm ab utroque procedat.

1<sup>o</sup> Persona divina potest mitti ab illà à quà procedit: Siquidem 1. personà à quà procedit altera, quamdam, ut ita dicam, habet auctoritatem in hanc personam (1); proindè illam mittere potest. 2. In Scripturà, personæ divinæ mittuntur à personis à quibus procedunt. 3. Unanimiter consentiunt Patres et theologi.

2<sup>o</sup> Persona divina mittitur tantùm ab illà à quà procedit: Siquidem 1. nulla est in divinis auctoritas, dignitas, nisi penès originem, quà una ab alià procedit. 2. Nunquàm in Scripturis persona legitur missa, nisi ab illà à quà procedit. 3. De hoc unanimiter consentiunt Patres et theologi. Ergo.

**Prob. special.** 1<sup>a</sup> p. Filius à Patre solo mittitur.

(1) Ità ratiocinantur SS. Patres. Missionem, in eo qui mittit, *dignitatem, auctoritatem* testari indicat S. Gregor. Naz. orat. 37, qui de Spiritu S. dixisse Christum observat: *Ego mittam eum, et Veniet; quorum priore auctoritatem suam ostendit, posteriore, verò Spiritus potestatem*. Item S. Hilarius, l. 8 de Trin. *Qui mittit, potestatem suam in eo, quod mittit, ostendit*. Vid. Petav. l. 8, c. 4, n. 8.

— *Mittitur à Patre: Joan. 3, 16: Sic Deus dilexit mundum ut Filium suum Unigenitum daret: ut omnis qui credit in eum non pereat, sed habeat vitam æternam. Non enim misit Deus Filium suum in mundum ut judicet mundum, sed ut salvetur mundus per ipsum.*  
Joan. 20, 21: *Sicut misit me Pater, et Ego mitto vos.*  
— *Mittitur à Patre solo: Siquidem à Patre solo procedit. Aliundè nusquàm in Scripturis dicitur missus à Spiritu S.*

*2<sup>a</sup> p. Spiritus S. à Patre Filioque mittitur. Joan. 14, 26: Paracletus autem Spiritus Sanctus, quem mittet Pater in nomine meo, ille vos docebit omnia. Joan. 15, 26: Cùm venerit Paracletus, quem Ego mittam vobis à Patre, Spiritum veritatis qui à Patre procedit, ille testimonium perhibebit de me. Ergo Spiritus S. mittitur à Patre et Filio. Joan. 16, 7: Si abiero, mittam eum (Paracletum) ad vos. Ergo Spiritus S. mittitur à Filio.*

#### COROLLARIA.

Ex antea dictis sequentia deduci possunt corollaria  
1<sup>o</sup> de processionibus divinis, 2<sup>o</sup> de relationibus, 3<sup>o</sup> de proprietatibus personalibus propriè dictis, 4<sup>o</sup> de notionibus divinis, 5<sup>o</sup> de nominibus quæ unicuique personæ specialiter attribuuntur.

##### *I. De Processionibus divinis.*

In Deo duæ et duæ tantum sunt processiones. Siquidem in Deo tot sunt processiones, quot personæ productæ. Porro duæ et duæ tantum sunt personæ productæ. Ergo.

*II. De Relationibus divinis.*

**Relatio in genere est: habitudo quâ entia ad se mutuò referuntur et habent respectum: aliis verbis, relatio constat entis proprietate, quæ supponit in altero ente proprietatem correlativam, Quo posito,**

**In Deo sunt quatuor tantum relationes originis, scilicet: Paternitas, Filiatio, Spiratio passiva et Spiratio activa; relationes reales et essentielles, quarum tribus primis constituuntur personæ divinæ.**

**In Deo sunt quatuor tantum relationes originis: Siquidem, ut suprâ diximus, processiones sunt tantum duæ, porro ex unâquaque processione non consurgunt nisi duæ relationes. Ergo. Ex unâquaque processione non consurgunt nisi duæ relationes: quia una processio tantum habet unum principium et unum terminum. Itâ in processione Filii sunt relationes generantis et geniti, in processione Spiritûs S. sunt relationes spirantis et spirati. Ergo.**

**Relationes reales et essentielles: Siquidem istæ relationes consurgunt ex processionibus, quæ in Deo sunt reales et essentielles.**

**Quarum tribus primis constituuntur personæ divinæ. Siquidem, cum divinæ personæ communem habeant essentiam divinam, simulque sint realiter distinctæ, agnoscendum est aliquid speciale quo constituentur in esse personæ et sic distinguantur. Porro solummodò relationibus, et solummodò tribus primis constituuntur in esse personæ et distinguuntur.—Solummodò relationibus constituuntur...: siquidem in divinis omnia sunt communia et absoluta, nec ulla est distinctio, nisi ubi**

obviat relationis oppositio. — Solummodò tribus, scilicet : Pater, paternitate ; Filius, filiatione ; Spiritus, spiratione passivà : siquidem cùm spiratio activa communis sit Patri et Filio, dici non potest relatio constitutiva alterutriusque, sed tantùm distinctiva à Spiritu S.

Ideo tres relationes constitutivæ à theologis dicuntur relationes *realiter distinctæ* (1).

### III. De Proprietatibus personalibus propriè dictis.

Proprietas personalis, juxta theologos, est forma positiva unicuique personæ propria, illiusque constitutiva.

Ex illa definitione patet proprietates personales nihil aliud esse quàm relationes personis peculiares ; tres proindè tantùm admittendas esse, scilicet : Paternitatem, Filiationem, Spirationem passivam. Hocsensu universa Ecclesia dicit in Præfat. Trinit.: *Et in personis Proprietas, et in Essentiâ unitas*. Et Conc. Lateran. IV: *Firmiter hæc sancta Trinitas secundum communem essentiam una, et secundum Personales Proprietates discreta*.

Quidam Patres et Theologi numerant Innascibilitatem, seu Improducibilitatem, inter proprietates personales, quia specialis est Patri. Sed meritò rejicitur à plerisque ; siquidem est aliquid merè negativum, porro persona non constituitur persona negatione, sed formâ positivâ (2).

### IV. De Notionibus divinis.

Notio, juxta D. Thomam, est ratio propria cognos-

(1) Vid. fusiùs Suarez, l. 3.

(2) Vid. fus. Suarez, l. 7, cc. 1, 2 et seq.

cendi personam divinam; seu, aliquid peculiare, quo personæ divinæ à se invicem distinguuntur. Notio concipitur instar formæ cujusdam abstractæ, quæ, veluti caractere, persona una vel duæ personæ ab aliâ distinguuntur (1).

In Deo quinque sunt notiones, scilicet: Innascibilitas, Paternitas, Filiatio, Spiratio activa et Spiratio passiva; et quinque tantum.—Quinque notiones assignatæ merito dicuntur notiones, patet ex definitione. Quinque tantum admittendæ sunt: siquidem quidquid aliud de *divinis* prædicatur, vel non habet notionis characteres, vel potest comprehendi, sub quinque notionibus assignatis.

*F. De Nominibus quæ unicuique personæ specialiter attribuuntur.*

**PRIMA** Persona merito dicitur:

1<sup>o</sup> *Pater*: Siquidem ab illo procedit Filius verus per generationem perfectissimam.

2<sup>o</sup> *Primum principium*: 1. Quod solus ille sit sine principio, juxta illud D. Bernardi, de Consid. l. 3, c. 8: *principium propriè est quod caret principio*; 2. quod ab illo procedant Filius et Spiritus S.; 3. quod ab illo, cum Filio et Spiritu S., vel per Filium et Spiritum S., omnia creata constant.

3<sup>o</sup> *Prima persona*: Siquidem Filius et Spiritus S. ab illo procedunt; proinde Pater dici potest anterior, anterioritate rationis.

4<sup>o</sup> *A se, innascibilis, improductus*: Quia ipse à nullo, aliæ verò personæ ab illo divinam naturam habent.

(1) D. Thom. 1 p. q. 32, art. 2 et seq.; Suarez, l. 3, c. 8 et 9.,



SECUNDA Persona meritò dicitur :

1<sup>o</sup> *Filius*: cùm procedat à Patre per generationem veram.

2<sup>o</sup> *Verbum Dei*: Verbum internum nihil aliud est quàm cogitatio, locutio interna quàm cognoscimus et nobis interiùs dicimus quid simus, quid sint res externæ. Ità Filius, qui procedit per actum intellectûs Patris, ipse est cogitatio interna quàm Pater videt et sibi interiùs dicit quid ipse sit, quid sint res creatæ.

3<sup>o</sup> *Veritas*: Veritas est Ens, quatenùs per intelligentiam percipi potest. Porro Filius est Ens, cùm totam habeat naturam divinam; Ens, quatenùs per intellectum percipi potest: Siquidem, ipse est cogitatio substantialis, verbum substantiale Patris; ipse est lumen procedens à Patre.

4<sup>o</sup> *Lux, Lumen*: Lumen est id in se visibile, quo objecta fiunt visibilia. Porro omnia fiunt per verbum Deo et hominibus visibilia, omnia cognoscuntur. Et 1<sup>o</sup> Deo: per verbum enim Deus seipsum videt, cognoscit seipsum, et omnia entia creata. 2<sup>o</sup> Hominibus: testatur Joannes, 1: *Et illuminat omnem hominem venientem in hunc mundum*; id est: Omnes et singulos homines illuminat luce rationis et intelligentiæ; et luce fidei ac gratiæ nullus est hominum qui nisi ab ipso illuminetur.

5<sup>o</sup> *Imago Dei*: Siquidem imago est similitudo ab aliquo expressa: porro Filius procedit à Patre similis in naturâ, vi suæ processioneis: ergo vera et propria est imago Patris. Constat etiam ex Scripturâ: à D. Paulo Filius dicitur, in ep. ad Colos. 1: *imago Dei invisibilis*, et ad Hæbr. 1: *figura substantiæ ejus*.

6<sup>o</sup> *Secunda persona*: Siquidem procedit à Patre et cum illo producit Spiritum S. Proindè, in ordine rationis, dici potest posterior Patri, anterior verò Spiritui S.

*TERTIA Persona* meritò dicitur :

1<sup>o</sup> *Sanctus Spiritus*: Et 1. *Spiritus*; quia terminus est divini amoris, amor autem est quædam voluntatis spiratio, seu impulsio in rem amatam. 2. *Sanctus*; quia spiratur ab essentiali sanctitate, spiratione purissimâ.

2<sup>o</sup> *Amor, Charitas*: Tum quia procedit ex amore Patris et Filii; tum quia terminus est subsistens et personalis amoris mutui Patris et Filii.

3<sup>o</sup> *Donum, primum Donum*: Et 1. *Donum*; quia procedit per amorem; porro amor naturâ tendit ad unionem amantis et amati, seu nihil aliud est quàm donum sui ipsius. 2. *Primum donum*; tum ratione excellentiæ, quia ipse est amor substantialis, personalis; tum quia ab ipso profluunt omnia dona, donum enim confertur propter amorem, porro Spiritus est amor.

4<sup>o</sup> *Tertia persona*: Siquidem à Patre et Filio procedens, ratione dici potest posterior Patri et Filio.

*Notandum.* — Omnes proprietates naturæ sunt communes tribus personis. Nihilominus quædam ex istis proprietatibus modo speciali attribuuntur tali personæ, quia propinquiorem habent relationem cum proprietatibus unicuique personæ propriis.

Ita, specialius attribuuntur :

Patri : 1<sup>o</sup> *æternitas*, cum Pater sit Ens Innascibile, à quo cuncta procedunt, 2<sup>o</sup> *potentia*, quia Pater est primum principium ; ipsi proindè censetur inesse soli potentia, quæ est omnium ratio, vel causa.

**Filio :** 1° *intelligentia*, siquidem Filius est Verbum Patris, intelligentia in actu, intelligentia in supremo gradu perfectionis ; 2° *sapientia*, cū sapientia nihil aliud sit quā intelligentia, quatenus discernit finem et ad finem coōrdinat media convenientia.

**Spiritui Sancto :** *bonitas*, quia Spiritus S. est amor; porro amor inclinatur ad benefaciendum, seu ad exercendam bonitatem.

§ II. De Proprietatibus relat. seq. ex relationibus quas divinæ personæ cū creaturis habent.

PUNCT. I. De Proprietatibus communibus.

1° Quælibet persona concurrit ad mundi creationem, conservationem, gubernationem. Siquidem actus prædicti producuntur per potentiam, intelligentiam, voluntatem ; porro tres istæ facultates communes sunt tribus personis.

2° Tres personæ reflectuntur in rebus externis, ita ut in omnibus creaturis quædam inveniantur vestigia, quædam imagines impressæ Trinitatis (1).

PUNCT. II. De Proprietatibus specialibus.

Ex omnibus operibus ad extrā, specialius attribuuntur :

**PATRI :** *Creatio* ; etenim Patri per appropriationem attribuitur potentia, cujus creatio est effectus.

**FILIO :** 1° *Ordo rerum* ; siquidem ordo nihil aliud est quā collectio mediorum ad finem accommodatè tendentium, discretio mediorum, eorumque accommo-

(1) Vid. tractat. nostrum *de Locis theologicis*, vol. 1, pag. 278 et seq.

datio ad finem fit per sapientiam; porro sapientia specialiter attribuitur Filio. 2<sup>o</sup> *Legislatio*: Directio moralis entium moralium ad finem, evidenter attinet ad sapientiam. 3<sup>o</sup> *Judicium ultimum*: Judicium constat sanctione post debitam legis applicationem ad examen actuum; porro præcipuè legislatoris est applicandi legem sanctionemque à se latam.

SPIRITUI S. 1<sup>o</sup> *Vivificatio*: quia vivificatio nihil aliud est quàm donatio vitæ; porro spiritus est principium vitæ. Siquidem potest et vult dare vitam. Potest, cum sit amor, proindè principium activum, proindè vita; vult, eum sit charitas, bonitas suprema. 2<sup>o</sup> *Mundi gubernatio*: Gubernatio fit dono mediorum ad finem; porro omne donum à supremâ charitate descendit. 3<sup>o</sup> *Incarnatio*, saltem quatenus spiritus est causa efficiens: siquidem Incarnatio est donum medii excellentissimi ad finem. 4<sup>o</sup> *Distributio gratiæ*: Hoc evidens est ex opinione juxta quam gratia est ipsa persona Spiritus S. in animâ inhabitantis in eâque operantis. Hoc etiam verum est juxta theologos affirmantes gratiam esse principium vitæ supernaturalis, siquidem Spiritus est principium vitæ, cum sit amor.

---

## APPENDIX.

*De modo loquendi in exponendo SS. Trinitatis mysterio.*

*Regula generalis.* Quicumque sermonem habet de SS. Trinitate diligenter attendat quis sit communis loquendi usus, et quænam rerum adjuncta. Sant enim ambi-

quæ quædam locutiones, quas sapiens vitare, aut saltem explicare debet, ne pias aures temerè offendant. (Hæc aliundè regula semper observanda est quotiescumque de dogmatibus habendus est sermo.)

*Regulæ speciales.* In Deo, una est essentia, tres sunt personæ distinctæ, et coæquales. Undè :

1<sup>a</sup> *Reg.* Cavendum est à locutionibus, quæ distinctionem tum naturæ, tum attributorum absolutorum, significarent.

2<sup>a</sup> *Reg.* Vitandum est quidquid personarum distinctionem tollit.

3<sup>a</sup> *Reg.* Fugiendæ sunt loquendi rationes quibus tollitur personarum æqualitas.

Ex istis regulis sequentia deducimus :

*Ex 1<sup>a</sup> Regulâ:*—1<sup>o</sup> Dici non potest : In Deo est *triplicitas*, Deus est *triplex*; nam juxta communem usum istæ voces non solas personas, sed ipsam multiplicant naturam. Benè verò dici potest : *Trinitas*, Deus est *trinus*; ex usu istæ voces designant solas personas. 2<sup>o</sup> Dici non potest : *Aliud* est Pater, *aliud* est Filius... Benè verò : *Alius* est Pater... Ex usu communi, pronomina neutrius generis substantiam designant, generis autem masculini personam directè respiciunt. 3<sup>o</sup> Personæ divinæ dici non possunt *similis naturæ*, quia illud supponit plures esse naturas; benè verò : *similes* in naturâ. 4<sup>o</sup> Dici non potest in Deo *tria* esse *individua*; plura enim individua diversam numero naturam indicant. 5<sup>o</sup> Dici non potest : *Essentia generat*, *essentia generatur*; hæc enim videntur supponere aliam esse essentiam quæ generat, aliam quæ generatur. Benè verò dicitur : *Deus generat*, *Deus generatur*; quia tunc

ista vox *Deus* non sumitur absolutè pro essentiâ , sed relativè pro unâ speciali personâ.

*Ex 2<sup>a</sup> Regulâ* : — 1<sup>o</sup> Dici non potest : *Deus est singularis, solus, solitarius* ; quia ista verba non deorum tantùm, sed personarum pluralitatem excludunt. Dicitur tamen : *Deus est Unus* ; in istâ loquendi ratione *unus* designat naturam. 2<sup>o</sup> Dici non potest : *Filius unus* est cum Patre, quia excluderetur Spiritus S. Benè verò dicitur : *Filius unum* est cum Patre.

*Ex 3<sup>a</sup> Regulâ* : — Non licet dicere : *Personæ sunt dispares, dissimiles, differentes, disparatæ*, etc., quia istæ voces naturæ differentiam includunt.

---



## II. DE ACTIBUS DIVINIS AD EXTRA.

Attributa divina manifestantur ad extra tripli modo :  
1<sup>o</sup> *Creatione*, 2<sup>o</sup> *Conservatione*, 3<sup>o</sup> *Providentiâ*, seu gubernatione entium creatorum, sive in ordine physico, sive in ordine morali, tum naturali, tum supernaturali.

Omissis quæ pertinent ad creationem, conservationem et providentiam in ordine physico (de quibus alibi dictum est), nunc tractandum de Providentiâ Dei erga hominem sub respectu morali consideratum.

### DE PROVIDENTIA DEI

#### ERGA HOMINEM

##### SUB RESPECTU MORALI CONSIDERATUM.

Dicenda sub hoc titulo duplici quæstione comprehenduntur : 1<sup>o</sup> utrùm Deus provideat homini quatenus homo est ens morale ; 2<sup>o</sup> quibus actibus?

### QUÆSTIO PRIMA.

UTRUM DEUS PROVIDEAT HOMINI, QUATENUS HOMO EST ENS MORALE ?

*Resp.* Affirmative.

*Prob.* 1<sup>a</sup>. Existit providentia in ordine physico ; ergo à fortiori in ordine morali, qui priore multò excellentior est.

*Prob.* 2<sup>a</sup>. Providentia lato sensu sumpta, prout in præsentî quæstione accipitur, est : *præordinatio æterna entium ad finem per media, simulque hujus præ-*



*ordinationis exsecutio.* Ergo admittenda est providentiæ, de quâ agitur, existentia, si 1<sup>o</sup> Deus homini, sub respectu morali considerato, assignaverit finem, et ad hunc finem media instituerit; si 2<sup>o</sup> hæc ordinatio sit æterna; si 3<sup>o</sup> decreta posita certò sint à Deo exsequenda. Atqui hæc tria certa sunt.

1<sup>o</sup> Deus assignavit homini, enti morali, finem et media.—Hæc propositio constat 1 ex suprâ dictis, initio hujus *Expositionis theologicæ*, q. 1 et 2. Ibi enim probavimus hominem à Deo ad finem ultimum destinatum, simulque conditiones ad finem obtinendum institutas fuisse. Constat 2. ex consensu populorum, qui omnes admiserunt vitam æternam, et religionem complectentem omnia media ad eam obtinendam necessaria.

2<sup>o</sup> Ordinatio prædicta est æterna: Nam in hypothesi contrariâ, voluntas Dei, quoad actus futuros, esset indeterminata, ut evidens est; imò instabilis, siquidem, primò indeterminata, fieri posset determinata: quæ repugnant Dei infinitæ perfectioni.

Æterna ordinatio est certò à Deo exsequenda. Nam 1. in hypothesi contrariâ, Deus mutaret consilium, et argui posset de inconstantia; quod impossibile est. 2. Sap. 8, 1: *Attingit... à fine usque ad finem fortiter, et disponit omnia suaviter.* Ibid. 12, 13: *Non enim est alius Deus quàm tu, cui cura est de omnibus.* I Petr. 3, 7: *Omnem sollicitudinem vestram projicientes in eum, quoniam ipsi cura est de vobis.* His textibus nulla imponitur limitatio quoad materiam et quoad tempus; ex eis proindè concludi potest gubernatio divina, præsens et futura, non solum in ordine physico, sed etiam in ordine morali.

## QUÆSTIO SECUNDA.

QUIBUS ACTIBUS DEUS HOMINI PROVIDEAT IN ORDINE MORALI?

*Resp.* Triplici actuum serie, actibus *ante tempus*, *in tempore*, *post tempus*. De quibus nunc.

Primâ serie actuum constituitur *præordinatio*, seu *providentia strictè dicta*; secundâ et tertiâ, *exsecutio*, seu *gubernatio*; tribus simul junctis, *providentia, in sensu lato*.

### I.

#### DE ACTIBUS PROVIDENTIÆ

#### ANTE TEMPUS.

Præordinatio Dei uno et æterno actu realiter constat; cùm autem actus iste, in suâ unitatè considerari non possit, distinguenda sunt ejus quasi elementa, et secundum ordinem rationis exponenda.—Porro, vi abstractionis, in actus sequentes, juxta ordinem suum dispositos, resolvitur.

1° Inter status possibles Deus eligit statum homini assignandum.

2° Vult hominis salutem, mediaque ad eam consequendam necessaria.

3° Prædestinat alios ad gloriam, alios ad pœnam æternam.

## ACTUS PRIMUS.

### INTER STATUS POSSIBILES DEUS ELIGIT STATUM HOMINI ASSIGNANDUM.

Duo requirit hujus actûs explicatio : 1. expositio statuum possibilium, 2. determinatio status homini à Deo assignati. Undè quærendum 1<sup>o</sup> quinam sint status possibiles ; 2<sup>o</sup> quinam status à Deo determinati ?

### QUÆSTIO I.

#### QUINAM SINT STATUS POSSIBILES ?

*Præmittenda.* Status quoad præsentem quæestionem est : *certa quædam naturæ humanæ conditio in ordine ad finem ultimum.*

In omni statu , duplicis generis elementa distingui possunt, scilicet : essentialia et accidentalia. Elementa *essentialia* sunt finis et media. Per verbum elementa *accidentalia*, designantur quædam adjuncta, quibus conditio humana fit melior aut pejor. — Proindè status à statu differre potest elementis essentialibus, elementis accidentalibus : indè statuum divisiones et subdivisiones.

1<sup>o</sup> Status est alter naturalis, alter supernaturalis.

*Naturalis* : id est, naturæ humanæ accommodatus, et illi, posita creatione, saltem debitus. — *Naturalem* dicimus statum in quo finis et media ad finem sunt naturalia. Per vocem *finis naturalis* designatur Deus, quatenus est cognitus abstractè, seu per ideam inter mentem humanam et Deum intermediam, et amatus

amore cognitioni prædictæ proportionato. Per vocem *media naturalia* designantur facultates humanæ, quatenus sunt naturaliter aptæ ad Deum cognoscendum et amandum; imò auxilium divinum indebitum adjuvans mentem ad cognitionem et amorem Dei intra sphaeram naturalem.

*Supernaturalis*: id est, excedens naturam humanam et ipsi indebitus.— *Supernaturalem* dicimus statum in quo finis et media ad finem sunt supernaturalia. Per vocem *finis supernaturalis* designatur Deus videntus intuitivè, id est, facie ad faciem seu absque intermedio, et amandus fruitivè seu immediate. Per vocem *media supernaturalia* designantur media quibus mens humana visionis intuitivæ et amoris fruitivi fit capax, scilicet: gratia supernaturalis, habitualis et actualis, et media ad eam obtinendam destinata.

2º Status naturalis potest esse, vel status naturæ puræ, vel status naturæ integræ.

Status *naturæ puræ*, id est sibi derelictæ, est status in quo, cum fine et mediis naturalibus, homo nasceretur sine peccato, sed obnoxius ignorantiae, errori, concupiscentiae, dolori, morbo et morti.

Status *naturæ integræ*, id est dono gratuito ad perfectionem naturæ possibilem elevatæ, est status in quo, cum fine et mediis naturalibus, homo nasceretur absque peccato, et exemptus ignorantia, errore, concupiscentia, dolore, morbo et morte.

3º Status supernaturalis species pendent ex variis hypothesebus quæ de hoc statu fieri possunt.

1. Positâ elevatione ad finem supernaturalem, homo potest nasci, vel absque gratiâ sanctificante, sed cum

mædiis eam acquirendi: tunc status dicitur *supernaturalis sine addito*; — vel cum gratiâ sanctificante, et status dicitur *justitiæ originalis*.

2. Elementis statûs justitiæ originalis addi possunt accidentalialia statûs naturæ integræ, et status dicitur *innocentiæ*; — vel accidentalialia statûs naturæ puræ, qui status nullum inter theologos nomen sortitus est.

3. Homo potest in statu sibi assignato perseverare, et tunc status dicitur *perseverantiæ*; — aut non perseverare, et status dicitur *naturæ lapsæ*.

4. Homo lapsus potest non reparari, et status dicitur *naturæ lapsæ non reparatæ*; — vel reparari, et status dicitur *naturæ lapsæ reparatæ*.

5. Reparatio, si supponatur, potest esse imperfecta, et status dicitur *naturæ absque satisfactione perfectâ reparatæ*; — vel perfecta, et status dicitur *naturæ satisfactione perfectâ reparatæ*. Quibus positis,

RESP. In genere possibles sunt omnes et soli status, nec in se, nec divinis perfectionibus repugnantes.

Duabus propositionibus æquivalet principium positum:

1<sup>a</sup> Impossibiles sunt status in se, vel divinis perfectionibus repugnantes. — Impossibiles sunt status repugnantes in se: nam quod repugnat in se absolute et cuilibet enti impossibile est; — vel divinis attributis: nam imperfectum, imò malum est ens naturam suam actibus contradicere; Deus proindè, eligendo statum perfectionibus repugnantem, imperfectus et malus evaderet, quod impossibile est.

2<sup>a</sup> Possibiles sunt status in se, aut divinis attributis non repugnantes: nam Deus, utpotè infinitè liber et

potens, omnia potest, exceptis tantum actibus qui in se, vel divinis attributis repugnant.

Ex hoc principio deducuntur omnes propositiones ad materiam præsentem spectantes.

Ex primâ propositione: *Impossibiles sunt status in se, vel attributis divinis repugnantes*, tria deducuntur corollaria :

*Corol. I.* Impossibilis est omnis status in quo Deus non esset finis ultimus hominis, siquidem in Quæst. I<sup>a</sup>, initio hujus *Expositionis theologicæ*, probavimus Deum, positâ hominis naturâ, non potuisse ei assignare finem ultimum à se distinctum.

*Corol. II.* Impossibilis est omnis status in quo homo non haberet media Deum cognoscendi et amandi. Siquidem homo solummodo per cognitionem et amorem Deo frui potest; ergo, si homini deessent media ad cognoscendum et amandum Deum necessaria, ad finem pervenire non posset; proindè Deus sibi contradiceret, assignando finem simulque denegando media ad finem, quod impossibile est.

*Corol. III.* Impossibilis est omnis status in quo homo nasceretur vitiatus culpâ absolutè independenti à facto humano. Nam in dictâ hypothesi Deus esset auctor peccati, quod repugnat ipsius Sanetitati.

Ex alterâ propositione: *Possibiles sunt omnes status in se, et perfectionibus divinis non repugnantes*, deducuntur corollaria sequentia, quæ ab omnibus Christianis admittuntur omnia, excepto tamen corollario de possibilitate status naturæ puræ, quæ rejicitur à Luthero, Calvino, Baio et Jansenio.

*Corol. I.* Possibilis est status naturalis in genere.

**Prob. 1<sup>a</sup>.** Non repugnat in se, seu naturæ humanæ ; nec attributis divinis.

1<sup>o</sup> Non repugnat *in se*, scilicet non opponitur naturæ humanæ : secus natura humana exigeret finem et media supernaturalia, id est, sibi dignitate superiora, quod absurdum est.

2<sup>o</sup> Non *attributis divinis* : non sapientiæ : nam sapientia id unum exigit, scilicet ut homini assignentur finis Deo dignus et media fini proportionata ; porro finis naturalis est Deo dignus, cum sit Deus ipse ; et media naturalia fini naturali proportionata. Non bonitati : nam bonitati sufficienter satisfacit, si conditio hominis talis sit ut existentia ipsi sit potior quam non existentia ; atqui, etiam in statu naturali, existentia est homini nihilo præferenda. Non justitiæ : nam justitia solummodo exigit ut Deus det homini finem et media ipsius naturæ strictè accommodata. Non sanctitati : id unum repugnaret divinæ sanctitati, si homo nasceretur vitiatus peccato ab humano facto prorsus independenti ; porro in statu naturali homo nasceretur à peccato immunis.

**Prob. 2<sup>a</sup>.** Si status naturalis non est possibilis, ergo destinatio hominis ad visionem intuitivam non est gratia, sed homini debita ; non est supernaturalis, sed naturalis : porro hæc propositio contradicit Ecclesiæ fidei, ejusque auctoritati dogmaticæ, cum propositio sequens, 21 Baii : *Humanæ naturæ sublimatio et exaltatio in consortium divinæ, debita fuit integritati primæ creationis, ac proinde naturalis dicenda est, et non supernaturalis*, approbante Ecclesiâ, damnata fuit à Pio V anno 1567, à Gregorio XIII an. 1579, ab Urbano VIII an. 1641.

**Corol. II.** Possibilis est status naturæ puræ.

*Prob. 1<sup>a</sup>.* Res ita est, si accidentia status naturæ puræ, scilicet ignorantia, error, concupiscentia, dolor, morbus et mors non repugnent naturæ humanæ, nec perfectionibus divinis. Atqui,

1<sup>o</sup> Non repugnant naturæ hominis, 1. Ignorantia: cum intelligentia humana sit finita. 2. Error: etenim intellectus humanus in errorem incidit ideas oppositas consociando, quia rerum naturam ignorat. 3. Concupiscentia: homo enim naturaliter constat carne et spiritu; ratione carnis, propensionem habet ad bonum sensibile; ratione spiritus, habet propensionem ad bonum spirituale: porro ex his contrariis propensionibus sponte nascitur luctamen carnis contra spiritum, seu concupiscentia. 4. Dolor: dolor est naturæ humanæ possibilis et conveniens. Possibilis: facto constat. Conveniens: anima enim debet saluti corporis invigilare, proinde de ipsius malo subito moneri, simulque moveri ad malum amovendum; porro nullum ad hos fines obtinendos medium dolore efficacius, ut evidens est. 4. Morbus et mors: corpus humanum, sicut corpus quodlibet dividi et alterari potest vi causarum externarum, ac proinde naturâ suâ, morbo et morti obnoxium est.— Ex suprâ dictis constat accidentia naturæ puræ ex naturâ hominis sponte fluere, nedum illi repugnent.

2<sup>o</sup> Non repugnant divinis attributis: nec sapientiæ, nec bonitati, nec justitiæ, propter rationes in præcedenti propositione expositas;

Nec sanctitati: Si status naturæ puræ sanctitati divinæ repugnaret, maximè ratione peccati aut concupiscentiæ. Porro 1. non ratione peccati: nam homo in hoc statu absque peccato nasceretur. 2. Neque ratione

\*



concupiscentiæ: concupiscentia in statu naturæ puræ, homini innata, repugnaret sanctitati Dei, vel quia esset in se mala, vel quia esset occasio peccati; atqui neutrum dici potest. Non quia esset in se mala: etenim concupiscentia, seu colluctatio carnis contra spiritum, oritur ex appetitu boni sensibilis, qui in se conformis est naturæ mixtæ hominis, et nihil in se mali continet. Non quia est occasio peccati: hæc enim occasio peccati ex naturâ hominis oritur, ut suprâ probatum est; est libera, nam homo potest resistere concupiscentiæ; maximam utilitatem importat, concurret enim ad conservationem et ad meritum hominis. Ergo, salvâ sanctitate, Deus potest concupiscentiam non destruere, siquidem ex consensu omnium licet ponere, à fortiori non tollere occasionem peccati, si adsint rationes sufficientes.

*Prob. 2<sup>a</sup>. Propositiones sequentes Baïi: Deus non potuisset talem creare hominem qualis nunc creatus est... Integritas primæ creationis non fuit indebita naturæ humanæ, sed naturalis ejus exaltatio, damnatæ sunt à Pio V, Gregorio XIII, Urbano VIII.*

*Corol. III. Possibilis est status naturæ integræ.*

*Prob. 1<sup>a</sup>. Res ita est, si Deus potuerit, privilegio speciali, homini, etiam in statu naturali posito, perfectiones concedere oppositas defectibus naturæ puræ; atqui Deus hoc potuit. Talis enim concessio 1. non repugnat naturæ humanæ, quæ hoc dono perficitur, nedum destruat. 2. Nec repugnat divinis perfectionibus, quæ illa concessione perfectius manifestantur.*

*Prob. 2<sup>a</sup>. Deus concessit has perfectiones primo*

homini; ergo perfectiones illæ sunt possibiles in statu innocentie; ergo in statu naturali, si nulla assignari possit ratio valida differentie statuum sub illo respectu: porro nulla assignari potest.

*Corol. IV.* Possibilis est status *supernaturalis in genere.*

*Prob. 1<sup>a</sup>.* Ad hoc sufficit ut Deus possit hominẽ concedere capacitatem visionis intuitivæ et media ad eam obtinendam necessaria; atqui hæc concessio possibilis est. Etenim 1. non repugnat naturæ humanæ, siquidem capacitati visionis abstractæ addi potest capacitas visionis intuitivæ; mediis obtinendi visionem abstractam addi possunt media obtinendi visionem intuitivam, quin inde destruaturs natura humana: 2. Nee repugnat perfectionibus divinis; econtrà perfectiones divinæ hoc dono perfectiùs manifestantur.

*Prob. 2<sup>a</sup>.* Status supernaturalis primitus existit et nunc existit; ergo possibilis est.

*Corol. V.* Possibilis est status *supernaturalis sine addito.*

*Prob.* Si impossibilis esset status ille, maximè quia repugnaret hominem destinatum ad finem supernaturalem nasci sine gratiâ justificante, quæ est medium necessarium ad visionem intuitivam. Porro hæc ratio nulla est, nam in hoc statu homo haberet gratiam actualem, cujus ope gratiam sanctificantem obtinere posset.

*Corol. VI.* Possibilis est status *justitiæ originalis.*

*Prob. 1.* Nedum hic status repugnet; econtrà magis consentaneus est homini ad visionem intuitivam destinato; siquidem in hoc statu homo ab ortu possideret

gratiam sanctificantem, medium immediatum ad finem.  
2. Nec repugnat divinis attributis, quæ indè perfectius quàm in præcedenti statu manifestarentur.

*Corol. VII.* Possibilis est status in quo elementis statûs supernaturalis essentialibus consociantur accidentia statûs naturæ puræ.

*Prob.* Hæc unio 1. non repugnat proprietatibus hominis naturalibus : siquidem probavimus possibilitatem statûs naturæ puræ. 2. Nec repugnat proprietatibus hominis ad statum supernaturalem elevati : nulla enim essentialis oppositio assignari potest inter gratiam sanctificantem et accidentia statûs naturæ puræ, ità ut gratia nècessariò destruatur ignorantia, errore, concupiscentia, dolore, morbo, morte. Aliundè in statu actuali homo subijcitur accidentibus naturæ puræ, et potest simul possidere gratiam sanctificantem. 3. Unio prædicta non repugnat perfectionibus divinis : in hoc statu perfectius manifestantur quàm in statu naturæ puræ. qui tamen est possibilis.

*Corol. VIII.* Possibilis est status innocentia, seu status in quo elementis statûs supernaturalis consociantur accidentia statûs naturæ integræ.

*Prob. 1<sup>a</sup>.* Consociari possunt accidentia naturæ integræ statui naturali ; à fortiori statui supernaturali, qui multò perfectior est.

*Prob. 2<sup>a</sup>.* Adam creatus est in hoc statu. Ergo.

*Corol. IX.* Possibilis est status perseverantia.

*Prob.* Nam Deus constanter præbuit homini media ad finem, quorum ope liberè perseverare potest.

*Corol. X.* Possibilis est status naturæ lapsæ.

*Prob.* In statu naturæ lapsæ comprehenduntur : 1.

peccatum hominis, 2. lapsus hominis à statu priori per peccatum. Atqui hæc duo sunt possible.

1<sup>o</sup> Possible est peccatum hominis : homo enim possidet libertatem contrarietatis, undè potest inter bonum et malum eligere.

2<sup>o</sup> Possibilis est lapsus hominis in statum inferiorem per peccatum : lapsus est Adam, ipsius peccato lapsa quoque tota humanitas ; hic lapsus reputatur omnium profundissimus ; possibilis est ergo quilibet lapsus in genere, si prior fuerit possible. Atqui,

1. Possibilis fuit lapsus Adami : nam Deus potuit privilegia, quibus Adamum donaverat, ipsius fidelitati alligare ; quo posito, Adam per peccatum perdit cum gratiâ privilegia obedientiæ promissa, labitur proindè in statum inferiorem.

2. Possibilis fuit lapsus totius humanitatis : duo includit lapsus posteritatis Adami : amissio privilegiorum naturæ humanæ indebitorum ; peccatum originale. Porro hæc duo sunt possible. Amissio privilegiorum : nam Deus potuit, salvis perfectionibus, punire peccatum patris privando filios donis eorum naturæ indebitis. Peccatum originale : variæ quidem sunt opiniones circa hujus peccati naturam ; quidquid autem sit, ejus impossibilitas nequit probari, et possibilitas saltem concluditur ex ejus existentia per revelationem certò probatâ.

*Corol. XI.* Possibilis est status naturæ lapsæ non reparatæ.

*Prob. 1<sup>a</sup>.* Deus nullâ lege tenetur reparare hominem liberè lapsum.

*Prob. 2<sup>a</sup>.* Deus angelos lapsos non reparavit, ergo à pari poterat hominem lapsum non reparare.

**Prob. 3<sup>a</sup>.** Si status naturæ lapsæ non reparatæ est impossibilis, ergo necessaria fuit reparatio, ergo jam non est actus misericordiæ divinæ, quod contradicit Scripturæ et fidei Ecclesiæ.

**Corol. XII.** Possibilis est status naturæ reparatæ.

Hæc propositio evidenter includitur in sequentibus.

**Corol. XIII.** Probabilior est opinio eorum qui affirmant possibilem esse hominis reparationem absque satisfactione perfectâ.

De quæstione præsentî duplex est inter theologos opinio: Juxta primam, attentâ solummodò potentiâ Dei, possibilis est reparatio absque satisfactione perfectâ; impossibilis est autem, attentâ ratione sanctitatis et justitiæ, nam perfectiones istæ exigunt ut Deus odio infinito peccatum persequatur et puniat quamdiù existit; porro existit quamdiù pro eo plenè non est satisfactum. Secunda autem opinio negat necessitatem satisfactionis perfectæ ad reparationem. Equidem, inquit ipsius defensores, homo perversus, in suâ perversitate manens, non potest Deo reconciliari; obstant sanctitas et justitia: sed gratias actuales recipiens potest illarum ope ad Deum se convertere. Porro, positâ conversione, nihil obstat peccatorum remissioni, et, remisso peccato, sanctitas et justitia jam non exigunt satisfactionem perfectam. Quæ opinio videtur probabilior.

**Corol. XIV.** Possibilis est reparatio per satisfactionem perfectam.

**Prob.** Infra probabimus Verbum Incarnatum perfectam pro peccatis hominum satisfactionem Deo obtulisse; ergo realis est satisfactio perfecta, à fortiori possibilis.

## QUÆSTIO II.

QUINAM SINT STATUS A DEO DETERMINATI, *id est*, A DEO DECRETI  
VEL PERMISSI?

RESP. Tres sunt status à Deo determinati: 1<sup>o</sup> decrevit statum innocentiae, 2<sup>o</sup> permisit lapsum hominis, 3<sup>o</sup> decrevit reparationem.

Omnes actus Dei ad extrà voluntate aeternâ prædeterminantur, ergo prædicti status à Deo fuerunt ab æterno determinati, si reverà in tempore exstiterunt; atqui rem ità esse ex dicendis constabit.

---

## ACTUS SECUNDUS.

DEUS VULT HOMINIS SALUTEM, MEDIAQUE AD EAM  
CONSEQUENDAM NECESSARIA.

*Prænot.* 1. Juxta Prædestinatianos, Deus solos electos vult salvare. 2. Calviniani censent quosdam homines esse à Deo exclusos à gloriâ, etiam ante peccatum originale, et *antelapsarii*; solùm post peccatum originale, et *postlapsarii* appellantur. 3. Jansenistæ fatentur quidem Deum, ante peccatum originale, omnium voluisse salutem; admittunt etiam in Deo post peccatum originale voluntatem salutis omnium, sed otiosam, sterilem, nec præbentem homini gratias verè et relativè sufficientes.

Catholici admittunt generaliter in Deo voluntatem salutis omnium sinceram, ità ut Deus omnibus conferat gratias verè et relativè sufficientes. Quidam tamen, inter quos Sfondratus et Vasquez, excipiunt parvulos ante baptismum defunctos.

Undè actus prædicti probatio et explicatio tres exigit quæstiones: 1<sup>o</sup> utrùm Deus velit salutem hominum; et, in hypothesi affirmativà, quorum hominum; 2<sup>o</sup> utrùm Deus velit hominibus media ad salutem necessaria, et quibus hominibus; 3<sup>o</sup> quali voluntate Deus velit salutem et media?

### QUÆSTIO I.

UTRUM DEUS VELIT SALUTEM HOMINUM, ET QUORUM HOMINUM?

RESP. 1<sup>o</sup> Deus voluit salutem omnium hominum in statu innocentiae. 2<sup>o</sup> Posito peccato originali, Deus vult salutem aliorum quàm prædestinatorum. 3<sup>o</sup> Etiam posito peccato originali, Deus vult salutem omnium et singulorum hominum. 4<sup>o</sup> Specialiter vult salutem infantium sine baptismo morientium.

I<sup>a</sup> Ppo. — Deus voluit salutem omnium hominum in statu innocentiae.

*Prob. 1<sup>a</sup>.* Ex dicendis infra, Deus primo homini et in Adamo ejus posteritati contulit media ad salutem, scilicet gratiam sanctificantem, gratias actuales, privilegia status innocentiae; ergo voluit salutem omnium, siquidem Ens summè sapiens non potest velle media quin simul et finem velit.

*Prob. 2<sup>a</sup>.* In statu innocentiae, sicut in statu præsentis, non fuisset sors æterna inter visionem intuitivam et reprobationem æternam media. Quo posito, homines innocentes à salute exclusi ad damnationem æternam solâ voluntate divinâ fuissent creati, quod repugnat sapientiæ, bonitati et justitiæ Dei.

II<sup>a</sup> Ppo. — Posito peccato originali, Deus vult salutem aliorum quàm prædestinatorum. (*Ppo est de fide.*)

**Prob. 1<sup>a</sup>. Arg. theol.** In propositione sequenti probabimus Deum velle salutem omnium hominum, à fortiori Deus vult salutem aliorum quàm prædestinatorum.

**Prob. 2<sup>a</sup>. Script.** Joan. 6, 39 : *Hæc est autem voluntas ejus, qui misit me, Patris: ut omne, quod dedit mihi, non perdam ex eo, sed resuscitem illud in novissimo die.* Ibid. 17, 12 : *Quos dedisti mihi custodiri, et nemo ex eis periit, nisi filius perditionis...* Ex primo textu, Deus vult salutem omnium quos Filio dedit. Ex secundo, inter eos quos Filio dedit, unus periit, scilicet *filius perditionis*. Ergo Deus voluit salutem unius hominis qui periit; ergo vult salutem aliorum quàm prædestinatorum.

Joan. 6, 40 : *Hæc est autem voluntas Patris mei, qui misit me: ut omnis qui videt Filium et credit in eum habeat vitam æternam.* Ibid. 3, 16 : *Sic... Deus dilexit mundum, ut Filium suum unigenitum daret: ut omnis, qui credit in eum, non pereat, sed habeat vitam æternam.* Deus vult vitam æternam iis qui credunt in Filium; porro omnes qui credunt in Filium non salvantur; ergo Deus vult salutem aliorum quàm prædestinatorum.

**Prob. 3<sup>a</sup>. Fid. et auct. Eccl.** Hæc habet symb. Nicæn.: *Credo... in unum D. N. J. C., qui propter nos homines, et propter nostram salutem, descendit de cælis. Et incarnatus est... Crucifixus etiam pro nobis.* Concil. Trid. sess. 6, c. 6, de adultis qui accedunt ad baptismum ut purificationem accipiant sic loquitur : *Fidentes Deum sibi propter Christum propitium fore.* Undè sic : Omnes homines ex fide divinâ credere tenentur Christum natum, passum et crucifixum fuisse *propter salutem* hominum; specialiter baptizati tenentur credere



*Deum sibi propter Christum propitium fore.* Ergo certum est, alioquin ex fide divinā non esset credendum, Christum velle omnium salutem, Deum baptizatis propter Christum propitium fore. Porro tamen, nec omnes homines, nec etiam omnes baptizati salvantur; ergo Deus vult salutem aliorum quā prædestinatorum.

Ab Innocentio X, et Alexandro VII, in constitutionibus ab universali Ecclesiā acceptis, hæc 3<sup>a</sup> Jansenii propositio: *Semi-pelagianum est dicere Christum pro omnibus omninò hominibus mortuum esse*, ut hæretica fuit damnata, eo sensu intellecta, ut Christus pro salute duntaxat prædestinatorum mortuus sit. Ergo *de fide* est contradictoria, scilicet Christum mortuum esse pro aliis quā prædestinatis. Ergo Deus vult salutem aliorum quā prædestinatorum; vult enim salutem omnium pro quibus mortuus est.

III<sup>a</sup> Ppo.— Etiam posito peccato originali, Deus vult salutem omnium et singulorum hominum. (*Ppo fidei proxima.*)

*Prob. 1<sup>a</sup>. Arg. theol.* Inferiùs, ubi *de Gratia* probabimus Deum omnibus offerre gratias sufficientes; ergo vult omnium salutem, nam si Ens sapiens vult media, vult finem.

*Prob. 2<sup>a</sup>. Script.* Matth. 18, 11: *Venit... filius hominis salvare quod perierat.* I Tim. 2, 4 et seq. Qui (Deus) omnes homines vult salvos fieri, et ad agnitionem veritatis venire. Unus enim Deus, unus et mediator Dei et hominum Homo Christus Jesus: qui dedit redemptionem semetipsum pro omnibus. II Petr. 3, 9: *Patienter agit propter vos (Dominus); nolens aliquos perire, sed omnes ad pœnitentiā reverti.* Nulla

est ratio textus citatos à sensu naturali detorquendi ; porro in hoc sensu accepti evidenter æquivalent nostræ propositioni.

*Prob. 3<sup>a</sup>. Tradit.* Fatente Jansenio, ab omnibus græcis Patribus propositio admittitur.

Inter Latinos autem, S. Cyprianus, epist. 52, scribit : *Deus utique neminem vult perire*. S. Ambrosius, lib. de Paradiso : *Venerat Dominus Jesus omnes salvos facere peccatores... ostendit omnibus quòd omnes voluit liberare*. S. Augustinus, de spiritu et litterà, c. 23 : *Vult autem Deus omnes salvos fieri, non sic tamen ut eis adimat liberum arbitrium*.

*Prob. 4<sup>a</sup>. Fid. et auctor. Eccl.* Conclusio superius deducta ex Symbolo Nicæno propositioni actuali sicut et præcedenti applicari potest.

Conc. Trid. sess. 6, c. 3 : *Verùm, etsi Christus pro omnibus mortuus est, non omnes tamen mortis ejus beneficium receperunt, sed ii duntaxat quibus meritum passionis ejus communicatur*.

Propositio Jansenii superius citata : *Semi-pelagianum est dicere Christum pro omnibus omninò hominibus mortuum esse*, ut falsa, temeraria et scandalosa damnata fuit.

*Prob. 5<sup>a</sup>. Arg. indirect.* Si rejicienda esset propositio, maximè quia Deus quibusdam hominibus media ad salutem necessaria denegaret ; porro hoc falsum esse ex infrà dicendis constabit.

IV<sup>a</sup> Ppo.— Specialiter Deus vult salutem infantium sine baptismo morientium.

*Prob. 1<sup>a</sup>.* Deus vult salutem omnium, ergo infantium non baptizatorum.

*Prob. 2<sup>a</sup>. II Cor. 5, 14 :* Si unus (Christus) pro om-

*nibus mortuus est, ergo omnes mortui sunt.* Ergo Christus mortuus est pro omnibus qui in Adamo mortui sunt; ergo mortuus est pro infantibus qui omnes in Adamo peccatum originale contraxerunt. Ergo Deus vult salutem illorum.

## QUÆSTIO II.

UTRUM DEUS VELIT MEDIA AD SALUTEM NECESSARIA, ET QUIDBUS HOMINIBUS?

**RESP.** Deus vult media ad salutem necessaria omnibus hominibus, sive in statu innocentiae, sive in statu naturæ lapsæ.

**Prob. 1<sup>a</sup>.** Deus vult salutem omnium hominum, omnibus præcipit ut salutem sperent, ut ad salutem tendant. Ergo Deus omnibus hominibus vult media ad salutem: alioquin esset insipiens, cum vellet finem sine mediis; crudelis, cum præciperet vanam spem; injustus, cum præciperet impossibile: quod absurdum est.

**Prob. 2<sup>a</sup>.** Christus pro omnibus mortuus est, ergo omnibus vult media ad salutem.

**Prob. 3<sup>a</sup>.** Inferiùs, ubi *de Gratiâ*, probabitur gratias verè et relativè sufficientes à Deo omnibus hominibus concedi; ergo.

## QUÆSTIO III.

QUALI VOLITIONE DEUS VELIT SALUTEM ET MEDIA?

**Præmittenda.** Volitio Dei potest esse: 1<sup>o</sup> vel interior et realis, vel exterior et signi. *Interior*, seu sincera, quâ Deus vult sincerè, realiter; *exterior et signi*, quâ Deus exteriùs manifestat velle quod reverà non vult:

sic Deus nolebat Isaac immolari, quamvis illud præceperit.

2<sup>o</sup> Volitio interior est alia absoluta, alia conditionalis. *Absoluta*, quæ Deus vult independenter ab omni conditione; *conditionalis*, quæ vult, sed tantum posita tali conditione.

3<sup>o</sup> Interior et conditionalis est efficax, vel inefficax. *Efficax*, si effectum sortiatur; *inefficax*, si non sortiatur. Quibus positis,

Quæstio duplex est: 1<sup>a</sup> de *fine*, 2<sup>a</sup> de *mediis*. Porro volitio Dei circa media duo includit: voluntatem instituendi media in genere, voluntatem ea variis hominum speciebus applicandi.

His quæstionibus triplici propositione respondemus:

1<sup>o</sup> Deus vult media salutis in genere voluntate efficaci, absolutâ et interiore.

2<sup>o</sup> Deus vult mediorum salutis applicationem 1. infantibus sine baptismo morientibus, voluntate inefficaci, conditionali, sed sincera; 2. infidelibus adultis, voluntate efficaci, absolutâ, sincera, juxta D. Thomam; 3. item omnibus Christianis.

3<sup>o</sup> Deus vult salutem prædestinatorum voluntate efficaci, absolutâ, juxta quosdam, voluntate conditionali juxta alios, voluntate sincera; reproborum autem, voluntate inefficaci, conditionali, sincera tamen.

1<sup>a</sup> Ppo.— Deus vult media salutis, in genere, voluntate efficaci, absolutâ et interiore.

*Prob.* Vult voluntate *efficaci*: Deus enim concessit Adamo in statu innocentie gratiam habitualement et gratias actuales sufficientes; hominique lapso concessit redemptionem, reparationem, et omnia media ex illis

donis emanantia. — *Absoluta*: Deus enim voluit et concessit hæc omnia independenter ab omni conditione. — *Sincera*: nam, si interior, seu sincera non fuisset, voluntas Dei ad actum non fuisset redacta.

*II<sup>a</sup> Ppo.* — Deus vult mediorum salutis applicationem: 1. infantibus sine baptismo morientibus, voluntate inefficaci, conditionali, sed sincera; 2. infidelibus adultis, ex D. Thomâ, voluntate efficaci, absoluta, sincera; 3. item Christianis omnibus.

*Prob. p. part. 1<sup>a</sup>.* Infantibus sine baptismo morientibus mediorum salutis applicationem Deus vult voluntate inefficaci, conditionali, sed sincera. — *Voluntate inefficaci*: res patet ex hypothesi; hic enim loquimur de infantibus sine baptismo morientibus; — *conditio-nali*: non est enim absoluta, alioquin baptismum reciperent; sed Deus his infantibus vult baptismum sub istis conditionibus, scilicet, parentes velint, vel administratio non exigit miraculum; — *sincera* tamen: Princeps enim ad utilitatem societatis instituens media generalia, nullum eorum applicationi ponens obicem, censetur velle sincerè bonum eorum etiam quibus inutilia sunt, quamvis non sustulerit obstacula humanam voluntate, aut legibus generalibus orta. A pari Deus, qui pro salute omnium baptismum instituit, ministros ipsius administrationi præposuit, parentibus mandavit ut saluti filiorum per baptismum invigilarent, censetur velle sincerè hujus sacramenti administrationem, quamvis permittat parentum negligentiam, malam voluntatem, et non tollat per derogationem legibus naturalibus impedimenta ejus administrationi obstantia.

*2<sup>a</sup> p.* Juxta D. Thomam, infidelibus adultis Deus

vult media salutis voluntate efficaci, absolutâ, sincerâ. — *Voluntate efficaci*: Juxta Doctorem Angelicum, quamvis homo non possit viribus suis se præparare ad divinam vocationem; potest tamen auxilio gratiæ à Deo sibi oblata peccatum vitare. Cùm autem Deus sit semper paratus ad vocandum et illuminandum, certò infidelis, si non peccet, vocabitur et illuminabitur, vel per hominem, vel per angelum: per hominem, ità disponente Deo res humanas ut id sine miraculo fieri possit; per angelum, illuminante interiùs angelo, quod non est miraculum, sed quid pertinet ad divinam providentiam supernaturalem. Ex quo videre est Deum velle voluntate efficaci infidelibus media salutis. — *Absolutâ*: nam Deus huic concessioni non apponit conditionem boni usûs, cùm mediis prædictis omnibus infidelibus oblatis multi abutuntur; neque conditionem possibilitatis gratiarum concessionis sine miraculo, siquidem, ut diximus, vocatio infidelis fit mediis ad supernaturalem providentiam pertinentibus. — *Sincerâ*: patet.

Diximus: juxta D. Thomam; quidam nempe theologi arbitrantur Deum velle media salutis infidelibus, non voluntate *efficaci*, cùm media ad finem necessaria eis reverà non offerantur; non voluntate *absolutâ*, alioquin fides eis annuntiaretur; sed *conditionali*, id est, si media offerri possent, sine miraculo; voluntate tamen *sincerâ*, ob rationem suprâ expositam ubi de infantibus.

3<sup>a</sup> p. Christianis Deus vult media salutis voluntate efficaci, absolutâ, sincerâ. — *Voluntate efficaci*: Inferiùs, ubi de *Gratiâ*, probabitur Deum omnibus Christianis, etiã induratis, obcæcatis etiãque reprobatis præ-

bere media ad salutem sufficientia; ergo Deus vult Christianis media ad salutem voluntate efficaci. — *Absoluta*: si voluntas Dei alicui conditioni subjiceretur, vel conditioni boni usûs gratiarum, vel conditioni possibilitatis gratiarum concessionis sine miraculo. Atqui neutrum affirmari potest; neque prius, nam indurati et obcæcati gratiis sibi oblati quotidie abutuntur; neque posterius, gratia enim interna, de quâ hic agitur, semper concedi potest immediatè à Deo absque miraculo. — *Sincera*: hoc evidens est.

III<sup>a</sup> Ppo. — Deus vult salutem prædestinatorum voluntate efficaci, voluntate absolutâ, juxta quosdam theólogos, conditionali, juxta alios, voluntate sincera; reproborum autem, voluntate inefficaci, conditionali, et tamen sincera.

*Prob. 1<sup>a</sup> p.* Deus vult salutem prædestinatorum voluntate efficaci; siquidem salutem consequuntur; — *absolutâ*, juxta quosdam...: dicunt enim alii Deum velle salutem prædestinatorum antecedenter prævisis meritis, alii Deum velle salutem prædestinatorum consequenter prævisis meritis; et sub illo respectu voluntas Dei dicitur absoluta vel conditionalis: agnoscunt autem omnes obtentionem salutis non fieri absque operibus bonis, et sic esse conditionatam (hanc quæstionem paulò infrâ tractabimus ubi de *Prædestinatione*); — *sincera*: nam efficax est.

*2<sup>a</sup> p.* Reproborum autem Deus vult salutem voluntate inefficaci: siquidem non salvantur; — *condicionali*: secus voluntas esset absoluta et salvarentur (conditiones autem appositæ variæ sunt: pro adultis, Deus vult illos salvare, si velint uti mediis propositis; pro

infantibus, si parentes velint, et non obstant leges naturales); — *sincerâ*: erga adultos, nam salus ipsorum ab ipsis pendet; erga infantes, nam quod diximus supra de voluntate circa administrationem baptismi dici potest de voluntate circa finem.

## ACTUS TERTIUS.

### DEUS PRÆDESTINAT ALIOS AD GLORIAM, ALIOS AD POENAM ÆTERNAM.

De duobus ergo disserendum: 1<sup>o</sup> de *prædestinatione* electorum, seu de *prædestinatione* propriè dictâ; 2<sup>o</sup> de *prædestinatione* reproborum, seu potius de *reprobatione*.

#### § I. — DE PRÆDESTINATIONE PROPRIÈ DICTA.

*Prædestinatio est: divina et æterna destinatio creaturæ intellectualis ad gloriam, præparatioque mediorum efficacium ad illam.*

Circa prædestinationem errarunt: 1<sup>o</sup> Fatalistæ, affirmantes vitam futuram hominis esse prædeterminatam quidem, sed non à liberâ Dei voluntate; 2<sup>o</sup> Pelagiani et Semipelagiani. Equidem admittebant Deum ab æterno præscire quinam obtenturi essent gloriam, ac proinde illis ab æterno gloriam præparasse. Juxta Pelagianos autem merita propriis viribus hominis comparata causa sunt unica prædestinationis; et, juxta Semipelagianos, initium et præparatio ad bona opera sunt ab homine: contendebant ergo prædicti hæretici in homine omnino esse causam prædestinationis, non autem à Deo. Ab



eis rejiciebatur prædestinatio, qualis in sensu catholico intelligitur, quia libertatem tolleret, hominemque in secordiam et desperationem induceret.

Inter theologos qui prædestinationem admittunt in sensu catholico, affirmant *alii* eam esse absolutam et à meritorum futurorum prævisione prorsus independentem, ità præcipuè Thomistæ; *alii* eam à meritorum futurorum prævisione pendere, ità Molina, Lessius, Becanus, Tournely, etc.; *alii* absolutam esse prædestinationem ad gratiam efficacem, conditionatam verò prædestinationem ad gloriam, ità Congruistæ.

Disserendum 1<sup>o</sup> de existentia; 2<sup>o</sup> de proprietatibus prædestinationis.

#### I. De existentia prædestinationis.

*Quær. Utrùm admittenda sit prædestinationis existentia?*

*Resp. Affirmativè.*

*Prob. 1<sup>a</sup>. Arg. direct.* Res ità est, si Deus quosdam homines ab æterno destinaverit ad gloriam, et illis præparaverit medià efficacia; atqui hæc duo certa sunt.

1<sup>a</sup> p. Quosdam homines destinavit ad gloriam: Si quidem 1<sup>o</sup> Deus nihil operatur in tempore, quod ab æterno non præordinaverit; alioquin, vel inciperet velle in tempore, vel quid faceret præter intentionem, quod repugnat ipsius perfectioni. Ergo admittenda prædestinatio ad gloriam, cùm multis gloriam æternam sit concessurus. 2<sup>o</sup> Rom. 8, 29, 30: *Nam quos præcivit, et prædestinavit conformes fieri imaginis Filii sui... quos autem prædestinavit, hos et vocavit: et quos vocavit, hos et justificavit: quos autem justificavit, illos et*

*glorificavit. Ephes. 1, 5: Qui prædestinavit nos in adoptionem filiorum per Jesum Christum in ipsum, secundum propositum voluntatis suæ. 3<sup>o</sup> Conc. Trid. sess. 6, c. 12, docet: Nemo quoque, quamdiu in hac mortalitate vivitur, de arcano divinæ prædestinationis mysterio usque adeò præsumere debet ut certò statuat se omninò esse in numero prædestinatorum... Nam, nisi ex speciali revelatione, sciri non potest quos Deus sibi elegerit.*

*2<sup>a</sup> p. Deus præparat gratias efficaces: Nam Deus, utpotè summè sapiens, non potest velle finem quia velit media. Ergo cùm multos voluntate æternà ad gloriam destinaverit, eis media ad hunc finem efficacia ab æterno præparavit.*

*Prob. 2<sup>a</sup>. Argum. indirect. Si rejicienda esset prædestinatio, aut 1. quia destrueret hominis libertatem; aut 2. quia hominem in socordiam et desperationem induceret; siquidem, posito prædestinationis dogmate, cuique sic argumentari liceret: « vel sum prædestinatus, vel non; si prædestinatus, quidquid egero, salvabor; si contrà, quidquid egero, reprobus ero. » Atqui neutrum dici potest.*

*1<sup>o</sup> Prædestinatio non destruit hominis libertatem: Opinio de prædestinatione conditionatà est libera, ut infrà dicemus; porro, in illà opinione, prædestinatio non lædit libertatem. Prædestinatus enim non operatur bonum quia à Deo prædestinatur, sed Deus eum prædestinat quia eum tali modo acturum prævidet. Deus actus ejus prævidet quia ab æterno futuri sunt. Hic est ergo ordo rationis inter facta prædicta: actus ab æterno futuri, præscientia meritorum, prædestina-*

tio. Undè prædestinatio est ratione posterior præscientiæ, præscientia posterior actibus liberis hominis; proindè prædestinatio libertatem destruere non potest.

In opinione theologorum, qui affirmant absolutam esse prædestinationem ad gloriam et ad gratiam efficacem, conceduntur à Deo gratiæ, quæ naturâ suâ juxta Thomistas, congruitate suâ juxta Congruistas, effectum suum infallibiliter consequuntur. Porro in his opinionibus non facilè concipitur quomodò voluntas mota per gratias hujusmodi, libertatem conservet. Difficultatem conciliant tamen harum sententiarum defensores, affirmando gratias istius modi infallibiliter quidem, non verò necessariò, effectum suum producere. Undè remanet voluntati libertas. De hoc fusiùs ubi *de Gratiâ*.

2<sup>o</sup> Prædestinatio non inducit in socordiam et desperationem: Siquidem falsum est dilemma objectum. 1. Si verum esset, sic argumentari liceret de rebus temporalibus: « vel Deus prædeterminavit successum, vel non; si prædeterminaverit, quidquid egero scopum attingam; si contrà, quidquid egero ad finem non perveniam. » Porro nemo sanus non videt hujus sophismatis falsitatem in rebus temporalibus; à pari falsum est in rebus spiritualibus. 2. Falsum est in opinione prædestinationis conditionatæ; nam prædestinatio ab operibus pendet. Falsum est etiam in aliis opinionibus, cùm Deus, hominem ad gloriam prædestinando, simul determinet media ad gloriam absolutè necessaria. In qualibet ergo opinione bona opera sunt ad salutem requisita.

II. De Proprietatibus prædestinationis.

Hic tractandum 1. de gratuitate, 2. de certitudine prædestinationis.

I. De Gratuitate.

*Quær. Utrum prædestinatio sit gratuita, an verò pendeat ex meritis?*

Prædestinatio considerari potest *in se* et quoddam effectus.

I. Si quæstio sit de prædestinationis effectibus,

*Resp.* Tres effectus producit prædestinatio, vocationem, justificationem, glorificationem : constat ex Apostolo, Rom. 8, 30: *Quos autem prædestinavit (Deus), hos et vocavit : et quos vocavit, hos et justificavit : quos autem justificavit, illos et glorificavit.* Porro,

1<sup>o</sup> *Vocatio*, seu prima gratia excitans, quæ ad fidem vel ad contritionem excitamur, est gratuita.

*Prob.* Si homo primam gratiam mereri posset, eam mereretur absque gratiâ. Porro hoc est impossibile : nam 1. vires liberi arbitrii nullam habent proportionem ad gratiam ; 2. sub titulo *de Merito*, probabimus hominem non posse mereri absque gratiâ.

2<sup>o</sup> *Justificatio*, seu gratia sanctificans, est gratuita, id est non datur ex meritis de condigno præcedentibus.

*Prob.* Si homo posset gratiam sanctificantem mereri, eam mereretur absque gratiâ sanctificante ; porro hoc impossibile est. Siquidem 1. sub titulo *de Merito* ostendimus opus non esse meritorium de condigno, quin procedat ab homine justificato. 2. Concil. Trid. sess. 6, c. 8: *Gratis autem justificari ideò dicamur, quia*

nihil eorum quæ justificationem præcedunt, sive fides, sive opera, ipsam justificationis gratiam promeretur. Si enim gratia est, jam non ex operibus: alioquin, ut... Apostolus inquit, gratia jam non est gratia.

3<sup>o</sup> Gloria, seu vita æterna datur nobis ex præcedentibus meritis de condigno.

Prob. 1<sup>a</sup>. Matth. 5, 12: *Gaudete, et exultate, quoniam merces vestra copiosa est in cælis.* Rom. 2, 6: *Qui reddet unicuique secundum opera ejus.* Matth. 23, 34 et seq.: *Venite benedicti Patris mei, possidete paratum vobis regnum à constitutione mundi. Esurivi enim, et dedistis mihi manducare: sitivi, et dedistis mihi bibere: hospes eram, et collegistis me: nudus, et cooperuistis me; infirmus, et visitastis me: in carcere eram, et venistis ad me.* II Tim. 4, 7: *Bonum certamen certavi, cursum consummavi, fidem servavi. In reliquo reposita est mihi corona justitiæ, quam reddet mihi Dominus in illa die justus judex...* Unde vita æterna est merces, corona bonis operibus debita.

Prob. 2<sup>a</sup>. Concil. Trid. sess. 6, can. 52: *Si quis dixerit... ipsum (hominem) justificatum bonis operibus, quæ ab eo per Dei gratiam, et Jesu Christi meritum, cujus vivum membrum est, fiunt, non verè mereri augmentum gratiæ, vitam æternam, et ipsius vitæ æternæ, si tamen in gratiâ decesserit, consecutionem..., anathema sit.*

De his fusiùs sub titulo *de Gratiâ et Merito*.

II. Si prædestinatio consideretur in se,

Resp. Quædam sunt certa, quædam controvertuntur.

Certa. Ab omnibus admittuntur propositiones sequentes:

1<sup>o</sup> Sicut Deus in tempore confert primam excitantem gratiam sine ullo nostro merito, sic ab æterno decrevit illius donum absque ullo nostro merito.

2<sup>o</sup> Sicut in tempore confert gratiam sanctificantem sine meritis, sic ab æterno decrevit illius donum sine meritis.

3<sup>o</sup> Sicut in tempore confert gloriam propter merita, sic decrevit ab æterno illius donum propter merita.

*Controvertitur* autem utrùm vita æterna, quæ datur ex merito, prædestinetur ex merito.

De hac quæstione, ut suprà indicavimus, triplex est opinio.

*Prima* affirmat electionem ad gloriam pendere ex prævisis meritis. — Sic explicatur : Deus vult salutem omnium ; omnibus dat media ad salutem sufficientia, modo tamen inæquali. Ab æterno futurum est ut quidam gratiis sibi oblatis benè utantur, quidam autem abutantur. Undè gratiæ sunt, pro primis efficaces, pro secundis inefficaces. Deus præscientiâ suâ ab æterno omnia videns, prædestinat ad gloriam eos qui gratiâ sibi oblata benè sunt usuri, ad pœnam qui eâ sunt abusuri.

*Secunda* affirmat electionem ad gloriam esse gratuitam, quamvis detur vita æterna ex meritis. — Sic conciliantur in hac opinione propositiones apparenter incompatibiles : Deus prædestinat quosdam ad gloriam independentem ab ipsorum meritis ; vult ut electi perveniant ad gloriam per merita ; præparat ad meritum gratias *de se efficaces*, id est, infallibiliter, vi intrinsecâ, conducentes ad meritum ; in decreto suo videt merita futura ; vult ab æterno ea remunerare per gloriam,

quod exsequitur in tempore. Unde actus Dei sic apparent ordinati: in tempore concedit gloriam ob merita; decreto æterno determinaverat remunerationem meriti per gloriam; sed primò elegerat ad gloriam gratuitò.

*Tertia à Congruistis prolata, sic explicatur: Deus omnibus concedit gratias sufficientes quarum prævidet usum futurum pro circumstantiis. Speciali dilectione et misericordiâ, non verò attentis meritis, quosdam seligit; hos statuit ponere in circumstantiis in quibus scit certè eos gratiâ benè usuros et in eâ perseveraturos; eis tandem salutem decernit ob merita in eo statu obtinenda per gratias ex congruitate cum circumstantiis efficaces. Alios autem statuit relinquere in circumstantiis in quibus prævidet eos non benè usuros gratiâ; et sic eos negativè reprobat. Unde prædestinatio ad gratiam est gratuita, ad gloriam verò est ex meritis.*

Cùm verò gratiæ ad quas electus gratuitò prædestinatur sint ex congruitate cum circumstantiis efficaces, et infallibiliter ad gloriam perducant, hæc ultima opinio, quoad quæestionem præsentem, non essentialiter à secundâ differt.

*Observ.* Expositio rationum quibus nituntur opiniones prædictæ innumeras et intricatissimas discussiones exigeret, à quibus abstinemus, quia ex his nihil certum erui potest. De his opinionibus sufficiant observationes sequentes:

1<sup>a</sup>. Cuique licet quam voluerit amplecti, cùm nihil de eâ quæstione statuerit Ecclesia, et quæstio sit inter theologos acerrimè controversa.

2<sup>a</sup>. Opiniones de prædestinatione gratuitâ, vel ad gloriam, vel ad gratias efficaces, 1. minùs favent liber-

tati quàm opinio contraria. Etenim, juxta opinionem de prædestinatione absolutà ad gloriam, homo ante prævisionem actuum liberorum prædestinatur etiam ad gratias efficaces vi quarum certò et infallibiliter bonum operetur. Item in opinione Congruistarum, homo primò et absolutè prædestinatur ad gratias congruenter efficaces, quarum ope certò et infallibiliter meretur vitam æternam. Porro, posito gratiæ influxu infallibili, difficiliùs concipitur bonorum operum libertas. Dùm econtrà evidenter salva remanet in opinione contrarià, ex quà actus liber anterioritate rationis præcedit præscientiam quæ ipsa prior est decreto divino. 2. Minùs facilè conciliantur cum voluntate Dei circa salutem reprobatorum. Deus enim iis quos non prædestinat omittit dare gratias de se efficaces sine quibus homo certò non salvabitur. In contrarià verò opinione Deus cuique concedit gratias sufficientes, quas homo efficaces reddere potest consensu suo, et ope quarum certò salvabitur si velit. Undè in primà opinione reprobatio Deo, in secundà abusui libertatis tribuenda videretur. 3. Magis favent accusationi acceptionis personarum in Deo. In opinione enim prædestinationis gratuitæ, Deus sola voluntate, et absque ullo hominum merito, alios destinat ad gloriam, alios negativè reprobat, omittendo eorum prædestinationem. In contrarià autem opinione differentia sortis hominum ab eorum meritis pendet. 4. Minùs videntur congruæ sapientiæ et bonitati divinæ: ex modò dictis patet. 5. Minùs facilè et clarè respondent difficultatibus prædestinationem impugnantibus, ut suprà vidimus in probatione indirectà hujus dogmatis. De opinione affirmante prædestinationem ex



meritis sic scribit S. Franciscus Salesius ad P. Lessium, S. J.: *Sententia illa antiquitate, suavitate, ac Scripturarum nativâ auctoritate nobilissima, de prædestinatione ad gloriam post prævisa opera, sanè mihi gratissima fuit, qui nimirum eam semper ut Dei misericordiæ ac gratiæ magis consentaneam, veriore, et amabiliorem existimavi, quod etiam tantisper in libello de amore Dei indicavi.*

## II. De Certitudine.

Quær. *Utrùm prædestinatio sit certa, an incerta?*

Resp. Quæstio potest esse vel de certitudine *objectivâ*, vel de *subjectivâ*.

Si 1, id est, si quæretur utrùm prædestinatus sit certò gloriam obtenturus, *resp.* affirmative. Nam impossibile est ut decretum Dei absolutum effectu suo fraudetur, secùs voluntas divina non esset omnipotens: ergo prædestinatio certa est in se, seu *objectivè*, si sit Dei decretum absolutum. Porro res ita est, sive decretum prædestinationis sit absolutum, ut evidens est; sive sit ex prævisis meritis, siquidem decretum conditionatum fit absolutum verificatâ conditione.

Si 2, id est, si quæretur utrùm homo certò cognoscere possit se esse prædestinatum; *resp.* cum Concil. Trid. sess. 6, cap. 12: *...nisi ex speciali revelatione, sciri non potest quos Deus sibi elegerit.*

## § II.—DE REPROBATIONE.

Reprobatio adæquatè sumpta est: *non electio ad gloriam et pænæ æternæ præparatio.*

Undè duplex reprobatio: *negativa*, non electio ad gloriam; *positiva*, præparatio pænæ æternæ.

Uno ore reprobationem admittunt Christiani, sed diversim de ipsius motivis sentiunt.

Damnatos à Deo antecedenter, etiam positivè, reprobari admiserunt: 1. Gotescaucus, IX<sup>o</sup> sæculo; 2. Calvinus et ejus discipuli, inter quos quidam, Antelapsarii, cum Calvino extendunt hanc opinionem ad statum innocentiae, imò ad Angelos; alii, Postlapsarii, eam limitant ad homines lapsos.

Catholici autem admittunt omnes positivam reprobationem determinari ex peccatorum praevisione, sed dissentiunt in assignando motivo reprobationis negativæ. Alii affirmant eam esse peccatorum praevisioni antecedentem, alii subsequentem.

Hic disserendum, ut suprà, 1<sup>o</sup> de existentia, 2<sup>o</sup> de proprietatibus reprobationis.

#### I. De Existentia reprobationis.

*Quær. Utrùm admittenda sit reprobationis existentia?*

*Resp. Affirmativè.*

*Prob. 1<sup>a</sup>.* Deus in tempore quosdam homines ad pœnam æternam damnat; ergo ab æterno eos reprobat, cum nihil, ut suprà diximus, operetur in tempore, quod non decreverit ab æterno.

*Prob. 2<sup>a</sup>.* Matth. 25, 41: *Discedite à me, maledicti, in ignem æternum, qui præparatus est diabolo, et angelis ejus.* Deus decreto æterno angelos reprobavit: ergo à pari homines damnatos.

#### II. De Proprietatibus reprobationis.

Duo quærentur: 1<sup>o</sup> Utrùm voluntate antecedente, an subsequente praevisioni peccatorum Deus damnatos

reprobet; 2<sup>o</sup> si ex prævvisis peccatis, utrū ex originali, an ex actuali?

Quæst. 1<sup>a</sup>. *Utrū voluntate antecedente, an ex prævvisis peccatis, Deus damnatos reprobet?*

Resp. Quæstio potest esse, vel de reprobatione *positivâ*, vel de *negativâ*.

I. Si de reprobatione *positivâ*: Deus reprobât ex prævvisis peccatis.

Prob. 1<sup>a</sup>. Si Deus antecederet reprobari, innocentes puniret supplicio omnium gravissimo: porro hoc repugnat ejus bonitati et justitiæ. — Deus vult salutem omnium; porro nullo modo vellet reproborum salutem, si antecederet eos reprobari.

Prob. 2<sup>a</sup>. Si Deus antecederet et positivè damnatos reprobari, perditio reproborum esset à Deo, Deus odio haberet reprobos ante omnem culpam; porro hæc admitti non possunt. Sic enim habet Scriptura: Ose. 13, 9: *Perditio tua Israel: tantummodò in me auxilium tuum.* Sap. 11, 25: *Nihil odisti eorum quæ fecisti.*

II. Si quæstio sit de reprobatione *negativâ*: duplex est opinio.

*Prima* admittit reprobationem negativam *antecedentem* peccatorum prævvisioni. — Hæc sententia sequitur necessariò ex admissione prædestinationis antecedentis. Nam Deus quosdam ad gloriam aut gratiam congruenter efficacem gratis prædestinando, hoc ipso alios omittit, et negativè reprobât. Undè,

Pr. 1<sup>a</sup>. Deus antecederet prædestinat, ergo antecederet negativè reprobât.

Pr. 2<sup>a</sup>. Admittenda est reprobatio negativa antee-

dens, si Deus possit reprobare negativè antecederet, si velit. Porro 1. potest: siquidem reprobatio negativa est omissio hominis in decreto prædestinationis; atque Deus potest omittere quos vult in decreto prædestinationis, nam non tenetur hominem liberè lapsum reparare. 2. Vult: Hæc enim habet Scriptura, Rom. 9, 11: *Cum enim nondum nati fuissent, aut aliquid boni egissent, aut mali..., non ex operibus, sed ex vocante dictum est ei: quia major serviet minori, sicut scriptum est: Jacob dilexi, Esaü autem odio habui... Ergo cujus vult miseretur et quem vult indurat.* Undè sic: Ex D. Paulo, agendi ratio Dei erga Esaü et Jacob est typus prædestinationis et reprobationis; ergo, sicut antequàm duo fratres aliquid boni egissent aut mali, Deus Jacob dilexit et Esaü odio habuit, ita electos prædestinat, reprobaturque damnatos antecederet et abstrahendo à peccatis et meritis.

*Secunda* affirmat reprobationem etiam negativam à prævisis demeritis pendere. — Hæc opinio affinis est opinioni de prædestinatione ex prævisis meritis. Cum enim juxta illam opinionem ad gloriam prædestinentur omnes quorum prævidentur merita, à gloria consequenter excluduntur ii tantum quorum prævidentur demerita. Undè,

*Pr. 1<sup>a</sup>.* Rejicienda est prædestinatio antecedens, ergo et reprobatio negativa antecedens.

*Pr. 2<sup>a</sup>.* Si Deus negativè et antecederet reprobareret damnatos, sincerè non vellet eorum salutem, cum nollet eos eripere damnationi quam in Adamo incurrerunt.

*Pr. 3<sup>a</sup>.* In statu præsentis, qui negativè reprobat,ur,

eo ipso positivè reprobatur ; ergo, si reprobatio negativa sit antecedens, etiam antecedens est reprobatio positiva, quod ab adversariis rejicitur.

Insolutà quæstione de causis prædestinationis, solvi non potest quæstio de causis reprobationis negativæ. Ab eà dirimendâ abstinemus, et in opinionem quæ affirmat reprobationem etiam negativam ex prævisis demeritis inclinamur, propter rationes suprâ expositas ubi *de Prædestinatione*.

Quæst. 2<sup>a</sup>. *A quibus peccatis pendeat reprobatio, an ex originali, an ex actualibus?*

*Resp.* Vel agitur de infantibus sine baptismo morientibus, vel de infidelibus adultis, vel de christianis.

1<sup>o</sup> Si de infantibus : reprobatio pendet à solo peccato originali ; infantes enim nullum peccatum actuale commiserunt.

2<sup>o</sup> Si de infidelibus adultis : pendet à peccatis tùm originali, tùm actualibus ; nam infideles adulti sunt rei peccatis tùm originali, tùm actualibus.

3<sup>o</sup> Si de christianis : pendet à peccatis actualibus tantùm. Baptizatis enim absolutè remissum fuit peccatum originale, dicente Apostolo, Rom. 8, 1 : *Nihil... nunc damnationis est iis, qui sunt in Christo Jezu.*

## II.

### DE ACTIBUS PROVIDENTIÆ IN TEMPORE.

Tribus actibus manifestatur in tempore Providentia divina :

- 1° Deus Adamum constituit in statu innocentiae;
- 2° . . . permittit lapsum hominis ;
- 3° . . . reparať hominem per Christum.

#### ACTUS PRIMUS.

##### DEUS CONSTITUIT ADAMUM IN STATU INNOCENTIÆ.

Sequenti propositione comprehendí possunt hujus actus elementa constitutiva : *Deus constituit Adamum in statu innocentiae, ita ut ex ejus fidelitate vel infidelitate pendeat ipsi primò, posteritati subsequenter, hujus status conservatio aut amissio.*

Propositioni nostrae adversantur 1° Pelagiani, negantes primos homines in ortu suo donis supernaturalibus fuisse exornatos; affirmantes hominem talem nunc nasci qualis ab initio conditus fuerat, sine peccato et gratia. 2° Pelagianis assentiunt Sociniani, Arminiani, Rationalistae.

Hanc admittunt omnes catholici; dissentiunt verò theologi in ejus explicatione.

Nobis ergo probanda et explicanda propositio.

**PROBATIO.**

Tribus propositionibus æquivalet thesis posita : 1<sup>o</sup> Deus Adamum constituit in statu innocentiae ; 2<sup>o</sup> hujus status conservatio, aut amissio pendet Adamo ex fidelitate aut infidelitate ; 3<sup>o</sup> item ejus posteritati.

**I.**

**DEUS CONSTITUIT ADAMUM IN STATU INNOCENTIAE.**

Status innocentiae, qualis protoparentibus fuit concessus, includit elementa duplicis generis, essentialia et accidentalia ; — *essentialia*: finem supernaturalem ; media supernaturalia, gratiam scilicet habituales et gratias actuales ; — *accidentalibus* duplicis etiam speciei: *intrinseca*: in intelligentiâ, scientiam perfectam, et immunitatem ab errore ; in voluntate, rectitudinem ; in corpore, immunitatem à morbo et morte ; *extrinseca*: dominium in res inferiores, habitatio in Paradiso.

Ergo Deus Adamum constituit in statu innocentiae, si elementa prædicta protoparentibus concesserit : porro hoc certum est.

§ 1. — Deus Adamo concessit elementa essentialia status innocentiae.

**I. Finem supernaturalem:**

*Prob. 1<sup>a</sup>.* Ex fide et doctrinâ Ecclesiae, gratia sanctificans est medium ad visionem intuitivam ; ergo Deus Adamum destinavit ad visionem intuitivam, si illum constituerit in gratiâ sanctificante. Porro Adamum in statu justitiae, seu gratiae sanctificantis, à Deo fuisse constitutum, ex propositione sequenti constabit.

**Prob. 2<sup>a</sup>.** Homo post reparationem destinatur ad finem supernaturalem, ut probavimus initio hujus *Expositionis*; ergo ad finem supernaturalem destinabatur ante lapsum: nam reparatio non mutavit finem, sed tantum homini reddidit jus ad finem peccato amissum.

**Prob. 3<sup>a</sup>.** Ex dicendis infra constabit infantes sine baptismo morientes fuisse jure ad visionem intuitivam in Adamo privatos; ergo infantes erant ad visionem intuitivam in Adamo destinati; à fortiori Adamus ipse.

**Prob. 4<sup>a</sup>.** Propositio nostra constat ex consensu theologorum, fide et doctrinâ Ecclesiæ.

## *II. Media supernaturalia, scilicet:*

### *1<sup>o</sup> Gratiam habitualem:*

**Prob. 1<sup>a</sup>. Arg. theol.** Ex dicendis, ubi de lapsu protoparentis, constabit Adamum per primum peccatum amisisse sibi et suæ posteritati jus ad vitam æternam; ergo ante peccatum jus illud habebat, ac proinde gratiam sanctificantem cui inhæret.

**Prob. 2<sup>a</sup>. Script.** Eph. 4, 23: *Renovamini autem spiritu mentis vestræ, et induite novum hominem, qui secundum Deum creatus est in justitiâ, et sanctitate veritatis.* Apostolus fideles excitat ut renoventur in gratiâ et sanctitate in quâ homo creatus est; ergo gratia sanctificans Adamo concessa fuit: constat enim tum verborum significatione, tum interpretatione theologorum, his verbis *justitiâ et sanctitate veritatis gratiam sanctificantem* designari.

**Prob. 3<sup>a</sup>. Tradit.** Patres plurimi explicantes primi Geneseos capitis versum 26: *Faciâmus hominem ad*



*imaginem et similitudinem nostram*, distinguunt inter imaginem et similitudinem, illam in donis naturalibus reponentes, hanc in donis supernaturalibus. Ex illis verbis concludunt hominem in ortu suo fuisse gratiâ et justitiâ exornatum. (Vid. Bellarm. *De Grat. prim. hom. cap. 2.*)

*Prob. 4<sup>a</sup>. Auctorit. Eccl.* Hæc habet Concilium Arausicanum : *Natura humana, etiamsi in integritate in quâ est condita, permaneret, nullo modo seipsam, Creatore suo non adjuvante, servaret. Undè, cùm sine gratiâ Dei salutem non posset custodire quam accepit, quomodò, sine Dei gratiâ, poterit reparare quod perdidit?* Undè sic: Textus citatus thesim nostram probat, si hæc verba : *integritas in quâ natura humana est condita*, designent gratiam sanctificantem : atqui res ita est. Nam in ultimâ parte textûs Patres supponunt hominem in statu actuali per gratiam actualem recuperare quod perdidit; porro per gratiam actualem recuperat gratiam sanctificantem.

Conc. Trid. sess. 5, decret. 1 : *Si quis non confletur, primum hominem Adam, cùm mandatum Dei in Paradiso fuisset transgressus, statim sanctitatem, et justitiam, in quâ constitutus fuerat, amisisse... anathema sit.*

2<sup>o</sup> Gratiam actualem :

*Prob. 1<sup>a</sup>.* Si gratiam actualem Deus non concessisset, homo non debuisset orare ad impetrandam bonam voluntatem actualem, neque de eâ obtentâ gratias agere; quod piis auribus repugnat.

*Prob. 2<sup>a</sup>. Act. 17, 28: In ipso... vivimus, et movemur,*

*et sumus.* Rom. 11, 36 : *Ex ipso, et per ipsum, et in ipso sunt omnia.* Hæc verba sunt generalia ; ergo, sive in ordine naturali, sive in ordine supernaturali, in statu innocentiae, sicut in statu naturæ lapsæ reparatæ, homo habet in Deo et ex Deo non solum esse, vitam, sed etiam motum. Proindè, præter gratiam habitualement per quam habet facultatem actuum supernaturalium, accipit gratiam actualem ad motum, seu ad actus supernaturales.

*Prob. 3<sup>a</sup>.* Ex consensu omnium theologorum, qui admittunt concessionem gratiæ in statu innocentiae, quamvis de naturâ ejus motuum dissentiant, ut videbitur infra.

*Prob. 4<sup>a</sup>.* Ex Concilio Arausicano suprâ citato, natura humana in integritate in quâ condita est, nullo modo seipsam, creatore suo non adjuvante, servare potuit.

§ III. — Deus Adamo concessit elementa accidentalia status innocentiae,

*I. Intrinseca, scilicet :*

1<sup>o</sup> *Intelligentiæ* : — 1. Scientiam perfectam :

*Prob. 1<sup>a</sup>.* Deus hominem creavit perfectum secundum corpus, à fortiori secundum animam ; ergo illi concessit scientiam perfectam, si scientia perfecta fuerit ad perfectionem absolutam et relativam animæ protoparentis necessaria. Porro necessaria erat 1. ad perfectionem absolutam. Nam perfectior est anima, si actu cognoscat omnia à se cognoscibilia, quàm si habeat solummodò capacitatem scientiam acquirendi, aut scientiam acquisitam sed limitatam. 2. Erat necessaria ad perfectionem relativam : Adam enim futurus erat non

solum Pater generis humani per generationem, sed etiam Doctor per scientiam; porro perfectus doctor esse non poterat, quin perfectam scientiam possideret.

*Prob. 2<sup>a</sup>. Eccli. 17, Vet 8 : Disciplina intellectus replevit illos (protoparentes). Creavit illis scientiam spiritus, sensu implevit cor illorum, et mala et bona ostendit illis. Posuit oculum suum super corda illorum, ostendere illis magnalia operum suorum, ut nomen sanctificationis collaudent; et gloriari in mirabilibus illius, ut magnalia enarrent operum ejus.* Unde sic: nulla est ratio verba hæc à sensu obvio detorquendi; porro in sensu naturali intellecta indicant scientiam perfectam in ordine tum naturali, tum supernaturali protoparentibus inditam fuisse.

2. Immunitatem ab errore :

*Prob. 1<sup>a</sup>. In statu innocentie, nullus fuisset defectus in corpore, à fortiori in anima; ergo nullus error, siquidem error est intellectus malum et defectus.*

*Prob. 2<sup>a</sup>. Si Adam errare potuisset, vel de rebus perfecte notis, vel de rebus absolute ignotis, vel de rebus imperfecte notis. Atqui neutrum dici potest. 1. Non de rebus perfecte notis: nam, si intellectus rem perfecte cognoscat, ejus attributa illorumque relationes perfecte cognoscit, nec proinde potest falsam inter ea relationem concipere, seu, quod idem est, errare. 2. Non de rebus absolute ignotis: nam intellectus non potest de re penitus ignota judicium ferre, ac proinde errare. 3. Non de rebus imperfecte notis: etenim, cum res supponatur invidens, homo potuisset à judicio abstinere; judicans ergo, errorem, ac proinde malum libe-*

rè vouluisset, quod opponitur rectitudini voluntatis ipsi à Deo concessæ, ut probabitur infra.

*Prob. 3<sup>a</sup>.* Propositionem nostram affirmant Doctores, specialiter S. Augustinus l. 3 *de liber. arbit.* c. 12, et S. Thomas, *Sum. theol.* 1 p. q. 104, art. 4.

2<sup>o</sup> *Voluntati*: — Rectitudinem:

*Prob. 1<sup>a</sup>.* Eccle. 7, 30: *Solummodò hoc inveni, quòd fecerit Deus hominem rectum.*

*Prob. 2<sup>a</sup>.* De propositione nostrâ consentiunt omnes theologi.

*Prob. 3<sup>a</sup>.* Juxta Concil. Trident. Adam constitutus fuerat in *justitiâ et sanctitate veritatis*. Hoc verbo *justitia* theologi intelligunt voluntatis rectitudinem.

3<sup>o</sup> *Corpori*: — 1. Immunitatem à morte:

*Prob. 1<sup>a</sup>.* Sap. 1, 13: *Quoniam Deus mortem non fecit, nec tetatur in perditione vivorum.* Genes. 2, 17: *In quocumque enim die comederis ex eo, morte morieris.* Sap. 2, 23: *Deus creavit hominem inexterminabilem,* et v. 24: *Invidiâ autem diaboli mors introivit in orbem terrarum.* Rom. 5, 12: *Per unum hominem peccatum in hunc mundum intravit, et per peccatum mors.* Ibid. 6, 23: *Stipendia enim peccati, mors.* Ibid. 8, 10: *Corpus quidem mortuum est propter peccatum....* Undè: Deus mortem non fecit; hominem creavit inexterminabilem; mors ex peccato et invidiâ diaboli, ac proindè ante peccatum non existerat. Ergo Deus creavit hominem immortalem.

*Prob. 2<sup>a</sup>.* Concil. Frid. sess. 5, decret. de pec. orig. 1: *Si quis non confletur primum hominem Adam, cum*

*mandatum Dei in Paradiso fuisset transgressus, statim sanctitatem, et justitiam, in quâ constitutus fuerat, amisisse, incurrisseque per offensam prævaricationis hujusmodi iram et indignationem Dei, atque idè mortem, quam antea illi comminatus fuerat Deus... anathema sit. Undè: mors ex peccato, ante peccatum ergo immortalis erat Adam.*

2. Immunitatem à morbo :

*Prob. 1<sup>a</sup>. Deus Adamum immortalitate donans, media simul instituerat quibus à morte præservaretur; porro eadem media à morbo probabilissimè præservare poterant.*

*Prob. 2<sup>a</sup>. S. Augustinus, de civ. Dei, l. 4, c. 26, sic loquitur de statu Adami, ante lapsum: Nullus intrinsecus morbus, nullus ictus inferebatur extrinsecus; summa erat in carne sanitas.*

*Prob. 3<sup>a</sup>. Propositionem admittunt theologi catholici.*

II. *Extrinseca*, scilicet :

1<sup>o</sup> *Dominium in animalia et omnes alias inferiores creaturas :*

*Prob. 1<sup>a</sup>. Divina providentia inferiora per superiora gubernat; ergo animalia et res inferiores homini subjici debent, ac proindè homo in ea dominium habet, si homo sit eis superior; porro superior est homo. Siquidem 1. homo est imago Dei. 2. Animalia et creaturæ inferiores sunt instrumenta homini concessa ad utilitatem corporis et animæ; corporis, siquidem inserviunt immediatè, vel mediatè ejus conservationi et perfectioni; animæ, siquidem sunt quasi speculum in quo invisibilia Dei per ea quæ facta sunt intellecta*

conspiciuntur. Si autem animalia et res inferiores sunt instrumenta ad utilitatem hominis ordinata, eo ipso sunt ipsi inferiores.

*Prob. 2<sup>a</sup>. Gen. 1, 26 : Faciamus hominem ad imaginem et similitudinem nostram : et præsit piscibus maris, et volatilibus cæli, et bestiis, universæque terræ, omnique reptili quod movetur in terrâ. Ibid. v. 28 : Benedixitque illis Deus, et ait : Crescite et multiplicamini ; et replete terram, et subjicite eam ; et dominamini piscibus maris, et volatilibus cæli, et universis animantibus quæ moventur super terram.*

2<sup>o</sup> Habitationem in Paradiso :

*Prob. Gen. 2, 8 : Plantaverat autem Dominus Deus Paradisum voluptatis à principio : in quo posuit hominem quem formaverat.*

Ex dictis sequitur veritas primæ propositionis positæ, scilicet : Deus constituit Adam in statu innocentiae.

II.

HUJUS STATUS CONSERVATIO AUT AMISSIO PENDET ADAMO EX FIDELITATE AUT INFIDELITATE.

*Prob. Vera est propositio, si Adamus fidelis bonæ statûs innocentiae conservare, si prævaricator ea perdere debuisset. Atqui,*

1<sup>o</sup> Fidelis ea bona conservasset : 1. Deus ea concesserat absque temporis limitatione ; ergo ea perpetuo conservasset Adam, si præcepto Dei obediens fuisset. 2. Si fidelis fuisset Adam, gratiam sanctificantem, ac proinde statûs innocentiae bona non amisisset, siquidem ista bona ex gratia pendebant, ut infra probabitur.

2<sup>o</sup> Adam prævaricator bona statûs innocentiae amissurus erat : 1. Adam peccans amittebat gratiam sanctificantem, ac proindè bona statûs innocentiae, ob rationem modò expositam. 2. Genes. 2, 17 : *In quocumque enim die comederis ex eo, morte morieris*. Ergo per peccatum immortalitatem amissurus erat; ergo, pari ratione et ex interpretatione theologorum, alia statûs innocentiae bona. 3. Juxta Concilium Trid., Adam, prævaricatione suâ, bona statûs innocentiae reverà amisit, ut videbimus, ubi *de Peccato originali*.

### III.

STATUS INNOCENTIAE CONSERVATIO AUT AMISSIO PENDET POSTERITATI  
EX ADAMI FIDELITATE AUT INFIDELITATE.

*Prob. 1<sup>a</sup>*. Conservatio aut amissio statûs innocentiae Adamo pendebat ex ipsius fidelitate aut infidelitate; ergo ex eisdem conditionibus ipsius posteritati, si præceptum Dei, non Adamum tantum, sed etiam in ejus personâ posteros spectaverit. Atqui res ita est, siquidem juxta Apostolum, Rom. 5, 12 : *in quo (Adamo) omnes peccaverunt*. Ergo.

*Prob. 2<sup>a</sup>*. Juxta doctrinam Concil. Trid. infra exponendam, per peccatum Adami ejus posteritas bona statûs innocentiae amisit. Undè sic : Peccante Adamo statum innocentiae amisit genus humanum, ergo non peccante, illum conservasset. Ergo ex fidelitate vel infidelitate protoparentis pendebat posteritati conservatio vel amissio statûs innocentiae.

**EXPLICATIO.**

Ad explicationem statûs innocentiae, duo sunt necessaria : 1<sup>o</sup> prædictarum propositionum partes singillatim evolvere, 2<sup>o</sup> illarum ostendere relationes.

**I.**

**SINGILLATIM EVOLVUNTUR PARTES PROPOSITIONUM.**

Circa PRIMAM PROPOSITIONEM, dicendum de elementis *essentialibus*, — *accidentalibus*, intrinsecis, extrinsecis.

**§ I. — De elementis essentialibus.**

Nihil de *fine*, seu de destinatione Adami ad visionem intuitivam.

*De Medis*, seu 1<sup>o</sup> de gratiâ habituali,

Tria sunt explicanda : 1<sup>o</sup> causa, 2<sup>o</sup> tempus, 3<sup>o</sup> modus.

I. Causa. — *Quænam sit causa justificationis Adami?*

Hic solùm agitur de causâ *meritoriâ*, an scilicet Adam justificatus fuerit ex meritis Christi?

*Resp.* Scotistæ affirmant, negant Thomistæ.

Juxta Scotistas primus finis Incarnationis non est, relativè ad hominem, redemptio, sed justificatio et glorificatio. Undè Verbum incarnatum fuisset, et per Verbum incarnatum homo justificatus et glorificatus, etiam non posito peccato. Proindè justificatio et aliæ gratiæ homini etiam innocenti concessæ ex Christi meritis originem habent.

Juxta Thomistas verò redemptio hominis est finis primarius Incarnationis. Undè, Adamo non peccante,



Verbum non fuisset incarnatum. Proindè Christus meruit gratiam homini lapso tantum, non verò homini innocenti.

Ut probabilior, communiter admittitur opinio Thomistarum. De hac quæstione fusiùs ubi *de Incarnatione*.

II. Tempus. — *Quonam tempore concessa fuerit Adamo gratia habitualis?*

*Resp.* Certum est eam fuisse ante peccatum concessam; nam Concil. Trid. ante citatum docet Adamum peccando amisisse sanctitatem et justitiam in quâ constitutus fuerat.

Controvertitur autem utrùm concessa fuerit in primo creationis instanti, an post creationem. — Duplex est opinio.

Quidam (inter quos Alens., Magister sentent., S. Bonav., Scot., etc.) affirmant gratiam Adamo fuisse datam post creationem. Sententiam probant 1<sup>o</sup> auctoritate SS. Cypriani, Augustini, qui eam admittere videntur; 2<sup>o</sup> convenientiâ: oportuit opus naturæ distinguî ab opere gratiæ, et ideò hominem primò creari, deindè justificari. Homo adultus non justificatur sine propriis actibus; improbable est autem Adamum in primo creationis instanti posuisse omnes actus ad justificationem necesarios.

Juxta alios (D. Thomam, Suarez, etc.), quorum communior est opinio, gratiâ sanctificante donatus est Adam eodem instanti quo fuit creatus.

*Pr. 1<sup>a</sup>. Script. Gen. 1, 26 : Faciamus hominem ad imaginem et similitudinem nostram.* Undè sic : Homo à primo creationis instanti factus est ad similitudinem

Dei, ergo in statu gratiæ; nam, juxta Patres, hæc verba designant gratiam, ut suprâ diximus.

Eccle. 7, 30: *Inveni quòd fecerit Deus hominem rectum*; ergo *justum*, seu in gratiâ habituali, si in Scripturâ *recti* dicantur *justi*. Porro hoc constat ex istis Cantic. 1, 3: *Recti diligunt te*; Ps. 7, 11: *Salvos facit rectos corde*; Ps. 32, 1: *Exultate justi in Domino: rectos decet collaudatio*. Eph. 4, 23: *Renovamini autem spiritu mentis vestræ, et induite novum hominem, qui secundum Deum creatus est in justitiâ, et sanctitate veritatis*; undè sic: induere Christum qui creatus est in justitiâ et sanctitate, est renovatio hominis; ergo Adam creatus est in justitiâ et sanctitate.

Pr. 2<sup>a</sup>. Omnia entia primitùs creavit Deus in statu perfecto, id est, actu disposito ad finem; ergo à pari perfectum creavit hominem, ipsi proindè ab instante creationis concessit gratiam habitualement, cùm sit ad finem supernaturalem necessaria.—Si Adam perseverasset, infantes in gratiâ sanctificante nati fuissent; ergo à fortiori Adam in gratiâ creatus est.

Pr. 3<sup>a</sup>. Si rejicienda foret opinio, maximè ob rationes prioris; porro hujus opinionis rationes falsæ sunt. Prima: nam opera naturæ et gratiæ distingui possunt, quamvis dona naturæ et gratiæ simul ab instanti creationis concessa fuissent. Secunda: nam 1. dici posset Adamum justificatum fuisse absque proprio actu prævio; 2. infrâ videbimus Adamum in primo instanti creationis potuisse elicere omnes actus ad justificationem necessarios.

Probabilior videtur secunda opinio.

III. Modus. — *Utrum Adam justificatus fuerit abs-*

*que præviis actibus propriis, an sub conditione actuum cum auxilio gratiæ productorum?*

*Resp.* Duplex opinio.

Juxta *primam*, Adam justificatus fuit absque præviis actibus. Nam in primo creationis instanti, homo habet à Deo omnes animæ modificationes; proindè actus liber, seu proprius, est ipsi impossibilis.

Juxta *secundam*, quam tenet D. Thomas (1 p. q. 93, art. 1 ad 3), homo fuit justificatus sub conditione actuum præviorum.

*Pr. 1<sup>a</sup>.* In primo creationis instanti Adam fuit sub omni respectu, ac proindè sub respectu justificationis perfectus. Ergo sub conditione actuum præviorum justificatus est, si modus iste sit priori perfectior: atqui res ità est: nam 1. actus est perfectior habitu; 2. perfectius est quod est per se eo quod est per aliud; perfectior proindè justificatio quæ fit sub conditione actuum à justificato productorum, quàm justificatio quæ tantùm fit per habitus in animam infusos.

*Pr. 2<sup>a</sup>.* Si rejiciendus esset hic modus justificationis, maximè quia impossibile fuisset Adamo elicere à primo creationis instanti actus ad justificationem preparatorios; atqui hoc falsum est. Siquidem Adam in statu adulto creatus est; porro Deus potest per revelationem ità subito adulti intellectum illuminare, ut statim per fidem assentiat veritati propositæ, et voluntas moveatur in objectum sic creditum.

2<sup>o</sup> De gratià actuali.

*Quær. Qualis fuerit gratia actualis Adamo concessa?*

*Resp.* Certum est eam fuisse adjuvantem. Nam 1. à theologis communissimè, specialiter à SS. Augustino

et Thomā, admittitur ad actum hominis, in ordine sive naturali, sive supernaturali, requiri, præter capacitatem, auxilium Dei speciale. 2. Ex Concilio Arausicano, *natura humana, etiamsi in integritate in quā est condita permaneret, nullo modo seipsam, creatore suo non adjuvante, servaret.*

Controvertitur autem utrū fuerit excitans ad vitanda peccata et ad benè operandum.

Quidam affirmant cum D. Thomā; quia *manifestum est*, inquit Angelicus Doctor, *omnes motus, tūm naturales, tūm spirituales, reduci in primum movens, quod est Deus; et ideo quantumcumquē natura aliqua corporalis aut spiritualis ponatur perfecta, non potest in actum suum procedere, nisi movetur à Deo* (1).

Alii negant, nixi auctoritate S. Augustini, qui in lib. de bono persever. c. 7, quærens: an possit homo non peccare, id est perseverare in bono, resistere omni tentationi, servare omnia mandata, etc., respondet: *Non est hoc in viribus liberi arbitrii, quales nunc sunt; fuerat in homine antequām caderet.* Eamdē doctrinam multotiēs in operibus exprimit (2).

Quo posito, probabilior videtur *secunda opinio.* Nam, cū auctoritates in utramque partem sint æquales, determinanda est quæstio ex ratione theologicā. Porro sic ratiocinari licet: In Adamo mens subiciebatur Deo, caro spiritui; ergo ad peccatum non incitabatur Adam per concupiscentiam carnalem; non indigebat proindē gratiā excitante ad vitandum malum. Insuper posside-

(1) *Sum.* 1-2, q. 109, art. 1.

(2) Vid. Bellarmin. *de grat. primi hom.* lib. unie. c. 4.

bat gratiam sanctificantem et omnes virtutes infusas, fidem, spem, charitatem, etc.; ergo ad bonum incitabatur, quin necessaria fuerit gratia specialis excitans, cum virtus sit inclinatio ad bonum.

§ III. — De elementis accidentalibus.

I. *Intrinsicis*, scilicet :

1<sup>o</sup> De dotibus Intelligentiæ, — seu *de cognitionibus Adami*.

Scientia Adami erat perfecta. Ergo Adam possidebat cognitiones : *naturales*, seu, cujus objectum erat ordinis naturalis; *supernaturales*, id est, cujus objectum erat ordinis supernaturalis.

Utriusque speciei scientiæ determinanda sunt 1<sup>o</sup> objectum, 2<sup>o</sup> medium acquisitionis, 3<sup>o</sup> proprietates.

I. *De Scientiâ naturali*.

I. Objectum. — *Quænam objecta ordinis naturalis cognoscebat Adam?*

*Resp.* In genere, omnia, et sola, quæ sunt ab humano intellectu perfectissimo naturaliter scibilia.

*Prob.* Adam cognoscebat omnia...: Alioquin perfecta non fuisset ejus intelligentia, et aliorum hominum intelligentias doctrinâ suâ perficere non potuisset; sola...: hic enim solum agitur de cognitionibus naturalibus.

*Corollaria.* Ex hoc principio sequentia deducuntur corollaria, circa scientiam Adami de rebus naturalibus, de intelligentiis creatis; de Deo; de illorum entium relationibus.

1<sup>o</sup> De rebus naturalibus. — Adam notitiam habuit omnium rerum corporearum, quibusdam exceptis. — Habuit notitiam omnium...: Nam 1. intellectus huma-

nus omnes res corporeas, saltem quodam modo cognoscere potest. 2. Ex Genesi, Adam omnibus animantibus apta et propria imposuit nomina, quod supponit perfectam eorum notitiam; porro, si animantia perfectè noverit, à pari alia objecta naturalis ordinis. — Quibusdam exceptis: Ex D. Thomà (1 p. q. 94, art. 3) non cognoscebat: 1. omnia ejusque speciei individua; hæc enim cognitio excedere videtur capacitatem hominis naturalem, et ad perfectionem intellectualem non est absolutè necessaria; 2. futura ex libero arbitrio pendentia; siquidem homo nullum medium naturalem possidet liberas aliorum determinaciones cognoscendi. Probabiliter juxta Suarez (1), non cognoscebat futura ex multis naturalibus causis pendentia, nam illorum cognitio capacitatem humanam excedere videtur.

2º De Intelligentiis creatis. — De homine: cognoscebat animæ suæ et aliorum existentiam ac proprietates; cogitationes suas certò; aliorum verò, conjectatoriè tantùm, per signa et effectus. — Certò animæ suæ et aliorum existentiam ac proprietates: siquidem hæc notitia evidenter humanum intellectum perficit, et facto constat eam non excedere ejus capacitatem. — Certò cogitationes suas: hoc evidens est. — Conjectatoriè tantùm cogitationes aliorum. Saltem conjectatoriè; hæc enim facultate donatur homo in statu actuali, à fortiori Adam; — non certò: nullum est enim homini medium quo ad hanc notitiam pervenire possit.

De Angelis: Certum est Adam eorum possibilitatem cognovisse; probabilius eorum existentiam ignorasse.

(1) Suarez, *de opere sex dier.* l. 3, c. 9, n. 14.

—Certum est Adam cognovisse Angelorum possibilitatem : Nam intellectus humanus, etiam in statu præsentì, evidenter judicat à Deo posse creari intelligentias puras, et animà humanà perfectiores. — Probabilius eorum existentiam naturaliter ignoravisse : Si cognovisset, vel à priori, vel à posteriori ; atqui neutrum dici potest. Non prius : nam Angelorum creatio erat conveniens quidem, non verò necessaria ; porro facta Dei libera à priori cognosci non possunt. Non posterius : nullum enim assignari potest factum ex quo certò possit naturaliter deduci angelorum existentia. — Dixi : *naturaliter*, Adamus nempe Angelorum existentiam cognoscebat per revelationem, ut videbitur infra.

3<sup>o</sup> De Deo. — Adam Dei existentiam et perfectiones intellectui humano naturaliter scibiles cognoscebat. — Res ità est, si 1. Deus scientià naturali cognosci possit ; si 2. perfectio scientiæ notitiàm Dei requirat. Atqui hæc duo sunt certa. 1<sup>o</sup> Deus scientià naturali potest cognosci : Facto constat rationem humanam, sufficienter evolutam, posse principiis sibi divinitas inditis Dei existentiam probare, ejusque naturam intra quosdam limites evolvere. 2<sup>o</sup> Cognitio Dei ad scientiæ perfectionem requiritur. Nam 1. scientiæ objectum est veritas, veritas autem est Ens quatenus per intelligentiam visibile. Atqui Deus est Ens infinitum, proinde veritas infinita ; ergo ejus cognitio ad scientiam perfectam requiritur. 2. Perfecta alicujus entis scientia ejus relationum notitiàm includit, relationum notitià supponit aut producit entium relativorum cognitionem. Porro inter creaturam et Deum existunt relationes causalitatis, cum Deus sit creaturæ causa ; similitudinis, cum

Deus impresserit in creaturis ratione privatis quasi vestigia, et in rationalibus imaginem perfectionum suarum. Ergo protoparens creaturas perfectè cognoscens non poterat ignorare existentiam et perfectiones Dei.

4<sup>o</sup> De relationibus inter entia prædicta.—Adam cognovit relationes creaturarum mutuas, relationes inter Deum et creaturas intellectui humano scibiles. Nam, ut diximus, entia perfectè cognosci nequeunt, quia et simul eorum relationes cognoscantur.

Ergo Adam perfectè cognovit legem naturalem, seu obligationes et jura ex relationibus naturalibus hominis cum Deo et entibus creatis manantia.

II. Medium acquisitionis.— *Quibus mediis Adam cognitiones prædictas acquisiverit?*

*Resp.* Inter media acquisitionis Adamo et homini actuali concessa, sunt similitudines et differentiae. Earum expositione pendet responsio quæstioni positæ.

Ad constituendam scientiam tria absolutè requiruntur: principia, conclusiones, inter ea ordo naturalis. Porro, in statu actuali, propositiones primariæ intellectui communicantur concursu rationis absolutæ et inductivæ, experientiâ externâ et internâ, testimonio hominum; consequentiæ facultate logicâ ex principiis deducuntur; ordo inter propositiones prædictas facultate methodicâ instituitur. Hæc omnia constant ex dictis, ubi *de Locis theologicis*.

Adamus autem, exceptis 1. experientiâ, cui supplebat cognitio à Deo infusa, 2. testimonio hominum, cui supplebat testimonium divinum, seu actio Dei in mentem testimonio humano æquivalens, eadem media possidebat.



Exceptis 1. experientiâ : etenim, statim post creationem, Adam perfectam de rebus experimentalibus scientiam habuit ; porro nondum experiri potuerat. Experientiâ supplebat cognitio immediatè à Deo infusa : nam, sublati experientiâ et testimonio hominum, alia causa scientiâ experimentalis assignari non potest. 2. Testimonio hominum : siquidem præter Adamum nullus existerat homo. Testimonio humano supplebat testimonium divinum, seu actio immediata Dei : nam in statu præsentis, intelligentiâ humanæ evolutio absque sociali educatione, juxta omnes, perdifficilis ; juxta multos, absolutè impossibilis. Ergo, cum educatio socialis esset protoparenti impossibilis, necessarium fuit ut Deus ejus defectui suppleret Adamum educando aut per verbum, aut per actionem immediatam eosdem effectus producentem.

Exceptis experientiâ et testimonio, eadem media erant Adamo : nam cognitiones Adami ejusdem erant speciei ac cognitiones humanæ in statu actuali. Eadem ergo ad earum acquisitionem media admittenda sunt, nisi probetur circumstantias aliud medium requisivisse ; quod probari non potest.

III. Proprietates. — *Quænam fuerint proprietates scientiæ Adami?*

*Resp.* Scientia Adami erat clara, certa, nullo modo retrogradis, quodam modo progressiva. — Clara, certa, nullo modo retrogradis, seu inamissibilis : scientia Adami erat perfecta ; porro, cæteris paribus, scientia eo est perfectior, quo clarius, certior et oblivioni minus obnoxia. — Quodammodo progressiva : scientia Adami potuisset crescere quoad numerum individuorum quæ

cognovisset, quoad modum seiendi; nam scientiam experimentalem potuisset acquirere eorum quæ primò scientiâ infusâ tantùm cognovisset.

*II. De Scientiâ supernaturali.*

I. Objectum. — *Quænam objecta ordinis supernaturalis cognoverit Adam?*

*Resp.* Quædam certa; quædam probabilissima.

Certè cognovit: omnia ordinis supernaturalis objecta ad finem supernaturalem consequendum necessaria.

Proindè cognovit 1º hominem ad finem supernaturalem, seu ad visionem intuitivam à Deo fuisse destinatum. Nam, si ignoravisset se ad finem supernaturalem fuisse destinatum, ad eum actibus liberis tendere non potuisset. 2º Cognovit media ad hunc finem obtinendum necessaria. Finis enim obtineri non potest, nisi mediis ad hoc institutis; ergo Adam eis uti, ac proindè ea cognoscere debebat. 3º Cognovit Deum quatenus est auctor finis et mediorum supernaturalium. A Deo enim solo finis et media possunt esse obligatoria; proindè, si Adam ignorasset Deum quatenus est auctor finis et mediorum, potuisset legitime non tendere ad finem per media, quod supponi non potest.

Probabilissimè cognovit 1º mysterium SS. Trinitatis. Nam ex modò dicendis cognovit Incarnationem, ergo Filium et Patrem, et probabilissimè Spiritum Sanctum. Hæc est aliundè communissima Patrum et theologorum sententia.

2º Cognovit mysterium Incarnationis, non quatenus ad redemptionem hominis, sed quatenus ad consummationem gratiæ et gloriæ est ordinatum.

Et 1. cognovit mysterium Incarnationis: hæc enim

verba protulit Adam videns Evam post ejus formationem : Gen. 2, 23, 24 : *Hoc nunc, os ex ossibus meis, et caro de carne mea...* Quamobrem relinquet homo patrem suum, et matrem, et adhærebit uxori suæ. De quibus ait Paulus ad Eph. 5, 32 : *Sacramentum hoc magnum est, ego autem dico in Christo et in Ecclesiâ.* Unde sic : Verba ab Adamo prolata erant symbolum unionis Christi cum Ecclesiâ, proinde symbolum Incarnationis per quam unitus est Christus cum Ecclesiâ. Quo posito, improbabilissimum est Adamum ignorasse sensum verborum suorum, probabilissimum ergo cognovisse mysterium Incarnationis.

2. Non illud cognovit quatenus ordinatum ad redemptionem : alioquin lapsum suum cognovisset, quod dici non potest ; nam posita rectitudine, potius fidelitatem suam quam infidelitatem prævidere debebat.

3. Illud autem cognovit quatenus ad consummationem gratiæ et gloriæ ordinatum : — Ad ejus propositionis intelligentiam notandum : Per Incarnationem non solum redimitur homo, sed gratia primitus ipsi collata consummatur per unionem personalem divinitatis cum humanitate, per unionem moralem fidelium cum Christo, capite Ecclesiæ. Consummatur etiam gloria humanitatis, cum, ex unione personali et morali humanitatis cum divinitate, in vitâ præsentis et futurâ exurgat immensa humanitati gloria. Consummatur tandem in tempore et æternitate gloria Dei ex cultu infinito Trinitati per Verbum incarnatum oblato. Quo posito, — Ex una parte Incarnatio fuit Adamo cognita, ex alterâ parte incognita, scilicet quatenus ordinata ad redemptionem ; ergo probabilissimum est Incarnationem Adamo fuisse

cognitam quatenus ordinatam ad gratiæ et gloriæ consummationem. Aliundè eà cognitione Adamus fiebat perfectior et Christus honoratior; ergo congruissima, ac proindè probabilissima est hujus scientiæ concessio.

3<sup>o</sup> Cognovit relationes suas cum angelis, ac proindè ipsorum existentiam, multorum perseverantiam et aliorum lapsum. Cognovit... relationes: ut possit à malorum tentationibus cavere et bonorum auxiliis uti; proindè existentiam, perseverantiam et lapsum, ut evidens est.

II. Medium acquisitionis. — *Quibus mediis cognitiones supernaturales acquisiverit Adam?*

*Resp.* Quadruplex supponi potest medium acquisitionis: visio intuitiva, scientia infusa, ratio, revelatio. — Porro cognitiones supernaturales acquisivit Adam,

1<sup>o</sup> Non visione intuitivâ habituali aut transitoriâ: — Non habituali: nam ex visione intuitivâ oritur amor beatificus habitualis; ex amore verò beatifico sequitur impeccabilitas, cum impossibile sit peccatum cum amore Dei summo appetitivè et intensivè. Porro Adamum non fuisse impeccabilem facto constat. — Non transitoriâ: propositio ista communiter à theologis concluditur ex hoc textu I Tim. 6, 16: *Qui (Deus)... lucem inhabitat inaccessibilem: quem nullus hominum vidit, sed nec videre potest...*

2<sup>o</sup> Non scientiâ infusâ: Etenim Adam fidem habuit. Porro impossibilis est scientia infusa cum fide; fides quippè supponit quamdam obscuritatem in veritatibus credendis, veritates autem cognitæ per scientiam infusam sunt claræ et evidentes.

3<sup>o</sup> Non ratione: Nam veritates supernaturales supe-

rant humanum intellectum. Aliundè veritates ratione tantùm acquisitæ scientiâ cognoscuntur, non fide.

4<sup>o</sup> Proindè revelatione sive immediatâ, sive mediâtâ per Angelos, sive internâ, sive externâ.—Revelatione: res itâ est si 1. Adam fidem habuerit, si 2. fides revelationem supponat. Atqui 1. Adam habuit fidem: Habac. 2, 4: *Justus... in fide sua vivet*. Hæbr. 11, 1: *Est... fides sperandarum substantia rerum*. Ibid. 6: *Sine fide... impossibile est placere Deo*. Undè sic: Adam erat justus, placebat Deo, sperabat; ergo ex textibus suprâ positis, fidem habebat. 2. Fides revelationem supponit: ex fide Ecclesiæ et theologorum consensu constat; fides enim est adhæsiō veritati ob testimonium Dei.—Revelatione mediâtâ aut immediâtâ, externâ vel internâ: ad fidem sufficit alterutra revelatio. Si quoddam foret dubium, maximè de revelatione internâ; porro fides haberi potest ex revelatione internâ, et reverâ Prophetæ habuerunt fidem de veritatibus internâ inspiratione sibi communicatis.

III. Proprietates.— *Quænam fuerint proprietates fidei protoparentis?*

*Resp.* Quoàd proprietates essentielles, fides Adami eadem erat quæ fides in statu actuali. Quoàd accidentales, sub respectu objectivo, erat minùs perfecta; sub respectu subjectivo, magis perfecta.

Quoàd proprietates essentielles (eas exposuimus ubi *de Dogmate in genere*) eadem erat fides Adami, si eadem fidei fuerit essentia; porro res itâ est. Actus enim fidei, in quocumque statu et subjecto existat, est firma mentis adhæsiō veritatibus à Deo revelatis propter veracitatem divinam.

Quoad proprietates accidentales : sub respectu ob-  
jectivo, erat minùs perfecta. Nam veritatibus primitùs  
Adamo revelatis, plures addidit Deus per revelationes  
subsequentes, specialiter per revelationem christianam.  
Sub respectu subjectivo, erat magis perfecta : Adam  
enim habuit ab initio fidem explicitam, firmam ac robus-  
tam, et errore immunem. Nostra verò fides ex implicità  
fit imperfectè explicita, plerùmque est debilis, et sæpiùs  
errore permixta.

2° De dotibus Voluntatis.

Quærendum 1° in quo sita fuerit rectitudo, seu jus-  
titia originalis Adamo concessa ; specialiter utrùm im-  
possibilitatem peccandi incluserit ; 2° quonam tem-  
pore fuerit concessa ?

Quæst. 1<sup>a</sup>. *In quo sita fuerit rectitudo, seu justitia  
originalis Adamo concessa ; specialiter, utrùm impos-  
sibilitatem peccandi incluserit ?*

Ad 1<sup>am</sup> quæst. partem,

*Resp.* Duplex rectitudo : negativa, positiva. *Negativa*  
consistebat in immunitate à peccato ; *positiva* consiste-  
bat in habitibus realiter et facto subjicientibus Deo vo-  
luntatem in ordine tùm naturali tùm supernaturali ;  
subjicientibus voluntati partes animæ inferiores et cor-  
pus.

*Prob.* In prædictis consistebat rectitudo, seu justitia  
originalis, si 1° prædicta privilegia ad constituendam  
rectitudinem requirantur ; si 2° eorum collectione rec-  
titudo compleatur ; si 3° Adamus iis donatus fuerit.  
Porro tria hæc sunt certa.

1° Prædicta privilegia ad constituendam rectitudinem

requiruntur : 1. Requiritur rectitudo negativa : siquidem homo vitiatuſ peccato opponitur legi ſeu regulæ, proindè rectus eſſe non poteſt. 2. Requiruntur habitus ſubjicientes... : Siquidem rectitudo exigit ſubjectionem realem et perpetuam, ipſaque ſubjectio habitus. — Exigit ſubjectionem realem : ad rectitudinem enim regulanda ſunt inferiora à ſuperioribus ; proindè voluntas à Deo, facultates inferiores et corpus à facultatibus animæ ſuperioribus. Exigit ſubjectionem perpetuam : hominis enim rectitudo in Scripturis designata perpetua eſt. Ipſa ſubjectio exigit habitus : nedum enim iſta rectitudo realis et perpetua ſit homini naturalis, econtra ejus naturæ ſibi derelictæ contradicit, ut diximus ; exigit ergo cauſas reales et perpetuas à naturâ diſtinctas, ejus inclinationes malas frænantes ; porro iſtæ cauſæ ſunt habitus boni ſubjicientes....

2º Horum collectione rectitudo completur : Ordini eſſentiali, ſeu rectitudini neceſſariò conformis eſt voluntas divina. Proindè recta eſt voluntas humana, ſi divinæ ſubjiciatur voluntati ; recta ſunt facultates animæ inferiores et corpus, ſi humanæ voluntati juxta divinam ordinatæ ſubjiciantur.

3º Iſis donatus eſt Adam : 1. Creatuſ eſt immunis à peccato. Aliter dicendum foret Deum eſſe auctorem peccati.

2. Donatuſ eſt habitibus ſubjicientibus Deo voluntatem in ordine naturali et ſupernaturali : Facultates animæ ſuperiores ſubjiciuntur Deo, in ordine ſupernaturali per virtutes ſupernaturales, in ordine naturali per virtutes morales ; porro Adam aliqualiſter habuit omnes utriuſque ordinis virtutes.

Habuit virtutes supernaturales infusas, fidem, spem, charitatem, etc.: semper enim cum gratiâ sanctificante infunduntur; porro gratiâ sanctificante donatus est Adam;

Virtutes morales: Deus ab initio Adamum ornavit omnibus scientiis naturalibus; ergo à fortiori virtutibus moralibus, cum virtutes morales magis perficiant hominem quàm scientiæ naturales. Eccli. 17, 1 et 2: *Deus creavit de terrâ hominem..., et secundum se vestivit illum virtute*; quæ verba, cum sint indeterminata, de omnibus virtutibus intelligenda sunt.

Dicimus: *aliqua*liter. Nam, ex D. Thomâ (1 p. q. 95, art. 3), Adam possidebat: — quoad habitum et actum, virtutes, quæ nullam continent imperfectionem, v. g. charitatem; quæ continent imperfectionem, sed compatibilem cum statu innocentiae, v. g. fidem, spem; — quoad habitum solum, virtutes supponentes imperfectionem cum statu innocentiae incompatibilem: id est, vi rectitudinis sibi infusæ, Adamus erat dispositus ad actus virtutum, positis imperfectionibus quas isti actus supponunt; sic pœnitentiam quæ peccatum, misericordiam quæ misérias humanas supponit.

3. Donatus est habitibus subjicientibus voluntati inferiores animæ partes et corpus: Res ita est, si Adam fuerit à concupiscentiâ immunis. Atqui hoc constat ex Scripturâ. Gen. 2, 25: *Erat autem uterque nudus, Adam scilicet et uxor ejus: et non erubescabant*. Postea verò (c. 3, 7), de illis post peccatum dicitur: *Et aperti sunt oculi amborum: cumque cognovissent se esse nudos, consuerunt folia ficus et fecerunt sibi perizomata*. Et infra, cum Adam ad Deum dixisset, v. 10: *Timui eo*



*quòd nudus essem, respondit Deus, v. 11: Quis enim indicavit tibi quòd nudus esses, nisi quòd ex ligno de quo praeceperam tibi ne comederes, comedisti? Unde sic: Protoparentes ante peccatum de nuditate non erubescabant; post peccatum verò et ab peccatum erubuerunt; ergo ante peccatum non experiebantur inordinatos motus quos post peccatum experti sunt. Ipsis ergo Deus concessit immunitatem à motibus concupiscentiæ inordinatis.— Rom. 7, 13 et 17: Non enim quod volo bonum, hoc ago: sed quod odi malum illud facio.. jam non ego operor illud, sed quod habitat in me peccatum. Sic de illo textu Concil. Trid. sess. 5, decret. de peccat. orig. 5: Hanc concupiscentiam, quam aliquandò Apostolus peccatum appellat, sancta Synodus declarat Ecclesiam Catholicam nunquàm intellexisse peccatum appellari, quod verè et propriè in renatis peccatum sit, sed quia ex peccato est, et ad peccatum inclinat. Unde, concupiscentia ex peccato; ergo ante peccatum non exis-tebat.*

Ad 2<sup>am</sup> quæst. part. scilicet: *Utrùm rectitudo includeret impossibilitatem peccandi?*

*Resp.* Rectitudo voluntatis includebat impossibilitatem peccandi impulsu concupiscentiæ, non verò alio modo. Ex his affirmationibus, prima concluditur ex propositione præcedenti, secunda ex peccato Adami.

Quæst. 2<sup>a</sup>. *Quonam tempore rectitudo voluntatis fuerit Adamo concessa?*

*Resp.* Certum est, et ab omnibus admissum, actu ipso creationis homini concessam fuissè rectitudinem, saltem naturalem.

Controvertitur autem utrùm rectitudo concessa fuerit

supernaturalis. Quidam affirmant; quia gratia habitualis statim à creatione fuit concessa. Alii negant; homo enim creatus in ordine et rectitudine naturali, postea tantum, sed ante lapsum, elevatus est ad ordinem supernaturalem. — Probabilior est prima opinio, ut supra dictum est.

3<sup>o</sup> De dotibus Corporis.

Quær. *Quibus mediis à morbo et morte præservatus fuisset Adam?*

Resp. Morbi et mortis duplex potest esse causa, extrinseca, intrinseca.

A causis *extrinsecis* præservabatur Adam, juxta quosdam, per donum habituale corporeum aut spirituale. Juxta alios, præservabatur per scientiam et sapientiam, quibus perfectius quàm nos cognoscebat et vitabat causas morbi extrinsecas; simulque per divinam providentiam quàm amovebantur causæ morbi extrinsecæ mediis prædictis inevitabiles. — Possibilis est utraque opinio; secunda tamen naturæ rerum magis accommodata, ac proinde probabilior videtur.

A causis *intrinsecis* præservabatur, juxta D. Thomam (1 p. q. 97, art. 1), virtute quâdam animæ infusâ, quæ corpus ab omni corruptione præservabat. Juxta alios, ad hunc finem concurrebant: bona corporis constitutio; conditiones extrinsecæ, v. g. cibus, potus, aer, etc. sanitati corporis accommodatissimæ; esus fructus ligni vitæ cui inhærebat efficacia vigorem vitalem renovandi, ut designat nomen ipsi à Deo inditum. — Probabilior videtur secunda opinio, utpotè naturæ rerum et Scripturæ magis accommodata.

*II. De elementis extrinsecis.*

**1° De dominio in animalia et res inferiores.**

**Quær.** *Quale fuerit Adæ dominium in animalia et res inferiores; et quomodo eo usus fuerit?*

**Ad 1<sup>m</sup> quæst. part. Resp.** Adam habebat dominium tum juris, tum facti.—Habebat dominium juris, id est habebat jus in ea dominandi. Hoc constat rationibus ad probandam thesim suprâ expositis.—Habebat dominium facti, id est, realiter in ea dominabatur. Ex Gen. 1, 31 : *Vidit... Deus cuncta quæ fecerat: et erant valde bona.* Porro, si bona, ergo ordinata ; si ordinata, ergo inferiora superioribus, ac proindè animalia et res inferiores homini facto subiciebantur, seu, quod idem est, homo in ea dominium facti possidebat.

**Ad 2<sup>m</sup> Resp.** Homo dominabatur in animalia, quasi imperio ; et in res inferiores, eis faciliè utendo. — Dominabatur in animalia quasi imperio : non quidem imperio propriè dicto, quod in animalia, propter defectum rationis, exerceri non potest ; sed imperio impropriè dicto, Deo eorum instinctum habitualiter ad obsequendum homini disponente.—Dominabatur in res inferiores, eis faciliè utendo : impossibile est enim alio modo in istas res dominari, cum motu spontaneo instinctuque priventur.

**2° De habitatione in Paradiso.**

**Quær.** *Utrùm ea quæ in Scripturâ narrantur de Paradiso intelligenda sint sensu litterali, an metaphorico; et in hypothesi sensûs litteralis, utrùm Paradisus fuerit locus specialis?*

Ad 1<sup>am</sup> quæst. partem,

*Resp.* Quidam, inter quos Origenes, arbitrantur dicta de Paradiso intelligenda esse in sensu metaphorico.

Juxta autem sententiam catholicam intelligenda sunt in sensu litterali.

*Prob. 1<sup>a</sup>. Script.* 1. Paradisus à Moyse describitur tanquàm locus habitationis protoparentis, qui loco corporeo indigebat. 2. Ex Genesi, Paradisus erat locus flumine irrigatus, in quatuor partes divisus, in quo Deus ex humo produxerat omne lignum pulchrum visu et ad vescendum suave; in quo homo positus fuerat, ut eum custodiret, coleret; à quo postea protoparentes expulsi sunt postquàm Eva, contra Dei prohibitionem, fructum arboris scientiæ boni et mali viderit, tanquàm pulchrum et delectabile concupierit, comederit, et viro edendum dederit; à cujus ingressu, post lapsum, prohibebantur homines per Cherubim, etc. Quibus positis, interpretatio metaphorica textui violentiam infert; ergo litteralis sola tenenda est.

*Prob. 2<sup>a</sup>.* Si verba Scripturæ de Paradiso metaphoricè interpretanda essent, maximè quia repugnaret divinis attributis Paradisi terrestris præparatio; porro nedùm repugnet, econtrà convenientissima fuit. Paradisus enim Scripturà descriptus, erat locus vitæ conservationi et felicitati temporali hominis aptissimus.

Ad 2<sup>am</sup> scilicet: *Utrùm Paradisus fuerit locus specialis?*

*Resp.* Paradisus fuit locus specialis. Adam extra Paradisum creatus, fuit postea in Paradisum translatus, post peccatum à Paradiso expulsus et ab ejus ingressu prohibitus: hæc omnia supponunt Paradisum fuisse locum specialem.

Explicatâ *primâ* propositione (de privilegiis statûs innocentiae Adamo concessis), explicandæ sunt *SECUNDA* et *TERTIA* de conditionibus conservationis aut amissionis statûs innocentiae. — De his quatuor quæstiones sequentes :

Quæst. 1<sup>a</sup>. *Utrûm Adam in primâ tentatione fidelis, deindè in gratiâ sanctificante, ac consequenter in statu innocentiae confirmari debuisset?*

*Resp.* Quidam respondent affirmativè.

Communior tamen et probabilior est opinio negativa. Homo in gratiâ confirmari potest duplici tantûm causâ, scilicet visione intuitivâ, et auxilio speciali. Porro quamvis Adam vicisset primam tentationem, ipsi tamen non fuisset statim concessa visio intuitiva. Aliundè nullâ ratione probari potest auxilium speciale ipsi concedendum fore.

Quæst. 2<sup>a</sup>. *Utrûm in hypothesi prædictâ, Adæ posterî in statu innocentiae nati ac confirmati fuissent?*

*Resp.* Si Adam in primâ tentatione fidelis perstitisset, ejus posterî nati fuissent cum privilegiis statûs innocentiae, exclusis tamen donis Adamo personalibus; in hoc verò statu confirmati non fuissent.

*Prob.* Nati fuissent cum privilegiis...: Nam 1. ex omnium consensu, statûs innocentiae bona omni generi humano in Adami personâ concessa fuerant. 2. Adamo peccante, natura humana statûs innocentiae dona amisit, ergo econtrâ, Adamo non peccante, omnes in statu innocentiae nati fuissent. — Exclusis donis Adamo personalibus : siquidem soli Adamo, ob rationes speciales, concessa erant. Sic ipsis infusa non fuisset scientia perfecta quam Deus concesserat Adamo tanquam posterî

tatis Doctori. — Confirmati non fuissent : ob rationes superius expositas.

Quæst. 3<sup>a</sup>. *Utrùm Adam peccans post primam tentationem amittere debuerit sibi et posteris privilegia statûs innocentiae?*

*Resp.* Si Adam, post primam tentationem, violâset præceptum de non comedendo fructu arboris scientiae boni et mali, amisisset sibi et posteris statum innocentiae. Nam præceptum et ejus sanctio erant perpetua. Deus enim dixerat Adamo, quatenus capiti generis humani, Gen. 2, 17 : *De ligno autem scientiae boni et mali ne comedas. In quocumque enim die comederis ex eo morte morieris.*

Si autem Adam mortaliter peccâset contra aliud præceptum, amisisset statûs innocentiae privilegia sibi tantum non verò posteris. — Amisisset sibi : nam 1. juxta D. Thomam, cujus sententia inferius exponenda est, privilegia statûs innocentiae à gratiâ pendebant ; ergo per peccatum mortale cum gratiâ fuissent amissa. 2. Per peccatum mortale, Adam factus fuisset reus aeternae mortis, proindè pœnæ, doloris ; ergo quædam et, ob paritatem rationis, omnia privilegia statûs innocentiae amisisset. — Non amisisset pro posteris : nullum enim aliud præceptum impositum fuit protoparenti tantum capiti totius naturæ humanæ.

Quæst. 4<sup>a</sup>. *Utrùm Eva, aut Adæ posteri peccatum personale committentes, sibi et posteris amisissent privilegia statûs innocentiae?*

*Resp.* Si, Adamo non peccante, Eva, aut Adæ posteri individualiter peccavissent, amisissent sibi, non verò posteris privilegia statûs innocentiae, juxta probabilio-

rem opinionem.—Amisissent sibi: ob rationes prædictas.—Non posteris: Nam 1. nullo modo probari potest alium, præter Adamum constitutum fuisse caput generis humani. 2. Ex hypothesi contrariâ sequeretur filios portare iniquitates omnium avorum suorum, quod falsum est. Juxta Apostolum, Rom. 5, 12: *Per unum hominem peccatum in hunc mundum intravit.*

Utrum autem status innocentiae per peccata personalia amissus recuperari potuisset, incertum est.

## II.

### PARTIUM OSTENDUNTUR RELATIONES.

**QUÆR.** *Quænam existant relationes inter elementa statûs innocentiae?*

**RESP.** Elementa statûs innocentiae 1º ad invicem coordinantur, 2º naturalia à supernaturalibus quoad existentiam pendent.

1º Ad invicem coordinantur:

*Finis supernaturalis* exigit ens supernaturale, quod in homine creatur *gratiâ sanctificante*.—Ens supernaturale vires supernaturales exigit, quæ homini per *gratias actuales* conceduntur. — Ens supernaturale viribus supernaturalibus præditum exigit facultates supernaturales quibus exercere possit actus ad finem necessarios. Ideò cum *gratiâ sanctificante* infunduntur *fides*, quâ cognoscit veritates supernaturales; *spes*, *charitas*, et aliæ *virtutes supernaturales infusæ* quibus vult et operatur bonum supernaturale.

Cum autem ens naturale sit entis supernaturalis instrumentum, perfectio naturalis congruit perfectioni

supernaturali donis præcedentibus completæ et per peccatum non vitiatæ. Agenti namque perfecto congruit instrumentum perfectum.—Perficiuntur verò sub respectu naturali: intellectus, *scientiâ perfectâ*; voluntas, *virtutibus moralibus* Adamo supernaturaliter infusis; corpus, animæ instrumentum, per dona indebita, *immunitatem à morbo, morte et concupiscentiâ*; natura, corporis instrumentum, per *subjectionem animalium et utilitatem ex rebus inferioribus in Paradiso terrestri perceptam*.

Explicatâ coordinatione mediorum ad finem à quibus pendet perfectio supernaturalis et naturalis, explicanda nunc coordinatio tentationis ad perfectionem. Porro, cum perfectio actibus propriis acquisita sit excellentior perfectione modo merè passivo obtentâ, congruentissimum fuit conservationem perfectionis primitivæ concessæ à merito hominis seu à probatione pendere.

2° Naturalia à supernaturalibus, quoad existentiam pendunt.

Elementa supernaturalia ea sunt, quæ ad finem supernaturalem necessariò et directè ordinantur. Elementa naturalia comprehendunt privilegia naturæ indebita, quæ supernaturaliter concedi possunt personæ ad finem supernaturalem etiam non destinatæ.

*Prob.* 1° Ex suprà dictis, dona naturalia ad supernaturalia coordinantur; ergo, amissis supernaturalibus, congruum est ut et naturalia amittantur. 2° Homo dona supernaturalia perdere non potest, quin Deo rebellet; porro æquum est ut contra animam Deo rebellatam insurgant ~~partes~~ inferiores, corpus, natura. 3° Homo peccando reus est poenæ; quæ necessariò, partim saltem,



donis naturalibus privatur. 4° Adam ejusque posterī privati sunt privilegiis naturæ integræ, in pœnam peccati protoparentis; ergo.

## ACTUS SECUNDUS.

### DEUS PERMITTIT LAPSUM HOMINIS.

Doctrina catholica de lapsu hominis sequentibus propositionibus comprehendi potest: 1° Peccaverunt protoparentes; indè amiserunt sibi privilegia statūs innocentiae; 2° Peccatum Adami fuit posteris transfusum, exceptis Christo et B. V. Mariâ; indè posterī amiserunt privilegia statūs innocentiae.

Priori propositioni adversantur Rationalistæ, qui negant statum innocentiae, ac proindè lapsum primi hominis.

Posteriori: 1° qui peccatum originale negant absolute: Pelagiani, affirmantes peccatum protoparentum his tantum, non verò posteris nisi fortè exemplo inculcasse; Albigenses anno 1278, Anabaptistæ anno 1540, Sociniani et Ariminienses, qui renovarant errorem Pelagianorum; omnes omnium temporum increduli; 2° qui negant infantes ortos ex parentibus justis contrahere peccatum originale: Calvinus, Zuinglius; 3° qui notionem peccati originalis adulterant, affirmando, v. g. illud consistere in solo reatu pœnæ, in solâ concupiscentiâ, etc.

Peccati originalis existentiam, universalitatem, naturam, quales ab Ecclesiâ intelliguntur, admittunt catholici. Dissentiunt tamen de quæstionibus accidenta-

libus ad peccati originalis naturam et transmissionem pertinentibus.

Nobis ergo probanda et explicanda propositio.

### PROBATIO.

#### I.

PECCAVERUNT PROTOPARENTES; — INDE AMISERUNT SIBI PRIVILEGIA  
STATUS INNOCENTIAE.

#### § I. — Peccaverunt protoparentes.

*Prob. 1<sup>a</sup>. Script. Gen. 2, 16 et 17: Præcepitque (Deus) ei (Adæ) dicens: Ex omni ligno paradisi comede: de ligno autem scientiæ boni et mali ne comedas. In quocumque enim die comederis ex eo, morte morieris. Ibid. 3, 6: Et tulit (mulier) de fructu illius, et comedit: deditque viro suo, qui comedit.*

*Rom. 5, 12: Per unum hominem peccatum in hunc mundum intravit, et per peccatum mors, et ita in omnes homines mors pertransiit in quo omnes peccaverunt. Ex his textibus patet protoparentes peccavisse.*

*Prob. 2<sup>a</sup>. Hæc est Ecclesiæ fides.*

*Prob. 3<sup>a</sup>. Concil. Trid. sess. 5, can. 1: Si quis non constetur, primum hominem Adam, cum mandatum Dei in Paradiso fuisset transgressus, statim sanctitatem, et justitiam, in quâ constitutus fuerat, amisisse, incurrisseque per offensam prævaricationis hujusmodi iram et indignationem Dei, atque ideò mortem, quam antea illi comminatus fuerat Deus, et cum morte captivitatem sub ejus potestate qui mortis deindè habuit imperium, hoc est, diaboli, totumque Adam, per illam prævaricationis offensam, secundum corpus et animam in deterius commutatum fuisse: anathema sit.*

§ III. — *Indè amiserunt sibi privilegia status innocentiae,*

*I. Essentialia, scilicet :*

1<sup>o</sup> Gratiam sanctificantem :

*Prob. 1<sup>a</sup>.* Ex doctrinà Ecclesiæ, per peccatum mortale amittitur gratia sanctificans; eam proindè perdidit Adam per peccatum suum, si hoc peccatum fuerit grave: porro ejus gravitas ex infrà dicendis constabit.

*Prob. 2<sup>a</sup>.* Ecclesia credit Adamum per peccatum suum gratiam sanctificantem amisisse.

*Prob. 3<sup>a</sup>.* Ex Concilio Tridentino suprà citato constat Adamum per peccatum suum *sanctitatem, et justitiam, in quâ constitutus fuerat, amisisse, incurrisseque per offensam prævaricationis hujusmodi iram et indignationem Dei.*

2<sup>o</sup> Finem supernaturalem, seu jus ad visionem intuitivam :

*Prob.* Adam per peccatum suum gratiam sanctificantem amisit; proindè jus ad visionem intuitivam, cùm ex doctrinà et fide Ecclesiæ, jure ad visionem intuitivam priventur qui gratiam sanctificantem non possident.

3<sup>o</sup> Jus ad gratias actuales :

*Prob.* Adam amisit per peccatum jus ad finem, seu ad visionem intuitivam; ergo amisit jus ad media, seu ad gratias.

*II. Accidentalìa:*

*Prob. gener. 1<sup>a</sup>.* Ex dictis, ubi de relationibus elementorum statûs innocentiae, ab essentialibus pendent accidentalìa; ergo, amissis prioribus, amitti posteriora necesse fuit.

2<sup>a</sup>. Per peccatum originale Adami posteritas amisit privilegia status innocentiae. Ergo à pari et à fortiori protoparens debebat illa amittere, si peccatum originale sit ipsius Adæ peccatum, gravius in protoparente quàm in posteris ; porro rem ità esse ex dicendis constabit.

3<sup>a</sup>. Concil. Trid. docet in canone citato *totum Adam, per illam prævaricationis offensam, secundum corpus et animam in deterius commutatum fuisse.*

*Prob. special.*— Protoparentes amiserunt privilegia accidentalìa,

*I. Intrinseca, scilicet :*

1<sup>o</sup> Intelligentiæ :

Diminuta est scientia naturalis : Siquidem per peccatum aptitudo ad scientiam attenuata est intrinsecè, extrinsecè. Intrinsecè, quia post peccatum aggravata est anima per corpus ; extrinsecè, quia homo ad laborem corporeum damnatus, ad terrena necessariò inclinatus, ad spiritualia difficiliùs assurgere poterat.

Amissa fuit cognitio supernaturalis : Nam, ex infrà dicendis, protoparentes in actu peccati fidem amiserunt.

Amiserunt privilegium non errandi : Nam 1. amiserunt fidem, ergo erraverunt. 2. Privilegium non errandi à rectitudine voluntatis pendebat ; porro amiserunt voluntatis rectitudinem.

2<sup>o</sup> Voluntatis :

Amiserunt rectitudinem voluntatis, seu, quod idem est, justitiàm originalem ; imò diabolo fuerunt subjecti.

Amiserunt justitiàm originalem : Vidimus enim con-

cupiscentiam à peccato ortam fuisse, ubi probavimus protoparentes ab eà fuisse immunes in statu innocentiae.

Diabolo fuerunt subjecti : Nam 1. II Petr. 2, 19 : *A quo... quis superatus est, hujus et servus est ;* ergo protoparentes in peccato suo à diabolo superati , ejus servi constituti sunt. 2. In canone suprà citato, Adam incurrit, *cum morte captivitatem sub ejus potestate qui mortis deindè habuit imperium, hoc est, diaboli.*

Corol. Ergo per peccatum immunitæ, non verò destructæ fuerunt vires liberi arbitrii protoparentum.— Fuerunt immunitæ : Siquidem libero arbitrio concupiscentiae et diabolo per peccatum subjecto, vires ad bonum immunitæ fuerunt ;—non verò destructæ : Concil. Trid., sess. 6, can. 5 : *Si quis liberum hominis arbitrium post Adæ peccatum amissum et extinctum esse dixerit, aut rem esse de solo titulo, imò titulum sine re, figmentum. denique à Satanâ invectum in Ecclesiam ; anathema sit.*

3<sup>o</sup> Corporis :

Amiserunt immunitatem à morte et morbo.

Immunitatem à morte : Nam 1. mortui sunt. 2. Rom. 5, 12 : *Per unum hominem peccatum in hunc mundum intravit, et per peccatum mors.* 3. In canone suprà citato (sess. 5, can. 1) Concilium Tridentinum docet Adam per peccatum incurrisse mortem, *quam antea illi comminatus fuerat Deus.*

Immunitatem à morbo : Eodem enim principio præservabantur à morte et morbo. Amissà proindè immortalitate, amiserunt immunitatem à morbo.

*II. Extrinseca, scilicet :*

Dominium facti in res inferiores et animalia: sic enim Adamum allocutus est Deus post peccatum : Gen. 3, 17, 18 : *Maledicta terra in opere tuo : in laboribus comedes ex ea cunctis diebus vitæ tuæ. Spinæ et tribulos germinabit tibi, et comedes herbam terræ.* Ergo protoparentes amiserunt dominium facti in res animalibus inferiores ; à pari in animalia.

Habitationem in Paradiso : Gen. 3, 23, 24 : *Emisit eum Dominus Deus de Paradiso voluptatis, ut operaretur terram de quâ sumptus est. Ejecitque Adam...*

**II.**

PECCATUM ADAMI FUIT POSTERIS TRANSFUSUM, EXCEPTIS CHRISTO ET B. V. MARIA ; — INDÈ POSTERI AMISERUNT PRIVILEGIA STATUS INNOCENTIÆ.

§ I. — Peccatum Adami fuit transfusum posteris, exceptis Christo, et B. V. Maria.

Tria includit hæc propositio : 1<sup>o</sup> Homines nascuntur peccato originali obnoxii. 2<sup>o</sup> Excipiuntur Christus et B. V. Maria. 3<sup>o</sup> Soli excipiuntur.

*I. Homines nascuntur peccato originali obnoxii.*

*Prob. I.* Peccatum originale est : peccatum, à conceptione, in Adamo contractum, verum et cuique proprium. — Proindè ad probandam propositionem requiritur et sufficit ostendere : 1<sup>o</sup> homines in peccato concipi, 2<sup>o</sup> hoc peccatum esse contractum in Adamo, 3<sup>o</sup> esse verum, 4<sup>o</sup> esse unicuique proprium. Porro,

**I. Homines in peccato concipiuntur :**

*Pr. 1<sup>a</sup>. Argum. theol.* — Baptismus ad remissionem

peccatorum ordinatur. Ergo infantes nascuntur rei peccato, si baptismus sit ipsis necessarius. Atqui res ita est. Probanda tantum *maj.* et *min.*

Baptismus ad remissionem peccatorum ordinatur : Act. 2, 38 : *Baptizetur unusquisque vestrum in nomine Jesu Christi in remissionem peccatorum.* Symb. Nicæn. : *Confiteor unum Baptisma, in remissionem peccatorum.*

Baptismus est infantibus necessarius : Joan. 3, 5 : *Nisi quis (etiam infans) renatus fuerit ex aqua, et Spiritu Sancto, non potest introire in regnum Dei.* Aliundè Ecclesia exigit ut baptismus infantibus administretur.

*Pr. 2<sup>a</sup>. Script. V. T.*—Job. 14, 4 : *Quis potest facere mundum de immundo conceptum semine ? nonne tu (Deus) qui solus es ?* Undè sic : Homo nascitur fœdatus maculâ, quam Deus solus potest delere ; proindè maculâ spirituali, seu peccato.

*Psal. 50, 7 : Ecce... in iniquitatibus conceptus sum : et in peccatis concepit me mater mea.* (In textu hebr. *iniquitate, peccato, pro iniquitatibus, peccatis.*) Undè sic : Nulla est ratio intelligendi verba hæc de peccatis in conceptione David, à matre commissis ; intelligenda sunt proindè de peccato Davidi proprio. Ergo David in peccato proprio conceptus est ; à pari cæteri homines.

*Script. N. T. Ephes. 2, 3 : Eramus naturâ filii iræ, sicut et cæteri.* Rom. 5, 12 : *Per unum hominem peccatum in hunc mundum intravit, et per peccatum mors, et ita in omnes homines mors pertransiit, in quo omnes peccaverunt.* II Cor. 5, 14 : *Si unus pro omnibus mortuus est, ergo omnes mortui sunt.* Undè sic : Peccatum actuale supponit libertatem in actu ; porro infantes peccato actuali sunt incapaces ; ergo admittendum est

peccatum originale, si infantes nascentur peccato rei. Porro nascuntur peccato rei; ex textibus citatis constat. Nascuntur enim *filii iræ*, ergo peccato maculati, cum solos peccatores odit Deus; *omnes peccaverunt*, ergo infantes; peccaverunt omnes qui morti obnoxii sunt, ergo infantes, siquidem sunt mortales; mortui sunt peccato ii omnes pro quibus Christus mortuus est, ergo infantes, pro ipsis nempe mortuum fuisse Christum constabit ex infra dicendis.

*Pr. 3<sup>a</sup>. Tradit.* — Sæculo II<sup>o</sup> S. Justinus, martyr, in dial. cum Tryph. ait : Christum in Jordane baptismum propter genus humanum quod per Adam, in mortem et fraudem seductionemque serpentis inciderat ; ut interim, inquit, propriam pro se malignè agentis cuiusque culpam taceam. Ergo, juxta S. Justinum, in homine existunt culpæ, aliæ à tentatione serpentis, aliæ à voluntate propriâ provenientes ; seu, quod idem est, peccatum originale et actuale. — Tatianus, in orat. contr. Græc. ait nos propter priscorum hominum inobedientiam, spiritum Dei, perfectam justitiam sanctitatemque amisisse. — S. Irenæus, lib. 3 contra hæres. : *Impossibile erat ut salutem perciperet* (sine Christo) *qui sub Adæ peccato ceciderat.*

Sæc. II<sup>o</sup> et III<sup>o</sup>, Tertullianus, de testim. animæ, c. 3 : *Per quem* (diabolum) *homo à primordiis circumventus, ut præceptum Dei excederet, et propterea in mortem datus ; exindè totum genus de suo semine infectum, suæ etiam damnationis traducem fecit.* — Origenes, in Cant. Cantic. homil. 3 : *Serpens qui seduxerat Evam, peccati in eam venena diffundens, omnem posteritatis sobolem, contagio prævaricationis infect.*



Multa aliorum Patrum testimonia omittimus, ut Chrysostomi, Cypriani, Athanasii, etc., etc., quæ legi possunt apud Bellarminum, t. 3, Controv. *de amissione grat. sive de statu peccati*.

*Pr. 4<sup>a</sup>. Concil. 1<sup>o</sup> Viginti quatuor Concilia damnaverunt Pelagianos dogma peccati originalis negantes.*

*2<sup>o</sup> Conc. Trid. sess. 5, can. 2: Si quis Adæ prævaricationem sibi soli, et non ejus propagini, asserit nocuisse; et acceptam à Deo sanctitatem et justitiam, quam perdidit, sibi soli, et non nobis etiam eum perdidisse; aut inquinatum illum per inobedientiæ peccatum, mortem et pœnas corporis tantum in omne genus humanum transfudisse, non autem et peccatum, quod mors est animæ: anathema sit.*

II. Peccatum originis in Adamo fuit contractum:

*Pr. 1<sup>a</sup>. Script. Rom. 5, 12: In quo (Adamo) omnes peccaverunt. Ibid. v. 19: Per inobedientiam unius hominis, peccatores constituti sunt multi.*

*Pr. 2<sup>a</sup>. Ex fide Ecclesiæ.*

*Pr. 3<sup>a</sup>. Concil. Trident. affirmat, in sess. 5, can. 2, prævaricationem Adæ non sibi soli, sed etiam propagini ejus nocuisse; Adamum per eam nobis sanctitatem et justitiam perdidisse et peccatum suum transfudisse. In ean. 3 docet peccatum Adami, origine unicum, nobis transfusum fuisse.*

III. Peccatum originale est verum peccatum:

*Prob. 1<sup>a</sup>. Juxta Scripturam et traditionem, homines nascuntur peccatores, sine addito; ergo peccato propriè dicto maculati, nisi probetur verba hæc intelligenda esse in sensu metaphorico. Porro non probatur.*

*Pr. 2<sup>a</sup>. Ex Concil. Trident. 1<sup>o</sup> Concilium (sess. 5, can.*

2) vibrat anathema contra eos qui affirmant Adamum posteritati non transmisisse peccatum quod est *mors animæ*. Porro peccatum quod est mors animæ est peccatum propriè dictum, ut evidens est. 2º In can. 4, docet parvulos *baptizandos... lavacro expiari*. Ergo infantes purificatione, expiatione indigent; ergo nascuntur maculati peccato. 3º In can. 5, vibrat anathema contra eos qui negant per baptismum remitti *id quod veram et propriam peccati rationem habet*. Ergo peccatum originale, quod remittitur per baptismum, habet veram rationem peccati. In eodem canone affirmat baptizatos fieri *innocentes, immaculatos, puros, innoxios*; ergo ante baptismum erant nocentes, maculati, impuri, noxii; ergo affecti peccato. 4º In sess. 6, cap. 1 et 3, affirmat homines in prævaricatione Adæ factos esse *immundos, servos peccati; propriam injustitiam contraxisse*: quæ omnia supponunt peccatum originale esse peccatum verum.

IV. Peccatum originale est unicuique proprium :

*Pr. 1ª. Arg. theol.* Nemo dici potest *peccator* sine addito, seu sensu proprio, solà imputatione extrinsecà peccati alieni. Ergo peccatum originale est proprium unicuique, si omnes nascentur peccatores sine addito; porro hoc est certum, ut suprà probavimus.

*Pr. 2ª. Script. Rom. 6, 23: Stipendia... peccati, mors.* Porro mors est unicuique propria; ergo cuique proprium est peccatum, cujus mors stipendia. Ibid. 8, 19: *Sicut enim per inobedientiam unius hominis, peccatores constituti sunt multi: ita et per unius obedientiam, justi constituentur multi.* Porro justitia à Christo concessa unicuique est propria; ergo à pari peccatum in Adamo contractum.

**Pr. 3<sup>a</sup>.** Concil. Trid. sess. 3, can. 3, docet peccatum originale *inesse unicuique proprium*; et, scss. 6, cap. 3, *homines prævaricatione Adæ, propriam injustitiam contrahere*.

**Prob. II.** Dogma peccati originalis est fundamentum religionis mosaicæ et christianæ. Ergo, si falsum est dogma peccati originalis, falsa utraque religio; quod rejiciendum, ex dictis ubi *de Locis theologicis*.

Tertia probatio deduci posset ex solutione objectionum. Hanc omittimus quia objectiones propositionis explicatione diluuntur.

## **II. Excipiuntur Christus et B. V. Maria:**

1<sup>o</sup> Christus à peccato originali fuit immunis.

**Prob. 1<sup>a</sup>.** Homines nascuntur maculati peccato originali, quia ex semine Adami generantur. Porro Christus non ex semine Adami, sed de Spiritu Sancto conceptus fuit. Ergo.

**Prob. 2<sup>a</sup>.** In Christo, natura humana et divina hypostaticè uniuntur; undè sequitur communicatio idiomatum, vi cujus Christo attribui possunt proprietates divinitatis et humanitatis. Proindè, si Christus peccatum originale contraxisset, meritò dici posset Hominem-Deum fuisse peccatè maculatum, quod absurdum.

2<sup>o</sup> B. V. Maria, à primo conceptionis instanti, fuit immunis à peccato originali; *seu, quod idem est*, Ejus conceptio fuit immaculata.

Per conceptionem hic intelligimus unionem animæ cum corpore. Affirmamus ergo in propositione B. V. Mariam fuisse à peccato originali immunem à primo conceptionis instanti, ac proindè ab instanti creationis,

siquidem anima creatur eodem instanti quo corpori infunditur.

Affirmant pseudoreformati B. Virginem peccato originali, et in conceptione et in nativitate, fuisse maculatam.

Omnes Catholici semper tenuerunt nativitatem B. Virginis fuisse sanctam. Olim graves agitatæ fuerunt controversiæ circa sanctitatem ejus conceptionis. Nunc Doctores et fideles communissimè tenent B. Virginem fuisse immaculatam, seu immunem à peccato originali, à primo conceptionis instanti.

*Prob. 1<sup>a</sup>. Arg. theol.* Si B. Virgo peccato originali fuisset in conceptione maculata, ergo 1<sup>o</sup> Maria, Spiritus S. sponsa, Filii mater, fuisset diabolo et peccato submissa, Deo odibilis; 2<sup>o</sup> Filius denegasset matri privilegium angelis, protoparentibus, imò dæmonibus concessum; 3<sup>o</sup> corpus Domini, ex Mariâ Virgine conceptum, in matre saltem, fuisset peccato et diabolo submissum. Quæ conclusiones offendunt aures christianas; falsum proindè principium à quo fluunt.

Omnes theologi catholici affirmant nativitatem Mariæ immaculatam, quia nativitas maculata ipsius dignitatem dedeceret; ergo ipsius conceptionem immaculatam necesse est admittere, si dignitati Mariæ conceptio maculata pariter contradicat. Porro rem ità esse evidenter patet.

*Prob. 2<sup>a</sup>. Script.* Deus, post peccatum protoparentum, serpentem alloquitur his verbis: Gen. 3, 15: *Inimicitias ponam inter te et mulierem, et semen tuum et semen illius: ipsa conteret caput tuum, et tu insidiaberis calcaneo ejus.* Undè sic: B. Virgo sola, per Filium,

contrivit caput serpentis, seu diaboli ; ergo mulier de quâ agitur in hoc textu est B. Virgo ; ergo inter eam et diabolum existit inimicitia, et quidem perpetua, cum textus sit generalis ; ergo B. Virgo fuit à conceptione immaculata, alioquin inimicitia inter illam et diabolum non fuisset perpetua.

*Prob. 3<sup>a</sup>. Tradit. 1<sup>o</sup>, II<sup>o</sup> et III<sup>o</sup> Ecclesiæ sæc.*—In epistola Sacerdotum et Diaconorum Aethiæ, de martyrio S. Andræ, sic Apostolus proconsulem alloquitur : *Et propterea, quod ex immaculatâ terrâ creatus fuerat primus homo, necesse erat ut ex immaculatâ Virgine nasceretur perfectus homo, quo Filius Dei, qui antè condiderat hominem, vitam æternam quam perdiderant homines repararet.*—Origenes, homil. 1 in Luc. hæc habet de Mariâ : *Nec serpentis venenosi afflatibus infecta est.*

IV<sup>o</sup> sæc.—Amphiloquus, Iconensis episcopus, affirmat, serm. 4 in Deiparam, Deum formasse B. Virginem *sine maculâ et sine peccato.*—S. Ambrosius Mariam his verbis designat : *Virgo per gratiam ab omni integra labe peccati.*—S. Epiphanius, de laud. Virg., dicit de Mariâ : *Solo Deo excepto, cunctis superior extitit, naturâ formosior est ipsis Cherubim, Seraphim, et omni exercitu Angelorum... Ovis immaculata, quæ peperit Agnum Christum.*—S. Hieronymus explicans hæc verba, in commentar. Psal. 77 : *Et deduxit eos in nube diei,* hæc habet : *Ecce Dominus venit in Ægyptum in nebulâ levi. Nubem levem, aut propriè Salvatoris corpus debemus accipere, quia leve fuit, et nullo peccato prægravatum : aut certè nubem levem debemus sanctam Mariam accipere, nullo semine humano præ-*

*gravatam. Ecce Dominus venit in Ægyptum sæculi istius super nubem levem, Virginem. Et deduxit eos in nube diei. Pulchrè dixit diei; nubes enim illa non fuit in tenebris, sed semper in luce.* — S. Augustinus, contra Pelagianum affirmantem infantes, ex parentibus baptizatis ortos, nasci peccato originali immunes, sequentia affirmat: *Exceptâ itaque sanctâ Virgine Mariâ, de quâ, propter honorem Domini, nullam prorsus, cum de peccatis agitur, haberi volo quæstionem; undè enim scimus quòd ei plus gratiæ collatum fuerit ad vincendum omni ex parte peccatum, quæ concipere ac parere meruit quem constat nullum habuisse peccatum? Hæc ergo Virgine exceptâ, si omnes illos Sanctos, et Sanctas, cum hic viverent, congregare possemus, et interrogare utrùm essent sine peccato, quid fuisse responsuros putamus, utrùm hoc, quod iste dicit, an quod Joannes Apostolus? Rogo vos, quantalibet fuerint in hoc corpore excellentia sanctitatis, si de hoc interrogari potuissent, nonne unâ voce clamarent: Si dixerimus quia peccatum non habemus, nos ipsos decipimus, et veritas in nobis non est?* — Juxta S. Ephrem, orat. de S. Dei genitr., B. Virgo est: *Immaculata et intemerata, incorrupta et prorsus pudica, atque ab omni sorde et labe peccati alienissima, Dei sponsa et Domina nostra.*

Vº sæc. — Ex S. Cyrillo Alex. l. 6 in Joan.: *Omnes homines, excepto illo, qui de Virgine natus est, et sacratissimâ etiam Virgine, ex quâ Deus homo prodiit in mundum, exemptâ, cum peccato originali nascimur, et gravissimâ cæcitate depressi in mundum venimus, quam quidem cæcitatem de radice primi parentis con-*

*traximus. Et, in Conc. Eph. n. 6 : Quis unquam audi-  
vit architectum, qui sibi domum ædificavit, ejus occu-  
pationem et possessionem primò suo inimico cessione?*  
—S. Maximus, homil. 5 ante natale Dom.: *Idoneum  
planè Maria Christo habitaculum non pro habitu cor-  
poris, sed pro gratiâ originali.*

VI<sup>o</sup> sæc.—S. Fulgentius, serm. de laud. Mar., dicit  
Mariam ab Angelo salutatam fuisse *plena gratiâ*, quia  
prima iræ sententia fuerat erga eam *absolutè destructa.*

VII<sup>o</sup> sæc.—Juxta S. Ildefontium, disput. de V. M.,  
*Constat eam ab originali peccato fuisse immunem.*

VIII<sup>o</sup> sæc.—S. Joannes Damascenus, Orat. de Nativ.  
B. M. V.: *Quoniam futurum erat, ut Dei Genitrix ac  
Virgo ex Annd oriretur, natura gratiæ sætum antever-  
tere minimè ausa est, verùm tantisper expectavit dùm  
gratia fructum suum produxisset. Et, orat. 2 de As-  
sumpt.: Ad hunc paradisum serpens aditum non ha-  
buit.*

X<sup>o</sup> sæc.—S. Petrus Damianus, orat. 2 de Nativ. M.,  
hæc ait: *Caro Virginis, ex Adam sumpta, maculas  
Adam non admisit.*

XI<sup>o</sup> sæc.—S. Anselmus, de Conceptu Virgin. c. 18:  
*Decuit ut Virgo, quam Deus unigenito Filio suo præ-  
paravit in Matrem, eâ puritate niteret, quâ major sub  
Deo nequit intelligi. Et, in Comment. c. 12 ep. ad Cor.:  
Omnes mortui sunt in peccatis sive originalibus, sive  
voluntate additis, nemine prorsus excepto, demptâ Ma-  
tre Dei.*

XIII<sup>o</sup> sæc.—S. Bonaventura, serm. 2 de B. V.: *Do-  
mina nostra fuit plena gratiâ in suâ sanctificatione,  
gratiâ, scilicet, præservativâ contra sædilatam origi-  
nalis culpæ.*

Plura non adducemus, quia textus citati ad scopum nostrum sufficient.

*Prob. 4<sup>a</sup>. Auctor. theolog.* Immaculatam Conceptionem admiserunt: 1. Ordines religiosi: Ordo ipse FF. Prædicatorum; qui primò opinioni communi oppositus, tandem anno 1843, die 10 octobris, à Gregorio XVI impetravit et obtinuit licentiam celebrandi festum Conceptionis, simulque B. V. Conceptionem *Immaculatam* in Præfatione proclamandi; 2. Plerique theologi scientiâ eminentissimi, Thomistis exceptis; 3. Pleræque orbis catholici Academiae et Universitates, inter quas enituit Universitas Parisiensis, quæ, anno 1383, hanc propositionem: *Non omnem hominem, præter Christum, contraxisse peccatum originale, est expressè contra fidem*, damnavit ut falsam, scandalosam, præsumptuosè assertam, et piarum aurium offensivam.

*Prob. 5<sup>a</sup>. Auctor. SS. Pontif.* Sixtus IV, anno 1470, indulgentias concessit iis qui in festo Conceptionis missam audirent; festi horas canonicas recitarent, aut recitationi participarent. Missam et officium approbavit, in quibus Conceptio B. V. *Immaculata* designatur. Anno 1483, in Constitutione improbat ut temerariam, scandalosam, agendi rationem prædicatorum, et auctorum, qui affirmant hæreticam esse doctrinam de Immaculatâ Conceptione, et contra eos decernit excommunicationem; et, sub eadem poenâ, prohibet ne hæretica appelletur doctrina negans Conceptionem Immaculatam.

S. Pius V, anno 1568, Festum Conceptionis, hucusquè liberum, universæ Ecclesiæ obligatoriè præscripsit. Anno 1570, ingravescente controversiâ, prohibuit sub



gravibus pœnis, ne prædicatores in sermonibus suis defenderent aut oppugnarent doctrinam Immaculatæ Conceptionis; ne auctores de eadem quæstione scriberent idiomate vulgari; permisit tantum discussiones de hac materiâ in concertationibus academicis, et in congregationibus generalibus aut provincialibus ordinum religiosorum.

Paulus V, anno 1616, innovat constitutiones Sixti IV et Pii V. Anno 1617, prohibet sub pœnis gravibus ne in concertationibus academicis, etiamque congregationibus ordinum religiosorum, audeat quis affirmare B. Mariam fuisse peccato originali maculatam.

Gregorius XV, anno 1622, idem prohibet in conversationibus et scriptis privatis; exceptis tamen Brevi particulari, religiosi ordinis FF. Prædicatorum. Item præcipit omnibus clericis tum sæcularibus, tum regularibus, ut, sive in missæ sacrificio, sive in officiis divinis, designent festum his verbis: *Festum Conceptionis*; non verò his aliis: *Festum sanctificationis B. M. V.*, quæ, priori titulo, à FF. Prædicatoribus et ecclesiis particularibus substituta fuerant.

Alexander VII, anno 1661, in Constitutione *Sollicitudo omnium Ecclesiarum*, hæc ait: *Vetus est Christi fidei, erga ejus Beatissimam Matrem V. Mariam, pietas sentientium ejus animam, in primo creationis instanti, atque infusionis in corpus..., à maculâ peccati originalis præservatam, immunem, atque, hoc sensu, ejus Conceptionis festivitatem solemniter colentium et celebrantium.*

Gregorius XVI, et SS. DD. Pius PP. IX, nunc feliciter regnans, permiserunt multis Ecclesiis ut in Præ-

fatione festi Conceptionis, hæc verba canantur : *Et in Conceptione Immaculatâ*; et Litanis Lauretanis addatur hæc invocatio : *Regina sine labe concepta*.

His omnibus patet quantum favorem concesserint Summi Pontifices doctrinæ Immaculatam Conceptionem affirmanti.

*Prob. 6<sup>a</sup>. Fide Eccles.* Fides Ecclesiæ Græcæ manifestatur liturgiis; in his enim appellatur Maria *ex omni parte inculpata*.

Ecclesiæ Latine fides manifestatur 1<sup>o</sup> declarationibus Summorum Pontificum, ut suprâ vidimus; 2<sup>o</sup> Festo Conceptionis celebrato in omnibus Ecclesiis; et quidem in multis, sub titula *Immaculatæ*. Porro Ecclesia honorat solummodò personas et res sanctas. Cum ergo instituerit festum Conceptionis B. Mariæ, credit hanc Conceptionem fuisse sanctam, ac proindè immaculatam, seu ab originali peccato immunem.

*Prob. 7<sup>a</sup>. Conciliis.* Concilium Basileense, sess. 36, declarat doctrinam Immaculatæ Conceptionis, *tantumquam piam et consonam cultui ecclesiastico, fidei catholicæ, rectæ rationi, et sacræ Scripturæ ab omnibus catholicis approbandam, tenendam et amplectendam*. Quamvis Concilium, cum hanc declarationem emisit, jamjam non fuerit œcumenicum, hoc actu saltem manifestatur opinio Patrum Basileensium.

In Concilio Tridentino Cardinalis Pacheco Patribus Concilii proposuerat decisionem de Immaculatâ Conceptione. Tempore autem ad examinandam quæstionem deficiente, à Patribus rogabat ut in decreto de peccato originali declararetur : *Concilium de B. V. Mariâ nihil definire, quamvis credat eam in Conceptione fuisse à*

*peccato originali immunem. Assenserunt plerique Patres. Reclamantibus autem ordinis Prædicatorum Episcopis, aliisque membris, formulæ à Card. Pacheco propositæ Patres substituerunt sequentem : Declarat tamen hæc ipsa sancta Synodus, non esse suæ intentionis comprehendere in hoc decreto, ubi de peccato originali agitur, Beatam et Immaculatam Virginem Mariam, Dei Genitricem, sed observandas esse constitutiones Papæ Sixti IV, sub pænis his constitutionibus contentis, quas innovat. De istâ agendi ratione notandum : 1. Doctrinam Conceptionis Immaculatæ à plerisque Patribus fuisse admissam ; 2. B. Virginem à decreto de peccato originali exceptam ; imò appellatam in hoc decreto Immaculatam ; 3. à Patribus innovatas fuisse constitutiones Sixti IV, doctrinæ Immaculatæ Conceptionis faventes.*

Ita Auctor, anno 1848.

Hodiè *supremo SS. DD. NN. Pii PP. IX, judicio et auctoritate* definita est quæstio, per Constit. *Ineffabilis Deus*, Romæ dat. 6 Idus decemb. 1854. Ex eâ constitutione sequentia excerptimus :

Breviter resumptis actis et decretis RR. Pontificum, doctrinâ spectatissimarum Religiosarum Familiarum, celebriorum Academiarum, et præstantissimorum Doctorum, testimoniis Conciliorum, effatis Patrum, divinisque scripturarum eloquiis; relatis responsis et votis, quibus totius orbis catholici Pastores, Encyclicis Litteris an. 1849 ab Ipso Cajetæ datis respondentes, propriam et omnium fidelium fidem de Immaculatâ Conceptione B. M. V. manifestabant; sic pergit R. Pontifex : « Ita-  
» que plurimum in Domino *confisi advenisse temporum*

» *opportunitatem* pro immaculata Sanctissimæ Dei Ge-  
» nitricis Virginis Mariæ Conceptione definienda, quam  
» *divina eloquia, veneranda traditio, perpetuus Ec-*  
» *clesiæ sensus, singularis catholicorum Antistitum*  
» *ac fidelium conspiratio et insignia Prædecessorum*  
» *Nostrorum acta, constitutiones* mirifice illustant  
» atque declarant; rebus omnibus diligentissimè per-  
» pensis, et assiduïs, fervidisque ad Deum precibus  
» effusis, *minime cunctandum Nobis esse censuimus*  
» *supremo Nostro judicio* Immaculatam ipsius Virginis  
» Conceptionem *sancire, definire*, atque ita pietissimi  
» catholici orbis desideriis, Nostræque in ipsam sanc-  
» tissimam Virginem pietati satisfacere, ac simul in  
» Ipsa Unigenitum Filium suum Dominum nostrum  
» Jesum Christum magis ac magis honorificare,  
» cum in Filium redundet quidquid honoris et lau-  
» dis in Matrem impenditur. Quare... auctoritate Do-  
» mini Nostri Jesu Christi, beatorum Apostolorum  
» Petri et Pauli, ac Nostra, DECLARAMUS, PRONUNCIAMUS  
» ET DEFINIMUS DOCTRINAM, QUÆ TENET BEATISSIMAM VIRGI-  
» NEM MARIAM IN PRIMO INSTANTI SUÆ CONCEPTIONIS FUISSE  
» SINGULARI OMNIPOTENTIS DEI GRATIA ET PRIVILEGIO, INTUITU  
» MERITORUM CHRISTI JESU SALVATORIS HUMANI GENERIS, AB  
» OMNI ORIGINALIS CULPÆ LABE PRÆSERVATAM IMMUNEM, ESSE  
» A DEO REVELATAM, ATQUE ICCIRCO AB OMNIBUS FIDELIBUS  
» FIRMITER CONSTANTEQUE CREDENDAM. Quapropter si  
» qui secus ac à Nobis definitum est, quod Deus aver-  
» tat, præsumpserint corde sentire, ii noverint, ac  
» porro sciant, se proprio judicio condemnatos, nau-  
» fragium circa fidem passos esse, et ab unitate Eccle-  
» siæ defecisse, ac præterea facto ipso suo semet poenis

- » a jure statutis subicere, si quod corde sentiunt, ver-
- » bo aut scripto, vel alio quovis externo modo signi-
- » ficare ausi fuerint. »

Nunc ergo *de fide* est B. V. Mariam fuisse à primo suæ conceptionis instanti ab omni originalis culpæ labe præservatam immunem.

*III. Christus et B. V. Maria à peccato originali soli præservantur.*

*Prob. 1<sup>a</sup>.* Omnes probationes in primâ propositione expositæ sunt generales ; nullas proindè , præter probatas, admittunt exceptiones.

*Prob. 2<sup>a</sup>.* Si quidam excipiendi essent, maximè, ut volunt Zuinglius, Calvinus, infantes à parentibus fidelibus orti ; porro hoc falsum est. Nam 1<sup>o</sup> David, quamvis à parentibus fidelibus ortus, de se dicit, Ps. 50, 6 : *In iniquitatibus conceptus sum.* 2<sup>o</sup> Ecclesia exigit ut baptismus infantibus fidelium administretur. 3<sup>o</sup> Conc. Trid. sess. 5, can. 4, declarat : *Baptismus necessarium esse parvulis, etiamsi fuerint à parentibus baptizatis orti.*

§ II. — Per peccatum originale, Adæ posteri amiserunt privilegia status innocentiae.

*I. Essentialia, scilicet:*

1<sup>o</sup> Gratiam sanctificantem :

*Prob. 1<sup>a</sup>.* Hæc est fides Ecclesiæ.

*Prob. 2<sup>a</sup>.* Ob peccatum originale nascimur *fili iræ* (Eph. 2, 3); *facti* (sumus) *immundi* (Conc. Trid. sess. 5, cap. 1); ergo privati gratiâ sanctificante.

*Prob. 3<sup>a</sup>.* Conc. Trid. sess. 5, can. 2 : *Si quis Adæ*

*prævaricationem sibi soli, et non ejus propagini, asserit nocuisse; et acceptam à Deo sanctitatem et justitiam, quam perdidit, sibi soli, et non nobis etiam eum perdidisse... anathema sit.*

2<sup>o</sup> Jus ad finem supernaturalem :

*Prob. 1<sup>a</sup>. Privantur gratiâ sanctificante; ergo jure ad vitam æternam.*

*Prob. 2<sup>a</sup>. Joan. 3, 5: Nisi quis renatus fuerit ex aqua, et Spiritu Sancto, non potest introire in regnum Dei. Ergo homines in quibus peccatum originale per baptismum non fuit deletum, nequeunt introire in regnum Dei; seu, quod idem est, privantur jure ad finem supernaturalem.*

*Prob. 3<sup>a</sup>. Concil. Florent. et Lugdun. : Credimus illorum animas qui mortali peccato, vel cum solo originali decederint, mox in infernum descendere, pœnis tamen disparibus puniendas.*

3<sup>o</sup> Jus ad gratias actuales :

*Prob. Amisso jure ad finem, amittitur jus ad media.*

*II. Accidentalialia,—sive intrinseca, sive extrinseca.*

*Prob. 1<sup>a</sup>. Elementa accidentalialia pendent ab essentialibus quo ad existentiam; ergo, prioribus per peccatum originale amissis, posteriora amitti necesse fuit.*

*Prob. 2<sup>a</sup>. Propositio nostra sequitur ex canonibus 1 et 2 sess. 5 Conc. Trid. jam citatis.*

#### **EXPLICATIO.**

Tria sunt explicanda : 1<sup>o</sup> peccatum protoparentum, 2<sup>o</sup> peccatum originale, 3<sup>o</sup> utriusque peccati consequentia.—Ad quod, 1. cujusque propositionis partes singillatim evolvere, 2. illarum ostendere relationes necesse est.

I.

PARTES PROPOSITIONUM SINGILLATIM EVOLVUNTUR.

§ I. — De peccato protoparentum.

Tria sunt explicanda : 1<sup>o</sup> causa, 2<sup>o</sup> species, 3<sup>o</sup> gravitas.

I. Causa. — *Quænam fuerit causa peccati protoparentum?*

*Resp.* De hac quæstione quædam sunt nota, quædam inquirenda.

Ab omnibus notum et admissum est : 1<sup>o</sup> voluntatem liberam protoparentum fuisse causam efficientem peccati quod commiserunt ;

2<sup>o</sup> Tentationem diaboli fuisse causam excitantem immediatam peccati Evæ, mediatam peccati Adæ. — Immediatam peccati Evæ : hoc sequitur evidenter ex narratione tentationis Evæ (Gen. cap. 3); mediatam peccati Adæ : siquidem, ex Scripturâ, Eva à serpente seducta, suâ vice Adamum tentavit et ad peccatum adduxit.

Quæritur autem 1<sup>o</sup> utrùm tentatio diaboli fuerit externa tantum, an etiam interna ; 2<sup>o</sup> utrùm, cum tentatione diaboli, alia causa excitans concurrerit ad peccatum protoparentum ?

Ad 1<sup>am</sup> scilicet : *Utrùm tentatio diaboli fuerit externa tantum, an etiam interna?*

*Præmittendum* : In statu præsentis duplex potest esse tentatio diaboli, alia interna, alia externa : *interna*, quâ diabolus agit in imaginationem, in partem inferiorem, in corpus hominis ; *externa*, quâ utitur rebus externis et sensibilibus ad impellendum hominem ad malum. Quo posito,

*Resp.* De quæstione duplex est opinio: *Prima* affirmat tentationem fuisse merè externam. Nam, si fuisset interna, diabolus in imaginatione, vel inferiori parte, vel in corpore protoparentum motus inordinatos excitasset, quod repugnat justitiæ originali quæ præditi erant. Ità D. Thomas, 2-2, q. 165, art. 2 ad 2.

*Secunda* contradictoria negat tentationem externam, affirmatque narrationem de tentatione esse intelligendam in sensu metaphorico. Res ità est, inquit hujus sententiæ fautores, si hac voce *serpens* diabolus possit designari et reverà designetur. Atqui 1<sup>o</sup> potest designari: nam in Scripturà diabolus, sine corpore assumpto, *serpens* appellatur. 2<sup>o</sup> Reverà designatur: quia 1. de serpente illo dicitur fuisse callidiorem cunctis animantibus terræ, quod falsum est in sensu naturali; quia 2. *serpens* absque miraculo loqui non poterat; porro de miraculo tacet Moyses: proinde locutio fuit merè interna; quia 3. Eva serpentem loquentem horruisset et cum eo locuta non fuisset: cognovisset enim dæmonem per serpentem loqui; quia 4. Deus serpenti maledixit, quod de serpente propriè dicto intelligi non potest. Ità Cajetanus.

*Tertia* existere posset opinio inter præcedentes intermedia, affirmans scilicet tentationem fuisse simul externam et internam. His opinionibus positis,

1<sup>o</sup> Valdè probabilior est opinio D. Thomæ ab intrinseco, propter rationem expositam; ab extrinseco, quia communiter admittitur.

2<sup>o</sup> Opinio intermedia est multò minùs probabilis quàm prima: constat ex propositione præcedenti.

3<sup>o</sup> Falsa est et malè probata opinio Cajetani.—Falsa;



narratio enim Scripturæ sensu naturali interpretanda est, cum sensus metaphoricus repugnet circumstantiis narrationis et interpretationi communi.

Malè probata : Ad 1<sup>am</sup> objectionem, R. Ex eo quòd diabolus in se sæpè appelletur serpens, nihil indè. Ex circumstantiis enim tentationis Evæ certò apparet serpentem, designatum in narratione, fuisse realem. Imò ex S. Hieronymo, diabolus appellatur *serpens*, quia serpenti reali usus est ad tentandum hominem. Ad 2<sup>am</sup> : Serpens Evam tentans potuit dici callidior omnibus animalibus ; siquidem 1. à diabolo dirigebatur ; 2. de serpente in se considerato dicit Christus, Matth. 10, 16 : *Estote... prudentes sicut serpentes*. Ad 3<sup>am</sup> : Absque miraculo diabolus potuit loqui per serpentem ; nihil proindè mirum si Moyses de miraculo taceat. Ad 4<sup>am</sup> : Non horruit Eva, quia animalia erant protoparentibus subjecta. Cum eo locuta est, quia satis credibile est Evam cognovisse à Deo creatos fuisse spiritus ratione utentes et habentes potestatem in corpora ; aliundè etiam credibile est eam instanti tentationis, ignorasse lapsum Angelorum qui solà revelatione posterius fuit ipsi cognitus. Ad 5<sup>am</sup> : Maledictio à Deo contra diabolum prolata est, expressa tamen fuit metaphoricè per proprietates naturales serpentis ; sed indè non sequitur diabolum medio veri serpentis usum non fuisse ad Evam tentandam.

Ad 2<sup>am</sup> quæst. scilicet : *Utrum, cum tentatione diaboli, alia causa excitans concurrerit ad peccatum protoparentum ?*

*Resp.* De duplici causà quæstio esse potest : 1<sup>o</sup> de concupiscentiâ, 2<sup>o</sup> de ignorantia et errore.

1° Si de concupiscentiâ : — Certum est et ab omnibus admissum, illam ad peccatum protoparentum non concurrisse : protoparentes enim possidebant justitiam originalem.

2° Si de ignorantia aut errore : — Certum est et ab omnibus admissum, nullam ignorantiam, nullum errorem speculativum ad peccatum concurrisse ; id est, non peccaverunt protoparentes quia judicaverunt propositionem, per quam eos tentavit diabolus, esse veram in se. Nam ante peccatum protoparentes erant ignorantia et errore immunes ; ergo ad peccatum eorum non potuit concurrere ignorantia aut error speculativus.

Controvertitur autem utrum concurrerit error practicus aut ignorantia. (*Error practicus* dicitur iudicium quo peccator pronuntiat talem actionem malam nunc eligendam esse et agendam.)

Triplex opinio. *Prima* affirmat, quia agens non potest humano modo, seu liberè procedere ad actum, nisi pronuntiaverit, seu, quod idem est, judicaverit talem rem esse agendam. Ad peccatum protoparentum ergo concurrat error practicus. Ità, juxta quosdam, D. Thomas. *Secunda* affirmat ad peccatum protoparentum concurrisse, non quidem errorem practicum positivum, sed absentiam considerationis culpabilem, quæ ignorantia æquivalet ; scilicet protoparentes ad malum propositionis diaboli non attendentes peccatum elegerunt. Ità, juxta plures, D. Thomas. *Tertia* omninò negat. Nam 1. protoparentes immunes esse debuerunt ab errore, etiam practico. 2. Si admittendus esset error practicus in protoparentibus, maximè quia electio voluntatis iudicium supponeret ; porro hoc falsum est.

Supponit quidem electio ut res voluntati ut defectabilis et utilis proponatur, non verò ut intellectus de re proposita iudicet: immediatè enim voluntas bonum eligere potest. Porro malum ut utile protoparentibus à diabolo fuit propositum et protoparentes huic immediatè acquieverunt. 3. Ex opinione D. Thomæ libertas ab intellectu penderet; porro hoc falsum est: voluntas enim intellectui imperat cogitare, ratiocinari, imò credere in fide. Ità Cajetanus.

Ab extrinseco probabilior *secunda* opinio. Ab intrinseco neutra caret probabilitate; probabilior forsitan etiam *secunda*. Prima enim exigit ad peccatum errorem positivum, aliquo modo repugnantem immunitati ab errore quā præditi erant protoparentes. Tertia negat dependentiam voluntatis ab intellectu, quod relationibus naturalibus inter intellectum et voluntatem contradicere videtur. Secunda mitigat primam, exigendo tantum inconsiderationem, et tertiam, conservando dependentiam voluntatis ab intellectu.

Ex dictis conciliari potest possibilitas peccati protoparentum cum immunitate ab ignorantia, errore et concupiscentia, quā donati fuerant. Eorum enim peccatum non procedit ex concupiscentia, benè verò ex tentatione extrinsecà diaboli. Non procedit ex errore speculativo, omnes admittunt. Neque ex errore practico: Hoc certum est in opinione Cajetani, ut evidens est. Hoc est etiam certum in opinione D. Thomæ, quæcumque explicatio admittatur: dici enim potest inconsiderationem aut errorem includi in peccato, concomitari peccatum. Peccat nempè homo inchoativè, eo quòd ratio pravè iudicat aut omittit considerare; consummativè, eo quòd

...ntas malum eligit. Duo actus prædicti ratione separabiles uniuntur ad constituendum peccatum reale. Dici autem non potest peccatum procedere ex inconsideratione, aut errore; nam error non præcedit peccatum. Vera proinde manet propositio: protoparentes ante peccatum fuisse ignorantia et errore immunes.

II. Species. — *Quenam fuerit species peccati protoparentum?*

*Resp.* In primo actu peccaminoso protoparentum plura diversæ speciei includuntur peccata. Quædam sunt Adamo et Evæ communia, alia specialia.

Communia:

1<sup>um</sup>. *Superbia*. *Pr.* 1<sup>a</sup>. Impossibile erat protoparentes in statu innocentia peccasse ex purâ malitia, seu electione mali propter se; ergo protoparentes voluerunt peccatum ut medium ad bonum. Porro duplex bonum, sensibile scilicet et spiritale. Atqui non potuerunt primo peccare appetitu boni sensibilis, siquidem ante peccatum erant immunes à concupiscentia; peccaverunt proinde appetitu inordinato boni spiritualis. Porro hic appetitus nihil aliud est quam superbia. Hæc probatio confirmatur narratione biblica. Protoparentibus enim promisit diabolus similitudinem specialem cum Deo: *eritis sicut dii*.

*Pr.* 2<sup>a</sup>. *Eceli. 10, 14: Initium superbiæ hominis apostatare à Deo: quoniam ab eo, qui fecit illum, recessit cor ejus, quoniam initium omnis peccati est superbia. Tob. 4, 14: In ipsâ (superbiâ) enim initium sumpsit omnis perditio.*

*Pr.* 3<sup>a</sup>. Plerique Patres propositionem nostram admittunt. Juxta D. Thomam absque ratione et impro-

habilitissimè affirmaretur protoparentes voluisse similitudinem æquiparentiæ cum Deo. In hoc verò sita fuit superbia, quòd appetiverint 1. scientiam boni et mali à Deo independentem, ità ut potuissent per virtutem propriæ naturæ sibi determinare quid esset bonum, quid esset malum, 2. potestatem à Deo independentem, vi cuius potuissent proprià virtute operari et beatitudinem consequi. Sic, juxta Angelicum Doctorem, intellexerunt hæc verba serpentis : *eritis sicut dii*.

*Not.* Primo peccato semel commisso, protoparentes perdidierunt justitiam originalem; ignorantiae, errori, concupiscentiæ et diabolo fuerunt submissi, et ad peccata excitati iisdem incitamentis quibus incitamur. Sic explicantur peccata quæ sequuntur.

2<sup>um</sup>. *Infidelitas*. Verbis enim diaboli, similitudinem cum Deo promittentis, potius quàm revelationi divinæ crediderunt protoparentes.

3<sup>um</sup>. *Gula*. Gen. 3, 6: *Vidit igitur mulier quòd bonum esset lignum ad vescendum, et pulchrum oculis, aspectuque delectabile: et tulit de fructu illius, et comedit: deditque viro suo, qui comedit.*

4<sup>um</sup>. *Inobedientia specialis*, per actualem transgressionem præcepti positivi quo arcebantur ab esu fructus arboris scientiæ boni et mali.

5<sup>um</sup>. *Illicita peccati excusatio*. Rejicit enim Adam peccatum suum in Evam et Eva in serpentem.

*Specialia:*

*Evæ: scandalum, Adamum ad peccatum inducendo, Adami: illicita erga uxorem complacentia.*

III. *Gravitas*. — *Utrùm peccatum protoparentum fuerit grave et omnium gravissimum?*

*Resp.* Peccatum protoparentum fuit grave. Quoàd objectum non fuit omnibus gravissimum, benè verò quoàd circumstantias et effectus.

Fuit grave : evidens est.

Non fuit quoàd objectum omnibus peccatis gravissimum ; minus enim erat grave quàm Dei odium, quàm actus superbiæ appetentis similitudinem omnimodam cum Deo.

Fuit gravissimum 1º quoàd circumstantias : attentà scilicet consideratione personarum ; nullà enim laborabant protoparentes pronitate ad malum, tarditate ad bonum, ignorantia, concupiscentia ; 2º quoàd effectus : infecit enim totam naturam humanam, quæ indefinitè multiplicari potest, in eamque inexit innumera mala ordinis tum naturalis, tum supernaturalis.

### § III. — De peccato originali.

Dicendum 1º de naturà, 2º de proprietatibus, 3º de transmissione, 4º de exceptionibus.

I. De Naturà. — *Quænam sit natura peccati originalis ?*

*Præmit.* De naturà peccati originalis multæ sunt sententiæ (1).

1ª. Origenis. Peccatum originale est peccatum in cælo commissum. Sic explicatur : Animæ humanæ creatæ sunt unà cum Angelis ; fastidio honorum spiritualium amare cœperunt res terrenas, et in pœnam hujus peccati, in corpora, tanquam in carceres, à Deo detrusæ fuerunt.

(1) Vid. *fusiùs* Bellarmin. *Controv. de Amissione gratiæ*, l. 3.

2<sup>a</sup>. Alberti pign. Peccatum originale est peccatum actuale Adami extrinsecus posteris imputatum.

3<sup>a</sup>. Tertulliani. Peccatum originale est peccatum Adæ animæ posterorum per generationem spiritualem, seu ex traduce transfusum. Sic explicatur : Animæ filiorum ex animâ patris trahuntur quemadmodum ex corpore patris corpus filii. Proindè ex animâ Adami peccato vitiatâ nascitur posterorum anima peccato patris infecta.

4<sup>a</sup>. Illyrici et quorundam Lutheranorum. Peccatum originale est substantialis imago diaboli. Sic explicatur : Homini naturali in principio addita fuit substantia quædam supernaturalis quâ efficiebatur homo imago Dei et capax visionis intuitivæ ; hæc substantia fuit per diabolum transmutata in suam imaginem.

5<sup>a</sup>. Communis Lutheranorum. Peccatum originale nihil aliud est quàm inordinatio potentiarum (intellectus, voluntatis, etc.) quam in nobis experimur et quam Lutherani appellant *fomite concupiscentiæ*.

6<sup>a</sup>. Magistri sententiarum. Peccatum originale est qualitas quædam naturæ corruptæ inhærens. Sic explicatur : Peccatum est inclinatio ad creaturas ; indè voluntas Adami fuit per peccatum infecta qualitate inclinante ad creaturam. Ex hac inclinatione transfusa est in corpus Adami quædam qualitas morbida quæ, per generationem, corpori posterorum infunditur ; undè redundat in animam inclinatio ad creaturas. Hæc inclinatio animæ est essentialiter peccatum originale in se ; qualitas verò morbida corporis est peccatum originale causaliter.

Catholici autem communiter admittunt peccatum

originale esse privationem culpabilem justitiæ originalis. Dissentiunt tamen in hac affirmatione explicandâ.

Hic, brevitatis causâ, exponemus opinionem Bellarmini tantum.

Peccatum originale consideratum sub respectu suo *actuali*, est peccatum commissum ab Adamo prout personam generis humani gerebat; sub respectu *habituali*, est habitualis aversio mentis à Deo, orta ex peccato generis humani in personâ Adami commissio; proindè privatio culpabilis partis præcipuæ justitiæ originalis.

Quibus expositis, ad quæstionem respondemus:

1<sup>o</sup> Peccatum originale non est peccatum in cælo commissum. Nam 1. hæc opinio supponit animas extitisse antequàm in hoc mundo nasceretur homo; porro falsitas hujus opinionis probata est ubi de origine animæ. 2. Si vera sit hæc opinio; ergo nunquàm in hoc mundo homo fuit à peccato immunis, seu, quod idem est, impossibilis fuit status innocentiae; ergo voluntate propriâ, et non in Adamo, homines primò peccaverunt: quæ conclusiones Scripturæ, Traditioni, Ecclesiæ fidei et doctrinæ repugnant.

2<sup>o</sup> Peccatum originale non est peccatum Adami extrinsecùs imputatum. In hac enim opinione peccatum originale non esset peccatum propriè dictum, non esset peccatum unicuique proprium, quod falsum est ex suprà probatis.

3<sup>o</sup> Peccatum originale non est peccatum Adami ejus posteritati ex traducæ transmissum. Nam 1. hæc opinio supponit animam oriri ex traducæ, quod falsum esse probavimus ubi de origine animæ. 2. Si valeret expli-



catio : ergo filii ex parentibus baptizatis orti, naseerentur immunes peccato originali ; siquidem filiorum animæ essent pars animæ parentum à peccato originali immunis : quod falsum est, ut suprà probavimus.

4<sup>o</sup> Peccatum originale non est substantialis imago diaboli. Nam ex istà opinione sequeretur 1. existere substantiam per se malam, quod pertinet ad hæresim Manichæorum. Sequeretur 2. vel Deum esse causam peccati, vel aliquam rem existere quæ non sit à Deo, quod falsum est : *Omnia (enim) per ipsum facta sunt : et sine ipso factum est nihil.* (Joan. 1,3.) Sequeretur 3. peccatum non auferri per baptismum, quo nulla confertur aut aufertur substantia, quod falsum est.

5<sup>o</sup> Peccatum originale non est fomes concupiscentiæ. Nam 1. peccatum originale est peccatum propriè dictum ; porro concupiscentia non est peccatum. 2. Peccatum originale tollitur per baptismum ; porro concupiscentia permanet post baptismum.

6<sup>o</sup> Peccatum originale non est qualitas naturæ corruptæ inhærens. Nam 1. in hypothesi prædictà, peccatum originale, quod est peccatum propriè dictum, crearetur in animà ex qualitate morbida corporis ; atqui hoc absurdum. 2. Peccatum originale tollitur per baptismum ; porro hæc qualitas morbida, quæ in systemate Magistri sententiarum nihil aliud est quàm concupiscentia in quantum inhæret corpori, per baptismum non destruitur.

7<sup>o</sup> Peccatum originale, quatenus *actuale*, est peccatum ab Adamo commissum prout personam generis humani gerebat ; quatenus *habituale*, est aversio habitualis à Deo, orta ex peccato generis humani in per-

sonâ Adami commissio ; proinde privatio culpabilis partis præcipuæ justitiæ originalis (1).

*Præmit.* 1. Peccatum originale est peccatum generis humani, seu naturæ humanæ, siquidem cuilibet homini infunditur eâ solâ ratione quòd naturam humanam participat ex Adamo. Aliundè, hac expressione *peccatum originale* à theologis designatur. 2. In peccato originali adæquatè sumpto duo sunt distinguenda, actus scilicet et habitus. *Actus* est factum legi oppositum, proinde aversio actualis à Deo. *Habitus* est continuatio aversionis à Deo per modum habitûs in animâ permanens, vi ejus homo, etiam post actum, verè dicitur peccator donec ad Deum sese converterit per pœnitentiam. Hæc duo includit peccatum originale : est enim peccatum propriè dictum ; porro peccatum propriè dictum est aversio à Deo actualis primùm, deindè per modum habitûs in animâ perseverans donec retrahatur per pœnitentiam. Quo posito,

1<sup>o</sup> Peccatum originale quatenùs *actuale*, est peccatum actuale ab Adamo commissum prout personam generis humani gerebat :

*Prob. per part.* Peccatum originale est peccatum

(1) Vid. Bellarmin. *de Ams. gratiâ*, l. 5, c. 17, et seq. « Si quis, » ait Bellarminus, à nobis quærat quid propriè sit originale peccatum : Respondebimus cum distinctione ad hunc modum. Si peccatum pro actione cum lege pugnante accipitur ; peccatum originale est prima Adami inobedientia ab ipso Adamo commissâ, » non ut erat singularis persona, sed ut personam totius generis humani gerebat. Si verò peccatum accipitur pro eo quod residet in homine post actionem, et undè idem homo non peccans, sed peccator nominatur ; peccatum originale est carentia doni justitiæ originalis, sive habitualis aversio, et obliquitas voluntatis, quæ et macula mentem Deo invisam reddens appellari potest. »

**actuale** : Hic enim agitur de peccato originali quatenus fuit **actuale**.

**Ab Adamo commissum** : Vel enim est peccatum Adami, vel peccatum cujusque individui, vel peccatum hominis ab Adamo distincti. Atqui 1. non est peccatum cujusque individui : nam contrahitur peccatum originale in ipsâ conceptione, instanti proindè quo peccati actualis incapax est homo. 2. Non est peccatum hominis ab Adamo distincti : peccatum enim unius hominis non potest fieri peccatum naturæ, quin homo peccans personam generis humani gerat ; porro nullus præter Adam dici potest gessisse personam generis humani. Ergo peccatum originale, quatenus **actuale**, est peccatum ab Adamo commissum.

Ab Adamo quatenus personam generis humani gerebat : alioquin, ut diximus suprâ, ejus peccatum fuisset individuale, nec potuisset dici generis humani peccatum.

2<sup>o</sup> Peccatum originale, quatenus *habituale*, est aversio à Deo orta ex peccato in Adami personâ commisso, per modum habitûs in animâ perseverans ; proindè est privatio culpabilis partis præcipuæ justitiæ originalis.

*Prob.* Est habitualis aversio à Deo orta ex peccato in Adami personâ commisso : Nam per peccatum actuale Adami genus humanum à Deo aversum est. Ergo peccatum originale, quatenus *habituale*, est aversio à Deo in genere humano per modum habitûs perseverans, cum ex naturâ suâ peccatum habituale nihil aliud sit quàm peccati actualis continuatio, ut suprâ diximus.

Proindè privatio præcipuæ partis justitiæ originalis : Tribus elementis constituebatur justitia originalis, 1.

submissione habituali voluntatis Deo per gratiam sanctificantem et virtutes infusas ipsi annexas, 2. submissione habituali-partis inferioris voluntati, 3. submissione corporis animæ. Ex his elementis prius est præcipuum, quia relatio erga Deum est inter relationes hominis præcipua. Porro per peccatum originale homo privatur eâ submissione; siquidem, habitualiter aversus à Deo, amisit gratiam sanctificantem virtutesque ipsi annexas.

**Privatio culpabilis :** Nam 1. peccatum habituale non differt in se à peccato actuali: nihil aliud est enim quàm ejus continuatio. Proinde privatio habitualis justitiæ originalis est culpabilis, si primum peccatum, cujus est continuatio, sit ad culpam imputabile naturæ humanæ; porro res ita est, ut infra dicemus. 2. Probavimus antea peccatum originale unicuique infusum esse peccatum verum et propriè dictum.

**II. De Proprietatibus.**— Cum naturâ suâ peccatum habituale sit continuatio peccati actualis, seu actus voluntatis contra aliquam legem, quæritur 1. cujusnam peccati ab Adamo commissi peccatum originale sit continuatio; 2. utrùm peccatum illud sit voluntarium, et, in hypotesi affirmativâ, quomodò voluntarium?

Ad 1<sup>am</sup> scilicet: *Cujusnam peccati ab Adamo commissi peccatum originale sit continuatio?*

*Resp.* Peccati originalis causa fuit peccatum ab Adamo commissum contra legem prohibentem esum fructus arboris scientiæ boni et mali. Absque ratione affirmaretur ex alio Adami peccato, posita institutione divinâ, peccatum originale potuisse oriri.

*Prob. p. part. 1<sup>a</sup> p. Gen. 2, 17 : In quocumque...*

*die comederis..., morte morieris. Ibid. 3, 17: Quia audisti vocem uxoris tuæ... maledicta terra... Rom. 8, 17: Si... unius delicto mors regnavit...* Unde sic: peccati originalis causa fuit peccatum illud ex quo secuta est privatio privilegiorum statûs innocentiae; porro ex peccato quod commisit Adam manducans fructum vetitum secuta est hæc amissio: ex textibus enim citatis, per illud peccatum amisit immortalitatem, dominium facti in res inferiores; à pari alia privilegia. — Hoc aliundè sequitur ex 1º et 2º can. Conc. Trid. sess. 5, jam citatis.

2ª p. Peccatum originale oriri poterat tantummodò ex violatione præcepti impositi Adamo prout gerebat personam generis humani. Porro, equidem à Deo aliud præceptum Adamo sic considerato imponi potuisset, sed nihil probat fuisse impositum; ergo.

Ad 2ª scilicet: *Utrùm peccatum originale sit voluntarium, et, in hypothesi affirmativâ, quomodo voluntarium?*

*Resp.* Peccatum originale considerari potest vel quatenus est actuale, vel quatenus est habituale.

1º Si quatenus *actuale*: Fuit voluntarium in Adamo voluntate propriâ; voluntarium in posteris, voluntate Adami, quæ, non naturaliter quidem, seu vi paternitatis carnalis, sed vi decreti positivi voluntatem generis humani repræsentabat.

*Prob. p. part.* Fuit voluntarium in Adamo voluntate propriâ: hoc evidens est.

In posteris voluntate Adami: Nam ex Scripturâ, Traditione et Concilio Tridentino omnes homines in Adamo peccaverunt peccato propriè dicto. Ergo pec-

catur voluerunt aliquo modo : peccatum enim propriè dictum est aliquo modo voluntarium ; voluerunt in Adamo : nam in eo peccaverunt.

Voluntate Adamì quæ voluntatem posterorum repræsentabat : Alioquin, ut jam diximus, peccatum Adæ fuisset individuale tantum, non verò peccatum naturæ humanæ.

Non naturaliter quidem : Alioquin omnia peccata omnium parentum posteris transfunderentur, quod ab omnibus rejicitur.

Sed vi decreti positivi, quod sic explicari potest : 1<sup>o</sup> Deus potuit instituere primum hominem caput totius posteritatis suæ quoad vitam spiritualem, ita ut generi humano conservatio aut amissio vitæ spiritualis à voluntate protoparentis penderet. Illud enim nec potestati, nec justitiæ, nec bonitati divinæ repugnat. 1. Non potestati et justitiæ : homo enim sponte suâ et absque injustitiâ voluntatem propriam in voluntatem alterius transferre potest, ut quod ille voluerit, id se velle profiteatur. Ergo à fortiori Deus voluntatem posterorum in voluntatem protoparentis transferre potuit, ut quod vellet protoparens vellent posterì ; siquidem jus Dei in voluntatem humanam est strictius quàm jus hominis ipsius. 2. Non bonitati : illud enim pactum eedebat in commodum generis humani ; siquidem, ex unâ parte, Deus Adamum donaverat innocentis naturæ privilegiis, per quæ magis ad obediendum quàm ad peccandum idoneus erat ; ex alterâ parte, unum tantum ac levissimum præceptum imposuerat Adamo tanquàm capiti generis humani. 2<sup>o</sup> Reverà Deus positivè constituit Adamum caput generis humani quoad vitam spiritualem,

et ipsi sub eâ qualitate imposuit præceptum de non comedendo fructu arboris scientiæ boni et mali, ut suprâ vidimus; proindè in violatione hujus præcepti voluntas Adami repræsentabat voluntatem posterorum, qui sic dici possunt voluisse violationem hujus præcepti in voluntate protoparentis.

2° Si peccatum originale consideretur quatenus est *habituale*: Fuit voluntarium in eodem sensu in quo voluntarium fuit sub respectu actuali; siquidem, ut jam diximus, peccatum habituale est peccatum actuale cum proprietatibus suis perseverans (1).

(1) « Alii multi, inquit DD. Bouvier (tract. de Peccatis, p. 2, c. 1, art. 2, n. 6), naturam peccati originalis sic explicant: Ab initio Adam constitutus fuerat in justitiâ originali, gratiâ sanctificante et aliis donis indebitis instructus. Hæc omnia, ex ordinatione divinâ, fidelitate suâ sibi metipsi servare posterisque transmittere debebat, sed, peccando, et sibi et illis amisit, ipse peccati actualis reus et simul omnibus donis supradictis privatus, posteri vero in eâ privatione tantum constituti, quæ dicitur peccatum originale quia peccato oritur et quia, cum ordinationi Dei ejusque bonitatis consiliis adeò adversetur, omnes homines illius oculis odibiles facit indignosque supernaturali felicitate ipsis destinât. »

Inter recentiores hujus sententiæ fautores præcipuè eminet P. Perrone, qui eam propugnat in suis *Prolectionibus theologicis* in Collegio Romano habitis. Ad intelligentiam hujus sententiæ, sequentia excerptimus è tractatu prædicti auctoris *de Deo creatore*, part. 3, c. 4, in quo agitur de *Peccati originalis propagatione*.

« Ad germanum quæstionis statum cognoscendum juverit præmittere, 1° non esse permiscendum dogma de originalis peccati *existentia* et propagatione cum propagationis *modo*. Illud enim de fide est, iste vero non item. 2° Non esse pariter permiscendam controversiam de existentia cum *natura et essentia* originalis peccati. Circa ejusmodi peccati essentiam seu naturam plures viguerunt discrepantes sententiæ non solum inter catholicos et protestantes, sed etiam inter catholicos ad invicem...

» Nos, ut fundamentum dicendorum constituamus, subjicimus

### III. De Transmissione.— *Quomodo traducatur peccatum originale?*

*Resp.* Traducitur per generationem activam: *Humana natura traducitur à parente in filium per traductionem carnis cui postmodum anima infunditur, inquit*

» concilii Tridentini canones sess. 5, in quibus catholica veritas de  
» natura et propagatione originalis noxæ traditur. Can. 1º. *Si quis*  
» *non confitetur, primum hominem Adam, cum mandatum Dei*  
» *in paradiso fuisse transgressus, statim sanctitatem et justitiam,*  
» *in qua constitutus fuerat, amisisse; incurrisseque per offensam*  
» *prævaricationis hujusmodi tram et indignationem Dei, atque*  
» *ideo mortem, quam antea illi comminatus fuerat Deus, et cum*  
» *morte captivitatem sub ejus potestate, qui mortis deinde habuit*  
» *imperium, hoc est, diaboli, totumque Adam per illam præva-*  
» *ricationis offensam, secundum corpus et animam in deterius*  
» *commutatum fuisse; anathema sit.*

» Can. 2º. *Si quis Adæ prævaricationem sibi soli et non ejus*  
» *propagini asserit nocuisse, et acceptam a Deo sanctitatem et jus-*  
» *titiam, quam perdidit, sibi soli et non nobis etiam perdidisse;*  
» *aut inquinatum illum per inobedientiæ peccatum mortem et pœ-*  
» *nas corporis tantum in omne genus humanum transfudisse,*  
» *non autem et peccatum, quod est mors animæ; anath. sit.*

» Can. 3º. *Si quis Adæ peccatum quod origine unum est, et*  
» *propagatione, non imitatione transfusum, omnibus inest uni-*  
» *cuique proprium... per aliud remedium asserit tolli, quam per*  
» *meritum... Jesu Christi...; anath. sit.*

» Can. 4º. *Si quis parvulos recentes ab uteris matrum baptizan-*  
» *dos negat, etiamsi fuerint à baptizalis parentibus orti, aut dicit*  
» *in remissionem quidem peccatorum eos baptizari, sed nihil ex*  
» *Adam trahere originalis peccati...; anath. sit.*

» Can. 5º. *Si quis per J. C. D. N. gratiam, quæ in baptismo*  
» *conferitur, reatum originalis peccati remitti negat; aut etiam*  
» *asserit, non tolli totum id, quod veram et propriam peccati ra-*  
» *tionem habet...; anath. sit.*

» Ex his colligimus. 1º reatum culpæ, quatenus ab Adæ actione  
» provenit, in omnes ejus posteros transfundi, fierique uniuscujusque  
» proprium; 2º hunc reatum in quo tota ratio, seu formalitas con-  
» sistit peccati originalis, non aliud esse nisi mortem animæ. Adeo-



D. Thomas. Porro natura humana communicata per generationem activam est privata justitiâ originali, privatione nobis voluntariâ in Adamo; proinde cum naturâ humanâ per generationem transfunditur peccatum originale.

» que naturam seu essentiam hujus peccati prout *actionem* dicit,  
» seu ut peccatum *actuale* est, esse ipsum peccatum personale Adæ,  
» quatenus caput erat totius humanæ naturæ; prout vero *reatum*  
» dicit, seu *habitualmente* in Adæ posteris est, consistere in *privatione*  
» (non simplici *carentia* rei indebitæ) gratiæ sanctificantis et justitiæ quæ nobis *inesse deberet* juxta ordinem a Deo constitutum;  
» hâc privatione fit, ut nos vere peccatores simus, filii iræ, Dei  
» inimici, et habitualiter, saltem negative, a Deo aversi. Hinc S.  
» Thomas, 1, 2, q. 82, art. 3, aperte scribit: *Sic ergo privatio*  
» *originalis justitiæ, per quam voluntas subdebatur Deo, est for-*  
» *male in peccato originali*; 3<sup>o</sup> colligimus mortem, concupiscentiam,  
» morbos, ad malum pronitatem allaque ejusmodi, non esse nisi  
» peccati originalis *effectus*, appendices seu pœnas. »

Probatâ contra hæreticos existentia et propagatione originalis peccati, P. Perrone adversus incredulos sequenti modo ostendit *dogma de propagatione peccati originalis nullo modo rationi adversari*.

« Præter generale principium, quo saltem *indirecte* veritas propositionis adstruitur, non posse videlicet fieri, ut quæ divinitus revelata sunt recte adversentur rationi, sic *directe* etiam id ipsum conficimus.

» Ex dictis formalis ratio, seu natura ac essentia peccati originalis  
» in sola consistit *justitiæ originalis privatione*, ac precise gratiæ  
» sanctificantis qua Deus gratuito elevavit primum hominem ad statum supernaturalem, et dilectum, amicum, imo et filium suum  
» adoptione fecit. Huc gratiæ adnexa erant cætera dona integritatis,  
» immortalitatis, scientiæ, etc., quæ quidem dona in sua conservatione pendebant à conservatione gratiæ. Ejusmodi elevatio una  
» cum recensitis donis ex Dei ordinatione erant veluti ipsius naturæ dos et ornamentum; si proinde illam Adam Deo obsequendo conservasset, universum genus humanum ab eo propagandum hisdem muneribus fuisset auctum, quæ naturæ superaddita fuerant. At Adam mandatum sibi datum transgressus est,

IV: De-Exceptionibus. — Immunes fuerunt à peccato originali Christus, B. V. Maria. Quæritur 1º quare Christus, 2º quomodo B. Virgo immunis fuerit à peccato originali ?

» et transgrediendo graviter peccavit, privavitque proinde se gratia  
 » illa et, quod consequens est, universam posteritatem suam, quæ  
 » gratia supernaturali privata peccatrix effecta est, et spoliata  
 » pariter cæteris donis quæ illam comitabantur. Hoc porro est,  
 » quod dicitur peccati originalis propagatio, quatenus singula indi-  
 » vidua ex Adam progenita nascuntur privata originali iustitia, quæ  
 » ipsis ex Dei ordinatione inesse deberet, et qua solum debebant  
 » esse Deo accepta. Prout vero iustitiæ originalis nomine significa-  
 » tur gratia sanctificans, ejus privatio rationem habet peccati, seu  
 » reatus aut maculæ, quæ per modum habitus sequitur ipsam pec-  
 » cati actionem, sive actum ipsum peccati, quo fit ut Adæ posteri  
 » nascantur a Deo aversi, filii iræ, peccatores damnationi obnoxii;  
 » prout vero iustitiæ originalis nomine complexio significatur cæte-  
 » rorum donorum, illius privatio efficit, ut Adæ posteri nascantur  
 » cum concupiscentiæ inordinatione, mortales, ignorantie et dolo-  
 » ribus addicti, quæ sunt totidem *pœnæ et effectus* peccati illius,  
 » seu prioris privationis.

» Totam hanc doctrinam paucis ac dilucide expressit S. Ansel-  
 » mus, in lib. *de Concept. Virgin. et Peccato origin.*, c. 23, scri-  
 » bens: *Quod in illis (infantibus) non est iustitia, quam debent*  
 » *habere, non hoc fecit illorum voluntas personalis sicut in Adam,*  
 » *sed egestas naturalis, quam ipsa natura accepit ab Adam....*  
 » *spoliavit persona naturam dono iustitiæ in Adam; et natura*  
 » *agens facit omnes personas, quas ipsa de se procreat, eadem*  
 » *egestate peccatrices et injustas facit.* Et c. 27: *Hoc peccatum,*  
 » *quod originale dico, aliud intelligere nequeo in eisdem infanti-*  
 » *bus, nisi ipsam, quam supra posui, factam per inobedientiam*  
 » *Adæ iustitiæ debitæ nuditatem.* Nec minus luculenter S. Thomas,  
 » in *Sent.* II, dist. 30, q. 1, art. 2, idipsum docuit: *Dicendum,*  
 » *scribit, quod defectus illius originalis iustitiæ, quæ homini in*  
 » *sua creatione collata est, ex voluntate hominis accidit, et*  
 » *sicut illud naturæ donum fuit, et fuisset in totam naturam*  
 » *propagatum, homine in iustitia persistente, illa etiam et priva-*  
 » *tio illius boni in totam naturam perducitur, quasi privatio*

Ad 1<sup>am</sup> scilicet : *Quare Christus fuerit immunis?*

*Resp.* Christus immunis fuit, ut jam diximus, quia  
1<sup>o</sup> non natus est ex semine Adami, sed ex Spiritu sanc-  
to; quia 2<sup>o</sup> repugnat Hominem-Deum peccato macu-  
lari.

Ad 2<sup>am</sup> scilicet : *Quomodo B. Virgo fuerit immunis à  
peccato originali?*

*Resp.* Duplex est opinio. *Prima* affirmat B. Virginem  
à lege Adamo imposità fuisse exceptam; proindè eam  
non contraxisse peccatum originale, nisi quoad *debitum  
remotum*. Consistit debitum remotum in eo quòd B.

» et vitium naturæ; ad idem enim genus privatio et habitus  
» referuntur. Et in quolibet homine rationem culpæ habet ex hoc,  
» quod per voluntatem principii naturæ, id est, primi hominis  
» inductus est talis defectus.

» Ex his inferimus cum Cajetano, *Comment.* in 1, 2, q. 100, art. 2,  
» S. Th. Dom. Soto, *de Nat. et Grat.*, l. 1, c. 19; Bellarmino, *de*  
» *Grat. primi hominis*, lib. 1, c. 5, § 12, illud intercedere discri-  
» men inter hominem quem Deus condidisset in statu puræ naturæ,  
» et hominem lapsum, quod attinet ad collationem gratiæ et adnexa  
» ipsi dona, quale est inter hominem nudum et spoliatum, adeoque  
» nullum, in essentialibus saltem, detrimentum in se naturam ex  
» Adæ peccato passam esse. Voces propterea *corruptionis, vulne-*  
» *ris*, etc., sunt relativæ ad statum ex quo primus homo decidit.

» Quibus præmissis, sic jam perstringimus incredulos ac rationa-  
» listas, qui adversari rectæ rationi autumant dogma de peccati  
» originalis propagatione. Si qua esset repugnantia, hæc haberetur  
» aut ratione *sui*, aut ratione *modi*; neutrum porro dici potest.  
» Non ratione *sui*, nulla siquidem repugnantia est quod natura ex  
» culpa privetur re indebita, cujusmodi est gratia et dona quæ eam  
» eomitabantur: Deus enim ex pura sua liberalitate gratiam seu  
» justitiam originalem superaddidit naturæ. Non ratione *modi*;  
» nam cum peccatum originale ex dictis in sua ratione formali con-  
» sistat in *privatione*, nulla concipi potest repugnantia quod homo,  
» qui per peccatum suum personale privatus justitia originali est,  
» non amplius posteris communicet quod in se non habet. Ergo.

Virgo, orta ex semine Adami, debuisset includi in pacto cum Adamo inito, nisi Deus speciali privilegio eam ipsam dispensasset. Excepta autem fuit ratione dignitatis suae, tanquam Mater Redemptoris, et vi meritorum Christi: atque illud sufficit ut B. Virgo dicatur à Christo redempta. *Secunda* negat B. Virginem fuisse à lege exceptam; affirmat proinde eam contraxisse quoddam *debitum proximum* peccatum originale à quo speciali privilegio Dei fuit immunis. Sequentibus rationibus nititur: 1<sup>o</sup> Si B. Virgo fuisset excepta à lege hominibus in Adamo imposita, nullo modo dici posset peccatum originale contraxisse. Porro hoc falsum est, siquidem, ex Scripturâ, omnes concepti ex semine Adam in Adamo aliquo modo peccaverunt. 2<sup>o</sup> Si B. Virgo à peccato originali absolutè et in omni sensu fuisset immunis, non posset dici à Christo redempta. Porro tamen, ex I Cor. 15, 22: *Sicut in Adam omnes moriuntur, ita et in Christo omnes vivificabuntur* (1).

§ III.— De effectibus peccati protoparentum, peccati originalis.

Protoparentes per peccatum suum, eorum posterì per peccatum originale, amiserunt privilegia statûs innocentiae

#### I. *Essentialia*:

I. De amissione *gratiæ sanctificantis*, *juris ad gratias actuales*, nihil speciale dicendum.

(1) Circa *primam* opin. vid. specialiter Wirceburgenses, de *peccat. disp.* 3, c. 3, *quær.* post art. 3; hanc etiam propugnant nonnulli recentiores. Pro *secundâ* stant plerique veteres, inter quos Vasquez, Suarez, Bellarminus, de *amis. grat.* l. 4, c. 15.

**II. De amissione juris ad finem supernaturalem quaeritur** 1° de protoparentibus : utrùm hæc amissio fuerit ipsis irreparabilis ; seu, quod idem est, utrùm peccati sui veniam consequi potuerint, consecuti fuerint, imò vitam æternam obtinuerint ; 2° de posteris : quonam sensu intelligenda sit amissio finis, seu damnatio ex solo peccato originali orta, seu damnatio infantium in solo peccato originali decedentium ?

**Quæst. 1<sup>a</sup> de protoparentibus :** *Utrùm amissio juris ad finem supernaturalem fuerit ipsis irreparabilis ; seu utrùm 1. peccati sui veniam consequi potuerint, 2. consecuti fuerint, 3. vitam æternam obtinuerint ?*

**Ad 1<sup>am</sup> quæst. part. resp.** Protoparentes potuerunt peccati veniam obtinere et quoàd culpam, et quoàd pœnam æternam ; imò quoàd pœnam temporalem in alterà vitâ subeundam ; non verò, secundum ordinationem divinam, quoàd pœnas temporales hujus vitæ.

**Quoàd culpam :** Nam 1° infra probabitur culpam ipsis remissam fuisse. 2° Vera propositio, si protoparentes non fuerint de se pœnitentiæ incapaces ; si Deus, salvis attributis, potuerit eis concedere gratiam pœnitentiæ, et, positâ pœnitentiâ, peccatorum veniam : porro hæc tria sunt evidentia. 3° Textus Scripturæ de possibilitate et efficaciâ pœnitentiæ sunt universales ; ergo protoparentes sicut eorum posteritatem spectant.

**Quoàd pœnam æternam :** Remissâ enim culpâ, remittitur pœna æterna.

**Quoàd pœnam temporalem alterius vitæ :** Leges enim vi quarum posteri obtinent veniam pœnæ temporalis in alterâ vitâ subeundæ sunt generales ; applicari proinde potuerunt protoparentibus.

Non verò, secundum Dei ordinationem, quoad pœnas temporales in hac vitâ subeundas : Deus equidem potuisset absolutè loquendo has pœnas reddere remissibiles ; illas autem irremissibiles constituit. Ista enim lex Dei : *in quâcumque die comederis ex eo, morte morieris*, fuit absoluta.

Ad 2<sup>am</sup> q. part. *resp.* Protoparentes veniam obtinuerunt. Sap. 10, 1 et 2 : *Hæc (sapientia) illum, qui primus formatus est à Deo pater orbis terrarum, cùm solus esset creatus, custodivit, et eduxit illum à delicto suo.*

Ad 3<sup>am</sup> q. part. *resp.* Protoparentes obtinuerunt vitam æternam, et opinio contradictoria erronea censenda est.

*Pr. 1<sup>a</sup>.* Vera propositio, si de illâ consentiat ferè unanimiter Ecclesia : atqui res ita est, testante S. Augustino. De primis parentibus ait : *Post peccatum justè vivendo, meritò creduntur per Domini sanguinem ab extremo supplicio liberati.* Ex hoc textu, *creduntur* (proindè fide, et non opinione tantùm admittuntur) *ab extremo supplicio* (non à peccato tantùm) *liberati.*

*Pr. 2<sup>a</sup>.* Propositionem docent plerique SS. Patres.

Quæst. 2<sup>a</sup> de posteris : *Quonam sensu intelligenda sit amissio finis, seu damnatio ex solo originali, seu damnatio infantium in solo peccato originali decedentium?*

*Resp.* Quædam certa, quædam controversa.

Certum est infantes in solo peccato originali decedentes damnari, in eo saltem sensu quòd priventur visione intuitivâ. Hanc propositionem suprâ probavimus.

Controvertitur autem 1<sup>o</sup> utrùm ex privatione visionis

intuitivæ dolorem et tristitiam patiantur ; 2º utrùm pœnam sensûs subituri sint ; 3º utrùm perfruantur aliqua beatitudine naturali.

De 1ª controversiâ duplex opinio.

*Prima* affirmat infantes in peccato originali decedentes dolorem animi habituros ex privatione visionis intuitivæ (1). His rationibus nititur : 1º Sciunt isti infantes se ad visionem intuitivam destinatos fuisse, nec ad eam pervenire posse: porro ex hâc cognitione necessario aliquis dolor oriri debet. 2º Multi SS. Patres hanc opinionem amplexi sunt. 3º Hæc ait Concil. Florentinum : *Credimus illorum animas qui in mortali peccato, vel cum solo originali decederint, mox in infernum descendere, pœnis tamen disparibus puniendas.*

Cæterùm, inquit hujus sententiæ sectatores, hic dolor levissimus est, tùm quia infantes de quibus agitur dispositionem ad beatitudinem remotissimam tantùm habuerunt; tùm quia cognoscunt se absque propria negligentia tantum bonum amisisse; tùm quia cognoscunt pœnas damnatorum, ad quorum sortem pertinere potuissent, si diutius vivere ipsis contigisset.

*Secunda* opinio negat infantes prædictos ex amissione visionis intuitivæ pœnam habituros (2). Nam 1º fidem non habent, cùm baptismum non receperint. Ergo non cognoscunt se ad visionem intuitivam fuisse destinatos; ergo de ejus amissione dolere non possunt: ignoti enim nullâ cupido, et de ejus amissione nullus dolor. 2º In-

(1) Ità, inter alios, Bellarmin. *de amts. grat.* l. 6, c. 6; Sylvius in 1am 2æ, q. 85, art. 6.

(2) Ità D. Thomas, qua-st. 5 *de Malo*, art. 1, 2, 3; et in 2 sentent. dist. 35; atque post ipsum multi scholastici.

fantēs prædicti ad statum supernaturalem nunquā elevati sunt; ergo nunquā fuerunt visionis intuitivæ capaces; ergo de ejus privatione dolere non possunt. Homo enim rectæ rationis dolere non potest de privatione alicujus boni ad quod nullam capacitatem habet, v. g. nullus sapiens dolet eo quod non possit volare sicut avis: porro prædicti infantes rectā ratione donantur. 3<sup>o</sup> Contra nostram opinionem, inquit hujus sententiæ sectatores, nihil sequitur ex Conc. Florentino suprā citato; siquidem hæc verba: *pœnis disparibus*, possunt intelligi de privatione visionis intuitivæ, beatitudinisque naturalis, juxta multos theologos.

Hæc *secunda* opinio videtur saltem ab intrinseco probabilior.

De 2<sup>a</sup> controversiā, scilicet: *Utrū infantes in solo peccato originali decedentes pœnam sensus subituri sint?* — duplex opinio.

*Prima* affirmat hos infantes puniendos esse iisdem pœnis, quamvis disparibus, quibus puniuntur ii qui peccata actualia commiserunt. Peccatum enim originale est peccatum propriè dictum, easdem proindè ac peccata actualia meretur pœnas (1).

*Secunda*, communior et probabilior, negat, his probationibus nixa: 1<sup>o</sup> Ratione. 1. Nemo punitur pœnā positivā ac sensibili propter habitualement pronitatem ad vitium, sed tantū propter culpam actualem commissam per voluntatem personalem; ergo nullam pœnam positivam meretur peccatum originale per voluntatem

(†) Itā Gregor. Arim., Petavius, Noris, Sylvius in 1<sup>am</sup> 2<sup>ae</sup>, q. 85, art. 6, quær. 2; etc.



alterius et in nobis per modum habitus existens. 2. In Ecclesia nulla injungitur satisfactio poenalis hominibus baptizandis, quamvis adultis; porro tamen Ecclesia probabilissimè exigeret satisfactionem, si aliqua poena positiva peccato originali deberetur. 2º Ex SS. Patribus, hanc opinionem exprimunt S. Gregorius Nazianzenus, orat. 40; S. Gregorius Nyssenus, orat. de infantibus immaturà morte sublati; S. Bernardus, serm. 3 de resurrect. 3º Ex Innocentio III: *Pœna originalis peccati est carentia visionis Dei, actualis verò pœna peccati est gehennæ perpetuæ cruciatus* (1).

De 3ª controversià, scilicet: *Utrùm prædicti infantes perfruantur aliquâ beatitudine naturali?* — duplex etiam opinio.

*Prima* affirmat infantes, de quibus agitur, naturali beatitudine frui in alterâ vitâ. Nam infantes cum peccato originali decedentes avertuntur quidem à Deo tanquàm fine supernaturali, non verò à Deo fine naturali. Possunt proindè Deo frui sub posteriori respectu, habere proindè beatitudinem naturalem, quæ consistit in unione cum Deo fine naturali. Ità Catharinus, cardin. Sfondratus, et quidam alii.

*Secunda*, multò communior et probabilior, negat. Quicumque enim peccat contra Deum sub respectu supernaturali consideratum, eo ipso peccat contra Deum sub respectu naturali. Ergo homo, cui infunditur habitualiter peccatum Adami, avertitur à Deo, fine non sô-

(1) Ità D. Thomas, *Comment. in sentent.* l. 2, dist. 33; et *Sum.* 3 p. q. 1, art. 4 ad 2; Bellarminus, *de amís. grat.* l. 6, c. 4; Suarez, et in genere scholarum principes.

lūm supernaturali, sed etiam naturali. Ergo, quamdiū manet peccatum, homo non potest uniri Deo nequidem tanquā finī naturali, nec proindē frui beatitudine naturali (1).

(1) De hac ultimā controversiā hæc habet P. Perrone, part. 3, c. 6 :

« Ast circa hanc damni pœnam theologi minime inter se conveniunt; siquidem alii cum Bellarmino existimant infantulos ex privatione visionis Dei aliqua affici tristitia; alii vero cum S. Thoma id aperte inficiantur; alii demum cum Catharino, et card. Sfondrati censent eosdem aliqua naturali beatitudine frui, nunc quidem quoad animam, post resurrectionem vero etiam quoad corpus, et eo usque rem protrahunt, ut felicitatis hujus gradus determinent accuratissime, quemadmodum card. Norisius determinavit gradus caloris quos ab igne infantes isti patiuntur et sentiunt. Bellarminus sententiam, quæ tribuit infantibus non baptizatis beatitudinem naturalem, fidei adversari autumat; contra vero Petrus Godoy Ord. Præd.: *Sententia*, inquit, *concedens parvulis naturalem beatitudinem nullam censuram contra fidem meretur*, imo et alienam eam esse affirmat ab omni temeritatis nota.

» Ex hac discrepantia sententiarum, quæ inter Patres ac theologos viget, patet, si duos commemoratos articulos excipias de exclusione a gloria, ac disparitate pœnarum, reliqua omnia ad fidem nullo modo spectare, adeoque posse quemlibet circa ejusmodi sententias in suo sensu abundare. Nec obest pelagianos parvulis naturalem tribuisse beatitudinem, nam etiam hoc dato, licet alii contendant *supernaturalem* eam tribuisse, attamen nihil haberet commune pelagianorum commentum cum doctrina, quam catholici theologi tuentur de naturali istorum parvulorum beatitudine. Etenim pelagiani eam concedebant parvulis *sine morte peccati*, adeoque uti naturalem conditionem, non autem sub ratione *pœnæ* ac *damnationis* provenientis ex peccato originali quod negabant, contra vero catholici theologi eam tuentur *cum morte peccati*; ita ut exclusio à visione beatifica rationem habeat *pœnæ* et *damnationis* ex peccato provenientis. Quapropter merito a Pio VI in Const. Auctorem *fidei* proscripta est synodi Pistoriensis propositio 26, quæ ita se habet: *Doctrina, quæ velut fabulam pelagianam explodit locum illum inferorum (quem limbi puerorum nomine fideles passim designant), in quo animæ decedentium*

II. *Accidentalia*.— I. *Intrinseca*, scilicet :

I. *Intelligentiæ*.—*Quomodo protoparentes scientiam et incapacitatem erroris amiserint?*

*Resp.* 1<sup>o</sup> Amiserunt scientiam supernaturalem, seu

» *cum sola originali culpa, pœnas damni citra pœnam ignis puniuntur, perinde ac si hoc ipso quod qui pœnam ignis remouent, inducerent locum illum et statum medium, expertem*  
» *culpæ et pœnæ, inter regnum Dei, et damnationem æternam,*  
» *qualem fabulabantur pelagiani, falsa, temeraria, in scholæ catholicas injuriosa, declaratur.*

» Itaque si status istorum parvulorum *relative* spectetur ad supernaturalem beatitudinem, a qua per originale peccatum excidentur, habet rationem pœnæ ac damnationis, et sunt ejusmodi infantes a Deo saltem negative aversi, etc. Si autem spectetur *in se et absolute*, cum per peccatum homines nihil de naturalibus amiserint, talis est istorum parvulorum conditio, qualis fuisset, si Adam neque peccasset, neque elevatus ad statum supernaturalem fuisset, seu in conditione puræ naturæ. Hinc S. Thomas, in 2<sup>a</sup> Sent., dist. 33, q. 2, art. 2, ad 3, de ejusmodi infantibus scribit : *Sibi (Deo) junguntur per participationem naturalium bonorum, et ita etiam de ipso gaudere poterunt naturali cognitione et dilectione.*

» Angelicus igitur Doctor, prout jamdiu animadverterant De Lemos ac Billuart, his parvulis tribuit bona naturalia, et aliquem naturalem Dei amorem et gaudium. Nullo vero modo eos pœna sensus affici fuisse ostendit, loc. cit., diluitque difficultates desumptas ex Matth. XXV, et ex vocibus *suppliciis, tormentis, gehennæ, cruciatibus æterni*, quibus post Augustinum auctor *Hypognostici*, Fulgentius et Gregorius M. usi sunt. Nam Christi judicium *discussionis* ostendit neque pertinere ad hos infantes, neque ad infideles, in quibus fides non fuit fundamentum meritum ; citatos vero auctores *large* illas voces accepisse pro pœna, et *speciem* pro genere posuisse.

» Deinde in quæst. 3, *de Malo*, ostendit eosdem parvulos ex amissa beatitudine supernaturali, nulla affici tristitia, tum quia indebitam sibi esse cognoscunt illam beatitudinem ob Adæ peccatum contractum, tum quia etsi perspicuum habeant se ad aliquam beatitudinem conditos fuisse, minime cognoscunt hanc positam

fidem, per peccatum infidelitatis in primâ culpâ inclusum. Attamen potuerunt recuperare fidem, et facto recuperaverunt, ut constat ex suprâ dictis de poenitentia Adami.

2<sup>o</sup> Scientia naturalis, ut diximus in probatione, fuit attenuata; quia post peccatum aggravata est anima per corpus; quia homo ad laborem corporeum damnatus, ad terrena necessario inclinatus, ad spiritualia difficilius assurgere poterat.

3<sup>o</sup> Factus est capax erroris per amissionem rectitudinis.

II. Voluntatis. — *Quonam sensu intelligendæ sint, sive quoad Adamum, sive quoad posteros, amissio rectitudinis, seu justitiæ originalis, imminutio libertatis, subjectio erga diabolum è peccato protoparentis orta?*

*Resp.* Quædam certa, quædam controversa.

*Certa.* 1<sup>o</sup> Per peccatum Adamus ejusque posteritas amiserunt justitiam originalem in sensu suprâ explicato, scilicet: submissionem voluntatis erga Deum,

» esse in visione clara Dei; adeoque ignorant se ab illa exclusos,  
» nec proinde dolent, sed hoc, quod per naturam habent, sine  
» dolore possident.

» Quidquid porro de his placitis sit, quæ salva fide ac sine quavis  
» temeritatis nota quilibet tenere potest, hoc lucri ex tali senten-  
» tiarum discrepantia habemus, non deberi nec posse Ecclesiæ doc-  
» trinam cum privatorum placitis permisceri. Pessime igitur se  
» gerunt increduli cum fidei aut Ecclesiæ tribuunt doctrinam, quæ  
» Ecclesiæ non est, ut inde inferant catholicam Ecclesiam docere  
» dogmata, ut ipsi vocant, horribilia ac rectæ rationi repugnantia.  
» Tantum enim abest, ut Ecclesia voluerit illas sententias sancire,  
» ut potius summus Pontifex eos damnaverit qui notam inusserunt  
» illorum doctrinæ, qui penam sensus ab ejusmodi infantibus re-  
» movent. »

quæ in animâ existerat per gratiam sanctificantem clemenciamque ipsi annexam, submissionem partis animæ inferioris erga voluntatem, submissionem corporis erga animam, quæ gratuitò et supernaturaliter à Deo homini concessæ fuerant.

2º Liberum hominis arbitrium fuit imminutum, ab intrinseco, in eo sensu quòd vires ipsius ad vitandum malum, ad bonum operandum, imminutæ fuerint per amissionem justitiæ originalis; ab extrinseco, per submissionem diabolo.

3º Homo incurrit captivitatem sub potestate diaboli in duplici sensu: 1. in eo sensu quòd, ante peccatum obnoxius tentationi diaboli tantum exteriori, evaserit subjectus tentationi interiori in sensu suprâ explicato; 2. in eo sensu quòd peccando factus fuerit reus pœnæ æternæ, ac subindè sub jure diaboli constitutus.

*Controvertitur* autem utrùm Adamus et posterì per peccatum facti fuerint debiliores ad malum vitandum, ad bonum operandum, quàm fuissent in statu naturæ puræ.

Resp. Vel agitur de debilitate intrinsecâ, vel de debilitate extrinsecâ :

1º Si de *debilitate intrinsecâ* : — Duplex opinio.

*Prima* affirmat hominem per peccatum factum fuisse debiliorem quàm fuisset in statu naturæ puræ; seu, quod idem est, hominem per peccatum fuisse non solum spoliatum donis gratuitis, sed etiam in naturalibus vulneratum (1). — His rationibus nititur : 1. Juxta Con-

(1) Ità Navarr. l. 4, q. 9; Alvar. l. 6, disp. 45 et 47; Tournely, *de grat.* q. 4, art. 4; Contenson et p'ures recentiores.

cil. Tridentinum, homo fuit per peccatum in *deterius commutatus*; juxta multos Patres, *vulneratus*. Porro nec commutatus, nec vulneratus dici posset, si privatus fuisset tantum donis supernaturalibus. 2. Peccatum actuale naturaliter inclinatur hominem ad malum, etiam in ordine naturali: à pari peccatum originale, quod est peccati protoparentis continuatio. Vehementior proinde facta est concupiscentia Adami et posterorum quam fuisset in statu naturæ puræ qui peccatum excludit. 3. Homo per peccatum avertitur à fine ultimo, non tantum supernaturali, sed etiam naturali: ergo per peccatum factus est minus inclinatus ad finem, debiliior proinde ad operandum bonum. 4. In statu naturæ puræ, homo naturaliter potuisset diligere super omnia Deum prout auctorem naturæ, vincere gravem tentationem; porro post lapsum hæc non potest.

*Secunda opinio* negat hominem factum fuisse intrinsicè debiliorem, seu in naturalibus vulneratum; admittit tantummodo eum fuisse donis gratuitis spoliatum.—Hæc opinio, priori probabilior, sic probatur:

1. Si homo in naturalibus vulneratus fuisset, vel per ablationem alicujus perfectionis, vel per additionem alicujus realis qualitatis quæ naturam ad malum impelleret. Atqui 1. non per ablationem alicujus perfectionis: siquidem anima ejusque perfectiones sunt indivisibiles, proinde non possunt minui. 2. Non per additionem: hæc enim qualitas vel nullam haberet causam, vel crearetur à Deo, vel causà à Deo distinctà: atqui neutrum dici potest. Non primum: quidquid enim est reale causam realem exigit. Non secundum: siquidem, in hæc hypothesi, Deus crearet qualitatem ad malum ex naturâ

suâ impellentem, quod repugnat ipsius sanetitati. Non tertium: nam Deus solus est creator omnium quæ realia sunt.

2. Concilia et SS. Patres mutationem per peccatum in naturâ inductam attribuunt tantum amissioni justitiæ originalis, non verò vulnerationi hominis in naturalibus. Sic Concilium Tridentinum mutationem illam et vulnerationem naturæ exponit dicendo *primum hominem Adam, cum mandatum Domini in Paradiso fuisset transgressus, statim sanctitatem et justitiam in quâ constitutus fuerat amisisse... et secundum corpus et animam in deterius commutatum fuisse.*

3. Hæc est communior theologorum opinio, maximè inter veteres (1).

4. Si admittenda foret prima opinio, maximè ob rationes suprâ expositas: porro nullæ sunt. 1<sup>a</sup> quidem: Concilia enim et Patres ideò dicunt hominem esse vulneratum, quia per peccatum privatus est justitiâ originali, non verò quia vires ipsius naturales diminutæ sunt per subtractionem perfectionis aut additionem qualitatis realis ad peccatum inducentis. 2<sup>a</sup> et 3<sup>a</sup>: Peccatum enim minueret quidem vires hominis naturales ad bonum, seu illum vulneraret in naturalibus, si produceret in homine habitum activum inducentem ad peccatum; non verò si habitus, per peccatum actuale Adami et originale posterorum creatus, sit tantum perseverantia aversionis à Deo. Atqui hoc verum est de peccato Adami, quod fuit unicum et incapax produ-

(1) Ità D. Thom. 1 p. q. 95, art. 1; Scot. in 2, dist. 29; Cajetan.; Suarez, *de grat.* proleg. 4, c. 8; Bellarm. *de grat. et lib. arbitr.* l. 5; etc.

cendi per se habitum activè inclinantem ad malum ; à fortiori de peccato originali quod voluntate propria non fuit commissum. 4<sup>a</sup>: Affirmat enim vires hominis naturales debiliores fuisse post lapsum quàm in statu naturæ puræ. Atqui hoc contradicit theologorum opinioni ; siquidem theologi qui admittunt possibilitatem naturalem diligendi Deum super omnia in statu naturæ puræ, illam quoque admittunt quoàd statum naturæ lapsæ ; illi autem qui eam negant de statu naturæ lapsæ, eam pariter negant de statu naturæ puræ.

2<sup>o</sup> Si agatur de *debilitate extrinsecâ* : — Duplex etiam opinio.

*Prima* affirmat hominem per peccatum factum fuisse debiliorem ab extrinseco quàm fuisset in statu naturæ puræ ; quia 1. homo in statu naturæ puræ habuisset ad vitandum malum, ad bonum operandum, præter vires intrinsecas, auxilium actuale ordinis naturalis quo privatus est in pœnam peccati ; quia 2. in statu naturæ puræ homo non fuisset subjectus diabolo, in cujus captivitate fuit redactus per peccatum (1).

*Secunda* negat hominem ab extrinseco per peccatum factum fuisse debiliorem. Si debiliior factus fuisset : vel privatione auxilii naturalis, vel impugnatione diaboli. Atqui neutrum dici potest.

Non privatione auxilii naturalis : Nam 1. id affirmare non possunt adversarii. Equidem homo per peccatum hanc privationem meritus erat ; sed indè non sequitur illum hanc privationem subiisse. Sic per peccatum factus fuerat reus damnatione actuali et multis aliis pœnis

(1) Ità, inter plures, Wirceburgenses.



quæ ipsi irrogatæ non fuerunt. Probandum proindè foret rationibus positivis hominem privatum fuisse auxilio naturali de quo agitur. Porro hæc privatio probari non potest. Deus, utpotè sapiens, media facultatibus accommodat; porro facultates naturales homini peccatori conservavit; censetur proindè ipsi auxilium naturale conservasse.

Non impugnatione diaboli: Saltem hæc propositio absque ratione affirmaretur. Dubium est enim utrùm homo in statu naturæ puræ à dæmonio tentatus fuisset; et, in hypothesis affirmativâ, utrùm auxilia ad resistendum ipsi concessa in statu naturæ puræ magis valida fuissent quàm in statu naturæ lapsæ.

III. Corporis. — *Quomodò post peccatum homo factus fuerit subjectus morbo et mortì?*

*Resp.* Post peccatum factus est subjectus morbo et mortì merà privatione mediorum quibus, in statu innocentiae, supernaturaliter præservabatur: siquidem homo, ut probatum est ubi *de Statibus*, morbo et mortì naturâ suâ subjectus, ab his malis factus fuerat immunis supernaturaliter persola media prædicta.

II. Extrinseca, scilicet:

I. Dominium in res inferiores. — *Quo dominio in res inferiores privatus fuerit Adam: an dominio facti; an dominio juris tantum; an utroque?*

*Resp.* Non dominio juris, ex omnium consensu; sed dominio facti, ut experientiâ constat.

II. De habitatione in Paradiso, nihil explicandum.

II.

OSTENDUNTUR RELATIONES PROPOSITIONUM.

Veritatum sub titulo præsentis expositarum relationes, sive cum veritatibus tituli præcedentis, sive inter se, sequentium serie propositionum exprimi possunt.

In titulo præcedenti diximus: ex elementis essentialibus statûs innocentie, speciatim ex gratia sanctificante, pendere elementa accidentalia ejusdem statûs Adamo et posteritati concessa.

Porro gratia sanctificans, proinde alia statûs innocentie privilegia, per peccatum amitti potuerunt; proinde lapsus generis humani in statum inferiorem à peccato Adami et posteritatis pendebat.

In titulo præsentis probavimus Adamum et, in Adamo capite, omne genus humanum peccavisse. Unde homines à Deo aversi amiserunt gratiam sanctificantem, et, eum gratia sanctificante, alia statûs innocentie elementa essentialia, scilicet jus ad finem supernaturalem et ad gratias actuales.

Atqui, posita institutione divina, perditis elementis essentialibus, necessario amittere debebant elementa statûs innocentie accidentalia— *intrinseca*: fieri proinde quoad intellectum, capaces ignorantie et erroris; quoad voluntatem, concupiscentie subjecti; quoad liberum arbitrium, attenuati; quoad corpus, morti et morbo obnoxii; — *extrinseca*: proinde amittere dominium facti in res inferiores, ex Paradiso ejici.

---

## ACTUS TERTIUS.

### DEUS REPARAT HOMINEM PER CHRISTUM.

Hominem liberè lapsum Deus poterat non redimere; sed, misericordiâ motus, statim post peccatum protoparentum, generi humano promisit reparatorem.

Cùm autem Deus disponat omnia suaviter, et opera sua in ordine sive naturali, sive supernaturali, sensim sine sensu perficiat; debuit reparationem præparare, deindè præparatam adimplere.

Dicendum proindè 1<sup>o</sup> de reparatione *præparatâ*, 2<sup>o</sup> de reparatione *adimpletâ*.

#### I.

### DE REPARATIONE PRÆPARATA.

Deus reparationem præparavit per seriem actuum sequentium præcipuè :

1<sup>o</sup> Patriarcharum antediluvianorum eligit familias, quas providentiâ speciali gubernat. — Per illas integram conservat cognitionem religionis primitivæ, speciatim peccati originalis, redemptoris promissi. — Has cognitiones per eas proponit generationibus antediluvianis, transmittit tandem generationibus postdiluvianis. Siquidem homines tempore dispersionis cognoscentes prædictas veritates, eas in universum orbem asportarunt per traditiones generationibus sequentibus transmittendas.

2<sup>o</sup> Hominibus postdiluvianis in errores et vitia proruentibus, Abraham ejusque posteros eligit ut, Patriar-

charum antediluvianorum continuatores, conservent atque transmittant religionem primitivam; simulque recipiant, conservent et transmittant veritates quibus progressivè religionem primitivam evoluturus erat, ad homines disponendos ad reparationem. Providentiâ speciali dirigit Abraham, Isaac et Jacob. — In populum specialem eligit sibi eorum posteros, leges politicas et cœremoniales ipsis imponit; ut, ab aliis populis separati, eorum errores et vitia difficiliùs participantes, religionem primitivam revelationesque speciales tutiùs transmittere possint.

3<sup>o</sup> Per Abraham, Isaac et Jacob atque Prophetas sequentes usque ad Malachiam, populo Israëlitico successivè revelat Messiae characteres, quibus reparatoris persona quasi minutissimè delinearetur; ut in eam mens Judæorum perpetuò converteretur, simulque adveniens Liberator facilè et certò ab hominibus cognosceretur. — Insuper vitam et functiones Messiae, Ecclesiam ejusque futuros eventus adumbrat in vitâ Patriarcharum, in eventibus populi Israëlitici, in cœremoniis legalibus.

4<sup>o</sup> Per Moysen populi Israëlitici institutorem, Hebræis imponit leges præcepta primitivè revelata evolventes ac perficientes, ut transitus à lege primitivâ ad perfectionem christianam facilius evadat.

5<sup>o</sup> Per Israëlitas immediatè aut mediatè notificat aliis populis prophetias de Messia, religionemque Hebræorum.

Immediatè: Deo enim jubentè aut disponente, Abraham habitat in terrâ Chaldæorum, Chananæorum, Ægyptiorum. — Joseph terræ Ægyptiorum præest; in

eam introducit Jacob cum familiâ suâ. In eâ crescit tribus Israëlitarum, undè exurgit natio Hebræorum. — Tempore Salomonis commercium ineunt Hebræi cum Phœnicis et Ægyptiis. — In regiones orientales captivi ducuntur per reges Ninivitas; à Cyro Persarum rege post 70 annos liberantur. — Sub Alexandri successoribus commiscuntur populis Ægypti et Asiæ occidentalis. — Eorum libri hebraicè scripti, jubente Philadelpho, græcè redduntur. — Sub Romanis Judæa fit imperii provincia; Judæi in varias Occidentis regiones disseminantur, ipsamque Romam invadunt.

Mediatè: Judaicâ enim religione prædictis populis immediatè communicatâ, facilitè explicatur per commercium populorum ejus divulgatio, et exspectatio universalis Messiae tempore ejus adventûs.

6º Per imperia coadunavit in unam societatem tribus nationesque diversas. Sic manifestavit idololatriæ contradictiones, hostilitates populorum paulatim minuit, hominesque ad unitatem intellectualem et moralem doctrinæ christianæ præparavit. — Speciatim per imperia, Græcum et Romanum, communicationes inter populos instituit, linguas græcam et romanam vulgares fecit; indè prædicationi christianæ viam aperuit.

## II.

### DE REPARATIONE ADIMPLETA.

Omnibus ad reparationem præparatis, *Verbum caro factum est et habitavit in nobis*, ut hominem actibus suis repararet.

Sub titulo præsentis dicendum ergo de VERBO INCARNATO.

Tria autem sunt de Verbo Incarnato exponenda: Ejus existentia, proprietates, actus.

I. — DE EXISTENTIA

VERBI INCARNATI.

*Præmittenda.* Incarnatio est : unio naturæ divinæ et humanæ in unâ Verbi personâ.

In Verbo incarnato tria sunt distinguenda : 1° *natura divina*, id est substantia, proprietates et attributa divina; 2° *natura humana*, id est corpus humanum, animâ humana inter se unita; 3° *unio personalis* seu *hypostatica*, per quam naturæ divinæ et humanæ ad unicam Verbi divini personam reducuntur : undè fit Christus; quod sic explicari potest. In genere persona dicitur substantia libera et sui juris. Homo personæ superiori non unitus est persona, est enim substantia libera et sui juris. Si autem personæ divinæ uniatur, itâ ut ex duabus naturis quid unum fiat, amittit personalitatem suam; siquidem, licèt conservet libertatem, cessat esse sui juris.

Tria ergo negari possunt in Christo : divinitas, humanitas, unio hypostatica naturæ divinæ et humanæ per Verbi personalitatem.

Errârunt circa *naturam divinam* Christi : Simon magus, Cerinthus, Ebion, Carpocrates, Beryllus Bostræ in Arabiâ episcopus, Paulus Samosatenus, Sabellius.

Circa *humanitatem*, rejiciendo veram carnem à Christo de B. Mariâ assumptam : Simon magus, Menander, Saturninus, Basilides, Valentinus, Apelles, Cerdo;— spoliando Christum animâ vel mente humanâ : Ariani, qui, juxta S. Athanasium, aiebant vice inte-

rioris nostri hominis, id est animæ, Verbum in carne exstitisse; Apollinaristæ, qui in Christo corpus et animam admittebant, sed mentem humanam ei denegabant, Verbo vicem ejus supplente; — spoliando Christum voluntate et operatione humanâ: Monothelistæ, qui unicam agnoscebant in Christo voluntatem et operationem, scilicet divinam.

*Circa unionem naturæ divinæ et humanæ:* Nestorius, qui duplicem affirmabat personam unione duntaxat morali conjunctam. Aiebat enim: Verbum in homine Christo habitasse tanquàm in templo; unionem Verbi cum humanitate esse duntaxat affectûs; Verbum cum humanitate esse unitum secundum operationem, quia humanitas erat Verbi instrumentum, secundum participationem, quia Verbum homini impertiverat dignitatem suam ut Deus et Filius Dei appellaretur. Per modum corollarii negabat B. Virginem esse Deiparam; erat enim tantum personæ humanæ genitrix. — Eutyches, qui affirmabat unicam naturam in Christo fuisse post Incarnationem. Undè Eutychiani Monophysitæ appellati sunt. Hæresi Monophysitarum affinis est hæresis Monothelitarum de quâ suprâ. Quibus positis,

QUÆR. *Utrùm admittenda sit Verbi incarnati, seu Incarnationis existentia?*

RESP. Admittenda est Verbi incarnati, seu Incarnationis existentia.

PROB. I<sup>a</sup>. Ecclesia universalis credit dogma Incarnationis in sensu explicato. — Quæ fides explicitè manifestatur in symbolo S. Athanasii, quod auctoritate Ecclesiæ recitatur: *Est ergo fides recta, ut credamus et confiteamur, quia Dominus noster Jesus Christus Dei*

*Filius, Deus et homo est. Deus est ex substantiâ Patris ante sæcula genitus; et homo est ex substantiâ matris in sæculo natus. Perfectus Deus, perfectus homo; ex animâ rationali, et humanâ carne subsistens. Æqualis Patri secundum divinitatem; minor Patre secundum humanitatem. Qui, licet Deus sit et homo; non duo tamen, sed unus est Christus. Unus autem non conversione Divinitatis in carnem; sed assumptione humanitatis in Deum. Unus omnino, non confusione substantiæ, sed unitate personæ. Nam, sicut anima rationalis et caro unus est homo, ita Deus et homo unus est Christus.*

PROB. II<sup>a</sup>. Admittenda est Incarnationis existentia, si Christus possideat 1<sup>a</sup> naturam divinam, 2<sup>o</sup> naturam humanam; 3<sup>o</sup> si natura humana et natura divina Christi hypostaticè uniantur in unicâ Verbi personâ. Porro hæc tria certa sunt.

I. Christus possidet naturam divinam:

Pr. 1<sup>a</sup>. *Arg. theol.* Rationibus specialibus infra probabitur B. Virginem esse matrem Dei, ergo Christus Mariæ Filius est Deus.

Pr. 2<sup>a</sup>. *Script.* 1<sup>o</sup> Perfectiones divinæ supponunt naturam divinam; ergo Christus possidet naturam divinam, si habeat perfectiones divinas. Porro habet:—æternitatem: S. Joan. in Apoc. 22, 13, inducit Jesum de se ita loquentem: *Ego sum Alpha et Omega, primus et novissimus, principium et finis.* Hebr. 13, 8: *Jesus Christus heri, et hodiè: Ipse et in sæcula;*—Omniscientiam: Col. 2, 3: *In quo sunt omnes thesauri sapientiæ et scientiæ absconditi;*—Omnipotentiam et immutabilitatem: Apostolus (Hebr. 1, 10) Christo applicat hæc

\*\*



verba Psal. 101 : *Initio tu, Domine, terram fundasti: et opera manuum tuarum sunt cæli; ipsi peribunt, tu autem permanes...; mutabuntur, tu autem idem ipse es, et anni tui non deficient;*— Vim sanctificantem : I Cor. 6, 11 : *Sanctificati estis, et justificati in nomine Domini nostri Jesu Christi.*

2<sup>o</sup> Secunda Trinitatis persona (Verbum, Filius) possidet naturam divinam; ergo et Christus, si Christus sit Verbum, Filius Dei. Porro,

Christus est Verbum Dei :—Joan. 1, 14 : *Et Verbum caro factum est... et vidimus gloriam ejus.* Ibid. 1, 18 : *Joannes testimonium perhibuit de ipso.* Unde sic: ex textu, Joannes testimonium perhibuit Verbo incarnato; ergo Christus est Verbum incarnatum, cum aliundè constet Joannem fuisse Christi præcursores, proinde Joannem perhibuisse testimonium de Christo.

Christus est Filius Dei :— Christo interroganti discipulos quid cum esse dicerent, respondit Petrus : *tu es Christus Filius Dei;* cui Christus approbans declarat : *Beatus es, Simon Barjona, quia caro et sanguis non revelavit tibi, sed Pater meus qui in cælis est.* (Matth. 16, 16.)— In concilio sacerdotum et seniorum interrogatus utràm esset Filius Dei, Christus respondet : *Ego sum;* et addit : *Et videbitis Filium hominis sedentem à dextris virtutis Dei, et venientem cum nubibus cæli.* (Mare. 14, 61-62.) Quod Judæi intelligentes in sensu stricto omnes vociferaverunt : *secundum legem debet mori, quia Filium Dei se fecit.* (Joan. 19, 7.) — I Joan. 5, 5 : *Quis est qui vincit mundum, nisi qui credit quoniam Jesus est Filius Dei?* — II Cor. 1, 13 : *Dei Filius Jesus Christus.* Galat. 4, 4 : *Ubi venit plenitudo temporis, misit Filium suum factum ex muliere.*

3<sup>o</sup> Christus possidet divinitatem, si sit consubstantialis Patri; porro res ita est. Joan. 10, 30: *Ego et Pater unum sumus*. Ibid. 10, 38: *Ut cognoscatis et credatis quia Pater in me est, et Ego in Patre*. Ibid. 16, 13: *Omnia quaecumque habet Pater mea sunt*. Ibid. 14, 10: *Philippe, qui videt me, videt et Patrem*. Col. 2, 9: *In Ipso inhabitat omnis plenitudo divinitatis corporaliter*.

Christus possidet divinitatem, si in scripturis appellatur *Deus* sine addito; porro sic appellatur. Joan. 22, 28: Cum Thomas viso et attrectato Domino admirans exclamasset: *Dominus meus et Deus meus*, respondit ei Jesus: *Quia vidisti me, Thoma, credidisti: beati qui non viderunt et crediderunt*. Rom. 9, 5: *Ex quibus (Israelitis) est Christus secundum carnem, qui est super omnia Deus Benedictus in sæcula*. Rom. 14, 10, 12: *Omnes stabimus ante tribunal Christi... itaque unusquisque nostrum pro se rationem reddet Deo*; unde tribunal Christi, tribunal Dei. Philip. 2, 6: *Qui, cum in formâ Dei esset, non rapinam arbitratus est esse se æqualem Deo*. Tit. 2, 13: *Expectantes adventum gloriæ Magni Dei et Salvatoris nostri Jesu Christi*.

Pr. 3<sup>a</sup>. Traditione. S. Ignatius, ep. ad Ephes.: *Unus est medicus carneus et spiritualis, factus et non factus, in homine Deus, in morte vera vita, et ex Deo*. Et, ep. ad Magnes.: *Unus est Deus, qui seipsum manifestum reddidit per Jesum Christum Filium suum, qui est ipsius Verbum sempiternum*.—Eusebio teste, S. Polycarpus martyrie proximus hanc orationem habuit: *Te benedico et glorifico per sempiternum Pontificem Jesum Christum dilectum Filium tuum, per quem tibi cum*

*ipso in Spiritu Sancto gloria nunc et in futura sæcula sæculorum. Amen.* — S. Irenæus, adv. hæres. l. 2, c. 35: *Semper est coexistens Filius Patri, olim et ab initio semper revelat Patrem.* — S. Justinus, apolog. 1: *Filius ejus, qui solus propriè dicitur Filius, Verbum, simulcum eo ante creaturas et existens et nascens.* — Athenagoras, in legat. aut apolog.: *Quantum potui pro rei dignitate, demonstravi nos non esse à Deo alienos, qui universitatis hujus opificem Verbumque ejus et verum Deum veneramur.* — Tertullianus contra Praxeam, c. 25: *Ego et Pater unum sumus, ad substantiæ unitatem, non ad numeri singularitatem pertinet.* — Synodus Antiochena contra Paulum Samosatenum congregata ita catholicum dogma exprimit: *Hunc Filium genitum, unigenum Filium, imaginem invisibilis Dei, primogenitum omnis creaturæ, Sapientiam et Verbum, et Virtutem Dei, qui et ante sæcula, non præscientiâ, sed substantiâ et hypostasi Deum, et Dei Filium in veteri et novo Testamento agnoscentes confitemur...*

*Pr. 4<sup>a</sup>. Auctor. Eccles. Symb. Nicæn.: Credo... et in unum Dominum Jesum Christum, Filium Dei unigenitum... Deum de Deo... Deum verum de Deo vero... Consubstantialem Patri.*

II. Christus possidet naturam humanam.

*Pr. 1<sup>a</sup>. Script. Joan. 8, 40: Nunc autem quæritis me interficere, hominem, qui veritatem vobis locutus sum, quam audiavi à Deo. 1 Tim. 2, 5: Unus enim Deus, unus et mediator Dei et hominum homo Christus Jesus.*

*Pr. 2<sup>a</sup>. Symb. Nicæn.: Et homo factus est.*

*Pr. 3<sup>a</sup>. Christus possidet humanitatem, si habeat — corpus humanum, — animam humanam intellectu et*

voluntate præditam,—animam et corpus inter se unita.  
Atqui

Christus habet corpus :—Luc. 1, 30 : *Ne timeas, Maria... Ecce concipies in utero et paries filium.* Ibid. 24, 39 : *Videte manus meas et pedes, quia ego ipse sum: palpate et videte, quia spiritus carnem et ossa non habet, sicut me videtis habere.* II Joan. 7 : *Quoniam multi seductores exierunt in mundum, qui non confitentur Jesum Christum venisse in carne: Hic est seductor et antichristus.* I Joan. 4, 2 : *Omnis spiritus qui confitetur Jesum Christum in carne venisse, ex Deo est.*

Christus habet animam humanam intellectu et voluntate præditam :—Habet animam : Joan. 10, 13 : *Animam meam pono pro ovibus meis.* Matth. 26, 38 : *Tristis est anima mea usque ad mortem.* — Intellectu et voluntate præditam : Joan. 17, 9 : *Ego pro eis rogo.* Philip. 2, 8 : *Factus est obediens usque ad mortem, mortem autem crucis.* Undè sic : Christus orat, obediens est; ergo ipsius anima intellectu et voluntate prædita est, si oratio et obedientia intellectum et voluntatem supponant. Porro supponunt intellectum : oratio enim supponit cognitionem eorum quæ postulantur, obedientia, cognitionem præcepti impositi; supponunt voluntatem : oratio et obedientia in se consideratæ sunt actus voluntatis. — Animam humanam : Si anima in Christo existens non sit humana, ergo nihil aliud est quàm Verbum humanitati Christi unitum, ut volunt Ariani et Apollinaristæ; atqui hoc falsum est. Siquidem anima Christi, ut constat ex textibus suprâ citatis, potest tristari, orare, obedire. Porro Verbum est incapax tristitiæ, cùm sit essentialiter beatum; orationis,

cùm bona omnià essentialiter possideat et possit per se aliis communicare; obedientiæ, cùm sit Deus ac proindè essentialiter independens.

Christus habet corpus et animam inter se unita : — Christus passus est, mortuus est, resurrexit. Porro unionem inter corpus et animam supponit 1. dolor : sublatà enim hâc unione, impossibile est corpus agere in animam et vice versà ; 2. mors : est enim separatio animæ à corpore, porro anima non potest à corpore separari quin antea fuerint unita ; 3. resurrectio : cùm sit unio iterata inter corpus et animam.

III. Natura divina et natura humana uniuntur hypostaticè in unicà Verbi personâ :

1<sup>a</sup> p. Natura divina et humana *uniuntur* :

Pr. 1<sup>o</sup> Si natura divina et humana in Christo non unirentur, eidem Christo non possent attribui natura divina et humana, proprietates divinæ et humanæ, actiones divinæ et humanæ ; nullum esset enim in Christo subjectum unicum attributionis harum naturarum, proprietatum et actionum. Ergo reverà natura divina et humana inter se uniuntur, si Scriptura attribuat Christo naturam, proprietates actionesque divinas et humanas ; porro rem ità esse constat ex textibus suprà citatis multisque aliis.

2<sup>o</sup> Si natura humana non uniretur naturæ divinæ, nulla essent in Christo merita infinita. Siquidem hæc merita essent, vel in naturâ divinâ, vel in naturâ humanâ. Atqui, non in naturâ divinâ, quæ meriti incapax est, cùm infinitè independens et perfecta à nullo quidquam obtinere possit ; non in naturâ humanâ, quæ est incapax meriti infiniti, cùm sit essentialiter finita.

Ergo rejicienda est separatio naturarum et admittenda earum unio, si Christi merita et satisfactio fuerint infinita; porro hoc constat ex fide Ecclesiæ.

3<sup>o</sup> Si humanitas esset in Christo separata à Divinitate, Christus ut homo non esset adorandus, nihil enim adorandum inesse potest in merâ creaturâ. Ergo rejicienda est separatio naturarum, et admittenda earum unio, si Christus ut homo sit adorandus; atqui rem itâ esse ex dicendis constabit.

4<sup>o</sup> Si humanitas in Christo à Divinitate esset separata, B. Virgo puri hominis esset mater, proindè non posset appellari Mater Dei. Ergo natura divina et humana non sunt separatæ sed unitæ, si B. Virgo possit verè et propriè dici Mater Dei; porro hæc propositio infrâ probabitur.

2<sup>a</sup> p. Naturæ divina et humana uniuntur *in personâ divinâ*:

*Pr.* Admittenda est hæc unio, si non repugnet in se, et aliundè reddat solaque reddat rationem admissibilem veritatum in præcedenti quæstione expositarum. Atqui,

1<sup>o</sup> Non repugnat in se, quod ex dicendis in tertiâ probatione constabit.

2<sup>o</sup> Reddit rationem veritatum suprâ expositarum:

Positâ enim unione hypostaticâ, explicatur 1. attributio uni Christo naturæ divinæ et humanæ, proprietatum actionumque divinarum et humanarum. Sicut enim de unicâ hominis personâ affirmantur anima et corpus, proprietates actionesque spirituales et corporeæ, quia anima et corpus in homine hypostaticè uniuntur; itâ de unicâ personâ Christi affirmari possunt

natura humana et divina, proprietates actionesque divinæ et humanæ, quia naturæ divina et humana hypostaticè in Christo uniuntur. 2. Explicatur infinitudo meritorum Christi : Merita enim naturæ humanæ Christi ad valorem infinitum elevantur per unionem hypostaticam cum personâ Verbi, siquidem valor actionis crescit pro dignitate personæ agentis. 3. Explicatur legitimitas adorationis Christi ut hominis : Siquidem hæc voce *homo* designatur humanitas per personalitatem completa ; proindè hæc propositio : *Christus ut homo est adorandus*, significat : *Homo, quatenus personalitate Verbi terminatur, est adorandus*. Quæ propositio sic intellecta evidens est ; persona enim Verbi, ut divina, est adoranda, simulque adoranda est ejus humanitas ratione unionis hypostaticæ. 4. Explicatur maternitas divina : Nam, si natura humana uniatur hypostaticè cum personâ divinâ, B. Virgo est mater hominis personalitate divinâ terminati. Ergo Dei mater est, quamvis non genuerit personalitatem divinam ; sicut mulier dicitur mater hominis, quamvis non genuerit animam quâ corpus fit propriè homo.

3º Sola reddit rationem veritatum præcedentium :

Si alia unio posset reddere rationem veritatum suprà expositarum ; vel unio *moralis*, ad sensum Nestorii ; vel unio *per confusionem*, ad sensum Eutychetis. Porro,

Non unio *moralis* : Per unionem moralem explicari non potest 1. attributio naturæ divinæ et humanæ, proprietatum actionumque divinarum et humanarum eidem subjecto. Unio enim moralis est mera relatio ; porro meræ relationi attribui non possunt natura, pro-

prietates, actiones reales. Sic absurdum esset dicere affectionem inter Deum et hominem possidere naturam divinam et humanam, habere attributa divina et humana, agere per Deum et hominem. 2. Nec infinitudo meritorum Christi: Siquidem ex affectione mutuâ inter naturam divinam et humanam non sequitur meritum naturæ humanæ verè esse meritum naturæ divinæ, et vice versâ meritum hominis elevari ad valorem infinitum per dignitatem infinitam Dei. 3. Nec legitimitas adorationis Christi ut hominis: Siquidem ex eo quòd homo diligatur à Deo non sequitur eum esse adorandum. 4. Nec maternitas divina: Siquidem ex eo quòd filius alicujus mulieris diligatur à Deo, non sequitur mulierem esse matrem Dei.

Quod dicimus de unione affectionis, dicendum de aliis unionibus à Nestorio admissis; scilicet, de unione per habitationem, de unione causæ cum instrumento, de unione per communicationem extrinsecam, quas supra indicavimus.

Non unio *per confusionem*: Nam 1. si unio naturarum fieret per confusionem, ergo unica est in Christo natura ac proindè voluntas, quod contradicit Scripturæ, fidei et doctrinæ Ecclesiæ. 2. Positâ unione hypostaticâ, conciliantur affirmationes contradictoriæ quibus Christo attribuuntur proprietates actionesque divinæ et humanæ. Hæc omnia affirmantur de eodem subjecto quidem, scilicet de personâ Christi, non autem de eodem subjecto sub eodem respectu considerato. Proprietates enim et actiones humanæ affirmantur de Christo, quatenus possidet naturam humanam; proprietates verò actionesque divinæ, quatenus possidet naturam divi-



nam. Admissâ autem confusione naturarum, proprietates contradictoriæ affirmantur, non de eâdem personâ tantum, sed de eâdem naturâ, quod absurdum est.

3. Positâ confusione naturarum, ex tribus unum est admittendum: vel naturam mixtam exurgere ex unione naturæ divinæ et humanæ, vel naturam humanam à divinâ, vel divinam ab humanâ fuisse absorptam. Porro admitti non potest natura mixta: sequeretur enim naturam divinam mutatam fuisse, siquidem post Incarnationem possideret formaliter naturam humanam quam prius possedisset eminenter tantum. Nec absorptio naturæ humanæ à naturâ divinâ: Positâ enim tali absorptione, natura divina sola existeret, proindè impossibile esset meritum, proindè impossibilis satisfactio. Nec absorptio naturæ divinæ à naturâ humanâ: quia est absurda in se; et aliundè, absorptâ naturâ divinâ, evanesceret valor infinitus meritorum Christi.

3<sup>a</sup> p. Naturæ divina et humana uniuntur *in personâ Verbi*; seu, personalitas divina, quâ conjungitur natura divina et humana, est personalitas Verbi, non verò personalitas Patris aut Spiritûs Sancti:

*Pr. Joan. 1, 14: Et Verbum caro factum est. Ibid. 3, 16: Sic Deus dilexit mundum, ut Filium suum unigenitum daret.*

4<sup>a</sup> p. Uniuntur in *unicâ* Verbi personâ; id est, personalitas Verbi est unica, seu excluditur personalitas humana:

*Pr. Si in Christo esset personalitas humana, 1. duplex esset Christus, divinus scilicet et humanus: divinus, cùm in Christo esset personalitas Verbi; humanus, cùm ex hypothesi in eodem Christo esset personalitas*

humana. 2. Natura divina et humana, proprietates actionesque divinæ et humanæ de eodem Christo affirmari non possent. Siquidem personalitati humanæ exclusivè attribui deberent natura, proprietates, actionesque humanæ; simili modo personalitati divinæ, natura, proprietates actionesque divinæ. 3. Merita Christi non essent infinita; siquidem personæ humanæ exclusivè attribuenda essent. 4. Natura humana completa esset per humanam personalitatem; proindè Christus ut homo non esset adorandus; B. Virgo personæ humanæ non verò divinæ esset mater, et Mater Dei appellari non posset. Quæ omnia opponuntur Scripturæ, Traditioni, fidei et doctrinæ Ecclesiæ.

PROB. III<sup>a</sup>. Possidet, et ex dictis, cum rationibus validis possidet mysterium Incarnationis in Ecclesiâ catholicâ; proindè admittendum est, nisi ipsius falsitas rationibus certis probetur. Porro nedùm certæ, imò invalidissimæ sunt rationes hoc mysterium impugnantes, ut ex præcipuarum expositione et refutatione constabit.

Objectiones illæ repetuntur ex parte Verbi divini, ex parte humanitatis, ex parte nexûs.

1<sup>o</sup> Ex parte Verbi divini. *Objic.* 1. Per Incarnationem Verbum incipit esse homo; 2. Verbum ante Incarnationem completum, sit per Incarnationem pars totius à Verbo distincti. Ergo per Incarnationem mutaretur, quod absurdum est.

*Resp.* ad 1<sup>am</sup>: Verum est quidem Verbum contrahere per Incarnationem novam relationem extrinsecam cum naturâ humanâ quam terminat; verum est etiam naturam humanam per hanc relationem perfici, cum

ad personalitatem Verbi elevetur. Falsum est autem Verbum per Incarnationem intrinsecè mutari, quia per hanc relationem extrinsecam cum humanitate perfectionem ullam nec amisit, nec acquisivit; porro immutabilitati Verbi opponitur mutatio intrinseca, non verò extrinseca, alioquin dicendum foret Deum per creationem mutatum fuisse.

Ad 2<sup>am</sup>: Verum est naturam divinam et humanam posse, in sensu lato, appellari partes Christi; siquidem ex naturâ divinâ et humanâ hypostaticè unitis exurgit Christus. Falsa est autem hæc propositio in sensu stricto, qui induceret mutationem. Partes enim seorsim sumptæ incompletæ sunt; sese mutuò complent et perficiunt; porro ex Incarnatione sola humanitas perfectior evadit, non verò divinitas.

2<sup>o</sup> Ex parte humanitatis. *Objic.* Juxta Incarnationis dogma, 1. ex unâ parte, humanitas Christi esset perfecta; ex alterâ parte imperfecta, siquidem personalitate propriâ privaretur; 2. natura humana omnes Verbi proprietates participaret, v. g. infinitatem, omnipotentiam: quod absurdum.

*Resp.* ad 1<sup>am</sup>: Equidem natura humana personalitatem amittit per Incarnationem; conjungitur enim personalitati superiori Verbi, fit pars ipsius, desinit proinde esse sui juris: manet verò perfecta quoad naturam, et per unionem hypostaticam abundè suppletur amissioni personalitatis humanæ.

Ad 2<sup>am</sup>: Juxta dogma Incarnationis perfectiones divinæ attribui possunt humanitati in concreto; scilicet, prædicari possunt cum proprietatibus humanis eadem personâ Verbi. Dici enim potest, ob unionem

hypostaticam: *Deus est homo, homo est Deus, etc.*, etc. Falsum est autem proprietates divinas prædicari posse de naturâ humanâ in abstracto, quia natura divina et humana in Christo manent inconfusæ. Sic dici non potest: *divinitas est humanitas, humanitas est immensa, infinita, etc.* De his fusiùs ubi de *Communicatione idiomatum*.

3<sup>o</sup> Ex parte nexûs. *Objic.* 1. Nulla est proportio inter naturam divinam et humanam, impossibilis proindè earum unio. 2. Ex unione hypostaticâ sequitur de eodem subjecto prædicari posse attributa contradictoria. 3. Ex dogmate Incarnationis, Verbum solum incarnatum fuisset, quod est impossibile, cùm, ex dogmate Trinitatis, tres personæ unam et indivisam habeant substantiam.

*Resp.* ad 1<sup>am</sup>: Nulla est proportio perfectionis inter naturam divinam et humanam. Sed existit proportio similitudinis, habitudinis, qualis existit v. g. inter facultatem cognitivam et veritatem; imò capacitas hypostaticæ unionis, quod facto Incarnationis constat, quamvis hoc mysterium intellectûs humani capacitatem superet.

Ad 2<sup>am</sup>: Non repugnat, ut jam diximus, de uno eodemque subjecto, quod ex duplici naturâ coalescit, diversa et contradictoria prædicari pro diverso ad alterutram naturam respectu.

Ad 3<sup>am</sup>: Hoc est Ecclesiæ dogma de Incarnatione, scilicet: personam Verbi à personalitate Patris et Spiritûs S. realiter distinctam assumpsisse naturam humanam. Indè concludunt theologi naturam humanam, mediante personalitate Verbi, fuisse unitam naturæ divinæ, ac proindè per concomitantiam personis Patris

et Spiritus Sancti. Undè dogma Incarnationis nihil contradicit dogmati Trinitatis.

## II. — DE PROPRIETATIBUS

### VERBI INCARNATI.

In Verbo incarnato tria sunt distinguenda: 1<sup>o</sup> natura divina, 2<sup>o</sup> natura humana, 3<sup>o</sup> unio hypostatica naturæ divinæ et humanæ in unicâ Verbi personâ. Undè,

#### § I. — DE PROPRIETATIBUS DIVINIS CHRISTI.

*Quær. Quenam et quales sint proprietates divinæ Christi?*

*Resp.* Christus possidet ratione divinitatis omnes proprietates divinas in gradu infinito. Natura enim divina nec esse nec concipi potest his proprietatibus destituta.

#### § II. — DE PROPRIETATIBUS HUMANITATIS CHRISTI.

*Quær. Quenam et quales sint proprietates humanitatis Christi?*

*Resp.* In genere, ex omnium consensu, à primo conceptionis instanti Christus habuit omnes proprietates essentielles et naturales humanitatis, in summo gradu perfectionis naturalis et supernaturalis compossibili cum functionibus reparatoris.

*Prob.* Habuit proprietates essentielles et naturales humanitatis: siquidem possedit humanitatem sine addito (dicuntur *essentiales* humanitati, proprietates sine quibus homo nec esse nec concipi potest; *naturales*, sine quibus homo habere potest essentiam quidem, non

verò integritatem humanitatis); — in summo gradu perfectionis naturalis et supernaturalis : hoc enim requiritur dignitate humanitatis assumptæ in unitatem personæ divinæ; — eompossibili cum functionibus reparatoris : Christus enim debuit conservare defectus necesarios ad implendam functionem reparatoris, alioquin finem Incarnationis obtinere non potuisset; — à primò conceptionis instanti : Christus enim à primò conceptionis instanti fuit Homo-Deus, Redemptor.

Ex hoc principio deducuntur proprietates et perfectiones speciales Christi ratione humanitatis.

1° — De Proprietatibus humanitatis.

Christus habuit :

Corpus humanum integrum ;

Animam humanam; quoàd substantiam, spiritualetm; quoàd durationem, immortalem; quoàd facultates, intellectualetm, appetitui sensitivo obnoxiam, liberam.

2° — De Perfectionibus humanitatis.

Ut lucidiori modo exponantur, illas comparabimus cum perfectionibus protoparentis.

I. Adam habuit elementa statûs innocentie **ESSENTIALIA**, scilicet : *finem supernaturalem; gratiam habitualetm, gratias actualetm*. — Quæritur ergo utrùm humanitas Christi destinata fuerit ad finem supernaturalem; habuerit gratiam habitualetm, actualetm.

Ad 1<sup>m</sup> q. part. scilicet : *Utrùm humanitas Christi destinata fuerit ad finem supernaturalem?*

*Resp.* Non solùm Christus ad finem supernaturalem,

seu visionem intuitivam, destinatus fuit ; sed eâ fruitus est modo perfectissimo à primo conceptionis instanti.

Quod probandum et explicandum.

Probatio. — Christus fruitus est visione intuitivâ : Nam 1<sup>o</sup> visio intuitiva est supernaturaliter possibilis animæ humanæ et aliundè animam humanam perficiens. 2<sup>o</sup> Joan. 1, 14: *Et Verbum caro factum est, et habitavit in nobis, et vidimus gloriam ejus, gloriam quasi Unigeniti à Patre, plenum gratiæ et veritatis.* Verbum Incarnatum dicitur plenum gratiæ et veritatis ; ergo veritatem perfectè cognoscebat, proindè visione fruitivâ fruebatur. Ibid. 17, 24: *Pater, quos dedisti mihi volo ut ubi sum ego, et illi sint mecum, ut videant claritatem meam quam dedisti mihi.* Christus pro discipulis rogabat claritatem quâ fruebatur ; porro hæc claritas nihil aliud est quàm visio intuitiva, ergo Christus visione intuitivâ fruebatur.

Fruitus est modo perfectissimo à primo conceptionis instanti. Siquidem humanitas Christi debuit esse perfectissima statim atque fuit Verbo divino unita ; porro à primo conceptionis instanti humanitas Christi fuit unita Verbo, ut infra videbimus (1).

(1) Hic occurrit difficultas à plerisque memorata. Si Christus à primo conceptionis instanti indesinenter fruitus est visione intuitivâ modo perfectissimo, quomodò simul in eâdem superiori parte animæ ejus aliquandò potuerit esse tristitia et valdè magna ? Diversè respondent theologi. Juxta Suarez, cujus sententiam tantùm referemus, quamvis tristitia et gaudium sint contraria, divinâ tamen virtute, licèt non absque miraculo, fieri potuit ut simul conjungerentur in eâdem voluntate Christi gaudium et tristitia circa diversa objecta, imò circa idem objectum sub diverso tamen respectu. *Comment. in 3<sup>am</sup> part. q. 18, art. 6, sect. 3.*

Explicatio. — Quær. 1<sup>o</sup> *Utrum per visionem intuitivam anima Christi Deum comprehenderit?*

*Resp.* negativè. Comprehensio enim est adæquata et perfecta rei cognitio. Porro anima Christi, utpotè finita, non potest infinitum adæquatè et perfectè cognoscere.

Quær. 2<sup>o</sup> *Utrum per visionem intuitivam animæ Christi cognoverit omnia creata?*

*Resp.* Cognovit omnia quæ sunt, fuerunt, vel futura sunt extra Deum; quæcumque sunt in potentiâ creaturæ, quamvis nunquàm reducta vel reducenda in actum. Non cognovit autem omnia quæ sunt in potentiâ divinâ.

Cognovit omnia quæ sunt... Nam cognitiones prædictæ non excedunt capacitatem creaturæ ad visionem intuitivam elevatæ.

Non cognovit omnia quæ sunt in potentiâ divinâ... Alioquin omnipotentiam divinam comprehenderet, quod est impossibile, cùm sit infinita.

Ad 2<sup>am</sup> q. part. scilicet : *Utrum Christus habuerit gratiam habitualement ?*

*Resp.* Quædam certa, unum controversum.

*Certa.* 1<sup>o</sup> Christus secundum humanitatem fuit sanctus et Deo gratus. Hebr. 7, 26: *Talis enim decebat ut nobis esset pontifex, sanctus, innocens, impollutus, segregatus à peccatoribus.* Matth. 3, 17 et 17, 5: *Hic est filius meus dilectus in quo mihi benè complacui.*

2<sup>o</sup> Christus secundum humanitatem fuit sanctus per unionem hypostaticam, quæ humanitatem sanctificat, ac Deo gratiam reddit.



*Controvertitur* autem utrùm, præter sanctitatem communicatam per unionem hypostaticam, habuerit gratiam habitualement.

Pauci negant. Plerique affirmant animam Christi à primo conceptionis instanti habuisse gratiam habitualement in gradu perfectissimo, adduntque opinionem contrariam esse temerariam.

Sententiam affirmantem amplectimur, et sic probamus atque explicamus.

Probatio. — 1<sup>a</sup> p. Anima Christi habuit gratiam habitualement: Nam 1<sup>o</sup> gratia habitualis erat possibilis in animâ Christi, eam poterat perficere, nec obstabat functionibus reparatoris; hoc evidens est. 2<sup>o</sup> Rom. 5, 5: *Quia charitas Dei diffusa est in cordibus nostris per Spiritum Sanctum qui datus est nobis*. Deus diffundit charitatem in justis, ergo à fortiori in animâ Christi, cui *non ad mensuram dat Deus Spiritum* (Joan. 3, 34). Ergo ipsi concessit gratiam sanctificantem; cum gratia sanctificans nihil aliud sit quàm charitas habitualis, juxta quosdam theologos, et sit indissolubiliter charitati habituali unita, juxta alios. S. Joan. 1, 14, affirmat Christum fuisse *plenum gratiæ et veritatis*. 3<sup>o</sup> Propositionem nostram plerique Patres admittunt. 4<sup>o</sup> Ex Conc. Trid. sess. 6, cap. 7, et can. 11, constat nos justificari, ac proindè ad statum supernaturalem elevari per infusionem gratiæ et charitatis; ergo à pari Christus.

2<sup>a</sup> p. Eam habuit à primo conceptionis instanti, in gradu perfectissimo: Siquidem anima Christi fuit à primo conceptionis instanti unita personæ Verbi, proindè ab illo momento habuit in gradu perfectissimo omnes perfectiones Ipsi possibiles.

Explicatio. — Quær. *Utrum Christus habuerit gratiam sanctificantem absque præviis actibus propriis, an sub conditione actuum cum auxilio gratiæ productorum.*

*Resp.* Eam habuit sub conditione actuum cum auxilio gratiæ productorum, ob rationes expositas ubi de gratiâ protoparentis.

Ad 3<sup>am</sup> q. part. scilicet: *Utrum Christus habuerit gratiam actualem?*

*Resp.* Vel agitur de gratiâ *adjuvante*, vel de gratiâ *excitante*.

1<sup>o</sup> Si de gratiâ *adjuvante*: probabilius est Christum eam habuisse. Siquidem sine auxilio supernaturali, seu sine gratiâ, homo non potest bonum supernaturale operari.

2<sup>o</sup> Si de gratiâ *excitante*: probabilius est Christum eam non habuisse. Ipsi enim inutilis fuisset, cum sine eâ Christus fuerit sufficienter amotus à peccato per impeccabilitatem, sufficienter excitatus ad bonum per virtutes, et præcipuè per charitatem, ipsi inditas in gradu intensissimo.

II. Adam habuit elementa statûs innocentiae *ACCIDENTALIA* intrinseca, *scientiam perfectam* à visione beatorum distinctam, *immunitatem ab errore*, *voluntatis rectitudinem*; *immunitatem à dolore, morbo, morte.*

Quær. 1<sup>o</sup> *Utrum Christus habuerit scientiam perfectam à visione beatorum distinctam, immunitatem ab errore?*

*Resp.* Christus habuit scientiam perfectam à visione beatorum distinctam, immunitatem ab errore.

**Probatio.** — 1<sup>o</sup> Hæc privilegia fuerunt in Adamo innocente; ergo à fortiori in Christo, nisi repugnent visioni intuitivæ, aut functionibus reparatoris. Atqui non repugnant visioni intuitivæ: non repugnat enim eadem objecta cognosci per visionem beatorum simul et cognitionem viatorum. Nec functionibus reparatoris: Christus enim quamvis possidens scientiam perfectam, potuit pati, ac proindè satisfacere et reparare hominem.

2<sup>o</sup> Christus ut homo erat Dominus universorum, Caput Judexque omnium intelligentiarum creaturarum; porro Domino, Capiti, Judici universorum competit omnium cognitio.

**Explicatio.** — De scientiâ Christi determinanda sunt 1<sup>o</sup> objectum, 2<sup>o</sup> medium, 3<sup>o</sup> proprietates.

1<sup>o</sup> *Objectum.* In genere, Christus cognovit omnia naturaliter et supernaturaliter homini cognoscibilia; alioquin ejus cognitio non fuisset perfecta.

Proindè cognoscebat — in ordine naturali, entia, non solum quoàd species, sed etiam quoàd individua; cogitationes cordium, et futura etiam contingentia; — in ordine supernaturali, entia supernaturalia; mysteria fidei, etiam mysterium Trinitatis quoàd existentiam. Hæc enim sunt intellectui humano cognoscibilia per media naturalia aut supernaturalia.

Non cognovit autem omnia possibilis; quia comprehendisset omnipotentiam, quod excedit capacitatem humanam.

2<sup>o</sup> *Medium.* Christus à primo conceptionis instanti habuit omnes cognitiones prædictas per infusionem; insuper, decursu temporum multas acquisivit per expe-

rientiam et facultates naturales. Nullas habuit per revelationem.

Christus habuit omnes... per infusionem: Si alio modo habuisset illas cognitiones, vel per experientiam, vel per revelationem. Atqui non per experientiam: siquidem à primo conceptionis instanti non poterat experiri. Neque per revelationem: nam cognitiones Christi, cum fuerint perfectissimæ, per medium perfectissimum acquiri debuerunt; porro infusio, utpotè conferens cognitiones claras et completas, est perfectior revelatione, quæ veritates transmittit modo obscuro et incompleto.

Decursu temporum multas acquisivit per experientiam: Christus enim habuit facultates experimentales, sensus scilicet et facultates homini naturales; proinde scientiam experimentalem acquirere potuit. Eam ergo acquisivit, alioquin sub hoc respectu fuisset imperfectus.

Nullam per revelationem: constat ex suprà dictis.

3<sup>o</sup> *Proprietates*. Cognitiones Christo infusæ fuerunt perfectissimæ; id est, anima humana Christi comprehendebat omnia objecta intellectui humano comprehensibilia; incomprehensibilia verò simpliciter cognoscebat. De utroque cognitionis genere habebat scientiam claram, certam, non retrogradem seu oblivioni subjectam, non progressivam. Hæc enim evidenter requiruntur ad scientiam perfectam.

Cognitiones experimentales Christi fuerunt in genere suo perfectissimæ, perfectione tamen inferiori cognitionibus infusis. Nam in scientiâ infusâ mens illuminatur à Deo immediatè et completè pro capacitate suâ;

ſciant in ſcientiâ experimentalî mens illuminatur per creaturas incompletè, ut experienciâ conſtat.

In ſpecie non fuerunt retrogrades, benè verò progreſſivæ. Luc. 2, 52: *Jesus proficiebat ſapientiâ, et ætate, et gratiâ apud Deum et homines.*

Quær. 2<sup>o</sup> *Utrùm Chriſtus habuerit rectitudinem voluntatis?*

*Resp.* Chriſtus habuit rectitudinem voluntatis. Quæ propositio probanda et explicanda eſt.

Probatio. — Adam habuit rectitudinem voluntatis, à fortiori Chriſtus, ſi non repugnet ipſius perfectioni et functionibus reparatoris. Atqui neutrum dici poteſt, ut evidens eſt.

Explicatio. — Quær. 1. in quo ſita fuerit rectitudo voluntatis Chriſti, 2. quo medio eam obtinuerit?

Ad 1<sup>am</sup> ſcilicet: *In quo ſita fuerit rectitudo voluntatis Chriſti?*

*Resp.* Rectitudo voluntatis Chriſti ſita fuit in immunitate à peccato, imò impossibilitate peccandi, in habitibus facto ſubjicientibus in ordine tùm naturali, tùm ſupernaturali, voluntatem Deo, voluntati partes inferiores et corpus. Sine his nempè rectitudo voluntatis Chriſti non poteſt eſſe completa. — Hæc omnia conſtant ex dictis ubi de *Rectitudine voluntatis Adami.*

Excipienda tamen impossibilitas peccandi, quæ de Chriſto ſic probari poteſt. 1. Chriſtus erat Homo-Deus; ergo, ſi fuiſſet capax peccati, peccatum poſſet attribui Deo, vi communicationis idiomatum: quod repugnat. 2. Chriſtus viſione intuitivâ fruebatur, ergo erat impeccabilis.

Ex propositione præcedenti ſequentia deducuntur corollaria:

*Corol. I.* In Christo voluntas rationis, seu deliberata, semper fuit conformis voluntati divinæ. Alioquin Christus non fuisset impeccabilis.

Dico : voluntas *rationis*. Nam voluntas *sensualitatis*, seu appetitus sensitivus, poterat appetere contra voluntatem Dei quæ erant sensibus commoda, refugere quæ erant sensibus incommoda, ut patet ex his verbis Christi tempore passionis : *Non sicut ego volo, sed sicut tu*. Nec dicatur indè sequi in Christo fuisse concupiscentiam, illi enim motus non exurgebant repugnante, sed consentiente ratione; aut deordinationem etiam materiale, hæc enim repugnantia appetitûs sensitivi contradicebat tantum præceptivo positivo de passione Christi, de quo Verbum dispensare poterat et facto quoad prædictos actus dispensabat.

Proindè libertas Christi non fuit *contrarietatis*; alioquin Christus peccare potuisset. Proindè libertas Christi erat *contradictionis* tantum, sufficiens tamen ad meritum. Christus enim poterat mereri, non quidem adimplendo præceptum cujus infractio vi præimpeccabilitatis, erat ipsi impossibilis; sed operando actus non præceptos, aut adimplendo opera præcepta ex motivo non præcepto, v. g. moriendo ex motivo charitatis, vel fortitudinis, vel patientiæ, vel misericordiæ, etc., vel ex motivo omnium istarum virtutum.

*Corol. II.* Christus habuit aliquammodo omnes virtutes naturales et supernaturales, dona Spiritûs Sancti, gratias gratis datas.

Habuit virtutes naturales et supernaturales : ob rationes expositas ubi de *Rectitudine Adami*. — Dicimus : *aliquammodo*. Siquidem in Christo non fuerunt virtutes

quæ repugnant unioni hypostaticæ, visioni intuitivæ et perfectioni supernaturali et naturali. Sic in specie Christus non habuit fidem; fides enim est obscura cognitio, incompatibilis cum visione intuitivâ et scientiâ infusâ. Non habuit spem; spes enim supponit absentiam objecti ejus primarii, scilicet visionis intuitivæ quæ sperari non potest ab eo qui eam possidet. Non habuit poenitentiam, quæ supponit peccatum proprium, quod erat in Christo impossibile.

Habuit dona Spiritûs Sancti : Donum Spiritûs S. est qualitas supernaturalis, quâ homo benè disponitur ad extraordinariam inspirationem divinam promptè recipiendam et exsequendam. Septem sunt infrâ enumeranda. Christus habuit dona prædicta : Luc. 4, 1 : *Jesus autem plenus Spiritu Sancto regressus est à Jordane; et agebatur à Spiritu in desertum.* Ergo Christus movebatur à Spiritu Sancto; ergo, cùm fuerit secundum omnia perfectus, benè disponebatur ad recipiendam et sequendam ejus actionem; alioquin non fuisset perfectè Deo subjectus, nec proindè rectus. Isai. 11, 2 : *Requiescet super eum Spiritus Domini: spiritus sapientiæ et intellectûs, spiritus consilii et fortitudinis, spiritus scientiæ et pietatis, et replebit eum spiritus timoris Domini.*

Habuit gratias gratis datas: Gratia gratis data est donum supernaturale homini gratuitò datum, ad proximi salutem directè ordinatum, v. g. gratia sanitarum, operatio virtutum, prophetia, etc. Porro Christus habuit illas gratias. Fuit enim spiritualis doctrinæ et fidei primus, principalis et perfectus doctor; ergo habuit omnia dona ad hunc finem ordinata, alioquin in Ipso non fuis-

sent omnia ad voluntatem divinam exsequendam necessaria, nec proinde posset dici rectus.

*Corol. III.* In Christo non fuit fomes; id est, appetitus sensitivus et motus corporis in Christo non fuerunt inordinati. Nam 1<sup>o</sup> absentia fomitis fuit in Adamo innocente, à fortiori in Christo. 2<sup>o</sup> Si in Christo fuisset fomes, vi communicationis idiomatum dici posset Deum ad peccatum inclinari; quod repugnat. 3<sup>o</sup> Motus concupiscentiæ, seu fomitis, sunt inordinati; ergo ad peccatum imputabiles in eo qui potest et debet eos impedire. Ergo essent ad peccatum imputabiles personæ Verbi; cum potuerit eos impedire, ut evidens est; debuerit, ipsi enim incumbere cura humanitatem Christi dirigendi. Quod absurdum.

Unde passiones homini naturales non præveniebant actum deliberationis ipsius voluntatis; quod insuper probatur his verbis Joan. 11, 33: *Jesus ergo, ut vidit eam plorantem... infremuit spiritu, et turbavit seipsum.*

Ad 2<sup>am</sup> scilicet: *Quo medio Christus obtinuerit rectitudinem voluntatis?*

*Resp.* Certum est Christum, præter virtutes morales acquisibiles, habuisse per infusionem privilegia prædicta. Hæc enim viâ solâ acquiruntur.

Controvertitur autem utrùm virtutes morales acquisiverit, an infusione habuerit.—Quidam affirmant Christum eas acquisivisse, quia hic modus virtutes obtinendi est perfectior (1). Alii probabilius affirmant virtutes morales Christo fuisse infusas (2). A primo enim concep-

(1) Ità, inter alios, Contenson, *de Incarnat.* diss. 5, specul. 2.

(2) Ità Suarez, *Comment.* disp. 19, sect. 11; Sylvius, in 3<sup>am</sup> part. q. 7, art. 2; Billuart, etc.



tionis instanti Christus non potuit per actus acquirere omnes habitus virtutum. Proindè, si acquisitæ fuissent, Christus aliquandiù his virtutibus privatus fuisset; quod admitti non potest, siquidem carentia illarum virtutum magis derogâret perfectioni Christi, quàm eam augeret acquisitio.

Quær. 3<sup>o</sup> *Utrùm habuerit immunitatem à dolore, morbo et morte?*

*Resp.* Christus non fuit immunis à dolore et morte, immunis autem fuit à morbo.

Non fuit immunis à dolore et morte : Nam 1. hæc immunitas repugnaret functionibus reparatoris ; siquidem ex Scripturâ, Traditione, fide Ecclesiæ, Christus voluit homines per dolorem et mortem reparare. 2. Luc. 24, 26 : *Oportuit pati Christum et ita intrare in gloriam suam.* Rom. 8, 3 : *Deus Filium suum mittens in similitudinem carnis peccati* ; ergo cum carne dolori et morti obnoxia. 3. Symb. Nicæn. : *Crucifixus etiam pro nobis.. passus et sepultus est.*

Immunis fuit à morbo : Morbus est defectus naturæ humanæ ad implendam reparatoris functionem non necessarius. Siquidem Christus poterat per dolorem et mortem satisfacere. Aliundè nihil probat illum subiisse morbum.

Dictis suprâ de corpore Christi addendum. Inter Christum ex unâ parte, Adamum ejusque posteros ex alterâ parte existunt differentiæ sequentes. Adam nec patrem nec matrem habuit, posterî Adæ à patre et matre oriuntur per generationem, undè oritur amissio virginitatis. Christus autem quoad humanitatem habuit matrem ex quâ natus est de Spiritu Sancto, et quæ

virginitatem non amisit nec ante partum, Isaï. 7, 14 : *Ecce Virgo concipiet*; nec in partu, symb. Apost.: *Natus ex Mariâ Virgine* (manente virgine); nec post partum, ait enim Concil. Chalcedon.: *Virginitatem Mariæ à Christo sacratam esse etiam post partum, utrumque ejus fuisse obsignatum, ut nullius injuriæ indè pateret.* Aliundè ab Ecclesiâ appellatur *virgo sine addito.*

III. Adam habuit elementa statûs innocentiae extrinseca : scilicet, *habitationem in paradiso, dominium juris et facti in creaturas exteriores.*

*De habitatione in paradiso* nihil dicendum. Evidens est enim Christum hoc privilegio privatum fuisse.

*Quæ. Utrum Christus dominum habuerit in res creatas?*

*Resp. 1º In ordine naturali,*—Christus habuit quoddam dominium excellens et quamdam potestatem in omnes res creatas, et in actiones hominum et Angelorum.

*Prob. 1ª.* Hoc dominium habuit Christus, si in eo sit possibile, si Christum perficiat, nec repugnet functionibus reparatoris. Atqui 1. possibile est in Christo; Deus enim potuit illud ipsi concedere. 2. Humanitatem Christi perficit, illi omnia subjiciendo. 3. Non repugnat functionibus reparatoris. Equidem Christus ad reparandum hominem voluit præbere exemplum paupertatis, sed ad hunc finem sufficiens fuit privatio dominii terreni, splendoris externi et abundantiae temporalium rerum.

*Prob. 2ª.* Act. Ap. 10, 36 : *Annuntians pacem per Jesum Christum (hic est omnium Dominus).* 1 Cor. 15,

**27: Omnia subjecta sunt ei... præter eum qui subjecit ei omnia.** Apostolus ad Hebr. 2, 8, exponit de Christo illud Psalm. 8, 7: *Constituisti eum super opera manuum tuarum. Omnia subjecisti sub pedibus ejus.* Christus dicitur in Apocal. 1, 5: *Princeps regum terræ*; et 19, 16: *Habet in vestimento et in femore suo* (in humanitate, juxta explicationem communem) *scriptum: Rex regum, et Dominus dominantium.*

Dicimus: *dominium excellens.* Est enim immediate à Deo, stabile et æternum; se extendens ad omnes creaturas, ad omnem usum tam naturalem quàm supernaturalem; superius proindè dominio merè humano, quamvis inferius dominio Dei absoluto.

Notandum tamen dominium Christi non excludere alia dominia, sicut supremum Dei dominium non excludit privata dominia.

2<sup>o</sup> In ordine *supernaturali*, — Christus habuit omnem potestatem requisitam ad exercendas functiones ipsi impositas. Porro multæ sunt Ipsius functiones.

In specie Christus est Ecclesiæ *Caput*. Coloss. 1, 18: *Ipse est caput corporis Ecclesiæ*; in eam proindè potest influere vitam.

*Mediator.* I Tim. 2, 5: *Unus enim Deus, unus et mediator Dei et hominum, homo Christus Jesus, qui dedit redemptionem semetipsum pro omnibus.*

*Sacerdos.* Hebr. 8, 1: *Talem habemus pontificem, qui consedit in dexterâ sedis magnitudinis in cælis.* Ergo potest reconciliare hominem cum Deo, ipsis à Deo obtinere gratias per mediationem sacerdotalem.

*Rex, Legislato et Jûdex.* Rex: Joan. 18, 37: *Dixit ei Pilatus: ergo rex es tu? respondit Jesus: tu dicis*

*quia rex sum ego.* Porro si rex, ergo legislator et iudex. Aliundè, Matth. 28, 19 : *Docete... eos servare omnia quaecumque mandavi vobis.* Act. Ap. 10, 42 : *Ipse est qui constitutus est rex vivorum et mortuorum*; ergo in Ecclesiam summam potestatem habet. Quod confirmatur facto; siquidem Ecclesiam fundavit, leges imposuit, sacramenta instituit, Apostolos ordinavit et ad prædicandum misit, in ultimo iudicio reddet unicuique juxta opera sua.

§ III. — DE PROPRIETATIBUS UNIONIS HYPOSTATICÆ,  
ET EX UNIONE HYPOSTATICA IN CHRISTO SEQUENTIBUS.

1<sup>o</sup> — De proprietatibus unionis hypostaticæ.

Unio hypostatica considerari potest 1<sup>o</sup> quoad rationem existendi, 2<sup>o</sup> quoad durationem, 3<sup>o</sup> quoad modum.

I. De unione hypostatica quoad rationem existendi.

Duplex potest esse ratio rerum : necessitas et actio libera; et, in secundâ hypothesi, actio ipsa rationem habet in motivo determinante voluntatem. Undè querendum : Utrùm Incarnatio fuerit necessaria vel libera, et, in secundâ hypothesi, quodnam fuerit ejus motivum?

Ad 1<sup>am</sup> q. part. scilicet : *Utrùm Incarnatio fuerit necessaria vel libera?*

*Resp.* Vel agitur de necessitate *absolutâ*, vel de necessitate *hypotheticâ*.

I. Si de necessitate *absolutâ*:

R. negativè. Nam 1<sup>o</sup> unum est absolutè necessarium,

scilicet Deus, ipsiusque infinita perfectio. Ergo 1. si Incarnatio fuisset necessaria, Deus non potuisset esse perfectus absque incarnatione, ac proindè absque operibus externis, cùm incarnatio sit opus ad extrà. Ergo 2. Deus ante Incarnationem non fuisset perfectus. Quæ sunt absurda. 2º II Joan. 4, 9: *In hoc apparuit charitas Dei in nobis, quoniam Filium suum unigenitum misit Deus in mundum, ut vivamus per eum.* Ergo Incarnatio fuit opus charitatis et misericordiæ, proindè non necessaria.

II. Si de necessitate *hypotheticâ* :

Quæstio proposita includit sequentes : utrùm incarnatio fuerit necessaria 1. in hypothesi creationis, 2. in hypothesi lapsus hominis, 3. in hypothesi reparationis simplicis, 4. in hypothesi reparationis per satisfactionem æquivalentem et perfectam ?

1º Utrùm... in hypothesi *creationis* ?

R. Incarnatio non erat necessaria. Si necessaria fuisset in hypothesi creationis, maximè, ut volunt quidam, quia posita creatione, Deus teneretur ad optimum. Porro hæc ratio falsa est. Ex eâ nempè sequeretur Deum per decretum creationis amisisse libertatem ; imò Deum in creando non fuisse liberum : nam, si teneatur ad optimum post decretum creationis, à pari ante decretum ; tenebatur proindè ad creationem, cùm creatio melior sit nihilo. Sequeretur mundum actua-lem inter omnes mundos possibles esse perfectissimum. Quod falsum.

2º Utrùm... in hypothesi *lapsus* hominis ?

R. Incarnatio non est necessaria. Siquidem 1. lapsus hominis fuerat liber, ac proindè Deus ad hominem

reparandum non tenebatur. 2. Etiam positâ necessitate reparationis, Deus potuisset alio modo reparare hominem; scilicet ipsi concedendo gratias quibus adduceretur ad pœnitentiam, quâ positâ, Deus gratuitò veniam et reparationem concedere potuisset (ut diximus ubi *de Statibus*).

3<sup>o</sup> Utrùm... in hypothesi *reparationis simplicis*?

R. Incarnatio non erat necessaria. Siquidem Deus poterat hominem per alium medium reparare, ut suprà diximus.

4<sup>o</sup> Utrùm... in hypothesi *reparationis per satisfactionem æquivalentem, et perfectam*?

R. Necessaria est incarnatio.

*Prænot.* Satisfactio est redditio honoris alteri liberè facta. *Redditio honoris*: id est, exhibitio reverentiæ in compensationem injuriæ; *facta alteri*: injuria enim, ac proindè satisfactio duas saltem personas supponit; *liberè*: alioquin existeret satispassio, non verò satisfactio. — Ut satisfactio sit *æquivalens*, requiritur ut honor redditus æquivalet injuriæ illatæ. Ut sit *stricta*, insuper requiritur ut fiat ex propriis et aliàs indebitis. Quo posito,

*Prob.* Necessaria est incarnatio (seu saltem unio hypostatica naturæ divinæ et creatæ) si ex unâ parte, nec Deus purus, nec creatura pura possint satisfactionem æquivalentem et perfectam offerre; si ex alterâ parte, creatura hypostaticè unita fuerit capax hujus satisfactionis. Atqui,

1<sup>o</sup> Deus purus non potest... siquidem est incapax subjectionis et meriti ac proindè omnis satisfactionis. — Creatura pura non potest 1. offerre satisfactionem

æquivalentem : crescit enim injuria pro dignitate offensi et pro vilitate offendentis ; proindè quasi infinita est injuria illata Deo per peccatum hominis , ergo creatura non potest offerre satisfactionem æquivalentem huic injuriæ. Non potest 2. offerre satisfactionem perfectam : siquidem satisfactio perfecta exigit omnes conditiones satisfactionis æquivalentis , insuper fieri debet ex propriis et aliàs indebitis , porro creatura habens omnia à Deo, omnia debet Deo.

2<sup>o</sup> Creatura hypostaticè unita personæ divinæ est capax satisfactionis : infrà probabitur.

Ex dictis constat liberam Dei voluntatem fuisse rationem incarnationis.

Ad 2<sup>am</sup> q. part. scilicet : *Quodnam fuerit motivum incarnationis ?*

*Resp.* Certum est incarnationem ordinatam fuisse proximè ad redemptionem, sanctificationem, glorificationem generis humani ; ultimò ad gloriam Dei , qui omnia propter semetipsum operatur.

Controvertitur autem quisnam ex finibus proximis fuerit præcipuus ; an redemptio generis humani , an verò ipsius sanctificatio et glorificatio. Undè exurgit alia quæstio : *Utrùm vi præsentis decreti, homine non peccante, Verbum incarnatum fuisset, an non ?*

De hac quæstione duplex opinio. *Prima*, Scotistarum, affirmat finem principalem incarnationis fuisse sanctificationem et glorificationem humanitatis : undè Verbum incarnatum fuisset , homine etiam non peccante (1).

(1) Ità Scot. in 3, dist. 7, q. 3 ; Albert. magn. in 3<sup>am</sup>, dist. 7 ; Catharinus ; Suarez de Incarn. disp. 3, sect. 5 ; Isamb. etc.

*Secunda*, D. Thomæ, affirmat finem principalem incarnationis fuisse reparationem hominis: undè, homine non peccante, Verbum non fuisset incarnatum (1).

Probabilior videtur opinio quæ affirmat reparationem hominis fuisse finem præcipuum incarnationis.

*Prob.* Incarnatio procedit ex liberâ voluntate Dei. Ergo ipsius motivum non ratione, sed revelatione tantum innotescere potest. Ergo admittenda est opinio affirmans reparationem hominis fuisse finem principalem Incarnationis, si magis congruat Scripturæ, Traditioni et doctrinæ Ecclesiæ. Porro magis congruit 1<sup>o</sup> Scripturæ: Luc. 3, 31: *Jesus dixit... non egent qui sani sunt medico, sed qui male habent. Non veni vocare justos sed peccatores ad pœnitentiam.* I Tim. 1, 13: *Christus Jesus venit in hunc mundum peccatores salvos facere.* Gal. 4, 4: *Misit Deus Filium suum factum ex muliere factum sub lege, ut eos qui sub lege erant redimeret.* 2<sup>o</sup> Traditioni: S. Iren. lib. 3, adv. hæc. 14, ait: *Si non haberet caro salvari, nequaquam Verbum Dei caro factum esset.* Origen. hom. 24 in Num.: *Si non fuisset peccatum, non necesse fuerat Filium Dei agnum fieri, sed mansisset hoc quod in principio erat, Deus Verbum.* S. August. serm. 8 de verbis Apostoli: *Si homo non periisset, Filius hominis non verasset.* Ità multi alii SS. Patres. 3<sup>o</sup> doctrinæ Ecclesiæ: Symb. Nicæn.: *Qui propter nos homines et propter nostram salutem descendit de cœlis, et incarnatus est de Spiritu Sancto... et homo factus est.*

(1) Ità cum D. Thomâ, 3<sup>a</sup> p. q. 1, art. 3, prædicte Thomiste, Bonafely, de Incarn. qj 6, art. 1; Wilasse, Legend, etc.



II. De unione hypostaticâ quoad durationem.

**Quær.** *Quænam sit unionis hypostaticæ duratio?*

**Resp.** Initium habuit à conceptione Christi, nunquam desitura est.

**Prob.** 1<sup>a</sup> p. Initium habuit à conceptione : Nam 1<sup>o</sup> Matth. 1, 23 : *Ecce Virgo in utero habebit, et pariet filium : et vocabunt nomen ejus Emmanuel, quod est interpretatum nobiscum Deus.* Filius Mariæ appellatur Emmanuel à conceptione. 2<sup>o</sup> VI<sup>m</sup> Concil. generale de animâ et corpore Christi ait : *Non ante suam cum Verbo unionem per seipsa unquam fuere, aut cujusquam aliterius extiterunt, sed coætaneam habentia cum Verbi unione existentiam.*

2<sup>a</sup> p. Nunquam desitura est : Joan. 12, 34 : *Christus manet in æternum.* Hebr. 13, 8 : *Jesus Christus heri et hodiè, ipse et in sæcula.* Symb. Nicæn. : *Cujus (Christi) regni non erit finis.*

III. De unione hypostaticâ quoad modum.

**Quær.** *Quomodo uniantur natura divina et humana in Christo?*

**Resp.** 1<sup>o</sup> Unio inter naturas facta fuit absque confusione naturarum, mediante Verbi personâ. — Facta fuit absque confusione : hæc propositio superius probata est. — Mediante Verbi personâ : alioquin, cum natura divina in se considerata sit communis tribus personis, persona Verbi non fuisset unita naturæ humanæ vinculo strictiori quam persona Patris et Spiritûs Sancti ; quod fidei adversatur.

2<sup>o</sup> Licèt, in assumptione naturæ humanæ, Verbum

sit immediatè unitum carni sicut animæ, dicitur tamen assumpsisse corpus *mediante animâ*, in eo sensu quòd in ordine dignitatis et congruentiæ anima fuerit veluti causa media propter quam Verbum voluerit corpus assumere. — In assumptione naturæ humanæ Verbum immediatè unitur carni sicut et animæ; hæc est communis doctrina theologorum. Et non obscurum habet fundamentum in his verbis Symb. Apost.: (Christus) *sepultus est*: etenim, si Christus dicitur sepultus fuisse, ergo Verbum fuit in sepulchro immediatè unitum corpori, à quo per mortem aberat anima. Aliundè docet Ecclesia in Catech. Conc. Trid. 1 p. *de Symb.* art. 4, § 2, Verbum non deseruisse corpus Christi in triduo post mortem. — Dicitur tamen assumpsisse corpus *mediante animâ*... Ità communiter theologi, post D. Thomam (1).

2. — De proprietatibus Christi ex unione hypostaticâ sequentibus.

Eas per modum corollariorum deducimus.

*Corol. I.* Christus habuit omnes proprietates personæ Verbi speciales. Siquidem in Ipso naturæ divina et humana personalitate Verbi terminantur.

*Corol. II.* Christus ut homo est filius Dei naturalis, non verò adoptivus.

*Naturalis* dicitur *filius*, qui verè genitus est ab eo cujus appellatur filius; *adoptivus* autem qui, ab uno genitus, ab altero ex benevolentia assumitur in filium, ac proindè suscipit jura veri filii.

(1) Vid. Sylvius, in 3 p. q. 6, art. 1, in resp. ad 3; Cardin. Gerdil, *de adoranda humanitate Christi*, in t. 9 *Theol. curs. compl.* col. 923.

Porro Christus dicendus est filius Dei naturalis : Nam 1<sup>o</sup> in propositione : *Christus ut homo est filius Dei naturalis*, hæc voce *ut homo* designatur humanitas quatenus terminata personalitate , quasi si diceretur de Christo : *hic homo, seu, persona, que subsistit in hac humanitate*, est... Porro personalitas Christi est personalitas Verbi, Verbum autem est Filius Dei naturalis ; ergo. 2<sup>o</sup> Rom. 8, 32 : *Qui proprio Filio suo non pepercit*. Joan. 1, 14 : *Vidimus gloriam ejus, gloriam quasi Unigeniti à Patre*. Joan. 3, 16 : *Sic Deus dilexit mundum ut Filium suum Unigenitum daret*.

Non potest dici filius Dei adoptivus : Nam 1<sup>o</sup> hæc appellatio *filius* designat personam, non verò naturam. Porro persona in Christo non potest dici filius Dei adoptivus ; ex adoptionis enim notione repugnat filium naturalem esse simul filium adoptivum. 2<sup>o</sup> Ecclesia simpliciter damnavit hanc propositionem : *Christus ut homo est filius Dei adoptivus*. Ergo.

*Corol. III.* Christus ut homo est adorandus, ità ut unà eademque adoratione adoranda sit Christi divinitas et humanitas.

Siquidem 1<sup>o</sup> Christus est Filius Dei naturalis ; ergo adorandus. Quando autem adoratur persona, eadem simul adoratione adorantur omnia quæ sunt aliquid ejus, quæ communicant eidem esse et subsistere ; porro humanitas in Christo constituit unum totum subsistens, idemque esse personale cum Verbo. Ergo. 2<sup>o</sup> Philip. 2, 9 : *Deus exaltavit illum et donavit illi nomen quod est super omne nomen, ut in nomine Jesu omne genu flectatur cælestium, terrestrium, et infernorum*. Joan. 3, 23, *Pater vult ut omnes honorificent Filium, sicut*

*honorificant Patrem*; porro Pater est adorandus. 3<sup>o</sup> Conc. generale V anathema dicit ei qui *unâ adoratione Deum Verbum Incarnatum cum ejus carne non adorat*.

Notat Billuart, dissert. 23 *de adorat. Christi*, art. 2: « Hanc adorationem humanitatis non debere dici relativam, sicut ea quæ defertur imagini Christi, sed propriam et absolutam, quia adoratur persona cujus est natura, totum cujus est pars, adeoque... ipsa ut pars totius adorati terminat etiam adorationem, secundariò tamen et minùs principaliter, quia adoratur non propter seipsam, sed propter Verbum conjunctum, ad quod primariò et principaliter terminatur adoratio (1): »

*Corol. IV.* In Christo duæ sunt voluntates et operationes liberæ, redactæ ad unitatem personæ per subjectionem voluntatis humanæ erga voluntatem et personalitatem divinam.

Duplex est voluntas et operatiò: Nam 1<sup>o</sup> Christus possidet naturam divinam et humanam; ergo voluntatem et operationem divinam et humanam. 2<sup>o</sup> Christus possidet naturam divinam; ergo voluntatem et operationem divinam, cum Deus voluntate suâ et operatione suâ privari non possit. Ergo in Christo duplex voluntas et operatio admittenda est, si Christus habeat voluntatem et operationem humanam. Atqui 1. pro nobis satisfecit et meritis est; porro meritum in Christo supponit voluntatem et actionem liberam humanitatis. 2. Luc. 22, 42: *Non mea voluntas, sed tua fiat*. Philip. 2, 8: *Factus obediens usque ad mortem*. Ergo in Christo

(1) Vid. etiam Sylvium, in 3 p. q. 23, art. 2, et opusc. præcit. Cardin. Gerdil:

existit voluntas distincta à voluntate Patris, quæ non potest esse nisi humana, cum una sit voluntas tribus Personis divinis. 3. VI Concil. gener. docet *duas voluntates in eo* (Christo), *et duas naturales operationes, indivisæ, inconvertibiliter, inseparabiliter, inconfusæ, secundum Sanctorum Patrum doctrinam prædicandas.*

Redactæ ad unitatem personæ... Ratione unionis hypostaticæ, voluntas humana, quamvis libertatem conservaverit, subjecta fuit voluntati divinæ, ita ut cessaverit esse sui juris, proinde personalitatem amiserit.

*Corol. V.* Christus fuit capax meriti infiniti.

Fuit capax meriti : possidebat enim voluntatem humanam liberam ac proinde meriti capacem. Meriti infiniti : siquidem, vi unionis hypostaticæ, meritum Christi erat meritum personæ infinitæ, meritum proinde valoris infiniti.

*Corol. VI.* Admittenda est communicatio idiomatum in concreto, rejicienda verò in abstracto.

Communicatio idiomatum est naturæ divinæ et humanæ, earumque proprietatum de se invicem mutua prædicatio. Est *in concreto*, cum naturæ et earum proprietates de se invicem prædicatæ supponunt personalitatem unicam Verbi. Est *in abstracto*, cum naturæ et proprietates de se invicem prædicantur verbis quæ abstrahunt personam. Porro,

1<sup>o</sup> Admittenda communicatio idiomatum *in concreto* : Christus enim est persona habens naturam divinam et humanam ; de eo proinde sub respectu personali considerato possunt affirmari natura divina et humana, proprietates divinæ et humanæ.

2<sup>o</sup> Rejicienda verò communicatio idiomatum *in abs-*

*tracto* : In unicâ enim personâ Christi inconfusæ manent natura divina et humana, proprietates divinæ et humanæ ; proindè de se invicem prædicari non possunt. Porro affirmarentur in communicatione idiomatum in abstracto, cùm verba abstracta designent naturam sepositâ personâ.

Sic licet dicere : *Deus est homo, homo est Deus* ; hæc enim propositio significat : eadem persona habet naturam divinam et humanam ; — *Deus est natus, passus, mortalis ; homo est immortalis, æternus* ; id est, eadem persona habet naturam divinam et proprietates humanas, naturam humanam et proprietates divinas ; — *mortalis est immortalis, æternus est temporalis* ; id est eadem persona habet proprietates divinas simul et humanas.

Non licet autem dicere : *deitas est humanitas, immortalitas est mortalitas, Deus est mortalitas*. Significant enim propositiones illæ : natura divina est natura humana ; immortalitas (proprietas divina) est mortalitas (proprietas humana) ; mortalitas (proprietas humana) pertinet ad naturam divinam.

Præter corollaria præcedentia de Christo, ex unionem hypostaticâ erui potest corollarium sequens de Beatâ Virgine :

*Corol.* B. Virgo Maria est verè Mater Dei.

Nam 1<sup>o</sup> mulier verè appellatur *mater* hominis, quia significat corpus hypostaticè unitum personalitati humanæ. A pari B. Virgo appellari potest in sensu stricto Mater Dei, quia est mater hominis qui hypostaticè unitur personæ Verbi. 2<sup>o</sup> *Ecce Virgo in utero habebit, et pariet*

*filium, et vocabunt nomen ejus Emmanuel, quod est interpretatum nobiscum Deus. Hic textus Isaïæ 7, 14, à S. Matth. Christo applicatur. Luc. 1, 33: Quod nasce-  
tur ex te sanctum; vocabitur Filius Dei. Christus ex B. Mariâ V. natus appellatur Deus; ergo B. Virgo est Mater Dei. 3<sup>o</sup> Concil. Ephesinum hæc habet: Si quis non confitetur Emmanuelem verè Deum esse, et ob id Sanctam Virginem Deiparam (genuit enim illa Incarnatum Patris Verbum secundum carnem), anathema sit.*

### III. — DE ACTIBUS

#### VERBI INCARNATI.

Homo per peccatum offenderat Deum, amiserat privilegia statûs innocentiae essentialia et accidentalia. Reparatio perfecta et completa generis humani exigebat ergo satisfactionem perfectam, redditionem omnium privilegiorum statûs innocentiae.

Deus poterat hæc omnia per Verbum Incarnatum præstare. Christus enim, utpotè Homo-Deus, poterat satisfactionem perfectam Deo offerre, homini per actus suos mereri redintegrationem in omnia statûs innocentiae privilegia. Noluit autem completè hominem reparare. Sic, ut facto constat, noluit homini restituere scientiam perfectam, immunitatem ab errore, rectitudinem voluntatis, saltem in eo sensu quòd destruxerit fomitem; immunitatem à morbo, dolore, morte; habitationem in paradiso voluptatis, dominium facti in res inferiores.

Per Christum Deus voluit tantùm obtinere satisfactionem perfectam; restituere generi humano privilegia

status innocentiae essentialia, scilicet jus ad visionem intuitivam, gratiam habitualement, gratias actuales; mentem humanam erroribus sanare, novis veritatibus illuminare et ad bonum perfectius dirigere.

Ad hunc scopum ordinantur actus Christi sequentes: 1° Christus Deo satisfacit; 2° hominibus meretur vitam aeternam et media ad eam obtinendam, scilicet jus ad visionem intuitivam, ad gratiam habitualement, ad gratias actuales; 3° praedictas gratias influit; 4° mentem humanam sanat, illuminat et dirigit per doctrinam. Et, ad perpetuandos usque ad consummationem saeculi praedictarum institutionum effectus, creat et constituit sub auctoritate supremâ Unius Capitis vices suas gesturi (S. Pontificis), Sacerdotium cui committit ministerium sacrificii, facultatem communicandi gratiam per sacramenta, auctoritatemque verbi infallibilem.

Sicut autem omnes *per unum et in uno* homine mortui erant, Deus voluit ut *per unum et in uno* omnes vivificarentur. Ideo constituit Christum Caput hominum et angelorum.

Cum actus iste in alios influat, de illo praevie dicendum; deinde actus Christi juxta ordinem sunt exponendi.

De quolibet actu tria sunt examinanda: 1° existentia, 2° proprietates, 3° consecutaria et effectus.

### ACTUS PRAEVIUS.

*DEUS CONSTITUIT CHRISTUM CAPUT HOMINUM ET ANGELORUM.*

#### § I. — De Existentia.

*Quaer. Utrum Deus constituerit Christum caput hominum et angelorum?*

*Resp. affirmative.*



*Prob.* Vera responsio, si Christus sit 1. caput hominum, 2. caput angelorum, 3. auctoritate divinâ. Atqui,

1<sup>a</sup> p. Christus est caput hominum: Nam 1<sup>o</sup> Rom. 12, 4: *Sicut in uno corpore multa membra habemus, omnia autem membra non eundem actum habent: ita multi unum corpus sumus in Christo.* I Cor. 12, 12: *Sicut enim corpus unum est, et membra habet multa, omnia autem membra corporis cum sint multa, unum tamen corpus sunt: ita et Christus.* Unde sic: homines constituunt unum corpus mysticum in Christo; ergo homines habent caput mysticum; ergo Christus est caput hominum, si habeat erga corpus mysticum hominum omnes capitis dotes, atqui hoc est certum. Caput enim est prima et perfectior pars hominis, vitam, motum directionemque influens in alia membra. Porro Christus est 1. corporis mystici pars prior, non tempore quidem, sed propinquitate ad Deum; dicitur aliundè *primogenitus in multis fratribus* (Rom. 8, 29); 2. pars perfectior quoad vitam spiritualem: *vidimus eum plenum gratiæ et veritatis* (Joan. 1, 14); 3. influens aliis membris vitam spiritualem, seu gratiam: *de plenitudine ejus omnes nos accepimus* (Joan. 1, 16); 4. influens directionem per leges quas instituit.

2<sup>o</sup> Ephes. 1, 22: *Suscitans illum à mortuis... omnia subjecit sub pedibus ejus: et ipsum dedit caput supra omnem Ecclesiam, quæ est corpus ipsius.* Ibid. 4, 13: *Crescamus in illo per omnia, qui est caput Christus. Ex quo totum corpus compactum et connexum...*

2<sup>a</sup> p. Est caput angelorum. Nam 1<sup>o</sup> Christus est prior, et perfectior angelis, ob rationes superius alla-

tas. In angelos influit augmentum vitæ supernaturalis, scilicet, gloriam accidentalem, notitiam perfectiorem aatributorum Dei, ut infrà dicemus. Ergo possidet omnes dotes capitis erga angelos, proindè est eorum caput. 2<sup>o</sup> Col. 2, 10: *Estis in illo repleti qui est caput omnis Principatûs et Potestatis*. I Petr. 3, 22: *Qui est in dexterâ Dei... profectus in cælum, subjectis sibi Angelis et Potestatibus et Virtutibus*.

3<sup>a</sup> p. Christus est caput hominum et angelorum auctoritate divinâ: Ephes. 1, 22: *Ipsam dedit (Deus) caput supra omnem Ecclesiam*.

### § II. — De Proprietatibus.

Dicendum 1<sup>o</sup> de terminis, 2<sup>o</sup> de naturâ, 3<sup>o</sup> de intensitate, 4<sup>o</sup> de duratione unionis prædictæ.

#### I. De Terminis.

Unio existit inter *Christum* ex unâ parte, *angelos et homines* ex alterâ parte.

I. De primo hujus unionis termino, seu de Christo capite, — quæritur: 1<sup>o</sup> utrùm Christus sit caput Ecclesiæ quatenùs est homo, an quatenùs est Deus; 2<sup>o</sup> utrùm Christus secundum animam, an secundum corpus, an simul secundum corpus et animam sit caput Ecclesiæ?

Ad 1<sup>um</sup>, scilicet: *Utrùm Christus sit caput Ecclesiæ quatenùs est homo, an quatenùs est Deus?*

*Resp.* Christus est caput Ecclesiæ quatenùs est homo. Nam, Ephes. 1, 22: *Suscitans illum à mortuis omnia subiecit sub pedibus ejus; et ipsum dedit caput supra omnem Ecclesiam, quæ est corpus ipsius*. Undè sic: 1.

Christus est caput Ecclesiæ quatenus est suscitatus, ergo quatenus est homo. 2. Dignitate capitis acquisivit superioritatem quam antea non possidebat, *omnia subiecit*; porro Christus, quatenus est Deus fuit semper angelis hominibusque superior; ergo Christus constitutus est caput ratione humanitatis tantum.

Ex his sequitur angelos et homines uniri immediate Christo quatenus est homo, et mediate quatenus est Deus. Siquidem humanitas Christi unitur hypostaticè personæ Verbi, proinde naturæ divinæ; ergo angeli et homines immediate uniti Christo quatenus est homo, Ipsi mediate uniuntur quatenus est Deus.

Ad 2<sup>um</sup>, scilicet: *Utrum Christus secundum animam, an secundum corpus, an simul secundum corpus et animam sit caput Ecclesiæ?*

*Resp.* Christus est caput Ecclesiæ simul secundum animam et corpus. Siquidem tota Christi humanitas est instrumentum divinitati conjunctum ad salutem hominis; v. g. per orationem meruit gratiam, per dolores et mortem redemit hominem.

II. De secundo unionis termino, scilicet de membris Christi, seu de angelo et homine, — quæritur: 1<sup>o</sup> utrum omnes angeli et homines sint membra Christi; 2<sup>o</sup> specialiter utrum homines sint membra Christi quoad animam et quoad corpus?

Ad 1<sup>am</sup>, scilicet: *Utrum omnes angeli et homines sint membra Christi?*

*Resp.* Certum est omnes angelos et homines lapsos, exceptis dæmonibus et damnatis, aliquo sensu esse membra Christi. Christus enim est caput omnium qui ab Ipso influxum supernaturalem recipiunt; porro om-

nes, angelis et hominibus damnatis exceptis, à Christo cum diversâ intensitate recipiunt influxum supernaturalem, ut infra videbimus.

Controvertitur autem utrùm Adam et Eva in statu innocentiae fuerint membra Christi. — Affirmant *Scotistæ*. Juxta eos, incarnatio immediatè et primariò ordinatur ad sanctificationem hominum; undè omnes gratiæ concessæ homini non solum peccatori sed etiam innocenti ex incarnatione manant. Negant *Thomistæ*. Nam, juxta eos, incarnatio immediatè et primariò ordinatur ad reparationem hominis; undè gratia homini peccatori tantum non verò innocenti ex incarnatione manat. Probabilior opinio Thomistarum, ex suprâ dictis.

Ad 2<sup>um</sup>, scilicet : *Utrùm homines sint membra Christi quoad animam et quoad corpus?*

*Resp.* Homo est membrum Christi, non solum quoad animam cui Christus influit gratiam, ut infra videbimus; sed etiam quoad corpus, testante Apostolo qui, 1 Cor, 6, 13, corpora nostra appellat *membra Christi*. Per influxum enim suum Christus facit corpora nostra instrumenta justitiæ ad opera exteriora virtutum, et in patria ipsis influit immortalitatem et cæteras gloriæ dotes.

## II. De Naturâ.

Quær. *Quænam sit natura unionis inter Christum et sua membra mystica?*

*Resp.* Hæc unio non est hypostatica, sed tantum *moralis*, ut evidens est. Concepitur analogicè per relationes inter caput hominis ejusque membra. Sicut enim caput influit internè aliis membris vitam et motum per media

à Deo ad hunc finem instituta, et directionem externam ne aberrant in actibus externis; ita Christus, caput Ecclesiæ, suis membris influit vitam supernaturalem per gratiam, directionem externam per leges.

### III. De Intensitate.

*Quær. Utrum intensitas unionis inter Christum et ipsius membra sit eadem in omnibus membris, an diversa?*

*Resp.* Intensitas unionis est diversa. Ipsius gradus cum ordine suo propositionibus sequentibus exprimi potest:

1° Christus conjungitur *actu*: 1. angelis, ipsis enim communicat lumen gloriæ accidentale; 2. sanctis, ipsis enim communicat lumen gloriæ essentielle, seu vitam supernaturalem, in suo gradu perfecto; 3. iis qui possident gratiam sanctificantem, siquidem cum gratiâ illis influit fidem, spem, charitatem et alios habitus supernaturales infusos, quæ omnia sunt viatori principia vitæ supernaturalis; 4. iis qui possident habitus fidei et spei, vel tantum fidei, siquidem spes et fides sunt principia actuum supernaturalium, sed incompleta sine charitate.

2° Conjungitur *potentiâ* tantum: iis qui nequidem fide informati sunt; et inter eos, primo loco his quibus postea uniatur, secundo loco his quibus postea non uniatur, sive sint adulti, sive infantes.

### IV. De Duratione.

*Quær. Quænam sit duratio prædictæ unionis?*

*Resp.* Unio Christi cum angelis est æterna. Cum ho-

minibus incipit à primo vitæ instanti; perseverat cum diversis intensitatis gradibus, durante vitâ, eâque finiente, desinit in damnatis, fit perpetua in beatis.

§ III. — De Consecrariis.

Quær. *Quænam sint consecraria unionis Christi et Ecclesiæ?*

Resp. Per unionem Christi cum Ecclesiâ, qui ad eam pertinent fiunt membra Christi. Specialiter homines elevantur ad consortium divinæ naturæ, proinde ad statum in se superiorem statui innocentiae, quia strictiori vinculo Deo uniuntur.

Per illam constituitur communio meritorum inter Christum et homines, communio meritorum hominum inter se, seu *communio sanctorum*; quia in uno corpore quodlibet membrum participat bonum totius corporis.

Per illam possibilis redditur influxus supernaturalis Christi in omnes homines, cum influxus vitalis capitis in membra sequatur ex unione membrorum cum capite.

ACTUS I.

CHRISTUS DEO SATISFACIT.

De illo dogmate errârunt: 1º Pelagiani, juxta quos, satisfactio Christi in eo tantum sita fuit quod reparator hominibus reliquerit exempla et præcepta justitiæ. Eundem renovavit errorem Abailardus, teste S. Bernardo. 2º Sociniani, qui affirmabant Deum ab hominibus satisfactionem non exegisse, gratis verò peccatum remisisse.

Dicendum, ut suprà indicavimus, 1<sup>o</sup> de existentia, 2<sup>o</sup> de proprietatibus, 3<sup>o</sup> de consecrariis satisfactionis Christi.

§ I.—De Existentiâ.

Quær. *Utrum Christus pro hominibus satisfecerit?*

Resp. Affirmativè.

*Prob. 1<sup>a</sup>. I Petr. 2, 24: Peccata nostra ipse pertulit in corpore suo super lignum, ut peccatis mortui justitiæ vivamus: Cujus livore sanati sumus. Eph. 1, 7: In quo habemus redemptionem per sanguinem ejus, remissionem peccatorum secundum divitias gratiæ ejus. Rom. 3, 24: Justificati gratis per gratiam ipsius, per redemptionem quæ est in Christo Jesu. Hebr. 10, 4: Impossibile enim est sanguine taurorum et hircorum auferri peccata. Ideò ingrediens mundum dicit: hostiam et oblationem noluisti: corpus autem aptasti mihi: holocausta pro peccato non tibi placuerunt. Tunc dixi: Ecce venio: in capite libri scriptum est de me: ut faciam Deus voluntatem tuam... In quâ voluntate sanctificati sumus per oblationem corporis Jesu Christi semel. I Joan. 2, 2: Et ipse est propitiatio pro peccatis nostris. Undè sic: Christus peccata nostra pertulit in corpore suo, ut justitiæ vivamus; ejus livore sanati sumus; per ejus sanguinem et gratiam redempti, justificati, sanctificati sumus; factus est propitiatio pro peccatis nostris, etc. Ergo.*

*Prob. 2<sup>a</sup>. Conc. Trid. sess. 14, cap. 8: Qui (Christus Jesus) pro peccatis nostris satisfecit.*

§ II.—De Proprietatibus.

Satisfactio considerari potest ratione 1<sup>o</sup> valoris, 2<sup>o</sup> auctoris, 3<sup>o</sup> medii, 4<sup>o</sup> subjecti, 5<sup>o</sup> perfectionis.

I. Ratione Valoris.

*Quær. Quisnam sit valor satisfactionis Christi; an sit finitus, an infinitus?*

*Resp.* Est infinitus. Satisfactio enim operata est per actus Christi; porro actus Christi sunt valoris infiniti, cum sint actus personæ infinitæ.

II. Ratione Auctoris.

*Quær. Utrum satisfactio Christi sit divina an humana; id est, utrum attribuenda sit divinitati, an humanitati?*

*Resp.* Opera satisfactoria in se attribuenda sunt naturæ humanæ, ipsorum infinitas personæ et naturæ divinæ.— Opera satisfactoria attribuenda sunt naturæ humanæ: Deus enim per se mereri et satisfacere non potest. Infinitas satisfactionis personæ et naturæ divinæ: siquidem satisfactio hominis puri est essentialiter finita. Undè dicendum Christum satisfecisse quatenus est homo personæ Verbi hypostaticè unitus.

III. Ratione Medii.

Certum est Christum satisfecisse per actus suos.

*Quær. autem utrum satisfactio operata sit per omnes, an solum per quosdam actus Christi?*

*Resp.* Satisfactio inchoata per actus Christi qui passionem præcesserunt, per passionem et mortem consummata est. — Inchoata per actus præcedentes passionem: satisfactioni Christi concurrerunt omnes actus quos Christus ad hunc finem ordinavit; porro ad satisfactionem omnes actus suos ordinavit, siquidem redemptio hominis ac proindè satisfactio fuit scopus præ-



cipuus Incarnationis.—Consummata est per passionem et mortem : Potuisset equidem Christus per unum actum satisfactionem consummare, cum quilibet actus ipsius sit infinitus valore ; textibus autem suprà citatis constat Christum voluisse hominis redemptioni applicare omnes actus suos, satisfactionemque per passionem et mortem consummare.

IV. Ratione Subjecti.

Quær. *Utrùm satisfactio Christi fuerit universalis nec ne ; seu, quod idem est, utrùm Christus pro omnibus satisfecerit, an solùm pro quibusdam ?*

Resp. 1º De fide est Christum satisfecisse pro aliis quàm prædestinatis. Siquidem ab Innocentio X et Alexandro VII, in Constitutionibus ab Ecclesià universali acceptatis, damnata est ut hæretica propositio sequens : *Semipelagianum est dicere Christum pro omnibus omninò hominibus mortuum esse*, in eo sensu intellecta quòd Christus pro salute duntaxat prædestinatorum mortuus sit.

2º Certum est, et proximum fidei, Christum pro omnibus hominibus satisfecisse.

Pr. 1ª. I Joan. 2, 2 : *Et ipse est propitiatio pro peccatis nostris, non pro nostris autem tantùm, sed etiam pro totius mundi*. I Tim. 2, 16 : *Unus enim Deus, unus et mediator Dei et hominum homo Christus Jesus, qui dedit redemptionem semetipsum pro omnibus*.

Pr. 2ª. Ex fide et doctrinà Ecclesiæ. Symb. S. Athan. : *Qui (Christus) passus est pro salute nostrà*. Symb. Nicæn. : *Qui (Christus) propter nos homines et propter nostram salutem descendit de cœlis... crucifixus etiam pro*

*nobis*. Unde sic: omnes homines fide divinā credere debent veritates in symbolis fidei inclusas; ergo quisque fide divinā credere debet Christum pro se passum et crucifixum esse, ergo certa propositio nostra.

*Pr. 3<sup>a</sup>*. Propositio superius exposita: *semipelagianum est dicere...* in sensu obvio damnata est ut falsa, temeraria et scandalosa.

*Pr. 4<sup>a</sup>*. Concil. Trid. sess. 6, cap. 3: *Verum, etsi ille (Christus) pro omnibus mortuus est, non omnes tamen mortis ejus beneficium recipiunt, sed ii duntaxat quibus meritum passionis ejus communicatur.*

V. Ratione Perfectionis.

*Quær. Utrum perfecta fuerit satisfactio Christi?*

*Resp. 1<sup>o</sup>* Certum est satisfactionem Christi fuisse perfectam erga Patrem et Spiritum Sanctum.

Ad satisfactionem perfectam, ex dictis, requiritur et sufficit ut sit æquivalens injuriæ, libera, ad alterum, ex propriis et aliis indebitis. Porro satisfactio Christi erga Patrem et Spiritum Sanctum est 1. æquivalens, imò superabundans, cum ex una parte satisfactio per actus Christi sit valoris infiniti, et ex altera parte peccatum sit in se finitum; 2. libera: Is. 53, 7: *Oblatus est quia ipse voluit*. Philip. 2, 8: *Factus obediens usque ad mortem*; 3. ad alterum: Christus enim personalitate distinguitur à Patre et Spiritu Sancto; 4. ex propriis et aliis indebitis: siquidem persona Filii, utpotè divina, est independens, habet dominium actuum suorum.

*2<sup>o</sup>* Controvertitur autem utrum satisfactio Christi fuerit perfecta erga Verbum.

Duplex opinio. — *Prima* negat. Quia in satisfactione Christi erga Verbum nulla fuisset alteritas; cum Christus homo, quatenus personæ Verbi unitus, Verbo satisfecisset. Ut autem salvetur, quantum fieri potest, perfectio satisfactionis, juxta hujus opinionis sectatores, Verbum satisfactioni sibi debitæ renuntiavit. *Secunda*, communior, affirmat satisfactionem Christi erga Verbum fuisse perfectam. Nam Rom. 3, 25: *Quem* (Christum) *proposuit Deus ad ostensionem justitiæ suæ* (sine addito). I Cor. 1, 30: *Christus nobis factus est... justitia... redemptio*. Nomina abstracta habent in Scripturâ vim significandi perfectionem rei significatæ; ergo Christus est nobis *justitia* et *redemptio* absolutè, proinde satisfactio est perfecta sub omni respectu, proinde erga Verbum.

Ad explicandam perfectionem satisfactionis Christi erga Verbum, quidam in Christo distinguunt duplicem æquivalenter personam, Verbum scilicet quatenus unitum naturæ humanæ, et Verbum quatenus inest naturæ divinæ. Verbum sub priori respectu consideratum satisfecit Verbo considerato sub posteriori respectu. — Juxta alios, natura humana potuit satisfacere Verbo, seu actus suos offerre Verbo in reparationem injuriæ 1. liberè: amittendo enim personalitatem, non amisit libertatem; 2. cum alteritate: distinguuntur in Christo natura divina et humana; 3. æquivalenter: ex unione hypostaticâ sequitur valor infinitus actuum; 4. ex propriis et aliis indebitis: Christus enim satisfecit per valorem infinitum actionum suarum. Qui valor, quamvis fluxerit ex dono unionis hypostaticæ, erat proprius humanitatis Christi; quia, positâ unione hypostaticâ, in-

hærebat actibus Christi essentialiter, non verò per modum doni gratuiti. Sic lucrum ex mutuo gratuito proveniens pertinet ad mutuatarium, non verò ad mutuantem.

§ III.—De Consecrariis.

**Quær.** *Quænam sint consecraria satisfactionis Christi?*

**Resp.** 1<sup>o</sup> *Erga Deum* : superabundanter reparat injuriam ipsi illatam per peccatum originale et actuale.

2<sup>o</sup> *Erga hominem* : ipsi meretur gratiam justificantem, per quam in eo exstinguitur peccatum.

ACTUS II.

CHRISTUS MERETUR.

§ I.—De Existentiâ meritorum Christi.

**Prænot.** Meritum est qualitas quâ opus bonum fit præmio dignum ex justitiâ, vel decentiâ. Undè duplex meritum 1. *de condigno*, si præmium debeat ex justitiâ, 2. *de congruo*, si ex decentiâ.

**Quær.** *Utrùm Christus per actus suos meruerit?*

**Resp.** Affirmativè.

**Prob.** 1<sup>a</sup>. Ex dicendis, ad meritum requiritur: *ex parte actûs*, ut sit liber, bonus, supernaturalis quoàd principium, et juxta opinionem probabiliorem, quoàd motivum; *ex parte merentis*, ut sit in viâ, et, si agatur de merito de condigno, possideat gratiam habitualement; *ex parte Dei*, ut mercedem operi promiserit, si agatur de merito de condigno; congruat à Deo concedi mercedem, si agatur de merito de congruo. Ergo Christus

meruit, si actus Ipsius his omnibus conditionibus vestiantur. Atqui,

Actus Christi sunt 1. liberi, nam humanitas Christi libertate fruebatur; 2. boni, Christus enim erat impeccabilis; 3. supernaturales quoad principium et motivum, Christus enim et pari ratione actus Christi possidebant omnes perfectiones naturales et supernaturales cum ipsius naturâ et functionibus compossibiles, porro actus supernaturalis quoad principium et motivum perfectior est actu merè naturali aut supernaturali sub respectu principii vel motivi tantum.

Christus 1. erat in viâ: finem quidem obtinuerat, in eo sensu quod visione intuitivâ fruebatur; erat autem in viâ in eo sensu quod debebat mereri sibi glorificationem corporis, exaltationem suæ humanitatis, angelis gloriam accidentalem, hominibus visionem intuitivam et media ad eam obtinendam necessaria; 2. possidebat gratiam sanctificantem, aut saltem gratiam unionis quâ Deo gratus erat, ut suprâ diximus.

Deus actionibus Christi mercedem promiserat: hanc mercedem promisit Deus multis actibus humanis in genere, positis ponendis, ut infrâ dicemus sub titulo *de Merito*; ergo actibus Christi.

*Prob. 2<sup>a</sup>. Ex fide Ecclesiæ.*

*Prob. 3<sup>a</sup>. Ex Concil. Trid. sess. 6, can. 10: Si quis dixerit homines sine Christi justitiâ per quam nobis meruit, justificari, aut per eam ipsam formaliter justos esse; anathema sit.*

#### § II. — De Proprietatibus.

Meritum considerari potest ratione 1<sup>o</sup> valoris, 2<sup>o</sup> auctoris, 3<sup>o</sup> medii, 4<sup>o</sup> subjecti et objecti,

I. Ratione Valoris.

*Quær. Quisnam fuerit valor meritorum Christi?*

*Resp.* Valor meritorum Christi fuit infinitus.

Undè meritum Christi fuit de condigno rigoroso, seu habens per se valorem æqualem ad præmium. Quod infra explicabitur ubi *de Merito*.

II. Ratione Auctoris.

*Quær. Utrùm meritum Christi sit divinum et humanum?*

*Resp.* Meritum Christi in se est humanum; quoàd valorem infinitum, est divinum.

III. Ratione Medii.

Certum est Christum meruisse per actus suos.

*Quær. autem utrùm meruerit per omnes actus, an per quosdam tantum?*

*Resp.* Christus à primo conceptionis instanti meritus est per omnes et solos actus humanitatis liberos. Ipsius autem meritum non fuit consummatum, nisi per mortem voluntariam.

*Prob. 1<sup>a</sup> p.* Christus meritus est per omnes actus humanitatis liberos: omnis enim actus liber humanitatis vestiebatur omnibus conditionibus ad meritum requisitis. A primo conceptionis instanti: siquidem à primo conceptionis instanti Christus habuit omnes perfectiones naturales et supernaturales cum unione hypostatica compossibiles; ergo à conceptione potuit mereri, ergo à conceptione meruit, alioquin quoàd actus fuisset imperfectus. Per solos actus humanitatis, non verò per actus divinitatis: meritum enim supponit indigen-

tiam et dependentiam, proinde est in Deo impossibile. Per solos actus liberos : siquidem libertas actûs est conditio essentialis meriti.

2<sup>a</sup> p. Meritum Christi non fuit consummatum, nisi per ipsius mortem : Joan. 12, 24 : *Nisi granum frumenti cadens in terram mortuum fuerit, ipsum solum manet; si autem mortuum fuerit, multum fructum affert.* Ibid. 12, 32 : *Et Ego, si exaltatus fuero (in cruce), omnia traham ad meipsum.* Hebr. 9, 15 : *Ideò novi testamenti mediator est, ut morte intercedente, reprobationem accipiant qui vocati sunt æternæ hæreditatis.* Ex quibus constat meritum Christi non fuisse consummatum, Ipso ità volente, nisi per mortem.

#### IV. Ratione Subjecti et Objecti.

Quæ. *Pro quibus et quid meruerit?*

Resp. Christus meruit Sibi, angelis et hominibus.

I. Sibi :—Exceptis unione hypostaticâ, et donis quæ ex eâ sequuntur et quæ Christo statim à conceptione concessa fuerunt, Christus meruit dona humanitati suæ concessa; specialiter glorificationem corporis, exaltationem nominis sui, adorationem omnium populorum.

Prob. p.p. 1<sup>o</sup> Christus non meruit unionem hypostaticam : Principium meriti non cadit sub merito, alioquin causa oriretur ab effectibus. Ergo Christus non meruit unionem hypostaticam, si fuerit in Christo principium meriti; porro res ità est. Siquidem Christus ideò ab instanti conceptionis mereri potuit, quia ex hoc instanti Ipsius humanitas donata est perfectionibus naturalibus et supernaturalibus ad meritum necessariis;

atque iis perfectionibus donata est, quia unita erat personæ Verbi, ut suprà dictum est.

2° Non meruit dona quæ ex unione hypostatica sequuntur et statim à conceptione Ipsi concessa fuerunt, v. g. impeccabilitatem : Res enim debita non censetur concessa per modum præmii, sed tantum per modum debiti, si concedatur statim ac debetur ; siquidem qui eam obtinet nullo instanti potuit eam mereri. Porro dona de quibus agitur in propositione ex hypothesi erant debita, et, à primo instanti debiti, fuerunt Christo concessa.

3° Alia dona meruit : Nam perfectius est rem obtinere ex merito, quàm absque merito. Christus ergo dona de quibus agitur meruit, si ea potuerit mereri ; porro potuit. Si non potuisset, vel quia ipsi defuissent conditiones ad merendum, vel quia hæc dona ipsi jam debita essent. Non prius : ex suprà dictis constat Christum statim à conceptione potuisse mereri. Non postea : res enim potest acquiri simul duplici titulo, scilicet ratione debiti et ratione præmii.

4° Specialiter meruit glorificationem corporis, exaltationem nominis, adorationem nationum.—Glorificationem : Luc. 24, 26: *Nonne hæc oportuit pati Christum, et ita intrare in gloriam suam?* Exaltationem et adorationem : Philip. 2, 8: *Humiliavit semetipsum, factus obediens usque ad mortem, mortem autem crucis. Propter quod et Deus exaltavit illum et donavit illi nomen quod est super omne nomen : ut in nomine Jesu omne genu flectatur, cælestium, terrestrium et infernorum; et omnis lingua confiteatur quia Dominus Jesus Christus in gloria est Dei Patris.*



II. Angelis: — Christus illis meruit; seu potius, Angeli per Christum obtinuerunt bona extrinseca, non verò bona intrinseca.

*Prob. p. p. 1º* Angeli obtinuerunt bona extrinseca: Siquidem facti sunt membra Christi. Ipsis manifestati sunt effectus mirabiles bonitatis et sapientiæ infinitæ Dei, Ephes., 3, 10: *Ut innotescat principatibus et potestatibus in cælestibus per Ecclesiam multiformis sapientia Dei.*

2º Non verò bona intrinseca (gratiam et gloriam): Siquidem decretum de gratiâ et gloriâ angelis conferendâ, ratione præcedit decretum de redemptione hominis per incarnationem.

III. Hominibus: — Christus omnibus hominibus meruit vitam æternam et media ad eam obtinendam necessaria, scilicet gratiam habitualement et gratias actuales.

*Prob. 1ª.* Act. Apost. 4, 12: *Non est in alio aliquo salus. Nec enim aliud nomen est sub cælo datum hominibus, in quo oporteat nos salvos fieri.* Matth. 18, 11: *Venit enim Filius hominis salvare quod perierat.* I Tim. 4, 10: *Speramus in Deum vivum, qui est salvator omnium hominum, maxime fidelium.*

*Prob. 2ª.* Vera nostra propositio, si spes vitæ æternæ oriatur ex merito Christi; porro res ita est. Nam Conc. Trid. sess. 6, can. 26, hæc habet: *Si quis dixerit justos non debere pro bonis operibus, quæ in Deo fuerint facta, expectare et sperare æternam retributionem à Deo per ejus misericordiam et Jesu Christi meritum... anathema sit.*

§ III. — De Consecrariis.

Quær. *Quenam sint consecraria et effectus meritorum Christi?*

Resp. Per Christi merita homini creatur certitudo obtinendi in hac vitâ gratias actuales; et, positis cum auxilio gratiæ conditionibus præviis, gratiam habitua-lem, in alterâque vitâ beatitudinem æternam.

ACTUS III.

CHRISTUS INFLUIT GRATIAM.

Influxus gratiæ potest considerari 1° in se, 2° quoad modum.

I.

DE INFLUXU GRATIÆ IN SE CONSIDERATO.

Gratia in genere est *donum*. Cùm autem donum possit esse ordinis vel naturalis, vel supernaturalis, gratia in sensu generalissimo sumpta potest esse naturalis aut supernaturalis. Supernaturalis autem gratia est donum Dei ordinatum ad finem supernaturalem.

Dividitur 1° in gratiam *Creatoris*, quæ angelis et homini innocenti immediatè à Deo concessa fuit, et gratiam *Redemptoris*, quæ homini lapsò à Deo conceditur intuitu meritorum et per influxum Christi.

2° Gratia Redemptoris est *gratis data*, cùm ordinatur ad utilitatem supernaturalem aliorum, v. g. donum prophetiæ, donum miraculorum, etc.; *gratum faciens*, cùm ordinatur ad bonum supernaturale subjecti cui conceditur.

3<sup>o</sup> Gratia gratum faciens est actualis vel habitualis. Hæc voce *actualis* intelligitur illuminatio aut motio Dei transiens, per quam natura humana in iis quæ ad salutem pertinent illuminatur, excitatur et adjuvatur; ista *habitualis* designatur donum Dei per modum habitûs animæ inhærens, quo homo fit justus et Dei amicus.

Sub præsentî titulo agitur præcipuè de gratiâ Redemptoris actuali et habituali.

§ I.—DE EXISTENTIÂ GRATIÆ.

*Prænot.* Gratix existentiam, ac proindè ejus influxum per Christum negârunt 1<sup>o</sup> Pelagiani, juxta quos liberum hominis arbitrium ita integrum et sanum est, ut gratiâ interiori medicinali et adjuvante non egeat; 2<sup>o</sup> Sociniani et Rationalistæ errorem Pelagianorum renovantes.

*QUÆR.* Utrûm Christus hominibus influat gratiam?

*Resp.* Christus influit gratiam, tum actualem, tum habitualement.

*Prob.* Res ita est, si 1<sup>o</sup> Deus conferat homini gratiam actualem, si 2<sup>o</sup> infundat justis gratiam habitualement, si 3<sup>o</sup> prædictas gratias per Christum influat. Porro,

1<sup>a</sup> p. Deus confert hominibus gratiam actualem :

*Pr.* 1<sup>a</sup>. I Cor. 10, 13: *Fidelis Deus est, qui non patietur vos tentari supra id quod potestis; sed faciet etiam cum tentatione proventum, ut possitis sustinere.* Phil. 2, 13: *Deus est enim qui operatur in vobis velle et perficere pro bonâ voluntate.* Undè sic: Deus pro bonâ voluntate auxilium præbet ut possimus sustinere

tentionem, operatur in nobis velle et perficere; ergo Deus confert homini gratiam actualem.

*Pr. 2<sup>a</sup>. Conc. Trid. sess. 6, can. 3: Si quis dixerit, sine præveniente Spiritûs S. inspiratione, atque ejus adjutorio, hominem credere, sperare, diligere aut pœnitere posse sicut oportet, ut ei justificationis gratia conferatur, anathema sit.*

2<sup>a</sup> p. Deus infundit justis gratiam habitualement :

*Pr. 1<sup>a</sup>. I Joan. 3, 9: Omnis qui natus est ex Deo peccatum non facit; quoniam semen ipsius in eo manet. II Petr. 1, 4: Maxima et pretiosa nobis promissa donavit, ut per hæc efficiamini divinæ consortes naturæ. Rom. 8, 9: Sicut enim per inobedientiam unius hominis peccatores constituti sunt multi, ita et per unius obedi- tionem justi constituentur multi. II Cor. 1, 22: Signavit nos Deus et dedit pignus spiritûs in cordibus nostris. Undè sic: anima justi possidet permanenter semen Dei; fit divinæ consors naturæ per donum Dei; per obedientiam justi constituitur justa; acceperit spiritum per modum pignoris, proindè permanenter. Porro donum Dei, quo anima fit permanenter justa, consors divinitatis, ac proindè grata, est gratia habitualis.*

*Pr. 2<sup>a</sup>. Conc. Trid. sess. 6, cap. 16: Justitia nostra dicitur (gratia sanctificans) quia per eam nobis inhærentem justificamur. Ibid. can. 11: Si quis dixerit homines justificari, vel solâ imputatione justitiæ Christi, vel solâ peccatorum remissione, exclusâ gratiâ et charitate quæ in cordibus eorum per Spiritum Sanctum diffundatur atque illis inhæreat; aut etiam gratiam quâ justificamur esse tantum favorem Dei, anathema sit.*

3<sup>a</sup> p. Prædictas gratias influit per Christum, — in duplici sensu.

1<sup>o</sup> Eas influit per Christum, causam *meritoriam* ; ut suprâ probatum est.

2<sup>o</sup> Eas influit per Christum, causam *instrumentalem*. Nam 1. in ordine naturali Deus influit membris principium vitæ per caput ; à pari in ordine supernaturali, per Christum, Ecclesiæ caput, influit hominibus gratiam, principium vitæ supernaturalis. 2. Per Christum influitur gratia actualis : Conc. Trid. sess. 6, cap. 16 : *Christus tanquàm caput in membra, et tanquàm vitis, in ipsos justificados jugiter virtutem influit, quæ virtus bona eorum opera semper antecedit et comitatur et subsequitur, et sine quâ nullo pacto Deo grata et meritoria esse possunt*. Per Christum influitur gratia habitualis : sess. 6, cap. 7 : *In ipsâ justificatione, cum remissione peccatorum, hæc omnia simul infusa accipit homo per Jesum Christum cui inseritur, fidem, spem, et charitatem*. Nam *fides, nisi ad eam spes accedat et charitas, neque unit perfectè cum Christo, neque corporis ejus vivum membrum efficit*.

§ III. — De Natura et Proprietatibus gratiæ.

I. QUÆR. Quænam sit NATURA gratiæ ?

Cùm duplex sit gratia, actualis scilicet et habitualis, duplex est quæstio. Undè,

Quæst. 1<sup>a</sup>. Quænam sit natura gratiæ actualis ?

Resp. Certum est gratias actuales ad duplicem naturam et speciem pertinere ; aliæ sunt *lumen* supernaturale, aliæ *vis* supernaturalis. (Lumen supernaturale : seu per se capax intellectum supernaturaliter illuminandi ; vis supernaturalis : seu per se capax voluntatem supernaturaliter à malo avertendi, ad bonum impellendi, in eoque exsequendo adjuvandi.)

*Prob. 1<sup>a</sup>.* Natura gratiæ actualis, quæ est auxilium supernaturale homini concessum, accommodari debet facultatibus adjuvandis. Porro ex unâ parte, duplex est facultas adjuvanda, intellectus scilicet, ut possit supernaturalia cognoscere et credere; voluntas, ut possit à malo declinare, et bonum supernaturale velle et operari. Ex alterâ parte, intellectus adjuvari potest in actibus ordinis supernaturalis solummodò per lumen supernaturale, voluntas solummodò per vim supernaturalem. Ergo gratia actualis, seu auxilium supernaturale homini concessum, est lumen supernaturale et vis supernaturalis.

*Prob. 2<sup>a</sup> p.p. 1<sup>o</sup>* Existit lumen supernaturale intellectum illuminans: Nam 1. Matth. 16, 17: *Beatus es, Simon Barjona, quia caro et sanguis non revelavit tibi; sed Pater meus qui in cælis est.* II Cor. 3, 5: *Non quòd sufficientes simus cogitare aliquid à nobis quasi ex nobis, sed sufficientia nostra ex Deo est.* Ergo S. Petrus divinitatem Christi per Patrem solum cognovit; ergo sufficientia nostra ad cognoscendum (in ordine supernaturali) ex Deo est. Ergo Deus homini concedit lumen supernaturale. 2. Concilium Arausicanum, quod, quamvis fuerit particulare tantùm, universalis tamen synodi auctoritatem habet, quia universalis Ecclesia decretis ejus subscripsit, hæc declarat in can. 7: *Si quis per naturæ vigorem bonum aliquid quod ad salutem pertinet vitæ æternæ, cogitare ut expedit, aut eligere, sive salutari, id est, Evangelicæ prædicationi consentire posse confirmat, absque illuminatione et inspiratione Spiritus Sancti; hæretico fallitur spiritu.*

*2<sup>o</sup>* Existit vis supernaturalis voluntatem impellens:

Nam 1. Ps. 118, 36: *Inclina cor meum in testimonia tua*. Philip. 2, 13: *Deus est enim qui operatur in vobis velle et perficere, pro bonâ voluntate*. 2. Conc. Trid. sess. 6, can. 4: *Si quis dixerit liberum hominis arbitrium à Deo motum et excitatum nihil cooperari assentiendo Deo excitanti... anathema sit*.

De naturâ autem hujus vis supernaturalis, seu gratiæ voluntatis, diversæ sententiæ fuerunt emissæ.

1<sup>o</sup> Jansenistæ affirmant omnem gratiam voluntatis *essentialiter* esse motum charitatis perfectæ. Nam, inquit, omnis motus voluntatis est amor, et aliundè omnis amor est charitas perfecta, vel cupiditas vitiosa. Porro gratia non potest movere ad cupiditatem vitiosam; ergo essentialiter movet ad charitatem perfectam.

2<sup>o</sup> Quidam catholici, inter quos theologi Lovanienses, admittunt equidem medium inter charitatem perfectam et cupiditatem vitiosam, itâ ut motus à charitate distinctus possit esse bonus in se. Affirmant verò omnem motum gratiæ esse motum charitatis perfectæ. Undè actus elicited ex motivo distincto à charitate, licet bonus in se, non potest esse supernaturalis, quia non fit ex motu gratiæ.

3<sup>o</sup> Juxta alios, existunt motus gratiæ à motu charitatis perfectæ distincti.

Quo posito, sequentiâ de controversiâ actuali affirmamus: 1. hæretica est Jansenistarum opinio, 2. repellenda videtur Lovaniensium, 3. admittenda proindè ultima solutio.

1<sup>o</sup> Hæretica est Jansenistarum opinio.

Pr. 1<sup>a</sup>. Opiniô Jansenistarum nititur hac proposi-

tione: *Omnis amor creaturæ rationalis aut vitiosa est cupiditas quâ mundus diligitur... aut laudabilis illa charitas quâ Deus amatur.* Porro hæc 38 propositio Bii damnata fuit à S. Pio V, Gregorio XIII et Urbano VIII.

*Pr. 2<sup>a</sup>.* Si omnes motus voluntatis à charitate distincti oriantur à cupiditate vitiosâ. Ergo 1. omnes habitus, præter habitum charitatis, sunt mali; proinde uniea est virtus, scilicet charitas. Porro hæc propositio contradicit Scripturæ, I Cor. 13, 13: *Nunc autem manent fides, spes, charitas, tria hæc, major autem horum est charitas.* Ergo 2. omnes actus distincti ab actibus charitatis sunt mali, ergo à Deo commendari non possunt. Porro hoc Scripturæ opponitur, Coloss. 3, 12: *Induite vos ergo sicut electi Dei, sancti et dilecti, viscera misericordiæ, benignitatem, humilitatem, modestiam, patientiam, supportantes invicem, et donantes vobismetipsis... super omnia autem hæc, charitatem habete.* Ergo 3. non vera est legis obedientia, quæ fit sine charitate. Porro hæc 16 propositio Bii damnata est à S. Pio V, Gregorio XIII, Urbano VIII. Ergo 4. Gehennæ metus, per quem ad misericordiam Dei de peccatis dolendo confugimus, et à peccato abstinemus, est peccatum, et peccatores peiores facit. Porro hæc propositio ut hæretica damnata fuit à Conc. Trid. sess. 6, can. 8.

2<sup>o</sup> Repellenda videtur Lovaniensium opinio:

*Pr. 1<sup>a</sup>.* Juxta Lovanienses, actus charitatis soli fierent ex motu gratiæ, seu inspirante Spiritu Sancto. Porro hæc propositio damnata est à Conc. Trid. sess. 6, can. 3: *Si quis dixerit, sine præveniente Spiritus Sancti inspiratione atque ejus adjutorio, hominem credere, sperare, diligere aut pœnitere posse sicut oportet, ut ei justificationis gratia conferatur, anathema sit.*



*Pr. 2<sup>a</sup>.* Conc. Trid. sess. 6, cap. 6, exponens dispositiones ad justificationem, hæc habet: *disponuntur autem ad ipsam justitiam, dum excitati divinâ gratiâ et adjuti*; postea inter dispositiones enumerat fidem, spem, timorem. Ergo motus fidei, spei et timoris in animâ produciuntur excitante et adjuvante gratiâ; ergo omnis gratia non est motus charitatis.

3<sup>o</sup> Ergo admittenda est gratia distincta à charitate:

*Pr.* Ex dictis rejicienda est opinio affirmans omnem gratiam esse motum charitatis; ergo existuat gratiâ à motu charitatis distinctæ.

*Quæst. 2<sup>a</sup>.* *Quænam sit natura gratiæ sanctificantis?*

*Resp.* Ex probatione existentie gratiæ sanctificantis, constat gratiam sanctificantem esse donum Dei per modum habitûs animæ inhærens, quo homo fit justus et Dei amicus.

Undè apparet falsitas opinionis Lutheranorum et Calvinistarum affirmantium gratiam habitualement non esse animæ inhærentem intrinsecè, sed imputationem merè extrinsecam justitiæ Christi.

De naturâ autem intimâ hujus habitûs triplex est inter catholicos opinio.

Juxta *Primam*, gratia sanctificans est ipsa charitas (1).

Sequentibus rationibus nititur hæc opinio: Eadem est natura gratiæ sanctificantis et charitatis, si utriusque iidem sint effectus; porro res ita est. 1<sup>o</sup> Gratia nos conjungit Deo. Item charitas, I Joan. 4, 16: *Qui manet*

(1) Andr. Vega, in Trid. l. VII, c. 23; Bellarmin. *de Grat. et lib. Arbitr.* l. I, c. 7; Estius, in 2, dist. 28, part. 4; Tournely, *de Grat.* q. 5, art. 3; etc.

*in charitate, in Deo manet, et Deus in eo.* 2<sup>o</sup> Gratia vitam spiritualem animæ infundit. Item charitas, I Joan. 3, 14: *Translati sumus de morte ad vitam, quoniam diligimus fratres; qui non diligit, manet in morte.* 3<sup>o</sup> Gratia nos Dei filios efficit. Item charitas, I Joan. 4, 7: *Omnis qui diligit, ex Deo natus est.* 4<sup>o</sup> Gratia hominem reddit gratum et acceptum Deo. Item charitas, Joan. 14, 21: *Qui diligit me, diligitur à Patre meo.* 5<sup>o</sup> Gratia est semen vitæ æternæ. Item charitas, Jacob. 1, 12: *Coronam vitæ repromisit Deus diligentibus se.* 6<sup>o</sup> Per gratiam homo justificatur. Item asserit Conc. Trid. de charitate, sess. 6, cap. 7: *(Justificatio fit) dum per Spiritum Sanctum charitas diffunditur in cordibus eorum qui justificantur, atque ipsis inhæret.*

Hæc opinio impugnatur 1<sup>o</sup> rationibus aliarum opinionum quæ præsentem excludunt, 2<sup>o</sup> rationibus sequentibus.

Malè probatur. Identitas gratiæ et charitatis concluditur ex eo quòd effectus gratiæ sanctificantis attribuantur charitati; porro hæc ratio nihil probat. Cum enim gratia et charitas sint inter se connexæ, et ex natura suâ inseparabiles; quæ conveniunt gratiæ tribuuntur charitati, tanquàm ejus præcipuæ proprietati, et vicissim ea quæ sunt charitati propria, tribuuntur gratiæ tanquàm radici.

Falsa est. Nam 1. charitas est virtus, seu habitus supernaturalis, porro habitus supernaturalis supponit naturam sibi proportionatam cui inhæreat; ergo charitas supponit naturam elevatam ad esse supernaturale, seu gratiam habitualement. Atqui, si charitas supponat gratiam habitualement, non est quid unum et idem cum

ea. 2. Scriptura distinguit gratiam et charitatem, II Cor. 13, 17: *Gratia Domini nostri J. C. et charitas Dei et communicatio Sancti Spiritus, sit cum omnibus vobis.*

3. Catechismus Concilii Tridentini hæc ait de gratiâ sanctificante: *Huic additur nobilissimus omnium virtutum comitatus, quæ cum gratiâ in animam infunduntur.* Undè virtutes, ac proindè charitas, sunt comitatus gratiæ. Ergo charitas à gratiâ distinguitur.

Juxta *Secundam*, gratia sanctificans est participatio creata naturæ divinæ, animæ inhærens per modum habitus (1).

Gratia est *participatio creata naturæ divinæ*: Non est participatio ipsius essentiæ divinæ, hoc enim modo essentia divina solis personis divinis communicatur. Est ergo participatio creata, seu donum à naturâ quidem divinâ distinctum, sed eam analogicè et imperfectè imitans. Quod sic explicari potest: sicut natura divina concipitur in Deo tanquàm radix divinarum perfectionum, et principium radicale divinarum operationum, scilicet actuum quibus se intuitivè videt, amore beatifico diligit, omnia extra se facit; ita gratia sanctificans est in hac vitâ radix, animæ inhærens per modum habitus, capacitatis virtutum infusarum et specialiter theologiarum, quibus anima potest Deum supernaturaliter cognoscere, diligere et ad eum tendere, in alterâ vitâ, radix habilitatis ad vitam intuitivam.

Hæc opinio nititur præcipuè sequentibus textibus: II Pet. 1, 4: *Per ipsum (Christum) maxima et pretiosa*

(1) Hanc sententiâ tenent multi, post D. Thomam, 1-2, q. 110, art. 3. Sic plerique Thomistæ; Suarez, *de Gratiâ*, part. 3, lib. VI, c. 12; Wirceburgenses, etc.

*nobis promissa donavit, ut per hæc efficiamini divinæ consortes naturæ.* I Joan. 3, 9: *Omnis qui natus est ex Deo peccatum non facit, quoniam semen ipsius in eo manet, et non potest peccare, quoniam ex Deo natus est.*

Impugnatur rationibus tertiæ opinionis infra exponendæ.

Juxta *Tertiam*, gratia sanctificans est persona Spiritûs Sancti, quatenus inest animæ, in eâque producit charitatem (1).

Sequentibus textibus nititur hæc opinio: Rom. 8, 14: *Quicumque Spiritu Dei aguntur, ii sunt filii Dei.* I Cor. 6, 19: *Membra vestra templum sunt Spiritûs Sancti.* I Joan. 4, 16: *Qui manet in charitate, in Deo manet et Deus in eo.* Joan. 14, 16: *Et alium Paracletum dabit vobis, ut maneat vobiscum... Apud vos manebit, et in vobis erit.* Rom. 5, 5: *Charitas Dei diffusa est in cordibus nostris, per Spiritum Sanctum qui datus est nobis.* Rom. 8, 15: *Accepistis Spiritum adoptionis, in quo clamamus Abba (Pater).* Undè sic: 1º Spiritus Sanctus habitat personaliter in animâ justi et in eâ agit. 2º Per habitationem et actionem Spiritûs Sancti explicantur perfecte omnes effectus gratiæ sanctificantis. Ideò enim homo elevatur ad statum supernaturalem, fit particeps naturæ divinæ, habet virtutes infusas, specialiter charitatem, est justus, gratus Deo, etc., quia Spiritus Sanctus in eo habitat et operatur. Ergo inutilis, ac proinde rejicienda est participatio creata naturæ divinæ, à secundâ opinione excogitata ad explicandos prædictos effectus.

(1) Ità Petavius et Thomassinus, præcipui hujus sententiæ patroni. Vid. specialiter Petav. *de Trin.*, l. VIII, c. 6 et seq.

Ergo gratia sanctificans consistit in personâ Spiritûs Sancti, prout inest et operatur in animâ.

Oppugnatur hæc opinio rationibus sequentibus :

1<sup>o</sup> Textus allati intelligi possunt de effectibus à Spiritu Sancto productis, per quos moraliter, sed non personaliter, habitat in animâ. — *Respondent* 3<sup>a</sup> opinionis defensores, hanc interpretationem inferre vim textibus.

2<sup>o</sup> De fide est gratiam sanctificantem augeri posse ; quod falsum esset in tertiâ opinione, siquidem Spiritus Sanctus augeri non potest. — *Resp.* 3<sup>a</sup> opinionis defensores, gratiam sanctificantem consistere in Spiritu Sancto, quatenus unitur animæ et in eâ operatur. Porro non repugnat, unionem Spiritûs Sancti ejusque influxum augeri.

3<sup>o</sup> Conc. Trid. sess. 6, can. 11, affirmat gratiam diffundi in animam per Spiritum Sanctum; ergo gratia est effectus Spiritûs Sancti, ab Eo proindè distinguitur. — *Resp.* defensores 3<sup>a</sup> opinionis : gratia est ea qualitas, vi cujus homo fit Deo gratus : undè verba Concilii Tridentini significare possunt : anima justi habet gratiam, seu est Deo grata, propter Spiritum Sanctum habitantem in eâ.

## II. QUÆR. Quænam sint PROPRIETATES gratiæ ?

*Resp.* Aliæ sunt *communes* gratiæ actuali et habituali, aliæ *speciales* alterutri.

### I. De Proprietatibus communibus.

Communes sunt 1<sup>o</sup> gratuita, 2<sup>o</sup> supernaturalitas, 3<sup>o</sup> necessitas.

I. De Gratuitate.

Quær. *Utrùm et quonam sensu gratia sit gratuita?*

Resp. Gratia est gratuita in triplici sensu:

1<sup>o</sup> Gratuita est in eo sensu, quòd sit medium ad visionem intuitivam ordinatum, Finis enim, seu destinatio ad visionem intuitivam, est homini indebitus; ergo indebitum ac proindè gratuitum est medium ad hunc finem ordinatum.

2<sup>o</sup> Gratuita est in eo sensu quòd homo non possit mereri *de condigno* gratiam primam, nec actualem, nec habitualement. Nam, ex dicendis infra sub titulo *de Merito*, meritum *de condigno* supponit gratiam tùm actualem, tùm habitualement. Ergo neutra cadit sub merito, proindè est gratuitò concessa.

3<sup>o</sup> Gratuita est in eo sensu quòd homo non possit mereri etiam *de congruo* gratiam primam actualem, ut infra videbimus.

De gratuitate aut non gratuitate aliarum gratiarum, infra dicemus ubi *de Merito*.

II. De Supernaturalitate.

Quær. *Utrùm, et quonam sensu gratia sit supernaturalis?*

Resp. Gratia tùm actualis, tùm habitualis est supernaturalis:

1<sup>o</sup> Quoad finem. Siquidem ad finem supernaturalem ordinatur immediatè gratia habitualis: cùm sit conditio absolutè necessaria visionis intuitivæ, undè Conc. Trid. ait: *Causa finalis justificationis est gloria Dei et Christi, ac vita æterna*; — mediatè gratia actualis: cùm ordinetur ad gratiam habitualement; nam, sine gra-

tiâ actuali, adultus non potest debitè seipsum disponere ad justificationem, proindè gratiam habitualement obtinere, actus supernaturales operari, ac proindè gratiam habitualement augere, ut infrâ probabitur.

2<sup>o</sup> Quoad *essentiam*. Gratia enim, quoad *essentiam* naturalis, non esset proportionata fini supernaturali.

3<sup>o</sup> Quoad *causam*. Etenim causa gratiæ, tùm actualis, tùm habitualis, est Deus, quatenus est auctor ordinis supernaturalis. Undè Conc. Trid. sess. 6, can. 3, gratiæ actualis productionem attribuit Spiritui Sancto: *Si quis dixerit sine præveniente Spiritus Sancti inspiratione atque ejus adjutorio...*; attribuitque Deo justificationem, ac proindè gratiam habitualement per quam homo justificatur, sess. 6, cap. 7: *Efficiens verò (causa justificationis) misericors Deus, qui gratuito abluit et sanctificat.*

### III. De Necessitate.

Necessaria est gratia actualis; item gratia habitualis, in diverso sensu tamen. Undè,

#### 1<sup>o</sup> De necessitate gratiæ actualis.

Duo quærenda sunt: 1<sup>o</sup> utrùm gratia actualis sit necessaria, 2<sup>o</sup> qualis gratia sit necessaria?

Q<sup>U</sup>ÆSTIO I<sup>a</sup>. *Utrùm gratia actualis sit necessaria?*

Hæc quæstio ad hæc verba reduci potest: Utrùm absque gratiâ actuali homo possit 1. operari bonum in ordine supernaturali, 2. illud operari in ordine naturali, 3. superare tentationes, 4. peccata vitare. Undè,

1<sup>a</sup> Subquæst. *Utrùm absque gratiâ actuali homo possit operari bonum in ordine supernaturali?*

*Resp.* Absque gratiâ actuali internâ homo non potest operari bonum in ordine supernaturali.

Quæ propositio probanda et explicanda.

Probatio. — Cùm omnis gratia sit actualis aut habitualis, propositio manebit probata, si 1<sup>o</sup> aliqua gratia requiratur ad opus supernaturale, si 2<sup>o</sup> non sufficiat gratia habitualis. Atqui,

1<sup>o</sup> Aliqua gratia requiritur ad opus supernaturale : Nam 1. opus supernaturale excedit vires hominis naturales ; ergo ad illud operandum requiritur auxilium supernaturale, seu gratia. 2. Joan. 6, 44: *Nemo potest venire ad me, nisi Pater qui misit me, traxerit eum.* Ibid. 15, 5: *Sine me nihil potestis facere* (dubio procul, in ordine ad vitam æternam). I Cor. 12, 3: *Nemo potest dicere Dominus Jesus, nisi in Spiritu Sancto.* Quæ omnia clarè indicant necessitatem gratiæ ad opus supernaturale. 3. Concil. Arausicanum II, can. 7: *Si quis per naturæ vigorem bonum aliquid quod ad salutem pertinet vite æternæ cogitare ut expedit, aut eligere, sive salutare, id est, Evangelicæ prædicationi consentire posse confirmat, absque illuminatione et inspiratione Spiritûs Sancti... hæretico fallitur spiritu.* Concil. Trid. sess. 6, can. 3: *Si quis dixerit sine præveniente Spiritûs Sancti inspiratione atque ejus adjutorio, hominem credere, sperare, diligere aut pœnitere posse, sicut oportet ut ei justificationis gratia conferatur, anath. sit.* Porro idem de aliis actibus supernaturalibus dicendum propter paritatem rationis.

2<sup>o</sup> Non sufficit gratia habitualis ad opera supernaturalia : Nam 1. Adam in statu innocentiae indigebat gratiâ actuali ad bonum operandum ; ergo à fortiori homo lapsus, quamvis justificatus. 2. S. Augustinus, lib. de nat. et grat. cap. 6 : *Sicut (inquit) oculus corporis etiam*



*plenissimè sanus, nisi candore lucis adjutus, non potest cernere, sic homo etiam perfectissimè justificatus, nisi æternâ luce justitiæ divinitus adjuvetur, rectè non potest vivere. S. Thomas, 1-2, quæst. 109, art. 9, sic habet : Non potest homo, licet jam gratiam consecutus, per seipsum operari bonum et vitare peccatum, absque novo auxilio Dei ipsum moventis. 3. Concil. Arausicanum suprâ citatum absque ullâ distinctione affirmat neminem, aliquid quod ad salutem pertinet vitæ æternæ posse cogitare... aut eligere... absque inspiratione et illuminatione Spiritûs Sancti; seu, quod idem est, absque gratiâ actuali.*

Explicatio. — Ex propositione præcedenti per modum explicationis sequentia deduci possunt corollaria.

*Corol. I.* Vera est propositio, sive intelligatur de actibus ex naturâ suâ supernaturalibus, v. g. actibus fidei, spei, charitatis, receptione sacramentorum; sive de actibus naturalibus quoad substantiam, et supernaturalibus quoad modum, seu elevatis ad ordinem supernaturalem per finem supernaturalem: sic v. g. edere, bibere, et alia ejusmodi quæ, naturalia in se, possunt elevari ad finem supernaturalem et fieri meritoria vitæ æternæ. Nam rationes propositionem probantes, cum sint generales, cuilibet actui supernaturali applicandæ sunt.

*Corol. II.* Homo non potest sine gratiæ interioris auxilio ne fidei quidem initium habere. Nam 1<sup>o</sup> fides, etiamque fidei initium, est actus supernaturalis, seu ordinatus ad vitam æternam. 2<sup>o</sup> II Cor. 3, 5: *Non quod simus sufficientes cogitare aliquid à nobis quasi ex nobis, sed sufficientia nostra ex Deo est.* In ordine

supernaturali nihil possumus cogitare à nobis quasi ex nobis, sed sufficientia nostra ex Deo est; ergo gratia actualis requiritur etiam ad initium fidei. 3<sup>o</sup> Concil. Arausicanum II, can. 8, sic definit: *Si quis, sicut augmentum, ita initium fidei, ipsumque credulitatis affectum, quo in eum credimus qui justificat impium, non per gratiae donum, id est, per inspirationem Spiritus Sancti..., sed naturaliter nobis inesse dicit, apostolicis dogmatibus adversarius approbatur.* Et Concil. Trid. vibrat anathema contra eos qui dicunt hominem posse sine inspiratione Spiritus Sancti credere, etc.

*Corol. III.* Homo sine gratiâ actuali non potest velle et operari bonum supernaturale. — Huc præcipuè tendunt probationes in propositione generali allatæ.

*Corol. IV.* Gratia, et quidem specialis, requiritur ad perseverantiam finalem. — Requiritur gratia: nam perseverantia ad obtinendum finem supernaturalem est necessaria. — Requiritur gratia specialis: siquidem 1<sup>o</sup> perseverantia finalis non conceditur omnibus justis, sed solis prædestinatis; ergo speciale est donum. 2<sup>o</sup> Concil. Trid. sess. 6, can. 22: *Si quis dixerit justificatum, vel sine speciali auxilio Dei, in acceptâ justitiâ perseverare posse, vel cum eo non posse, anathema sit.*

2<sup>a</sup> Subquæst. *Utrum absque gratiâ actuali homo etiam lapsus possit operari bonum in ordine naturali?*

In materiâ præsentî, duplex à theologis distinguitur potentia: *physica*, vi cuius homo potest absolute, quamvis difficillimè; *moralis*, vi cuius homo potest absque magnâ difficultate bonum operari. Quo posito,

*Resp.* Certum est 1<sup>o</sup> hominem lapsum posse moraliter proindè physicè, absque gratiâ actuali, aliquod

operari bonum in ordine naturali, speciatim actus faciliores adimplere.

*Pr.* Si homo lapsus nullum bonum naturalis ordinis operari posset; — Ergo 1<sup>o</sup> liberum ejus arbitrium, seu facultas boni naturalis, fuisset per peccatum non solum attenuatum, sed amissum et extinctum; porro hæc propositio damnata est à Concil. Trid. sess. 6, can. 5. Ergo 2<sup>o</sup> liberum arbitrium sine gratiæ Dei adjutorio, nonnisi ad peccandum valeret; quæ propositio 27 Baii damnata fuit à S. Pio V, Gregorio XIII et Urbano VIII. Ergo 3<sup>o</sup> irreprehensibiles essent quoad doctrinam propositiones sequentes Baii, 37<sup>a</sup>: *Cum Pelagio sentit, qui bonum aliquod naturale, hoc est, quod ex naturæ solis viribus ortum ducit, agnoscit.* 65<sup>a</sup>: *Nonnisi Pelagiano errore admitti potest usus aliquis liberi arbitrii bonus, sive non malus; et gratiæ Christi injuriam facit, qui ita sentit et docet.* Porro propositiones illæ ab iisdem Pontificibus damnatæ sunt.

*Certum est* 2<sup>o</sup> hominem lapsum non posse moraliter absque gratiâ actuali omnia mandata legis naturalis adimplere, seu omnes actus bonos ipsi præceptos operari, speciatim difficiliore.

*Pr.* 1<sup>a</sup>. Ad observandam totam legem naturalem, homo deberet vincere omnes tentationes; porro hoc est absque gratiâ actuali impossibile, ut infra probabitur.

*Pr.* 2<sup>a</sup>. Homo non potest cuncta legis naturalis præcepta sine gratiâ observare, si absque gratiâ non possit vincere concupiscentiam, servare castitatem, domare linguam. Atqui 1. non potest vincere concupiscentiam; hæc enim ait Apostolus, Rom. 7, 23: *Video aliam legem*

*in membris meis repugnantem legi mentis meæ (seu naturali) et captivantem me in lege peccati, quæ est in membris meis. Infelix ego homo, quis me liberabit de corpore mortis hujus? Gratia Dei per Jesum Christum Dominum nostrum.* 2. Non potest servare castitatem; Sap. 8, 21: *Scivi quoniam aliter non possem esse continens, nisi Deus det.* 3. Non potest domare linguam; Jacob. 3, 7: *Omnis natura bestiarum et volucrum, et serpentum, et cæterorum domantur et domita sunt à naturâ humanâ; linguam autem nullus hominum domare potest.*

Ex duabus propositionibus præcedentibus per modum explicationis sequentia deducuntur corollaria de potentiâ morali hominis.

*Corol. I.* Homo potest absque gratiâ actuali quasdam veritates speculativas aut practicas ad officia hominis spectantes cognoscere. Nam 1<sup>o</sup> facultates intellectuales non magis fuerunt in ipso extinctæ, quàm liberum arbitrium. 2<sup>o</sup> Juxta Apostolum, philosophi gentiles fuerunt inexcusabiles quia, cùm cognoverunt Deum, non sicut Deum glorificaverunt.

Dicimus *quasdam*, scilicet, clariores, v. g. existentiam Dei, prima principia legis naturalis, conclusiones proximas; non verò omnes conclusiones remotas quæ ex principiis difficillimè deduci possunt.

*Corol. II.* Homo lapsus potest propriis viribus Deum, ut auctorem naturæ, diligere affectivè et effectivè in quodam gradu, non tamen super omnia.

Dilectio Dei, tanquàm auctoris naturæ, est amor Dei quatenus manifestantis perfectiones suas in ordine naturali. Pro objecto habet, vel Deum, in quantum est in

se bonus, seu infinitè perfectus, et dicitur *amor benevolentiæ*; vel Deum, in quantum bonus est diligentibus se, et dicitur *amor concupiscentiæ*. — Dicitur *affectivus*, amor cordis, abstractâ ejus manifestatione per opera; *effectivus*, amor per opera manifestatus. Est *super omnia*, si talis sit ut Deus cuilibet rei anteponatur; secus, non est super omnia. Quo posito,

*Pr. p. p.* 1<sup>a</sup>. Homo lapsus potest... 1<sup>o</sup> Res ità est, si homo possit per facultates intellectuales cognoscere Deum tanquàm Ens perfectissimum et benefactorem, per facultatem affectivam adhærere Deo perfecto et benefactori, per facultates operativas amorem suum manifestare: atqui hæc tria evidenter constant. 2<sup>o</sup> Inter propositiones Baii ab Ecclesiâ damnatas, sic se habet 34<sup>a</sup>: *Distinctio illa duplicis amoris, naturalis videlicet, quo Deus amatur ut auctor naturæ, et gratuiti, quo Deus amatur ut beatificator, vana est et commentitia, et ad illudendum sacris litteris et pluribus veterum testimoniis excogitata*. Quæ indicant possibilitatem, saltem in se, amoris naturalis.

2<sup>a</sup>. Non potest tamen diligere super omnia affectivè: Nam, ex dictis, homo non potest sine gratiâ observare præcepta legis naturalis difficiliora; porro præceptum amoris Dei super omnia est inter difficiliora, cùm includat voluntatem implendi omnia alia præcepta, omnes tentationes superandi.

3<sup>a</sup>. A fortiori effectivè: Amor enim effectivus est affectivo difficilior.

*Controvertitur* autem utrùm homo absque gratiâ actuali possit *physicè* adimplere legis naturalis præcepta difficiliora.

De hac quæstione duplex opinio. *Prima* negat. Equidem homo potuisset physicè adimplere omnia præcepta naturalia in statu naturæ puræ; sed per peccatum factus est debilior ad bonum naturale operandum, quàm fuisset in statu naturæ puræ. Undè post lapsum jam non potest physicè adimplere omnia, speciatim difficiliora legis naturalis præcepta.

*Secunda*, probabilior, affirmat, sequenti ratione nixa. Véra propositio, si homo lapsus non factus fuerit debilior ad bonum naturale quàm fuisset in statu naturæ puræ, et si aliundè homo in hoc ultimo statu potuisset physicè omnia legis naturalis præcepta implere. Atqui 1. homo non factus fuit debilior; suprà enim probavimus, ubi *de effectibus peccati originalis*, hanc opinionem esse contradictorià probabiliorē. 2. In statu naturæ puræ homo potuisset physicè absque gratiâ implere omnia legis naturalis officia. Siquidem in hoc statu, vi naturæ suæ, debuisset totam legem naturalem adimplere; ergo Deus qui impossibilia non jubet, ipsi necessariò concessisset omnia media ad observandam legem naturalem. Porro, si Deus ea necessariò concessisset, hæc media dici non possunt gratiæ, etiam ordinis naturalis, cùm gratia quælibet sit essentiâ suâ donum gratuitum.

3<sup>a</sup> Subquæst. *Utrùm absque gratiâ actuali homo possit omnes vincere tentationes?*

*Resp.* Homo potest absque gratiâ actuali leviores tentationes, non verò graves superare.

*Prob. p. p. 1<sup>a</sup>.* Potest vincere leviores: Siquidem homo nullum potest aggredi bonum opus, etiam naturale, quin statim experiatur concupiscentiam levem

resistentem. Ergo, si homo non posset leves superare tentationes absque gratiâ, absque gratiâ nullum posset facere opus bonum naturale, quod falsum est ex suprâ dictis.

2<sup>a</sup>. Non potest vincere graves tentationes : Nam 1<sup>o</sup> Ps. 17, 30 : *In te eripiar à tentatione*. I Cor. 10, 13: *Fidelis Deus qui non patietur vos tentari supra id quod potestis, sed faciet etiam cum tentatione proventum, ut possitis sustinere*. Eph. 6, 11: *Induite vos armaturam Dei, ut possitis stare adversus insidias diaboli.... in omnibus sumentes scutum fidei, in quo possitis omnia tela nequissimi ignea extinguere*. Ergo per divinum auxilium homo à tentatione eripitur; ergo quædam tentationes essent supra id quod potest homo, nisi cum illis faceret Deus proventum; ergo homo non potest stare adversus insidias diaboli; nec ejus tela ignea extinguere, nisi induatur armaturâ Dei, et sumat scutum fidei. Ergo tandem homo non potest absque gratiâ graves tentationes vincere. 2<sup>o</sup> Concil. Arausicanum, can. 9 sic definit : *Divini est muneris, cum et rectè cogitamus, et pedes nostros à falsitate et injustitiâ tenemus*.

4<sup>a</sup> Subquæst. *Utrùm absque gratiâ actuali homo possit vitare omnia peccata?*

Resp. 1<sup>o</sup> Homo potest absque gratiâ quædam peccata vitare. Potest enim sine gratiâ quædam præcepta naturalia observare.

2<sup>o</sup> Homo non potest absque gratiâ omnia peccata vitare, etiam distributivè. Non potest enim absque gratiâ graves tentationes superare.

3<sup>o</sup> Homo potest cum gratiâ ordinariâ vitare distributivè omnia peccata formalia, tum mortalia, tum venia-

lia. Alioquin, cum auxilium extraordinarium pagis concedatur, quædam peccata essent necessaria; quod falsum est.

4<sup>o</sup> Homo potest cum privilegio speciali vitare collectivè omnia peccata, tum mortalia, tum venialia. Negaret enim omnipotentiam Dei, qui in Deo non agnosceret facultatem concedendi homini gratiam huic effectui producendo sufficientem.

5<sup>o</sup> Homo non potest absque speciali privilegio vitare omnia peccata mortalia collectivè. Nam vitare omnia peccata mortalia nihil aliud est quam perseverare in gratia usque ad mortem, quod fieri non potest absque speciali privilegio, ut suprâ probavimus.

6<sup>o</sup> Homo non potest absque privilegio speciali vitare collectivè omnia peccata venialia. Nam 1<sup>o</sup> II Paralip. 6, 36: *Neque enim est homo qui non peccet.* Eccl. 7, 21: *Non est enim homo justus in terrâ, qui faciat bonum et non peccet.* Prov. 24, 16: *Septies enim cadet justus (manens justus) et resurget.* I Joan. 1, 8: *Si dixerimus quoniam peccatum non habemus, ipsi nos seducimus, et veritas in nobis non est.* 2<sup>o</sup> Conc. Trid. sess. 6, can. 23: *Si quis hominem semel justificatum dixerit... posse in totâ vitâ peccata omnia, etiam venialia, vitare, nisi ex speciali Dei privilegio..., anathema sit.*

QUEST. II<sup>a</sup>. Qualis gratia requiratur ad operandum bonum, et malum vitandum; an naturalis, an supernaturalis?

Gratia, ut suprâ diximus, est donum Dei indebitum. — Est naturalis, si ordinetur ad bonum naturale: supernaturalis, si ad bonum supernaturale et ultimò ad finem supernaturalem. Quo posito,



*Certum est* 1<sup>o</sup> gratiam supernaturalem requiri ad assentiendum fide divinâ et supernaturali veritatibus revelatis, et ad observandas omnes leges ordinis supernaturalis, ad observandas leges naturales modo supernaturali et vitanda peccata his præceptis opposita. Siquidem finis supernaturalis non potest obtineri absque auxilio ejusdem ordinis.

*Certum est* 2<sup>o</sup> gratiam naturalem in se sufficere ad observandam legem naturalem, et vitanda peccata huic legi opposita, si homo non fuisset elevatus ad statum supernaturalem. Finis enim naturalis non exigit media supernaturalia.

*Controvertitur* autem utrùm gratia naturalis sufficiat ad observandam debito modo legem naturalem, posita elevatione hominis ad statum supernaturalem.

Quidam negant. Quia, posita elevatione ad statum supernaturalem, homo debet omnes actus suos ad hunc finem dirigere, ac proindè legem etiam naturalem ex motivo supernaturali observare, quod fieri non potest absque gratiâ supernaturali.

Alii verò communiùs et probabiliùs affirmant. Equidem, inquit, si finis supernaturalis esset homini necessarius, homo semper et in omnibus actibus suis ad hunc finem tendere deberet. Cùm autem finis supernaturalis sit gratuitus, Deus potest illum assignare homini, quin exigit ut homo perpetuò ad hunc finem tendat; proindè, Deo ità permittente, actus hominis possunt esse boni, quamvis fierent ex motivo bono merè naturali. Porro id permisit Deus; alioquin dicendum foret 1. actum bonum quoad objectum et circumstantias esse malum, quia fit ex intuitu boni merè naturalis,

quod repugnat sensui hominum communi; 2. liberum hominis arbitrium post peccatum non valere nisi ad peccandum, cum per se absque gratiâ supernaturali non possit sibi proponere finem supernaturalem, quo fine deficiente, actus in opinione adversariorum malus evaderet; porro hoc est falsum.

2<sup>o</sup> De necessitate gratiæ habitualis.

*Quær. Utrum, et, in hypothesis affirmativâ, quonam sensu gratia habitualis sit necessaria?*

*Resp.* Necessaria est 1<sup>o</sup> in eo sensu quod à Deo præcipiatur. Homo enim sine gratiâ sanctificante visionem intuitivam obtinere non potest, proinde ad finem suum debitè non ordinatur.

Necessaria est 2<sup>o</sup> in eo sensu quod sit conditio necessaria meriti *de condigno*, ut infra probabitur.

Necessaria est 3<sup>o</sup> in eo sensu quod homo non possit sine eâ obtinere vitam æternam. Hoc constat ex fide et doctrinâ Ecclesiæ; docet enim Concil. Trid. sess. 6, can. 32: *Si quis dixerit justificatum... non verè mere-ri... vitam æternam, et ipsius vitæ æternæ, si tamen in gratiâ decesserit, consecutionem... anathema sit.*

Non est necessaria 1<sup>o</sup> ad actus bonos. Nam 1. alioquin omnes actus infidelium et eorum qui sunt in statu peccati mortalis essent totidem peccata, quæ propositio damnata est. 2. In multis Scripturæ locis Deus hortatur peccatores ad actus bonos, ad eleemosynam, ad orationem, etc., ergo gratia sanctificans non est necessaria ad actus bonos. 3. Concil. Trid. sess. 6, can. 7: *Si quis dixerit opera omnia quæ ante justificationem fiunt, quâcumque ratione facta sint, vere esse peccata,*

*anathema sit.*— Imò fides non est necessaria ad actus bonos. Nam 1. Rom. 2, 14 : *Gentes quæ legem non habent, naturaliter ea quæ legis sunt, faciunt.* 2. Si fides requireretur ad actus bonos, omnia infidelium opera essent peccata, et philosophorum virtutes vitia ; quæ propositio 25<sup>a</sup> Baii damnata est.

2<sup>o</sup> Non est necessaria ad actus supernaturales. Nam ex Concil. Trid. infra citando homo cum gratiâ actuali potest sese disponere ad justificationem per fidem, spem, etc. Ergo potest absque gratiâ habituali actus supernaturales facere.

## II. De Proprietatibus specialibus.

1<sup>o</sup> Gratia actualis est universalis, non verò gratia habitualis. 2<sup>o</sup> Gratia actualis est transitoria, habitualis verò gratia permanens.

I. Gratia actualis est *universalis*, non verò gratia habitualis.

1<sup>a</sup> p. Gratia actualis est universalis :

*Pr.* 1<sup>a</sup>. Deus vult salutem omnium, ergo omnibus concedit mediâ ad salutem necessaria ; porro gratia est ad salutem necessaria, ut suprà ostendimus.

*Pr.* 2<sup>a</sup>. Ex fide Ecclesiæ.

*Pr.* 3<sup>a</sup>. Vera propositio, si Deus concedat gratias sufficientes iis qui sunt membra Ecclesiæ, iis qui sunt extra Ecclesiam. Atqui 1<sup>o</sup> concedit gratias sufficientes iis qui sunt in Ecclesiâ. Concedit justis : Concil. Trid. sess. 6, can. 18 : *Si quis dixerit Dei præcepta homini etiam justificato et sub gratiâ constituto, esse ad observandum impossibilia, anathema sit.* Ergo Deus concedit justis gratiam necessariam ad observanda Dei man-

data. Concedit peccatoribus : hæc habet Concil. Lateranense : *Si quis post susceptionem baptismi, lapsus fuerit in peccatum, per veram pœnitentiam potest semper reparari.* 2<sup>o</sup> Concedit gratiam iis qui sunt extra Ecclesiam : damnata est propositio sequens : *Pagani, Judæi, hæretici, alique hujus generis nullum omninò accipiunt à Jesu Christo influxum, ideòque hinc rectè inferes in illis esse voluntatem nudam et interiorem sine omni gratiâ sufficienti.* Ergo vera est contradictoria.

2<sup>a</sup> p. Gratia habitualis non est universalis :

*Pr.* Equidem omnibus offertur, ab omnibus obtineri potest cum auxilio gratiæ actualis ; sed multi eam non possident, incompatibilis est enim cum peccato mortali, quo multi sunt infecti.

II. Gratia actualis est *transitoria*, habitualis autem gratia *permanens*.

1<sup>a</sup> p. Gratia actualis est transitoria :

*Pr.* Actualis enim gratia conceditur ad illuminandum intellectum, adjuvandam voluntatem in quibusdam circumstantiis transitoriis.

2<sup>a</sup> p. Gratia habitualis est *permanens* ; ità ut tamen possit augeri per bona opera, amitti per peccatum mortale, minui extrinsecè, non verò intrinsecè per peccatum veniale.

Est *permanens* : Hanc propositionis partem jam suprà probavimus ubi de existentiâ gratiæ habitualis. — Hæc autem *permanentia* non æquivalet *immutabilitati*. Si quidem

Potest augeri : Nam 1. Apoc. 22, 11 : *Et qui justus est justificetur adhuc, et qui sanctus est sanctificetur adhuc.* 2. Concil. Trid. sess. 6, can. 24 : *Si quis dixe-*

*rit justitiam acceptam non conservari, atque etiam augeri coram Deo per bona opera.., anath. sit.*

Potest amitti: Nam 1. homo potest amittere gratiam sanctificantem per peccatum mortale, si gratia sanctificans sit cum peccato mortali incompatibilis. Porro res ita est; cum per peccatum mortale homo aversetur à fine, constituatur in statu deordinationis absolutæ, fiat proinde necessariò inimicus Dei, qui infinitè perfectus non potest esse amicus hominis in deordinatione absolutà constituti. 2. Concil. Trid. sess. 6, can. 23: *Si quis hominem semel justificatum dixerit amplius peccare non posse, neque gratiam amittere.., anath. sit.*

Minui potest extrinsecè per peccatum veniale: Nam peccatum veniale ponit obices gratiæ sanctificantis efficaetati, f. minuendo benevolentiam Dei erga hominem; undè sequitur imminutio gratiæ actualis, quæ necessaria est ad excitandas et adjuvandas dispositiones ad bonum supernaturale infusas cum gratiâ sanctificante; 2. inclinando cor hominis ad malum, attenuando proinde inclinationem ad bonum.

Non potest minui intrinsecè, juxta opinionem communioem et probabiliorem. Si posset minui, vel per mortale, vel per veniale peccatum. Porro 1. non per mortale: istud enim non solum minuit, sed destruit gratiam sanctificantem. 2. Non per veniale: nam, si minueretur per peccatum veniale, supponi posset peccata venialia ita numero augeri, ut per ea gratia sanctificans destrueretur; porro, juxta fidem Ecclesiæ, gratia destrui non potest per venialia peccata, licèt innumera.

§ III.—De Consecrariis et effectibus.

Duo quærentur : 1<sup>o</sup> Utrum et quænam ex gratiâ sequantur effectus et consecraria, 2<sup>o</sup> quomodo sequantur ?

QUESTIO I.

Utrum et quænam ex gratiâ sequantur effectus et consecraria ?

Hic dicendum de effectibus et consecrariis 1<sup>o</sup> gratiæ actualis solius, 2<sup>o</sup> gratiæ sanctificantis solius, 3<sup>o</sup> gratiæ actualis simul et sanctificantis.

I. De Effectibus gratiæ actualis solius.

Quær. *Quænam sint...?*

*Resp. I.* In genere gratiâ intellectus illuminat intellectum.—Gratia voluntatis movet voluntatem, ut bonum velit et incipiat, et dicitur *præveniens* et *excitans* ; ut bonum perficiat, et gratia appellatur *concomitans*, *cooperans* et *adjuvans* ; ut in bono persistat, et gratia appellatur *subsequens*. Hæc insinuat Concil. Trid., sess. 6, cap. 16, ubi loquens de gratiâ actuali, ait: *quæ virtus bona opera... semper antecedit, et comitatur et subsequitur.*

Quælibet gratia appellatur *efficax*, si producat effectum ad quem tendit; secus, dicitur *sufficiens*.

II. In specie, gratia actualis adjuvat hominem ad id ut possit observare totam legem naturalem, operari actus in se supernaturales, elevare actus naturales ad dignitatem supernaturalem, elicere actus qui ad justificationem conducunt, de quibus infra.

II. De Effectibus gratiæ sanctificantis solius.

**Quær. Quoniam sint...?**

**Resp. I.** Per gratiam sanctificantem homo inseritur Christo, et fit corporis ejus vivum membrum.

**Pr. 1<sup>a</sup>.** Juxta Scripturam, Christus est *vinca*, fideles sunt *palmites*; Christus est *caput* corporis, cujus fideles sunt membra. Ergo fideles possunt et debent Christo intimè uniri; quod, juxta Ecclesiæ doctrinam, fit per gratiam sanctificantem.

**Pr. 2<sup>a</sup>.** Conc. Trid. sess. 6, cap. 7: *In ipsâ justificatione, cum remissione peccatorum, hæc omnia simul infusa accipit homo per Jesum Christum cui inseritur, fidem, spem et charitatem; nam fides, nisi ad eam spes accedat et charitas, neque unit perfectè cum Christo, neque corporis ejus vivum membrum efficit.*

II. Per gratiam sanctificantem efficitur homo divinæ consors naturæ.

**Pr. 1<sup>a</sup>.** Per gratiam sanctificantem homo inseritur Christo, fit membrum vivum Christi; ergo participat ejus vitam et naturam.

**Pr. 2<sup>a</sup>.** II Petr. 1, 14: *Per quem (Christum) maxima et pretiosa nobis promissa donavit, ut per hæc efficiamini divinæ consortes naturæ.*

III. Per gratiam sanctificantem simul infusa accipit certò fidem, spem et charitatem; probabilius alias virtutes supernaturales; probabiliter dona Spiritus Sancti.

**Prob. 1<sup>a</sup> p.** Certò fidem, spem et charitatem: Nam 1<sup>o</sup> homo per gratiam sanctificantem factus consors divinæ naturæ, ad statum supernaturalem elevatur quoad substantiam; proindè ad capacitatem habitualement ac-

tuum supernaturalium quoàd facultates elevari debet. Porro elevatur ad capacitatem cognitionis supernaturalis per fidem; ad capacitatem amoris Dei, prout est bonum hominis, per spem; ad capacitatem amoris Dei, prout est bonum absolutum, per charitatem. Ergo. 2<sup>o</sup> Nostram propositionem explicitè docet Conc. Trid. supra citatum : *In ipsà justificatione, cum remissione peccatorum...*

2<sup>a</sup> p. Probabiliùs (1) virtutes supernaturales, seu habitus inclinantes ad bonum ex supernaturali motivo agendum : Nam 1<sup>o</sup> perfectio hominis, per gratiam sanctificantem ad statum supernaturalem elevatì, exigit ut ad bonum supernaturale habitualiter inclinetur. 2<sup>o</sup> Catechismus Concilii Tridentini de gratià sanctificante hæc ait : *Huic additur nobilissimus omnium virtutum comitatus, quæ cum gratià in animam infunduntur.*

3<sup>a</sup> p. Probabiliter (2) dona Spiritùs Sancti : (Donum Spiritùs Sancti est qualitas supernaturalis, quà homo benè disponitur ad extraordinariam inspirationem divinam recipiendam et exsequendam. Septem sunt dona Spiritùs Sancti. Alia pertinent ad intellectum, alia ad voluntatem. 1. Dona ad intellectum pertinentia perficiunt vel facultatem apprehendendi, vel facultatem judicandi. Facultas apprehendendi perficitur dono *intellectùs*, ut hominis intelligentia benè capiat et penetret divina. Facultas judicandi perficitur, circa res divinas speculativas, per donum *sapientiæ*; circa

(1) Ità D. Thom. 1-2, q. 63, art. 3, et omnes Thomistæ; A. Vega, in *Trid.* l. VII; Suarez, *de Grat.* l. VI, c. 9, etc. contra paucos.

(2) Ità D. Thom. 1-2, q. 68 et Thomistæ, contra Scot. dist. 36, art. 3; Vasquez, 3 p. disp. 44, c. 2.



res humanas speculativas, per donum *scientiæ* ; circa res practicas per donum *consilii*. 2. Quoad dona ad voluntatem pertinentia , homo perficitur in iis quæ sunt ad alterum per donum *pietatis* ; in iis quæ sunt ad seipsum, per donum *fortitudinis*, ut nullâ difficultate retrahatur à prosecutione boni ; per donum *timoris*, ut illicitas delectationes respuat.) Quo posito, probabile est justum hæc dona accipere cum gratiâ sanctificante. Siquidem homo per gratiam sanctificantem vivit vitâ supernaturali ; subjicitur proindè specialiter Spiritui Sancto, à quo procedit gratia actualis necessaria ut homo possit supernaturaliter operari. Decet ergo justum esse faciliè mobilem à Spiritu Sancto , seu quod idem est, decet justum possidere dona Spiritûs Sancti.

IV. Per gratiam sanctificantem homo redditur filius Dei adoptivus.

*Pr. 1<sup>a</sup>.* Redditur filius Dei : Per gratiam sanctificantem homo inseritur Christo, fit membrum vivum Christi, qui est Filius Dei naturalis, participat ergo filiationem divinam. Redditur filius adoptivus : Siquidem gratia habitualis, per quam justus Christo unitur, est ex parte Dei donum liberum.

*Pr. 2<sup>a</sup>.* I Joan. 3, 1 : *Videte qualem charitatem dedit nobis Pater, ut filii Dei nominemur et simus.*

V. Per gratiam sanctificantem homo intrinsecè justificatur ; diverso tamen sensu , pro differentiâ gratiæ infusæ, et vario statu hominum quibus infunditur.— Undè propositio probanda et explicanda est.

Probatio. 1<sup>a</sup> p. Homo justificatur : Nam 1<sup>o</sup> per gratiam sanctificantem homo fit consors naturæ divinæ, inseritur Christo, fit membrum vivum Christi ; porro

hæc privilegia homini concessa conciliari non possunt cum injustitiâ hominis intrinsecâ. 2<sup>o</sup> I Cor. 6, 11 : *Et hæc fuistis, sed abluti estis, sed sanctificati estis... in nomine Domini nostri Jesu Christi et in Spiritu Dei nostri.* 3<sup>o</sup> Conc. Trid. sess. 6, cap. 7 : *Hanc dispositionem, seu præparationem, justificatio ipsa consequitur, quæ non est sola peccatorum remissio, sed et sanctificatio et renovatio interioris hominis per voluntariam susceptionem gratiæ et donorum.*

2<sup>a</sup> p. Justificatur intrinsecè : 1<sup>o</sup> Hæc pars propositionis jam suprâ probata est. 2<sup>o</sup> Justificatio appellatur à Concilio Tridentino *renovatio interioris hominis.*

Explicatio. *Quonam sensu homo per gratiam sanctificantem justificetur ?*

Duplex gratia potest hominibus infundi, gratia prima et gratia secunda. Gratia prima est ea quæ creaturæ intellectuali nondum justæ conceditur. Gratia secunda est ea quæ conceditur creaturæ intellectuali jam justæ.—Gratia prima concessa est Adamo ante peccatum. Conceditur homini lapsso peccato originali tantum reo, relapsis post acceptam justificationem. Quo posito,

*Resp.* 1<sup>o</sup> Gratia prima ante peccatum Adamo infusa, illum justificavit in eo sensu quod in ipso deposuerit habitus qui, excluso fomite, subiciebant Deo voluntatem in ordine tum naturali, tum supernaturali ; voluntati, partes inferiores animæ et corpus, ut diximus sub titulo *de Statu innocentiae.*

2<sup>o</sup> Gratia sanctificans, homini lapsso per baptismum aut pœnitentiam infusa, illum justificat 1. in eo sensu quod in ipso, remanente tamen fomite, deponat habitus qui inclinant voluntatem ad subjectionem erga Deum

in ordine tūm naturali, tūm supernaturali, partes inferiores animæ et corpus ad subjectionem erga voluntatem : hi enim habitus requiruntur ad justitiam et rectitudinem, ut vidimus ubi *de Statu innocentie*. 2. Illum justificat in eo sensu quod excludat peccatum tūm originale, tūm actuale mortale. Nam justitia per gratiam sanctificantem infusa non potest in eodem subjecto coexistere cum injustitiâ, seu peccato originali aut mortali : undè, juxta Concil. Trid. sess. 6, cap. 7: *Per justificationem homo ex injusto fit justus*.

Ex quibus videre est justificationem infusam homini innocenti et homini lapso unam esse quoad essentiam ; differre autem sub duplici respectu scilicet 1. quod gratia hominis innocentis excludat, gratia verò hominis lapsi non excludat fomitem, 2. quod gratia hominis innocentis non excludat peccatum, cum illud in eo *non* exstiterit, gratia verò hominis lapsi excludat peccatum.

3<sup>o</sup> Gratia secunda auget justificationem infusam per gratiam primam, seu quod idem est, reddit hominem ex justo justiore. Secus gratia secunda nullum effectum produceret.

VI. Per gratiam sanctificantem homo fit amicus Dei. Siquidem per gratiam sanctificantem redditur consors divinæ naturæ, filius Dei adoptivus, intrinsecè justus, Dei proinde amicus.

VII. Per gratiam sanctificantem jus æquirit ad vitam æternam. Ait enim Apostolus, Rom. 8, 17: *Si filii et hæredes, hæredes quidem Dei, cohæredes autem Christi*. Idem affirmat Conc. Trid. loco citato: (per gratiam sanctificantem) *fit hæres secundum spem vitæ æternæ*.

III. De Effectibus gratiæ actualis simul et sanctificantis.

Quær. *Quenam sint...?*

*Resp.* Per gratiam actualem simul et sanctificantem, homo fit, sub quibusdam conditionibus, capax *merendi* quædam bona supernaturalia.

*Premitt.* Meritum supernaturale, de quo solo hic agitur, est opus dignum mercede supernaturali.

Duplex distinguitur: 1<sup>o</sup> meritum propriè dictum, cui merces debetur ex justitiâ, et dicitur *de condigno*. Est *de condigno rigoroso*, si adsit proportio rigorosa inter actum et mercedem, secùs appellatur *de condigno simpliciter*.

2<sup>o</sup> Meritum impropriè dictum, cui merces non debetur ex justitiâ, sed ex quâdam tantùm convenientiâ; et nominatur meritum *de congruo*. Quòd si habeat promissionem adjunctam, dicitur *de congruo infallibili*. Tale est meritum contritionis perfectæ in peccatore, respectu justificationis. Quo posito,

Propositio probanda et explicanda est.

I. Probatio.

Vera propositio, si homo justus sit capax meriti supernaturalis ratione gratiæ. Atqui

1<sup>o</sup> Justus est capax meriti: Nam 1. Gen. 16, 1: *Ego protector tuus sum et merces tua, magna nimis*. Eccli. 13, 22: *Ne verearis usque ad mortem justificari, quoniam merces Dei manet in æternum*. Rom. 4, 4: *Ei autem qui operatur merces non imputatur secundum gratiam, sed secundum debitum*. I Cor. 3, 8: *Unusquisque propriam mercedem accipiet secundum suum laborem*.

**Ergo homo est capax meriti. 2. Conc. Trid. sess. 6, can. 32: *Si quis dixerit hominis justificati bona opera ita esse dona Dei, ut non sint etiam bona ipsius justificati merita... anathema sit.***

**2<sup>o</sup> Capax meriti supernaturalis: Infrà probabitur homines posse mereri quasdam gratias, vitam æternam, quæ sunt bona supernaturalia.**

**3<sup>o</sup> Ratione gratiæ: Equidem, absque gratiâ, homo potest mereri in ordine naturali; non verò in ordine supernaturali, siquidem actio merè naturalis non est proportionnata mercedi supernaturali.**

*II: Explicatio.*

**Tria quæeruntur: 1<sup>o</sup> cujus meriti homo sit capax, 2<sup>o</sup> quænam sint conditiones meriti, 3<sup>o</sup> quodnam sit objectum meriti, seu, quænam bona supernaturalia homo possit mereri?**

**Quæst. 1<sup>a</sup>. Cujus meriti homo sit capax?**

**Resp. 1<sup>o</sup> Homo non est capax meriti *de condigno rigoroso*. Nulla est enim proportio rigorosa inter actus hominis et mercedem supernaturalem.**

**2<sup>o</sup> Homo est capax meriti *de condigno simpliciter*. Nam 1. Deus, ut infrà probabimus, quibusdam actionibus promisit mercedem supernaturalem; porro ex promissione divinâ sequitur jus strictum ad mercedem promissam. 2. II Tim. 4, 8: *In reliquo reposita est mihi corona justitiæ, quam reddet mihi Dominus in illâ die justus iudex*. Hebr. 6, 10: *Non enim est injustus Deus, ut obliviscatur operis vestri*. Ergo homo est capax mercedis quam Deus homini tenetur concedere, vi justitiæ suæ; ergo. 3. Concil. Trid. sess. 6, can. 32: *Si quis***

*dixerit... justificatum bonis operibus... non verè mereri augmentum gratiæ...; porro meritum de condigno est solum verum et propriè dictum meritum.*

3<sup>o</sup> Homo est capax meriti *de congruo*. Multa enim sunt opera, quibus Deus non promisit, quibus tamen non potest decenter denegare quamdam mercedem, ut infra videbimus.

Quæst. 2<sup>a</sup>. *Quænam sint conditiones meriti?*

Duplex est meritum, *de condigno, de congruo*. Undè quæstio duplex.

Ad 1<sup>am</sup> scilicet: *Quænam sint conditiones meriti de condigno?*

*Resp.* Ad meritum de condigno, sequentes requiruntur conditiones:

Ex parte *Dei*,—requiritur promissio mercedis. Nam 1. actiones nostras, etiam supernaturales, debemus Deo titulo justitiæ. Ergo actiones nostræ nullam per se nobis merentur mercedem; ergo jus ad mercedem nobis præstare non possunt, nisi ratione promissionis divinæ. 2. Conc. Trid. sess. 6, cap. 16: *Benè operantibus usque in finem et in Deo sperantibus proponenda est vita æterna, et tanquam gratia filiis Dei per Christum, Jesum misericorditer promissa, et tanquam merces ex ipsius Dei promissione bonis ipsorum operibus et meritis fideliter reddenda.*

Ex parte *agentis*,—requiritur 1<sup>o</sup> ut sit *viator*. Nam 1. ità volente Deo, et credente ac docente Ecclesiâ, homo post mortem est incapax meriti. 2. Eccl. 9, 5: *Nec habent (mortui) ultra mercedem*. Gal. 6, 10: *Dùm tempus habemus, operemur bonum.*

Requiritur 2<sup>o</sup> ut agens sit *justus*. Nam 1. qui non

habet gratiam sanctificantem est supernaturaliter mortuus, porro repugnat à mortuo produci opera viva, seu meritoria; est in statu damnationis, porro repugnat hominem in statu damnationis mereri vitam æternam.

2. I Cor. 13, 13: *Et si distribucro in cibos pauperum omnes facultates meas, et si tradidero corpus meum ità ut ardeam, charitatem* (ac proindè gratiam sanctificantem quæ est charitas, aut charitatem semper comitatur) *autem non habucro, nihil sum.* Joan. 13, 14: *Sicut palmes non potest ferre fructum à semetipso, nisi manserit in vite, sic nec vos* (potestis ferre fructum, seu mereri), *nisi in me manseritis* (scilicet per gratiam sanctificantem).

Ex parte actûs, — requiritur 1<sup>o</sup> ut sit *liber*. Nam 1. alioquin non esset agenti imputabilis, nec proindè ipsi meritorius. 2. Damnata est propositio sequens: *Ad merendum, vel demerendum in statu naturæ lapsæ, non requiritur libertas à necessitate, sed sufficit libertas à coactione.* Ergo vera contradictoria, scilicet: requiritur libertas seu exemptio necessitatis.

Requiritur 2<sup>o</sup> ut actus sit *bonus*. Secùs, nedùm mereretur, dignus esset poenà æternà.

Requiritur 3<sup>o</sup> ut actus sit *supernaturalis*. Alioquin nulla esset proportio inter actum meritorium qui esset ordinis naturalis, et mercedem quæ esset ordinis supernaturalis.

*In quonam autem sensu debeat esse supernaturalis?*

R. Actus meritorius debet esse supernaturalis 1. *quoàd auxilium*, seu fieri debet motu gratiæ. Homo enim non potest absque gratià actus supernaturales elicere.

2. Probabilius contra quosdam theologos (1), debet esse supernaturalis *quoad motivum*. Siquidem finis est elementum præcipuum actus; actus proinde non potest dici verè et sensu stricto supernaturalis, nisi factus fuerit ex motivo supernaturali.

Probabilius tamen, necessarium non est ut actus sit supernaturalis, in eo sensu quòd elici debeat ex motivo charitatis perfectæ, ut contendunt plures theologo (2). Matth. 19, 16-17. Christus his verbis interrogatus: *Quid boni faciam, ut habeam vitam æternam?* respondit: *Si vis ad vitam ingredi, serva mandata* (in genere). I Tim. 6, 18-19: *Divitibus hujus sæculi præcipe bene agere, divites fieri in bonis operibus, faciliè tribuere, communicare, thesaurisare sibi fundamentum bonum in futurum, ut apprehendant vitam æternam*. Undè vita æterna obtineri potest per actus à charitate distinctos.

Ad 2<sup>am</sup> scilicet: *Quænam sint conditiones meriti de congruo?*

*Resp.* Ad meritum *de congruo* sequentes requiruntur conditiones: 1<sup>o</sup> Homo sit *in viâ*, 2<sup>o</sup> actus sit *liber, bonus, supernaturalis* in sensu suprâ exposito, et propter rationes allatas.

(1) Soto, *de Nat. et Grat.* c. 4, Cajetan., Valent. disp. 8, q. 6, Vasquez, 1<sup>a</sup> 2<sup>ae</sup> disp. 207.

(2) Ità Suarez, *de Grat.* p. 3, l. XII, c. 8, 9, 10; Sylvius, 1<sup>a</sup> 2<sup>ae</sup>, q. 114, art. 4. Alii econtrâ, licèt admittant, ut actus sit meritorius præmii accidentalis, non requiri hunc actum esse elicited ex motivo charitatis perfectæ, contendunt tamen eum non esse meritorium vitæ æternæ, seu præmii essentialis, sine influxu, saltem virtuali, charitatis. Ità D. Bonaventura, in 2, dist. 41, art. 1, q. 5; Bellarmin. l. V, c. 15; Billuart, *de Gratiâ* dissert. 8, art. 4, et plures alii qui hanc sententiam tribuunt D. Thomæ, 1-2, q. 114, art. 4.



Ut meritum sit *de congruo infallibili*, requiritur in-  
super promissio ex parte Dei.

Ad meritum *de congruo* non requiritur in subjecto-  
status iustitiæ.

Quæst. 3<sup>a</sup>. *Quodnam sit objectum meriti, seu quæ-  
nam bona supernaturalia homo possit mereri?*

Quæstio potest esse vel 1<sup>o</sup> de mediis, seu de gratiâ,  
vel 2<sup>o</sup> de fine, seu de vitâ æternâ.

I. Quodâ gratiam.

Q. 1<sup>a</sup>. *Utrûm homo possit mereri primam gratiam?*

R. 1<sup>o</sup> Homo non potest mereri primam gratiam ac-  
tualem, nec *de condigno* nec *de congruo*. Nam conditio  
meriti non cadit sub merito; porro gratia actualis est  
conditio utriusque meriti.

2<sup>o</sup> Homo non potest mereri *de condigno* primam  
gratiam sanctificantem. Nam 1. gratia sanctificans est  
conditio meriti *de condigno*. 2. Rom. 3, 24: *Justificati  
gratis per gratiam ipsius*. 3. Conc. Trid. sess. 6, cap. 8:  
*Gratis autem justificari ideò dicamur, quia nihil eo-  
rum quæ justificationem præcedunt, sive fides, sive  
opera, ipsam justificationis gratiam promeretur.*

3<sup>o</sup> Homo potest mereri *de congruo* etiam *infallibili*  
gratiam sanctificantem primam, scilicet, per actum  
contritionis, aut charitatis perfectæ. Siquidem, ex unâ  
parte homo cum auxilio gratiæ actualis potest elicere  
hos actus, ex alterâ parte Deus justificationem promisit  
his actibus, ut constabit sub titulo *de Contritione*.

Q. 2<sup>a</sup>. *Utrûm, obtentâ primâ gratiâ, homo possit  
mereri gratias sequentes?*

R. Quæstio est vel de gratiâ actuali, vel de gratiâ  
habituali.

Si de gratiâ actuali: — 1° Homo non potest mereri *de condigno* gratias efficaces. Si posset enim per actus suos mereri gratiam efficacem, cùm perseverantia finalis nihil aliud sit quàm series harum gratiarum usque ad mortem continuata, homo posset mereri perseverantiam finalem, quod falsum est, ut infrà probabimus.

2° Homo potest mereri *de congruo* gratias efficaces. Nam potest *de congruo* mereri perseverantiam finalem, à pari gratias efficaces.

3° Probabiliùs potest mereri *de condigno* gratias actuales sufficientes. Potest enim mereri *de condigno* vitam æternam, augmentum gratiæ sanctificantis, à fortiori gratias sufficientes.

Si de gratiâ habituali: — Homo potest mereri *de condigno* gratiam secundam. Concil. Trid. sess. 6, can. 32: *Si quis dixerit (hominem) justificatum bonis operibus quæ ab eo per Dei gratiam et Jesu Christi meritum... non verè mereri augmentum gratiæ... anathema sit.*

Q. 3<sup>a</sup>. *Utrùm homo possit mereri reparationem post lapsum?*

R. 1° Homo non potest prædictam gratiam mereri *de condigno*. Ezech. 18, 24: *Si averterit se justus à justitiâ suâ, et fecerit iniquitatem... justitiæ ejus quas fecerat non recordabuntur.* Porro, si post lapsum Deus non meminerit justitiarum quas justus antea fecerat, ergo lapsus non potest reparationem mereri per easdem justitias.

2° Homo potest mereri gratiam prædictam *de congruo*. Psal. 70, 9: *Cùm defecerit virtus mea ne derelinquas me.* Hæc oratio Davidis includit spem reparatio-

nis, quæ spes supponit probabilitatem obtinendi reparationem post lapsum.

**Q. 4<sup>a</sup>.** *Utrùm homo possit mereri perseverantiam finalem?*

**R. 1<sup>o</sup>** Homo non potest mereri *de condigno* perseverantiam finalem. Nam 1. nullibi Deus in Scripturis hanc gratiam promisit. 2. Perseverantia finalis non numeratur à Concilio Tridentino inter ea quæ homo mereri potest. 3. I Cor. 10, 12: *Qui se existimat stare, videat ne cadat.* Philip. 2, 12: *Cum metu et tremore vestram salutem operamini.* Porro, si homo posset mereri *de condigno* perseverantiam finalem, amissio salutis, seu damnatio, non tanto timore metuenda esset; homo enim unico actu mereri posset perseverantiam finalem, proindè vitam æternam.

**2<sup>o</sup>** Homo potest mereri *de congruo* perseverantiam finalem. Congruit enim ut Deus concedat homini petenti gratiam suam et perseverantiam in gratiâ.

**II.** Quoàd vitam æternam.

**Q.** *Utrùm homo possit mereri vitam æternam?*

**R.** Homo potest mereri *de condigno* vitam æternam. Deus enim eam promisit. Siquidem 1. Jacob. 1, 12: *Beatus vir qui suffert tentationem, quoniam cum probatus fuerit, accipiet coronam vitæ quam repromisit Deus diligentibus se.* 2. Concil. Trid. sess. 6, cap. 16: *Proponenda est vita æterna, et tanquàm gratia filiis Dei per Christum Jesum misericorditer promissa.*

## QÆSTIO II.

Quomodò gratia producat suos effectus?

Hæc quæstio sequentibus æquivalet: 1<sup>o</sup> utrùm homo

necessariò an liberè subeat actionem gratiæ, 2º undè appetenda sit efficacia aut simplex sufficientia gratiæ actualis, an ex gratiâ ipsâ, an ex voluntate hominis?

Ad 1<sup>m</sup> scilicet: *Utrùm homo necessariò an liberè subeat actionem gratiæ?*

*Resp.* Certum est 1º animam necessariò subire effectus gratiæ sanctificantis. Illi enim effectus sunt consecratoria necessaria gratiæ sanctificantis.

Certum est 2º intellectum necessariò illuminari per actionem gratiæ intellectûs, adjuvari ad bonum per actionem gratiæ voluntatis.

*Controvertitur* autem inter Catholicos et hæreticos utrùm voluntas humana necessariò, an liberè, sequatur in actibus suis gratiæ inspirationem.

Catholici omnes affirmant libertatem hominis agentis sub inspiratione gratiæ etiam efficaci.

Pseudoreformati verò et Jansenistæ sententiam contradictoriam amplectuntur. — Juxta Pseudoreformatos, liberum hominis arbitrium fuit extinctum per peccatum originale; undè bona opera ab homine lapsò producta nullo modo ipsius voluntati, proindè totaliter gratiæ diuinæ sunt attribuenda. — Juxta Jansenistas, voluntas humana per protoparentis peccatum prorsus amisit activam liberi arbitrii flexibilitatem, quâ pro nutu sese ferebat ad bonum aut ad malum. Liberum arbitrium amissum suppletur per duplicem delectationem, cœlestem scilicet, seu charitatem, quæ ad bonum, et terrenam, seu concupiscentiam, quæ ad malum sollicitat. Duæ illæ delectationes ita in se invicem et in ipsam voluntatem influunt, ut voluntas necessitetur ad agendum juxta superiorem. Undè omnis gratia est necessa-

riò efficax, nulla existit gratia merè sufficiens in sensu stricto. Quo posito,

Contra Pseudoreformatos et Jansenistas cum Catholicis

*Resp.* Voluntas est libera in actibus sub influxu gratiæ etiam efficacis.

*Prob. 1<sup>a</sup>.* Conscientia homini supernaturaliter agentì testatur se ità agere, ut posset ab actu abstinere; ergo homo liberè subit gratiæ influxum.

*Prob. 2<sup>a</sup>.* Josue 24, 15: *Optio vobis datur, eligitè hodiè quod placet, cui servire potissimùm debeatis.* Eccli. 31, 10: *Potuit transgredi et non est transgressus, facere mala et non fecit, ideò stabilita sunt bona illius in Domino.*

*Prob. 3<sup>a</sup>.* Concil. Trid. sess. 6, can. 4: *Si quis dixerit liberum hominis arbitrium à Deo motum et excitatum nihil cooperari assentiendo Deo excitanti atque vocanti, quo ad obtinendam justificationis gratiam se disponat ac præparet, neque posse dissentire si velit, sed veluti inanime quoddam nihil omninò agere, merèque passivè se habere, anath. sit.*

*Prob. 4<sup>a</sup>.* Ex consecrariis sententiæ adversariorum.

1<sup>o</sup> Si vera sit Pseudoreformatorum et Jansenistarum opinio de libertate; Ergo 1. jam nullum existit bonum aut malum morale; eùm hæc duo supponant libertatem. Ergo 2. inutiles sunt leges; supponunt enim voluntatem dirigendam, proindè liberam. Ergo 3. jam nullum existit meritum et demeritum; hæc enim supponunt bonum aut malum morale. Porro hæc omnia contradicunt sensui hominum communi, fidei et doctrinæ Ecclesiæ.

2<sup>o</sup> In sententiâ adversariorum, nulla datur gratia merè sufficiens, omnis gratia est efficax, omnis gratia efficax est necessitans. Quo posito, — Ergo 1. *aliqua Dei præcepta hominibus justis volentibus et conantibus secundum præsentes, quas habent, vires, sunt impossibilia; deest quoque illis gratia quâ possibilia sunt.* Si enim justii peccantes aliquam haberent gratiam quâ præcepta adimplere possent, vel efficacem, vel sufficientem. Porro non habent efficacem, alioquin non peccarent; non habent sufficientem, nulla enim verè datur gratia sufficiens in opinione adversariorum. Ergo 2. *veræ sunt propositiones sequentes: Interiori gratiæ nunquàm resistitur... Semipelagiani in hoc erant hæretici, quòd vellent eam gratiam talem esse cui posset humana voluntas resistere vel obtemperare, quia scilicet hoc asserendo Semipelagiani ultra modum augebant vires liberi arbitrii. Porro has propositiones Jansenii damnaverunt SS. Pontifices.*

Ad 2<sup>am</sup> scilicet: *Undè repetenda sit efficacitas aut simplex sufficientia gratiæ; an ex ipsâ gratiâ, an ex hominis voluntate?*

*Resp.* Tres præcipuæ existunt inter theologos sententiæ.

*Prima*, Thomistarum, affirmat efficacitatem et sufficientiam gratiæ repetendam esse ex ipsâ utriusque gratiæ naturâ; ita ut gratia efficax non possit fieri simpliciter sufficiens, et vice versâ. In hac opinione, gratia efficax dicitur præmotio vel prædeterminatio physica, eò quòd physicè, id est realiter et per se moveat, determinetque voluntatem ad omnem actum.

*Secunda* affirmat gratiæ efficacitatem aut sufficien-

tiam pendere à consensu voluntatis. Sic præsentem opinionem explicat Molina ejus inventor: Deus, vi præscientiæ suæ, videt hominem talibus gratiis consensurum, aliis non consensurum. Si concedat homini gratiam primi generis, homo consentiet et gratia est efficax; si verò concedat gratiam secundi generis, homo dissentiet, et gratia est simpliciter sufficiens.

*Tertia* inter præcedentes quasi intermedia, à Congruistis inventa, affirmat gratiæ efficacitatem repeti ex ipsius congruitate, sufficientiam verò ex congruitatis defectu. Congruitas autem gratiæ est ipsius attemperatio cum hominis, cui conceditur, naturà, indole, variisque circumstantiis. Undè 1. ex unâ parte, gratiæ efficacia aut sufficientia non est absoluta, ut volunt Thomistæ, sed relativa, seu dependens à variis hominum naturà, indole, variisque circumstantiis; 2. ex alterâ parte efficacia aut simplex sufficientia non pendet à solo consensu voluntatis, ut vult *secunda* opinio. Congruitas enim aut non congruitas, à quâ pendet efficacia aut sufficientia, dcsumitur à circumstantiis, quæ sunt à voluntate independentes.

*Quarta* existit sententia, scilicet Augustinianorum. Augustiniani, sic appellati ex S. Augustino quem ducem sequi gloriantur, in eo cum Jansenio consentiunt, quòd omnem gratiam reponant in cœlesti delectatione superiori et victrici si habeat effectum, inferiori autem si careat effectu. In his verò à Jansenio differunt 1. quòd dicant cœlestem delectationem non esse semper charitatem; 2. quòd velint sub illà delectatione, si sit superior, veram esse peccandi potentiam, sub eà autem, si sit inferior, nullam esse peccandi necessitatem.

Hæc opinio à præcedentibus essentialiter non differt. Siquidem superioritas et inferioritas delectationis pendet vel ab ipsius naturâ, vel à voluntate, vel à circumstantiis. Si primum, ipsum est systema Thomistarum; si secundum, ipsum est systema Molinistarum; si tertium, ipsum est systema Congruistarum.

Nobis sufficiat has opiniones exposuisse, alii doctiores pronuntient.

## II.

### DE INFLUXU GRATIÆ QUOAD MODUM CONSIDERATO.

Quæritur *quomodo Christus influat gratiam*, id est:  
1<sup>o</sup> Utrum exigit dispositiones et conditiones prævias in subjecto; et, in hypothesi affirmativâ, quasnam exigit;  
2<sup>o</sup> Utrum gratias influat immediate, an mediatè per causas secundas; et, in posteriori hypothesi, per quas causas?

#### QUÆSTIO I<sup>a</sup>.

Utrum Christus exigit dispositiones et conditions prævias in subjecto et quasnam exigit?

RESP. Vel agitur de gratiâ actuali, vel de gratiâ habituali.

#### I. Si de gratiâ actuali:

Aliquandò Christus nullas exigit dispositiones. Sic quidam homines, in habitu imò et in actu peccati existentes, nullâ præviâ oratione, proindè absque dispositionibus, supernaturaliter illuminantur et excitantur.

Aliquandò Christus prævias conditiones exigit, specialiter orationem. Nam 1. Jacob. 4, 2: *Non habetis propter quod non postulatis*; ergo ad concedendam



gratiam, sæpè saltem Deus orationem exigit. 2. Concil. Trid. sess. 6, cap. 14 : *Deus impossibilia non jubet, sed jubendo monet et facere quod possis, et petere quod non possis, et adjuvat ut possis.*

*II. Si de gratiâ habituali:*

Vel agitur de hominibus qui usum rationis nunquam habuerunt, vel de aliis.

I. Si agatur de hominibus qui usum rationis nunquam habuerunt :

Nulla requiritur dispositio, cum isti homines sint dispositionum incapaces. Una verò requiritur conditio, scilicet receptio Baptismi; ut infra probabitur sub titulo *de Baptismo*.

II. Si agatur de hominibus qui usum rationis habent vel habuerunt :

Requiruntur dispositiones variæ, prout gratia concedenda est prima aut secunda.

Si gratia concedenda sit gratia *prima*:

Ex omnium consensu, requiritur fides. Disputant autem inter se Pseudoreformati et Catholici 1. de naturâ, 2. de sufficientiâ fidei requisitæ:

Juxta Pseudoreformatos, 1. fides ad justificationem requisita est actus quo homo credit certò et absque ullâ hæsitatione peccata sibi per Christum esse remissa; 2. nullæ, præter fidem sic definitam, requiruntur dispositiones et conditiones ad justificationem.

Juxta Catholicos, 1. fides ad justificationem requisita est adhæsió firma veritatibus à Deo revelatis et per Ecclesiam propositis; 2. præter fidem aliæ requiruntur ad justificationem dispositiones et conditiones.

Ergo Catholici dogmatis expositiæ quatuor requirit propositiones.

1<sup>a</sup> Ppo.—Fides ad justificationem requiritur.

*Prob. 1<sup>a</sup>. Heb. 11, 6: Sine fide impossibile est placere Deo, proinde obtinere justificationem per quam homo fit amicus Dei; credere enim oportet accedentem ad Deum quia est, et inquirentibus se remunerator sit.*

*Prob. 2<sup>a</sup>. Ex Concil. Trid. sess. 6, cap. 7: Sine fide nulli unquam contigit justificatio.*

2<sup>a</sup> Ppo.—Fides ad justificationem requisita intelligi non debet in sensu Pseudoreformatorum, sed in sensu catholico.

*Prob. 1<sup>a</sup> p. Fides justificans intelligi non debet in sensu Pseudoreformatorum :-*

Nam 1<sup>o</sup> Deus non potest ad justificationem exigere conditionem impossibilem. Ergo fides ad justificationem requisita non debet intelligi in sensu Pseudoreformatorum, si hæc fides sit impossibilis. Porro rem ita esse probatur 1. Scripturâ, Prov. 20, 9: *Quis dicere potest: mundum est cor meum, purus sum à peccato. Eccle. 9, 1: Nescit homo utrùm amore an odio dignus sit.* 2. Concilio Trid. sess. 6, cap. 9: *Quilibet dum seipsum, suamque propriam infirmitatem et indispositionem respicit, de suâ gratiâ formidare et timere potest, cum nullus scire valeat certitudine fidei, cui non potest subesse falsum, se gratiam Dei esse consecutum.* Unde sic: si homo certò et absque hæsitatione credere posset peccata sibi esse remissa, eo ipso posset credere cor suum esse mundum à peccato, dignum amore, se gratiam Dei accepisse. Porro hæc omnia credere non potest, cum dubia sint ex textibus citatis.

2<sup>o</sup> Concil. Trid. sess. 6, can. 12: *Si quis dixerit fidem justificantem nihil aliud esse quàm fiduciam divi-*

*æ misericordiæ peccata remittentis propter Christum, anathema sit.*

2<sup>a</sup> p. Fides justificans intelligi debet in sensu catholico:

Nam 1<sup>o</sup> Marc. 16, 16: *Prædicate Evangelium omni creaturæ... qui crediderit, salvus erit.* Hebr. 11, 6: *Sine fide impossibile est placere Deo, credere enim oportet accedentem ad Deum quia est, et inquirentibus se remunerator sit.* Hebr. 11, 1: *Fides est sperandarum substantia rerum, argumentum non apparentium.* Ergo ad salutem requiritur ut homo credat Evangelium, veritates non apparentes, seu revelatas, specialiter Deum remuneratorem. Porro in his sita est fides catholica.

2<sup>o</sup> Juxta Concilium Tridentinum, fides sensu catholico intellecta est prima conditio ad justificationem requisita, ut constabit ex infra dicendis.

3<sup>a</sup> Ppo.—Sola fides, etiam in sensu catholico intellecta, non justificat; sed aliæ requiruntur dispositiones insuper et conditiones.

*Prob. 1<sup>a</sup>.* Jacob. 2, 24: *Ex operibus justificatur homo, non ex fide tantum.* II Cor. 13, 2: *Si habuero omnem fidem, ita ut montes transferam, charitatem autem non habuero, nihil sum.*

*Prob. 2<sup>a</sup>.* Concil. Trid. sess. 6, cap. 8, can. 9: *Si quis dixerit solâ fide impium justificari, ita ut intelligat nihil aliud requiri, quod ad justificationis gratiam consequendam cooperetur, et nullâ ex parte necesse esse eum suæ voluntatis motu præparari, atque disponi, anathema sit.*

Dispositiones autem ad justificationem requisitæ his

verbis exponuntur à Concil. Trid. sess. 6, cap. 6: *Disponuntur autem ad ipsam justitiam, dum excitati divinâ gratiâ, et adjuti, fidem ex auditu concipientes, libere moventur in Deum, credentes vera esse quæ divinitus revelata et promissa sunt; atque illud imprimis, à Deo justificari impium per gratiam ejus, per redemptionem, quæ est in Christo Jesu; et dum peccatores se esse intelligentes, à divinæ justitiæ timore, quo utiliter concutiuntur, ad considerandam Dei misericordiam se convertendo, in spem eriguntur, fidentes Deum sibi propter Christum propitium fore; illumque, tanquam omnis justitiæ fontem diligere incipiunt: ac propterea moventur adversus peccata per odium aliquod et detestationem, hoc est, per eam pœnitentiam quam ante Baptismum agi oportet: denique dum proponunt suscipere Baptismum, inchoare novam vitam, et servare divina mandata.*

Insuper in lege novâ requiruntur conditiones sequentes: receptio realis, aut votum receptionis Baptismi vel Pœnitentiæ, ut constabit ex dicendis sub titulo *de Sacramentis*.

Si gratia concedenda sit *gratia secunda*:

Requiritur, juxta legem communem, ut subjectum recipiat cum dispositionibus debitis sacramentum vivorum, aut exerceat opus vestitum omnibus conditionibus requisitis ad meritum: ita volente Christo, qui has conditiones instituit ad communicandam gratiam, ut constat ex dictis *de Merito* et dicendis *de Sacramentis*; et hæc sola media instituit, nullum enim aliud assignari potest.

QUÆSTIO II.

Utrum Christus influat gratiam immediatè, an mediatè per causas secundas; et in hypothesis affirmativâ per quas causas?

RESP. 1<sup>o</sup> *Immediatè*, seu absque causâ intermediâ, Christus aliquandò influit gratiam actualem et habitua-lem. — Actualem: sic Christus sæpè supernaturaliter illuminat et movet hominem immediatè et absque causâ secundâ ad hunc finem institutâ. — Habitua-lem: sic, positis dispositionibus requisitis, votum Baptismi aut sacramenti Pœnitentiæ supplet his sacramentis. Porro, in his casibus, Deus concedit immediatè gratiam sanctificantem primam; item concedit immediatè gratiam secundam, cum sequitur ex merito hominis.

2<sup>o</sup> Aliquandò Christus influit *mediatè*, seu per causas secundas. Res ita est, si 1. Deus instituerit Sacramenta et Sacrificium; si 2. Sacramenta et Sacrificium sint causæ gratiam conferentes. Atqui hæc duo certa sunt; quod constabit ex dicendis sub titulis sequentibus.

# DE SACRAMENTIS.

---

Catholici verbis sequentibus aut æquivalentibus definiunt sacramentum : *signum gratiæ sensibile, arbitrium, symbolicum, practicum, à Deo institutum permanenter.*

*Signum gratiæ* : signum autem est res quæ primò cognita ducit ad cognitionem alterius ; sic administratio sacramenti Catholicis indicat gratiam quam producit. *Sensibile* : quod sensibus percipi potest. *Arbitrium* : id est, quod rem significat ex institutione positiva. *Symbolicum* : id est, quamdam habens analogiam cum effectu supernaturali producto ; sic in Baptismate, externa ablutio quamdam gerit similitudinem cum purificatione internâ. *Practicum* : id est, producens gratiam quam significat. *A Deo institutum* : Deus enim solus potest signo sensibili immediatè aut mediatè adjungere vim producendi gratiam. *Permanentèr* : id est, duraturum quamdiù religio cujus est pars.

Veritas definitionis catholicæ ex infrâ dicendis constabit. Probabimus enim sacramenta quælibet vestiri conditionibus in definitione enuntiatis.

Cum in sacramentis quædam sint communia, quædam verò specialia, sub hoc titulo dicendum 1. de sacramentis *in genere*, 2. de sacramentis *in specie*.

---

## DE SACRAMENTIS

### IN GENERE.

---

Circa quodlibet sacramentum, quædam sunt *credenda*; quædam sunt *agenda* vi legis divinæ, aut vi legis ecclesiasticæ. Unde pars triplex : *dogmatica*, *moralis*, *disciplinaria*.

Ex his partibus prima pertinet ad theologiam dogmaticam, secunda ad theologiam moralem, tertia ad jus canonicum. Ergo prima solum sub titulo præsentis tractanda videretur. Cum autem pars moralis sit corollarium partis dogmaticæ, et pars disciplinaria sit determinatio legislativa partis moralis, difficilius explicari et intelligi possent, si à se invicem separarentur ; ideo eas in ordine præcedenti exponemus.

---

#### I.

#### PARS DOGMATICA.

Hæc est summa dogmatis : Deus instituit quasdam conditiones ; quarum debita unione producitur gratia. Tria proinde sunt explicanda, 1º institutio, 2º conditiones, 3º effectus sacramentorum.

##### I. — DE INSTITUTIONE.

Duo quærentur : 1º utrum Deus instituerit ; et, in hypothesi affirmativa, quænam sacramenta instituerit ; 2º quomodo ea instituerit ?

QUESTIO I.

*Utrum et quot sacramenta Deus instituerit?*

Religio, quamvis substantialiter una, quatuor subiit modificationes quoad accidentia. Unde quatuor ipsius status: 1<sup>o</sup> status *innocentiæ*, seu status religionis homini innocenti impositæ; 2<sup>o</sup> status *legis naturæ*, seu status religionis post peccatum et ante legem mosaicam præscriptæ (appellatur *status legis naturæ*, quia religio non excludebat quidem, sed pauca continebat præcepta positiva: unde homines regebantur præcipue lege naturali per revelationem promulgatâ); 3<sup>o</sup> status *legis mosaicæ*, seu status religionis per legem mosaicam modificatæ; 4<sup>o</sup> status *legis christianæ*, seu status religionis ad perfectionem suam terrenam per Christum adductæ. Unde quæstio proposita quatuor æquivalet.

I. Ad quæstionem de *Statu Innocentiæ* intellectam.

*Resp.* Nulla probatione certâ affirmari aut negari potest institutio sacramentorum in statu innocentie.

*Prob. 1<sup>a</sup> p.* Nulla probatione certâ affirmari potest... Si probari posset institutio sacramentorum in statu innocentie, vel ratione, vel auctoritate. Atqui 1<sup>o</sup> non ratione: Siquidem sacramenta non sunt necessaria, cum Deus possit per se et independenter à sacramentis gratiam hominibus communicare. Ergo eorum institutio à voluntate libera Dei pendet; porro voluntas libera Dei probari non potest per rationem, sed tantum per auctoritatem. 2<sup>o</sup> Non auctoritate: Nam de sacramentis status innocentie silent Scriptura, Traditio, Ecclesia.

2<sup>a</sup> p. Nulla probatione negari potest... 1<sup>o</sup> Non ratione: Nam institutio sacramentorum non magis repugnat in



statu innocentiae, quàm in quolibet alio statu; cùm Deus omnipotens, gratiae dominus, possit ad arbitrium eam communicare, vel immediatè, vel mediatè per causas secundarias. Porro, si Deus potuerit instituere sacramenta in statu innocentiae, ratione probari non potest ea non fuisse instituta. 2º Non auctoritate: De non existentia sacramentorum in statu innocentiae silent Scriptura, Traditio et Ecclesia.

II. Ad quaestionem de *Statu Naturae* intellectam.

*Resp.* Nulla probatione certà affirmari aut negari potest institutio sacramentorum in statu legis naturae. Probabilius est autem unum saltem sacramentum à Deo institutum fuisse ad remissionem peccati originalis in infantibus.

*Prob. 1ª p.* Nulla probatione certà affirmari aut negari potest institutio: ob rationes in propositione praecedenti expositas.

2ª p. Probabilius est autem unum saltem à Deo institutum fuisse... Vera propositio, si 1º certum sit in statu naturae exstitisse remedium contra peccatum originale; si 2º probabile sit hoc remedium fuisse sacramentum. Atqui

1º Certum est exstitisse remedium contra peccatum originale: Nam certum est Deum, etiam posito peccato originali, velle verè et sincerè salutem hominum. Porro verè et sincerè non vellet salutem hominum, si remedium contra peccatum originale non instituisset in omnibus religionis statibus.

2º Probabile est hoc remedium fuisse sacramentum. Id affirmat S. Augustinus, lib. 3 contr. Jul. cap. 11: *Nec ideò credendum est ante circumcisionem famulos*

*Dei, quandoquidem eis inerat mediatoris fides in carne venturi, nullo sacramento opitulatos fuisse parvulis suis; quameis quid illud esset, aliquā necessariā causā Scriptura Sacra latere voluerit (1).*

*Explic. Quodnam autem fuerit istud sacramentum?*

**R.** Probabile est illud situm fuisse in fide exterius manifestatā, quā parentes in mediatorem venturum credebant.

**Pr.** Situm erat in fide, quā parentes in mediatorem venturum credebant: Act. 4, 12: *Nec enim aliud nomen est sub cælo datum hominibus in quo oporteat nos salvos fieri.* Exterius manifestatā: Alioquin hoc remedium non fuisset sacramentum.

Dicimus: probabile est *unum saltem* sacramentum institutum fuisse. Aliorum enim sacramentorum existentia ne probabiliter quidem affirmari potest ratione et auctoritate.

**III.** Ad quæstionem de *Statu Legis Mosæicæ* intellectam.

**Resp.** Deus in lege mosaïcā instituit sacramenta, quorum numerus, aliundē ignotus, revocari potest ad quatuor classes præcipua legis novæ sacramenta adumbrantes.

**Prob. 1<sup>a</sup> p.** Deus in lege mosaïcā instituit sacramenta:

**Pr. 1<sup>a</sup>.** Deus in lege mosaïcā plures instituit cære-

(1) Itā communiter theologi: D. Thom. 3 p. q. 70, art. 4 ad 2, et alibi; Scot. in 4, dist. 1, q. 6 et 7; Cano, *de Sacram. in gen.* p. 3; Suarez, *Comment. in D. Th.* q. 60, art. 3; Tournely, *de Sacram. in communi*, q. 2. art. 2; Drouin, *de Sacr. in gen.* q. 2, c. 2; etc.

monias omnibus sacramentorum conditionibus vestitas. Sic v. g. ablutiones legales erant signa sensibilia, symbolica, practica sanctitatis legalis quam producebant ex opere operato, seu vi propria, et sanctitatis internæ quam producebant ex opere operantis, seu vi dispositionum subjecti; à Deo instituta permanenter, seu quamdiù duratura erat lex mosaïca.

*Pr. 2<sup>a</sup>. Concil. Trid. sess. 7, can. 2: Si quis dixerit... novæ legis sacramenta à sacramentis antiquæ legis non differre, nisi quia cæremoniæ sunt aliæ et alii ritus externi, anathema sit.* Iste canon evidenter supponit existentiam sacramentorum in veteri lege.

2<sup>a</sup> p. Quorum numerus, aliundè ignotus, ad quatuor classes revocari potest :

Sub *primâ* classe comprehenditur Circumcisio, respondens Baptismo ; quia 1. per circumcisionem masculi populo israhëlitico aggregabantur, sicut per Baptismum omnes aggregantur populo christiano ; 2. juxta quosdam, quia debebat peccatum originale.

Quæ analogia negatur ab aliis et probabilius neganda videtur. Nam 1. masculi soli circumcidebantur ; Ergo, in hypothesi adversariorum, cum Deus velit salutem omnium, aliud exstitisset medium ad delendum peccatum originale in fœminis : quæ duplicitas videtur sapientiæ Dei opposita. 2. Præcipiebatur circumcisio octavo tantum post nativitatem die. Ergo, si circumcisio fuerit remedium peccati originalis, Deus sufficienter non providisset in veteri lege saluti omnium, cum multi infantes moriantur ante octavum diem post nativitatem. 3. Testante Scripturâ, Judæi quamdiù morati sunt in deserto, à circumcisione abstinuerunt, Moyse sciente et

non improbane; quod admitti non potest, si circumcisio fuerit remedium peccati originalis.

Sub *secundâ* classe comprehenditur immolatio et manducatio Agni Paschalis, respondens Eucharistiæ.

Sub *tertiâ*, Expiationes, Purificationes legales, sacramentum Pœnitentiæ adumbrantes.

Sub *quartâ*, sacerdotum Consecratio, quæ sacramentum Ordinis figurabat.

IV. Ad quæst. de *Statu Legis Novæ* intellectam.

*Resp.* De existentia Sacramentorum consentiunt omnes Christiani. De eorum numero disputant Pseudoreformati cum Catholicis.

Lutherus tria admisit sacramenta, Baptismum, Pœnitentiam et Eucharistiam. Demùm, rescissâ Pœnitentiâ, duo tantùm confessus est, Baptismum et Panem.— Calvinus duo tantùm primùm admisit, Baptismum et Cœnam, quibus addidit postea manuum Impositionem.

Juxta verò Catholicos, septem, nec plura instituta sunt sacramenta, nimirum Baptismus, Confirmatio, Eucharistia, Pœnitentia, Extrema-Unctio, Ordo et Matrimonium.

Quod dogma sequentibus rationibus probatur.

*Prob.* 1<sup>a</sup>. Vera propositio, si 1<sup>o</sup> septem cæremoniæ superiùs indicatæ vestiantur omnibus conditionibus ad constituendum sacramentum requisitis; si 2<sup>o</sup> quælibet seorsim sumpta unicum saltem genericè constituat sacramentum; si 3<sup>o</sup> nulla cæremonia præter indicatas habeat sacramenti conditiones. Atqui,

1<sup>o</sup> Septem cæremoniæ in propositione nostrâ indicatæ vestiuntur conditionibus ad constituendum sacra-

mentum requisitis : Hoc constabit ex dicendis sub titulis *de Sacramentis in specie*.

2<sup>o</sup> Quælibet ex prædictis cæremoniis seorsim sumpta unicum saltem genericè constituit sacramentum : Si quod de præsentī propositione subesse posset dubium, maxime de Baptismo, qui triplex distinguitur, fluminis, flaminis, sanguinis ; de Eucharistiā, quæ duplex sacramentum continet, unum sub specie panis, alterum sub specie vini ; de Extremā-Uctione, quæ administratur per plures unctiones, quibus singulis adjungitur forma specialis ; de Ordine, qui plura complectitur sacramenta, v. g. Diaconatum, Presbyteratum, Episcopatum. Porro ex citatis nihil concludi potest contra propositionem nostram.

Ex Baptismo : Unum est enim sacramentum baptismi, scilicet baptismus fluminis. Siquidem baptismus flaminis seu desiderii, nihil aliud est quàm votum baptismi ; quod, ità volente Deo, potest supplere baptismum, positus ponendis, sed nullo modo est sacramentum. Idem dicendum de baptismo sanguinis. Martyri quidem remittuntur peccata, sed non inde sequitur martyrium esse sacramentum ; alioquin dicendum foret Deum martyrium instituisse, crimini atrocissimo vim contulisse producendi gratiam, quod absurdum est.

Ex Eucharistiā : Siquidem rerum differentia specialis desumitur ex discrimine essentiali inter earum partes. Porro nullum est discrimen essenziale inter partes Eucharistiæ, sive sit sub specie panis, sive sub specie vini. In utroque enim casu continetur Christus totus eosdem producens effectus. Signum quidem sacramentale differt, sed accidentaliter tantum ; cum duo signa

etiam separata designent sufficienter alimoniam spirituales quæ una est, nec constituitur sicut alimonia corporalis cibo et pota.

Ex Extremâ-Uctione : 1. Ex multiplici ritu adhibito in administratione extremæ-unctionis ad summum concludi posset materiam et formam totalem et completam constitui ex collectione unctionum et formularum, non verò multiplex esse sacramentum extremæ-unctionis. 2. Multiplicitas unctionum et formularum non requiritur jure divino, sed jure ecclesiastico, ut constabit ex dicendis sub titulo *de Extremâ-Uctione*. Ergo unica unctio et forma propriè constituit sacramentum, proindè unicum est sacramentum.

Ex Ordine : Cùm affirmamus ordinem unicum constituere sacramentum, id intelligimus de unitate genericâ, non verò de unitate specificâ. Porro reverà existunt plures ordines qui sunt sacramenta specie distincta, v. g. differt Diaconatus à Presbyteratu, etc. Sed hæc sacramenta specie distincta ad unum reducuntur genus per proprietatem essentialem omnibus communem conferendi potestatem et gratiam ad exercendas functiones ecclesiasticas.

3<sup>o</sup> Nulla cæremonia præter indicatas in propositione habet conditiones ad sacramentum requisitas. Si quæ enim haberet, maximè lotio pedum. Id concludendum apparet ex narratione sequenti Joan. 13, 4 et seq. : *Cùm accepisset (Jesus) linteam præcinxit se, deindè mittit aquam in pelvim et cæpit lavare pedes discipulorum... Vos debetis alter alterius lavare pedes; exemplum enim dedi vobis, ut quemadmodum ego feci vobis, ita et vos faciatis*. Deindè alloquens Petrum ait : *Si non laverò te,*

*non habebis partem mecum.* Ex quo apparet lotionem pedum esse signum symbolicum, arbitrarium, practicum gratiæ, indicat enim et producit lotionem spiritua-lem, sine quâ homo non potest habere partem cum Jesu ; esse à Christo institutum, ut constat ex textu ; institutum permanenter, nullus enim assignatur institutioni terminus. Porro nihilominus lotio pedum *non* habet conditiones veri sacramenti, ita testante Ecclesia, quæ sola potest legitimè interpretari Scripturam sacram. Rejicit enim ex numero sacramentorum lotionem pedum, sive quia lotio pedum non est productiva gratiæ per se, seu ex opere operato, sive quia illa cæremonia non fuit à Christo præcepta modo perpetuo.

*Prob. 2<sup>a</sup>. Argum. præscriptionis.* Tempore Lutheri et Calvini, dogma catholicum de septenario sacramentorum numero admittebatur ab Ecclesiâ Occidentali et Orientali. A tempore Lutheri ad Christum istud dogma nec fuit inventum, nec adulteratum. Ergò fuit à Christo revelatum, ergo admittendum est ut veritas divina.

*Pr. anteced. p. p. 1<sup>a</sup>.* Tempore Lutheri et Calvini, dogma de septenario sacramentorum numero admittebatur ab Ecclesiâ Occidentali et Orientali. — Ab Occidentali : Fatentur adversarii. — Ab Orientali : Constat 1. ex censurâ quâ Jeremias Patriarcha Constantinopolitanus, approbante totâ Ecclesiâ Orientali, anno 1578, confessionem Augustanam improbavit et in quâ declaravit : *Sicut sunt septem dona Spiritûs Sancti, ita septem esse sacramenta qualia ab orthodoxis admittuntur.* 2. Ex Concilio Constantinopolitano, anno 1639, quod contra Cyrillum Lucar errores Pseudoreformatorum admittentem declarat *anathema Cyrillo nova dogmata*

*fabricanti, et credenti non esse ex institutione Jesu Christi, neque ex Apostolorum traditione praxique perpetuâ septem Ecclesiæ sacramenta, Baptismum scilicet, Confirmationem, etc.*

2<sup>a</sup> p. A tempore Lutheri ad Christum illud dogma nec inventum, nec adulteratum fuit.

1<sup>o</sup> Temeraria, ac proindè rejicienda est adversariorum assertio. Temeraria est, cùm nec nomen, nec patria inventoris, nec epocha, nec modus, nec ulla circumstantia inventionis, nec ulla ejus probatio assignari possit.

2<sup>o</sup> Impossibilis est inventio aut adulteratio. Si dogma de septenario sacramentorum numero inventum aut adulteratum fuisset, vel à Christianis, vel ab Apostolis. Atqui,

Non à Christianis: Constat enim tùm fideles, tùm pastores, omnis novitatis fuisse impatientes; Græcos à primis Ecclesiæ sæculis Latinis fuisse repugnantes; hæreticos à temporibus apostolicis exstitisse, et fuisse Catholicis et sibi invicem infensissimos. Quo posito, 1. Vel fideles innovassent, vel pastores. Si prius, reclamassent pastores; si posterius, fideles. 2. Vel innovassent Græci, vel Latini. Si prius, reclamassent Latini; si posterius, Græci. 3. Vel innovassent Catholici, vel hæretici. Si prius, reclamassent omnium sectarum hæretici; si posterius, reclamassent Catholici et omnes alii hæretici circa præsens dogma non errantes. Innovatio proindè innumeras suscitasset reclamationes quæ erroris propagationi obstitissent. Porro tamen admittitur dogma et de his reclamationibus tacet historia ecclesiastica.



Non ab Apostolis : Nam, si de præsentī dogmate decipere potuissent Apostoli, à pari de aliis dogmatibus ; si de omnibus dogmatibus decipere potuerunt, jam corruit religio christiana per Apostolos transmissa.

*Pr. conseq.* Ergo 1<sup>o</sup> dogma de septenario sacramentorum numero fuit à Christo revelatum : nulla enim alia origo ipsi potest assignari, ut ex dictis probatur.

Ergo 2<sup>o</sup> admittendum est ut veritas divina : hoc evidens est.

*Prob. 3<sup>a</sup>. Decision. Ecclesiam.* Ex Concil. Trid. sess. 7, can. 1 : *Si quis dixerit sacramenta novæ legis non fuisse omnia à J. C. D. N. instituta, aut esse plura vel pauciora quàm septem, scilicet Baptismum, etc... aut etiam aliquod horum septem non esse verè et propriè sacramentum, anathema sit.*

## QUÆSTIO II.

*Quomodo Deus instituerit sacramenta ; an immediatè, seu per se, an mediatè, seu per alium ?*

**RESP. I.** Si agatur de sacramentis *ante Christum*, à Deo instituta sunt immediatè. Nullibi enim legitur in Scripturà Deum sacramenta instituisse per intermedium, econtrà per se præcepit Abrahamo circumcisionem, Moysi promulgationem sacramentorum veteris legis.

**II.** Si agatur de sacramentis *Novæ Legis*, quæstio posita sequentibus æquivalet : 1<sup>o</sup> utrùm Trinitas per se an per alium instituerit sacramenta ; 2<sup>o</sup> utrùm Christus per se, an per Apostolos et Ecclesiam ea instituerit ; 3<sup>o</sup> utrùm Christus instituerit in specie materiam et

formam sacramentorum, an eorum institutionem Apostolis aut Ecclesiæ commiserit?

Quæst. 1<sup>a</sup>. *Utrum Trinitas per se an per alium instituerit sacramenta?*

*Resp.* Trinitas sacramenta novæ legis instituit non per se, sed per Christum, in quantum est Homo-Deus.

*Prob.* 1<sup>a</sup> p. Instituit per Christum : Docet enim Concil. Trid. sess. 7, can. 1: *Si quis dixerit sacramenta novæ legis non fuisse omnia à Christo instituta, anathema sit.*

2<sup>a</sup> p. In quantum est Homo-Deus : Nam institutio sacramentorum est actus mediationis, cum gratia per quam homo reconciliatur et unitur Deo conferatur homini per sacramenta. Ergo eorum institutio attribuenda est mediatori; porro mediator Dei et hominum est Jesus Christus, quatenus Homo-Deus.

Quæst. 2<sup>a</sup>. *Utrum Christus per se, an per Apostolos et Ecclesiam instituerit sacramenta?*

*Resp.* Ante Concilium Tridentinum quidam theologi (1) affirmârunt sacramenta Confirmationis, Extremæ-Uctionis per Apostolos aut Ecclesiam instituta fuisse, vi auctoritatis sibi à Christo concessæ. Undè, juxta hanc opinionem, instituta sunt immediatè ab Apostolis aut Ecclesiâ, et mediatè à Christo.

Post Concilium Tridentinum generaliter admittitur omnia sacramenta novæ legis esse immediatè à Christo instituta (2). Quod sic probatur.

(1) Ità Hugo à S. Victore, Magister sententiarum, et quidam alii.

(2) Et docet Suarez, *Comment. in D. Thom. q. 64, art. 4*, hanc propositionem esse omninò certam.

*Prob. 1<sup>a</sup>.* Ex Concilio Tridentino suprà citato Christus propriè et sine addito dicitur sacramentorum institutor; ergo reipsà sacramenta immediatè instituit, si auctor sacramentorum mediatas non possit dici propriè et sine addito illorum institutor. Porro res ità est. Sic Christus non potest dici propriè et sine addito auctor legum ecclesiasticarum, quamvis Ecclesiæ concesserit auctoritatem necessariam ad eas ferendas.

*Prob. 2<sup>a</sup>.* Si Apostoli quædam sacramenta instituisent, maximè, ut volunt adversarii, Confirmationem et Extremam-Uctionem. Porro falsa propositio quoad Extremam-Uctionem, quam Concilium Tridentinum, sess. 14, cap. 1, affirmat à Christo institutam et à B. Jacobo promulgatam.

Propositio nostra non est tamen de fide. Siquidem Concilium Tridentinum affirmat tantùm sacramenta novæ legis à D. N. J. C. fuisse instituta, non-erò immediatè.

Christus potuisset instituere omnia sacramenta immediatè, declarando v. g. suæ voluntatis esse ut existat sacramentum Baptismi, Confirmationis, etc., ut quodlibet sacramentum duabus partibus constituatur, materià scilicet et formà, quin designaverit in specie materiam et formam cujuslibet sacramenti. Undè,

*Quæst. 3<sup>a</sup>. Utrum Christus instituerit in specie materiam et formam sacramentorum, an earum institutionem Apostolis aut Ecclesiæ commiserit?*

*Resp.* Certum est Christum determinasse in specie materiam et formam Baptismi et Eucharistiæ. Verba enim quibus narratur horum sacramentorum institutio sunt clara, et explicitè designant utriusque materiam et formam.

Controvertitur autem utrum determinaverit in specie materiam et formam aliorum sacramentorum.

Quidam negant, affirmantque Ecclesiam determinasse materiam et formam. Sequenti ratione nituntur. In perficiendis sacramentis, Ecclesia usurpat tanquam essentialia nonnulla de quibus tacet Scriptura, quorum usus in Ecclesiis Græcâ et Latinâ varius est, imò nec constans fuit nec uniformis in ipsâ quidem Latinâ. Sic Scriptura tacet de porrectione instrumentorum in ordinatione; hæc cæremonia omittitur apud Græcos, invaluit apud Latinos à decimo et forsàn à duodecimo sæculo tantum. Quæ omnia facile explicantur, si Christus concesserit Ecclesiæ potestatem determinandi materiam et formam sacramentorum. Non possunt autem explicari in hypothesi contrariâ. Siquidem ritus prædicti, cum supponantur essentialia, deberent in Scripturâ contineri, utpotè à Christo instituta; iidem esse in omnibus Ecclesiæ partibus, cum Ecclesia universa debeat possidere vera sacramenta.

Multò plures negant Ecclesiam determinasse materiam et formam sacramentorum, affirmantque institutionem immediatam. Rationibus sequentibus nituntur, 1. Rationes superius allatæ nullæ sunt. Ex eo enim quòd materia et forma quorundam sacramentorum in Scripturâ non contineantur, indè non sequitur eas non fuisse à Christo institutas, siquidem institutio Christi cognosci potest per Traditionem. Falsò supponitur materiam et formam quorundam sacramentorum varias esse in Ecclesiis Græcâ et Latinâ. Equidem ritus accidentales differunt; non verò elementa essentialia, cum talia habenda sint tantum ea quæ in utraq; Ec-

★

clesiâ constanter usurpata sunt. 2. Si Ecclesia determinasset materiam et formam, quæ sunt quasi elementa sacramentorum, eo ipso sacramenta immediatè instituisset; quod falsum probatur ex propositione præcedenti. 3. Qui rem instituit, rem mutare potest. Ergo, si Ecclesia materiam et formam sacramentorum instituisset, eas mutare posset. Porro hoc falsum est; *docet enim Concil. Trid. sess. 21, cap. 2, Ecclesiam posse quidem ritus sacramentorum mutare, sed salvâ eorum substantiâ*, quod evidenter designat materiam et formam.

---

#### II. — DE CONDITIONIBUS.

Hic solùm agitur de conditionibus *validitatis*. Infrâ dicemus de conditionibus *licitatis*.

Tria requiruntur ad producendos effectus sacramentales: *minister* competens *elementa* sacramentalia debitè applicans *subjecto* capaci.

Dicendum ergo de conditionibus ex parte 1<sup>o</sup> ministri, 2<sup>o</sup> elementorum, 3<sup>o</sup> subjecti.

Præcipuè tractamus de conditionibus sacramentorum Novæ Legis.

##### § I. — DE CONDITIONIBUS EX PARTE MINISTRI.

Conditiones requiruntur 1<sup>o</sup> in personâ, 2<sup>o</sup> in actione ministri.

##### I. De personâ ministri.

Quær. *Utrùm, et quænam conditiones requirantur in personâ ministri?*

Hæc quæstio sequentes includit, scilicet: Utrùm minister debeat 1<sup>o</sup> esse homo viator, 2<sup>o</sup> esse vestitus

charactere religioso, et, in hypothesi affirmativa, quoniam charactere, 3<sup>o</sup> habere fidem, 4<sup>o</sup> habere sanctitatem, seu gratiam sanctificantem?

Ad 1<sup>am</sup> scilicet: *Utrum minister debeat esse homo viator?*

*Resp.* Minister sacramentorum ordinarius debet esse viator.

*Prob.* Minister debet esse viator: Facto constat; siquidem sacramenta per homines viatores, non verò per Angelos et Beatos administrantur.

Dicimus *ordinarius*; Deus enim posset extraordinariò Angelos aut Beatos deputare ad administrandum sacramentum.

Ad 2<sup>am</sup> scilicet: *Utrum minister debeat esse vestitus charactere religioso, et, in hypothesi affirmativa, quoniam charactere?*

*Resp.* De necessitate characteris errarunt Lutherus et Calvinus, affirmantes nullum alium requiri characterem ad administranda sacramenta, nisi characterem baptismalem cum vocatione auctoritatis laicæ.

Juxta verò Catholicos, character religiosus requiritur in ministro plurium sacramentorum: Concil. Trid. sess. 7, can. 10: *Si quis dixerit Christianos omnes in verbo et omnibus sacramentis administrandis habere potestatem, anathema sit.*

De charactere ad conficienda sacramenta necessario, — certum est 1<sup>o</sup> in ministro Baptismi nullum requiri characterem religiosum; valet enim Baptismus etiam ab infideli collatus; 2<sup>o</sup> in ministro ordinis et ordinario Confirmationis requiri characterem episcopalem; in ministro Eucharistiæ et Extremæ-Uctionis requiri cha-

racterem sacerdotalem solum ; in ministro Pœnitentiæ requiri characterem sacerdotalem cum jurisdictione ; in ministro Matrimonii requiri saltem characterem baptismalem. — *Controvertitur* autem utrùm in ministro Matrimonii requiratur character sacerdotalis. Quæ omnia tractabuntur ubi *de Sacramentis in specie*.

Ad 3<sup>m</sup> scilicet : *Utrùm minister debeat habere fidem ?*

*Prænot.* Necessitatem fidei in ministro ad validam sacramentorum administrationem affirmarunt III<sup>e</sup> sæculo S. Cyprianus, qui cum Africanis et quibusdam Orientalibus episcopis contendebat irritum esse baptismum ab hæreticis collatum. Eundem errorem renovarunt Donatistæ IV<sup>o</sup> sæculo.

Contra quos cum Ecclesiâ *Resp.* Fides non requiritur in ministro ad validam sacramentorum administrationem.

*Prob. 1<sup>a</sup>.* Sancto Cypriano et Africanis baptizatos ab hæreticis rebaptizantibus obstitit R. Pontifex S. Stephanus, docens : *Si quis à quâcumque hæresi venerit ad vos, nihil innovetur, nisi quod traditum est, ut manus illi imponantur ad pœnitentiam.* Quæ regula ab Ecclesiâ Catholicâ admissa est, ac proindè vera est.

*Prob. 2<sup>a</sup>.* Concil. Trid. sess. 7, can. 4 : *Si quis dixerit baptismum, qui etiam datur ab hæreticis in nomine Patris et Filii et Spiritûs Sancti, cum intentione faciendi quod facit Ecclesia, non esse verum Baptismum; anathema sit.* Ergo non est iterandus baptismus ab hæretico collatus, eâ ratione quòd minister fuerit hæreticus. Ergo fides non requiritur ad validitatem baptismi, à pari ad validitatem aliorum sacramentorum.

Ad 4<sup>m</sup> scilicet: *Utrum minister debeat habere gratiam sanctificantem?*

*Prænot.* Necessitatem sanctitatis in ministro ad validam sacramentorum administrationem affirmarunt 1<sup>o</sup> Donatistæ, IV<sup>o</sup> sæculo, negantes valere sacramentum collatum à ministro cujus nota esset improbitas; 2<sup>o</sup> Wiclefistæ et Hussitæ, XV<sup>o</sup> sæculo, negantes peccatorem etiam occultum posse validè administrare sacramentum.

Contra quos cum Ecclesiâ Catholica *Resp.* Sanctitas non requiritur in ministro ad validam administrationem sacramentorum.

*Prob. 1<sup>a</sup>.* Non requiritur fides; ergo nec sanctitas, quæ supponit fidem.

*Prob. 2<sup>a</sup>.* Concil. Trid. sess. 7, can. 12: *Si quis dixerit ministrum in peccato mortali existentem, modò omnia essentialia quæ ad sacramentum conficiendum aut conferendum pertinent, servaverit, non conficere, aut conferre sacramentum; anath. sit.*

## II. De actibus ministri.

Quær. *Utrum, et quænam conditiones requirantur in actu ministri ad validam sacramentorum administrationem?*

*Resp.* In actu ministri duo distingui possunt, materiale scilicet et formale. *Materiale* nihil aliud est quàm positio et unio debita materiæ et formæ. De conditionibus in hac positione et unione requisitis sub titulo sequenti dicemus. Hic ergo solùm agitur de *formali* actionis ministri, scilicet de intentione. Undè quærendum 1<sup>o</sup> utrum requiratur, 2<sup>o</sup> qualis requiratur intentio?



**Ad 1<sup>am</sup> scilicet: *Utrum requiratur intentio?***

**Resp.** Ad validam sacramentorum administrationem, in ministro requiritur et sufficit intentio faciendi quod facit Ecclesia vera, quaecumque sit.

**Prob.** Requiritur intentio: Nam sacramentorum administratio est actus religiosus, proinde humanus; porro ad actum humanum requiritur 1<sup>o</sup> intentio; 2<sup>o</sup> intentio faciendi quod facit Ecclesia vera, quaecumque sit: Concil. Trid. sess. 7, can. 11: *Si quis dixerit in ministris, dum sacramenta conficiunt et conferunt, non requiri intentionem saltem faciendi quod facit Ecclesia; anathema sit.* Idem jam definierat Concil. Lugdun. IV<sup>um</sup> in decreto ad Armenos.

Hæc intentio sufficit: Concilium enim nihil aliud exigit. Aliundè sic ab omnibus intelligitur eanon citatus.

**Corol. I.** Ergo non sufficit intentio mimica, sed requiritur seria. (*Mimica* dicitur intentio, cum ritus sacramentalis agitur per modum joci; *seria* verò, si seriò agatur.)

**Pr. 1<sup>o</sup>** In ministro requiritur intentio faciendi quod facit Ecclesia. Porro in administratione sacramentorum Ecclesia facit actum religiosum, ac proinde serius; ergo requiritur intentio seria, nec sufficit intentio mimica. 2<sup>o</sup> Minister sacramenti personam Christi gerere debet. Qui autem habet intentionem mimicam histrio habendus est; porro repugnat histrionem personam Christi gerere.

**Corol. II.** Ergo probabilius non sufficit intentio externa, etiam seria, sed requiritur interna.

Intentio est *merè externa*, si minister velit tantum ritum sacramentalem externum, excludens aut omittens

intentionem effectum internum producendi. Est *internæ*, si quodam modo velit ritum externum, quatenus producentem effectum internum.

De necessitate intentionis internæ, aut sufficientiæ externæ, duplex opinio. — *Prima* affirmat sufficientiam intentionis externæ(1). Quia, cum de intentione internâ ministri certò constare non possit, de validitate sacramenti semper dubitaretur, si intentio interna esset necessaria. Undè fideles de receptâ gratiâ et salute perpetuò anxiarentur; quod repugnat sapientiæ et bonitati divinæ.

*Secunda*, probabilior, negat (2). Nam 1º in ministro requiritur intentio faciendi quod facit Ecclesia. Porro Ecclesia in administratione sacramenti non celebrat ritum merè externum, sed ritum effectus internos producentem. 2º Ex opinione affirmante sufficientiam intentionis externæ sequeretur administrationem sacramenti non differre ab actu profano. Sic baptismus non differret ab actione quâ mater infantem lavaret, munditiæ causâ, pronuntiando hæc verba: *Ego te baptizo...* Porro hoc absurdum. 3º Damnata est ab Alexandro VIII propositio sequens: *Valet baptismus collatus à minis-*

(1) Hujus sententiæ patronus est A. Catharinus, qui eam propagat in opusc. *de intentione ministri*, et illi aecadunt Salmeron; Contenson, *de Sacram. in gen.*; Juenin, *de Sacram. diss.* 1, q. 5, c. 2, art. 3; Natal. Alexander, *de Sacram. in gen.* 1. 2, art. 3; Drouin, *de Sacram. in gen.* q. 7, c. 3; etc.; et contendunt sibi favere D. Thomam, 3 p. q. 64, art. 8.

(2) Ità Bellarmin. l. 1 *de Sacram. in gen.*, c. 27; De Lugo, *de Sacram.* disp. 7, q. 3; Vasquez, disp. 138; Billuart, *de Sacram. in com.* diss. 3, art. 7, § 2; Tournely, *de Sacram. in gen.*, q. 7, art. 1; Benedictus XIV, *de Synod. dioc.* l. 7, c. 4; etc.

*tro qui omnem ritum externum formamque baptizandi observat, intus verò in corde suo resolvit : non intendo quod facit Ecclesia. 4°* Si rejicienda esset opinio affirmans necessitatem intentionis internæ, maximè quia, hac opinione positâ, de validitate sacramenti constare non posset, et ex eâ incertitudine nascerentur fidelibus anxietates. Porro hæc ratio nulla est. Equidem, si requiritur intentio interna, fidelis non potest habere certitudinem physicam de validitate sacramenti. Potest autem habere certitudinem moralem. Certò enim præsumitur minister, nisi de ejus impietate et malitiâ diabolicâ constet, habere intentionem internam administrandi sacramentum, cum ritum sacramentalem seriò celebrat. Porro sapientia et bonitas Dei nihil ultra certitudinem moralem exigunt, cum Scripturâ constet hominem in hac vitâ nescire *utrùm amore an odio dignus sit.*

Quamvis dubia maneret speculativè opinio affirmans necessitatem intentionis internæ, certa est practicè ; in dubio enim circa validitatem sacramentorum pars tutior est eligenda.

*Corol. III.* Ergo non requiritur ut minister sacramenti intendat explicitè productionem gratiæ et characteris, administrationem sacramenti, ritum religiosum prout celebratur ab Ecclesiâ Catholicâ.

*Pr. 1°* Sufficit ut minister habeat intentionem facienti quod facit Ecclesia vera, quæcumque sit. *2°* Valet baptismus, etiam ab hæreticis, imò ab infideli collatus. Porro infidelis non sibi proponit productionem gratiæ et characteris, administrationem sacramenti, cum illa ignoret ; nec infidelis, nec hæreticus sibi proponunt

ritum religiosum prout ab Ecclesiâ Catholicâ celebratur.

Dicimus *explicitè*. Nam minister, si habeat intentionem faciendi quod facit Ecclesia vera, eo ipso vult implicitè quod facit Ecclesia Catholica, quæ sola est vera. Vult proindè implicitè administrare sacramentum quod administratur ab Ecclesiâ Catholicâ; vult proindè implicitè producere gratiam et characterem per sacramentum reverà productum.

Ad 2<sup>am</sup> scilicet : *Qualis intentio requiratur?*

*Resp.* Requiritur intentio determinata, absoluta aut æquivalens absolutæ, saltem virtualis.

*Prob.* 1<sup>a</sup> p. Requiritur intentio *determinata*, id est, minister velit applicare formam tali materiæ, materiam et formam tali subjecto : Nam 1<sup>o</sup> hoc supponit formam, quæ in omnibus sacramentis est determinata; v. g. in baptismo, *Ego te baptizo*; in Eucharistiâ, *Hoc est corpus meum*... 2<sup>o</sup> Juxta Rubricas Missal. Rom.: *Si quis habeat coram se undecim hostias et intendat solùm consecrare decem, non determinans quas decem intendit, in his casibus non consecrat, quia requiritur intentio, quæ debet esse determinata, ut constat exemplo allato.*

2<sup>a</sup> p. Requiritur intentio *absoluta*, id est posita absque conditione, aut æquivalens absolutæ : (Porro æquivalens absolutæ intentio posita sub conditione de præterito aut de præsentī aliundè verificatā; nam, positā verificatione, intentio conditionalis fit absoluta. Item intentio posita sub conditione de futuro necessario; siquidem conditio censetur necessariò verificata aut naturaliter verificanda.) Requiritur intentio prædicta. Nam intentio ministri debet coexistere administrationi sacra-

menti; porro intentio merè conditionalis non coexistit. Si enim coexisteret, vel cùm ponitur, vel cùm verificatur conditio. Atqui non coexistit cùm ponitur conditio, seu cùm administratur sacramentum; siquidem intentio conditionalis fit tantùm vera et propriè dicta intentio, cùm verificatur conditio. Non coexistit eùm verificatur conditio; eo instanti adest quidem vera intentio, sed jam non existit administratio sacramenti prius posita.

3<sup>a</sup> p. Requiritur saltem *virtualis*: (Sub respectu præsenti triplex distinguitur intentio: *habitualis*, seu animi dispositio talis ut agens finem certè intendisset, si de eà cogitasset; *actualis*, seu præsens volitio finis; *virtualis*, seu intentio actualis moraliter perseverans.) Porro non sufficit habitualis; est enim mera dispositio ad intentionem, non autem intentio vera. Sufficit quidem intentio actualis, quia vera est intentio; sed non requiritur, nam intentio virtualis æstimatione communi vera reputatur. Ut autem existat intentio virtualis, requiritur ut intentio actualis præcesserit, non fuerit retractata, nec cessaverit lapsu temporis; seu, quod idem est, actio non distet longiori temporis intervallo ab intentione actuali: quod determinatur communi æstimatione.

§ II.—DE CONDITIONIBUS EX PARTE ELEMENTORUM.

Duo quæruntur: 1<sup>o</sup> quibusnam elementis, seu partibus intrinsecis et essentialibus, constituatur sacramentum; 2<sup>o</sup> quibus conditionibus vestiri debeant hæc elementa ad validam sacramentorum confectionem?

Ad 1<sup>um</sup> scilicet: *Quænam sint elementa sacramentorum?*

*Resp.* Vel agitur de sacramentis antechristianis, vel de sacramentis christianis.

I. Si de sacramentis *antechristianis*: — Probabile est ea non constituta fuisse rebus et verbis, sed tantum rebus. Nam in Scripturâ V. T., ubi præscribuntur præcipui ritus sacramentorum, nulla fit mentio verborum. Hoc patet Gen. 17; ubi præscribitur ritus circumcisionis, Exod. 12; ubi determinatur ritus ordinationis.

II. Si de sacramentis *christianis*: — Constant *rebus* tanquam materiâ, *verbis* tanquam formâ.

*Not.* 1<sup>o</sup> Juxta philosophiam Aristotelicam, omnia entia duobus elementis essentialibus constant, materiâ scilicet et formâ. *Materia* est elementum entis primum, indeterminatum, imperfectum; *forma* est elementum entis secundarium, determinativum et perfectivum materiæ. Sic v. g. si ex ligno fiat statua humana, lignum est materia statuæ. Est enim elementum statuæ, quia statua fit ex ligno; primum, cum forma hominis supponat lignum cui applicari debet; indeterminatum, siquidem ex ligno fieri potest quid aliud quam statua, alia statua quam statua hominis; imperfectum, nam imperfectius est lignum absque figurâ hominis, quam lignum cui impressa fuerit figura hominis. Figura hominis est forma statuæ. Ex dictis enim constat figuram hominis esse elementum statuæ, cum lignum absque figurâ hominis non esset statua hominis; secundarium, cum imprimatur ligno præexistenti; determinativum, siquidem lignum per figuram hominis superadditam fit statua humana, et distinguitur à quolibet alio objecto; perfectivum, ideò enim statua est perfectior ligno, quia ipsi additur figura humana.

Scholastici X<sup>o</sup> sæculo, sacramentis applicarunt terminologiam Aristotelicam, in his distinguendo materiam et formam. *Materiam* appellarunt partem sacramenti quæ confusè et imperfectè significat effectum; *formam* verò partem sacramenti, quæ materiæ applicata, clarè et perfectè effectum significat.

*Not.* 2<sup>o</sup> In plerisque sacramentis, res et verba sunt intelligenda in sensu stricto; in aliis autem in sensu lato. Sic actus Pœnitentiæ, qui appellari non possunt *res* in sensu stricto, sunt materia Pœnitentiæ; in Matrimonio, consensus mutorum à quibusdam theologis appellatur *forma* sacramenti, quamvis signo, non verò verbis propriè dictis exprimatur.

*Not.* 3<sup>o</sup> Materia duplex esse potest, alia *remota*, alia *proxima*. Prior est ipsa res sensibilis, quæ in sacramento adhibetur, seu circa quam actio sacramentalis exercetur. Posterior est ipsamet applicatio materiæ remotæ ad subjectum, vel actio sacramentalis subjecti. Quibus positis,

*Prob. summatim.* 1<sup>o</sup> Propositio nostra ab omnibus theologis, quoad omnes suas partes, admittitur.

2<sup>o</sup> Hæc habet Concil. Florent. in decreto unionis : *Omnia sacramenta tribus perficiuntur, rebus tanquàm materiâ, verbis tanquàm formâ, et personâ ministri conficientis sacramentum, cum intentione faciendi quod facit Ecclesia; quorum si aliquid desit, non perficitur sacramentum.*

*Prob. p. p.* 1<sup>a</sup>. Sacramenta novæ legis constant rebus et verbis : Nam 1<sup>o</sup> in Scripturâ expressè exiguntur res et verba in quatuor sacramentis : in Baptismo, Matth. 28<sup>a</sup> *Baptizantes* (seu aquâ abluentes) in nomine Pa-

*tris...*; in Eucharistiâ, Matth. 26, requiruntur panis et vinum, et verba *hoc est corpus meum, hic est sanguis...*; in Confirmatione, Act. 8, manûs impositio et oratio; in Extremâ-Uctione, Jacob. 5, unctio et oratio. Ergo saltem probabile est alia sacramenta iisdem elementis constare. 2<sup>o</sup> S. Augustinus tract. 8, in Joan.: *Accedit verbum ad elementum, et fit sacramentum.*

2<sup>a</sup> p. Res est materia, et verba sunt forma sacramentorum: Res et verba in hoc conveniunt quòd designant effectum sacramentalem. Sic in Baptismo, animæ purificatio designatur primò lotione aquæ, deindè verbis *Ego te baptizo...* Sed inter se differunt in eo quòd verba ordinentur lotioni ad determinandam et perficiendam ejus significationem. Ergo lotio in Baptismo est relativè ad verba elementum primum, indeterminatum, imperfectum; ergo est materia. Proindè verba sunt forma sacramenti. Et sic de aliis sacramentis.

Ad 2<sup>am</sup> scilicet: *Quibus conditionibus vestiri debeant elementa sacramentorum (materia et forma), ut valida sit sacramenti confectio?*

*Resp.* Requiritur 1<sup>o</sup> ut minister adhibeat materiam et formam à Christo determinatas, nec substantialiter adulteratas.

*Prob.* Requiritur ut adhibeat materiam et formam à Christo determinatas: istis enim elementis et non aliis Christus indidit virtutem producendi gratiam. Nec substantialiter adulteratas: alioquin elementa adhibita jam non essent elementa à Christo instituta. Ratione contrariâ valeret sacramentum, quamvis materia aut forma accidentaliter adulterarentur.

*Explic.* 1<sup>o</sup> Substantialis est adulteratio materiæ, si



mutatio talis sit ut communi hominum æstimatione jam non possit appellari nomine, quo designatur materia à Christo determinata. Secus est accidentalis. 2<sup>o</sup> Substantialis est adulteratio formæ, si sensus formæ adhibitæ essentialiter differat à sensu formæ à Christo institutæ. Secus est accidentalis.

Undè 1. semper accidentalis est mutatio *idiomatis*, mutatio verborum usitatorum in verba realiter synonyma.

2. Semper essentialis, matrimonio excepto, mutatio verbi in nutus, scripturam, aut alia signa.

3. Accidentalis aut essentialis pro circumstantiâ :

Mutatio per corruptionem verborum formæ. Sic valeret baptisma, si minister imperitiâ pronuntiaret *Patrias* loco *Patris*. Valeret consecratio, si sacerdos pronuntiaret *copus* pro *corpus*, *calis* pro *calix*, etc. Non valeret autem baptismus, si minister diceret *Matris* loco *Patris*; nec Eucharistia si sacerdos pronuntiaret *cor* loco *corpus*, etc., quia in posteriori casu verba substituta sensum habent diversum à verbis formæ, dùm in priori verba substituta sunt ipsa verba formæ, pronuntiatione vitiosâ adulterata.

Additio alicujus termini. Sic valeret baptismus collatus in nomine *Patris omnipotentis*, *Filii unigeniti*, et *Spiritus Sancti Paracleti*. Non valeret autem, si minister adderet : *Et in nomine Beatæ Virginis*, intendens baptizare in nomine ejus, sicut in nomine *Patris*.

Substractio verbi. Sic valeret baptismus, quamvis minister non diceret *Ego*; et Eucharistia, si sacerdos omitteret *enim*. Secus, si omitteretur in formâ baptismi aliqua persona Trinitatis, et in formâ Eucharistiæ *meum*.

**Transpositio verborum formæ.** Sic conficeret baptismum qui diceret : *In nomine Patris et Filii et Spiritûs Sancti, ego te baptizo.* Secûs, si diceret : *Patris ego te baptizo in nomine Filii et Spiritûs Sancti.*

**Interruptio verborum formæ.** Sic sacerdos qui, post hæc verba *hoc est*, sternutaret et statim adderet *corpus meum*, validè consecraret. Secûs, si notabili morâ differret pronuntiationem secundæ partis formæ.

Requiritur 2<sup>o</sup> ad validitatem sacramenti ut materia et forma uniantur debite ab eodem ministro erga idem subjectum.

Requiritur ut... uniantur : Sacramentum enim est quid unum, exigitur proindè unio inter ejus elementa.

Uniantur *debite*. Requiritur autem unio *physica* in Eucharistiâ, cujus forma exprimit materiam hîc et nunc demonstrabilem. — Unio *moralis* sufficit in aliis sacramentis, cùm unio moralis sit vera unio, et forma horum sacramentorum non exigat unionem physicam. Strictior tamen debet esse in Baptismo, Confirmatione, Extremâ-Untione et Ordine quàm in Pœnitentiâ et Matrimonio. — Unio minùs stricta sufficit in Pœnitentiâ ; quia hoc sacramentum administratur per modum judicii ; porro in judicio informatio causæ separari potest à sententiâ, aliquo temporis spatio. Sufficit etiam in Matrimonio : nam in opinione eorum qui affirmant materiam hujus sacramenti esse contractum, formamque benedictionem nuptialem, hæc duo quamvis aliquâ morâ separata uniuntur tamen moraliter quia contractus semel initus perseverat, proindè post aliquod tempus formæ realiter uniri potest. Idem dicendum in opinione eorum qui affirmant consensum esse simul materiam et formam ;

quia contractus est validus, quamvis inter consensum partium intersit aliqua temporis dilatio.

Uniantur ab eodem ministro erga idem subjectum: Alioquin forma sacramentorum non verificaretur. Sic minister qui diceret: *Ego te baptizo...*, dum alter effunderet aquam, falsum proferret; siquidem non baptizaret. Item, si idem minister effunderet aquam in unum subjectum, et ad aliud subjectum dirigeret hæc verba: *Ego te baptizo...*, neutrum baptizaret.

§ III. — DE CONDITIONIBUS EX PARTE SUBJECTI.

Conditiones requiruntur aliæ in personâ, aliæ in actu subjecti.

I. De personâ subjecti.

Quær. *Utrum, et quænam conditiones requirantur in personâ subjecti?*

Resp. Requisitæ conditiones sunt aliæ physicæ, aliæ morales, aliæ supernaturales.

I. Conditiones *physicæ*,

*Generales*: 1<sup>o</sup> Subjectum sit viator: alioquin non potest accipere gratiam, quæ viatoribus solis conceditur.

2<sup>o</sup> Sit moraliter præsens ministro: secus forma sacramentalis, v. g. *Ego te baptizo...*, *Ego te absolvo...*, quæ supponit subjectum præsens ministro, non verificaretur.

Excipiuntur tamen 1. Matrimonium, quod administratur absentibus, modò consensum manifestent per procuratorem aut per litteras; 2. Eucharistia, quia, salvâ validitate sacramenti, à ministro ad subjectum

mitti potest, et in primis Ecclesiae saeculis aliquandò mittebatur per personam intermediam.

*Speciales* : Requiritur ut subjectum sit in periculo mortis, si agatur de Extremâ-Uctione ; masculus, si de Ordine ; capax contractûs Matrimonii, si de Matrimonio.

## II. Conditiones *morales* :

Requiritur ut subjectum sit aut fuerit capax actûs humani, si agatur de Pœnitentiâ, Extremâ-Uctione, Matrimonio. Hoc autem non exigitur, si quæstio sit de aliis sacramentis.

Subjectum sit aut fuerit capax actûs humani, 1<sup>o</sup> si agatur de Pœnitentiâ et Extremâ-Uctione : illa enim sacramenta instituta fuerunt ad remissionem peccatorum, proindè supponunt peccatum, porro peccatum supponit capacitatem actualem aut præteritam actûs humani ; 2<sup>o</sup> si agatur de Matrimonio : siquidem hoc sacramentum supponit contractum, contractus autem capacitatem actûs humani.

Capacitas actûs humani non requiritur in Baptismo, Confirmatione et Eucharistiâ. Hæc sacramenta ministrabantur infantibus in primævis Ecclesiae saeculis. Non requiritur et in Ordine ; cùm natura ordinis actum humanum non exigit in suscipiente. Ità pronuntiat Benedictus XIV in bullâ *Inter sollicitas*. Qui autem ante rationis usum fuisset ordinatus, ad cœlibatum non obligaretur, quia votum castitatis non emisisset, hoc aliundè præscribit Bened. XIV in bullâ citatâ. Vid. S. Ligorium, *de Sacram.*, n. 811.

## III. Conditiones *supernaturales* :

Ad alia sacramenta validè suscipienda præexigitur

susceptio baptismi; non verò sanctitas; nec etiam fides, si excipias sacramentum Pœnitentiæ.

Præexigitur susceptio baptismi: Nam 1. sacramenta à baptismo distincta pro solâ Ecclesiâ sunt instituta, proindè solis Ecclesiæ subjectis administrari possunt; porro per baptismum, et per solum baptismum, homines fiunt Ecclesiæ subjecti. 2. Sic definivit Eugenius IV in decreto ad Armenos.

Non requiritur sanctitas; nec fides, exceptâ Pœnitentiâ: Constat ex praxi Ecclesiæ, quæ nunquàm permisit iterari baptismum et ordinationem improborum aut hæreticorum, modò ritè baptizati aut ordinati fuerint. —Fides autem requiritur in Pœnitentiâ, quia ad validitatem Pœnitentiæ exigitur contritio, porro contritio supponit fidem.

## II. De actu subjecti.

Quæritur 1<sup>o</sup> utrùm requiratur intentio in subjecto; 2<sup>o</sup> qualis intentio?

Ad 1<sup>am</sup>, scilicet: *Utrùm intentio requiratur in subjecto?*

*Resp.* Vel agitur de his qui usûs rationis sunt incapaces, vel de aliis.

1<sup>o</sup> Si agatur de iis qui usûs rationis sunt incapaces: Nulla in eis requiritur intentio ad receptionem sacramentorum quæ illis ex Ecclesiæ praxi administrari possunt; siquidem intentio ipsis impossibilis est.

Porro ex praxi Ecclesiæ talibus subjectis administrari possunt, Baptismus, Confirmatio, Eucharistia et Ordo.

2<sup>o</sup> Si agatur de his qui sunt capaces usûs rationis: In his requiritur intentio recipiendi quod administrat

**Ecclesia vera, quæcumque sit. Nam 1. receptio sacramenti est actus humanus, proindè exigit intentionem actui faciendo conformem. 2. Deus non vult hominem rationis compotem sanctificari, nisi velit. 3. De propositione nostrâ consentiunt omnes.**

**Nota.** Qui ad Eucharistiam accederet absque intentione sacramentum recipiendi, realiter quidem communicaret corpori et sanguini Christi, non verò participaret effectus sacramenti.

**Ad 2<sup>um</sup>, scilicet: *Qualis requiratur intentio in sub-  
jecto?***

**Resp.** Hæc intentio debet esse:

**1<sup>o</sup> *Seria*, nec sufficeret intentio ludendi.**

**2<sup>o</sup> *Interna*, nec sufficeret intentio participandi cæremoniae merè externæ. Non requiritur autem intentio explicita recipiendi sacramentum, effectus sacramentales, participandi cæremoniae in Ecclesiâ Romanâ usitatæ. Quod patet ex dictis ubi *de Ministro sacramenti*.**

**3<sup>o</sup> *Actualis*, aut saltem *virtualis* in Pœnitentiâ, Matrimonio et Ordine.**

**In Pœnitentiâ et Matrimonio :** Quia materia horum sacramentorum est actus subjecti, non sufficit proindè voluntas habitualis.

**In Ordine :** quia, cùm receptio ordinis graves, speciales et difficiles importet obligationes, nemo censetur velle ordinem suscipere, nisi de hujus susceptione aliquandò voluntatem explicitam habuerit. — Dicimus: *aliquandò* voluntatem explicitam habuerit. Sufficit enim voluntatem suscipiendi Ordinem aliquandò fuisse habitam nec retractatam, ut videre est apud S. Lig. *de Sacram.* n. 81; proindè erga illud sacramentum intentio

semel habita semper perseverat et virtualis censetur donec revocetur.

4<sup>o</sup> Sufficit autem in aliis intentio *habitualis* et *implicita*. Porro, ut adsit hæc intentio, sufficit, si agatur de Baptismo, voluntas peragendi omnia ad salutem necessaria; si agatur de aliis sacramentis, sufficit intentio inclusa in vitâ christianâ aut ejus proposito. Quæ omnia constant consensu communi et praxi Ecclesiæ (1).

### III. — DE EFFECTIBUS.

Tria quærentur: 1<sup>o</sup> utrùm sacramenta producant effectus; 2<sup>o</sup> in hypothesis affirmativâ, quosnam producant effectus; 3<sup>o</sup> quomodò producant effectus?

#### QUÆSTIO I.

*Utrùm sacramenta producant effectus?*

RESP. Sacramenta producant effectus. Alioquin inutiliter à Deo instituta fuissent. Aliundè propositio nostra ab omnibus admittitur.

#### QUÆSTIO II.

*Quosnam effectus producant sacramenta?*

RESP. Quæstio potest esse de sacramentis *veteris* aut *novæ* legis.

I. Si de sacramentis *Veteris Legis*.

1<sup>o</sup> Sacramenta veteris legis producebant gratiam *legalem*, seu externam. Sic v. g. per circumcisionem homo aggregabatur populo Dei; per lustrationes à lege præscriptas Judæus purificabatur à sordibus legalibus.

2<sup>o</sup> Producebant gratiam internam; seu potiùs, occasione receptionis sacramenti, gratia interna concede-

(1) Vid. S. Llg. de Sacram. n. 82.

batur iis qui accedebant cum dispositionibus internis gratiæ meritoriis, ut infra explicabitur.

H. Si de sacramentis *Novæ Legis*:

Variè sentiunt Pseudoreformati et Catholici.

Juxta Anabaptistas et Socinianos, sacramenta unum effectum producunt, scilicet manifestant professionem fidei christianæ, et distinguunt fideles ab infidelibus. Juxta Lutheranos et Calvinistas, sacramenta, præter effectum suprà assignatum, excitant in suscipientibus fidem, quâ justificantur.

Juxta verò Catholicos, omnia sacramenta producunt gratiam sanctificantem, primam aut secundam, gratiam sacramentalem, quædam insuper characterem.

Undè quærendum: 1<sup>o</sup> utrùm sacramenta producant gratiam habitualement; et, in hypothesi affirmativâ, qualem gratiam; 2<sup>o</sup> utrùm producant gratiam sacramentalem; 3<sup>o</sup> utrùm producant characterem in animâ?

Ad 1<sup>am</sup> p. 1<sup>a</sup> q. scilicet: *Utrùm sacramenta producant gratiam sanctificantem?*

*Resp.* Omnia sacramenta *Novæ Legis* producunt gratiam sanctificantem.

*Prob. 1<sup>a</sup>. Script.* Hæc enim habet de Baptismo, Joan. 3, 5: *Nisi quis renatus fuerit ex aquâ et Spiritu Sancto, non potest introire in regnum Dei.* Ephes. 5, 25: *Christus dilexit Ecclesiam, et seipsum tradidit pro eâ, ut illam sanctificaret mundans lavacro aquæ in verbo vitæ.* Tit. 3, 5: *Non ex operibus justitiæ quæ fecimus nos, sed secundum suam misericordiam salvos nos fecit per lavacrum regenerationis.* De Confirmatione, Act. Apost. 8, 17: *Tunc imponebant manus super eos et accipiebant Spiritum Sanctum.* De Eucharistiâ, Joan.



**6, 54 : Qui manducat meam carnem et bibit meum sanguinem habet vitam æternam.** De Pœnitentiâ, Joan. 20, 22 : **Quorum remisistis peccata remittuntur eis, et quorum retinueritis retenta sunt.** De Extremâ-Uctione, Jacob. 5, 14 : **Infirmatur quis in vobis? inducat presbyteros Ecclesiæ, et orent super eum, ungentes eum oleo in nomine Domini, et oratio fidei salvabit infirmum, et alleviabit eum Dominus, et, si in peccatis sit, remissentur ei.** De Ordine, II Tim. 1, 6 : **Admoneo te ut resuscites gratiam quæ est in te per impositionem manuum mearum.**

Undè sic : vera propositio nostra, si 1<sup>o</sup> in textibus citatis productio gratiæ tribuatur sacramentis ; si 2<sup>o</sup> gratia producta sit gratia sanctificans aut habitualis. Atqui,

1<sup>o</sup> Productio gratiæ attribuitur sacramentis ; hoc patet ex textibus.

2<sup>o</sup> Gratia producta est gratia sanctificans : Nam per gratiam baptismalem homo renascitur, sanctificatur, salvatur ; quæ omnia gratiâ sanctificante solâ produci possunt. Per Confirmationem homo accipit Spiritum Sanctum, cujus infusio comitatur donum gratiæ habitualis. Per Eucharistiâ homo habet vitam æternam, seu jus ad visionem intuitivam, quod inhæret gratiæ sanctificanti. Per Pœnitentiâ et Extremâ-Uctionem homo obtinet remissionem peccatorum, quæ fit per gratiæ habitualis infusionem. Per Ordinem christianus accipit gratiam quæ habitualiter manet in eo ; qui character ad solam gratiam habitualem pertinet.

Ergo sex sacramenta citata producunt gratiam sanctificantem. Idem dicendum, ob paritatem rationis, de Matrimonio, cum sit sacramentum.

*Prob. 2<sup>a</sup>. SS. PP.* Tertullianus de resur. carnis, cap. 8: *Caro abluitur, ut anima emaculetur; caro ungitur, et anima consecratur; caro saginatur, ut anima muniat; caro manūs impositione adumbratur, ut anima Spiritu illuminetur; caro corpore et sanguine Christi vescitur, ut anima de Deo saginetur.* S. Joan. Chrysost. homil. 23 in Joan.: *Quod est matrix embrioni, hoc est fidei aqua, siquidem in aqua fingitur et formatur.* S. Augustinus, tract. 80 in Joan.: *Unde tanta virtus aquae, ut corpus tangat et cor abluat.*

*Prob. 3<sup>a</sup>.* Ex Cone. Trid. sess. 7, can. 6: *Si quis dixerit sacramenta novæ legis... gratiam... non ponentibus obicem non conferre... anathema sit.* Ibid. can. 8: *Si quis dixerit per ipsa novæ legis sacramenta ex opere operato non conferri gratiam, sed solam fidem divinæ promissionis ad gratiam (justificationem seu gratiam habitualem) consequendam sufficere, anathema sit.*

Ad 2<sup>am</sup> p. 1<sup>o</sup> q. scilicet: *Qualem gratiam producant sacramenta?*

*Præmit.* Sacramenta sunt alia mortuorum, alia vivorum. Dicuntur sacramenta mortuorum Baptismus et Pœnitentia, quia per se instituta sunt pro eis qui, privati gratiâ, spiritualiter sunt mortui. Cætera verò dicuntur sacramenta vivorum, quia per se sunt instituta pro eis qui per gratiam spiritualiter vivunt. — Unde duplicem gratiam producere possunt: *primam*, quâ homo ex injusto fit justus; *secundam*, quâ homo justus fit magis justus. — Sacramenta utramque gratiam possunt producere duplici modo: *directè*, seu vi institutionis suæ; *indirectè*, seu præter institutionem. Quibus positis,

*Resp. 1<sup>o</sup> Directè* producunt gratiam primam sacramenta mortuorum, gratiam verò secundam sacramenta vivorum.

*Prob. 1<sup>a</sup> p.* Sacramenta mortuorum producunt gratiam primam : Siquidem Baptismus à Christo fuit institutus ad remissionem peccati originalis, Pœnitentia ad remissionem actualis. Ergo Christus Baptismo indidit vim remissivam peccati originalis, et Pœnitentiæ vim remissivam peccati actualis. Porro peccatum, sive originale, sive actuale, si sit mortale, non potest remitti nisi per infusionem gratiæ primæ. Ergo Baptismus et Pœnitentia directè producunt gratiam primam.

*2<sup>a</sup> p.* Sacramenta vivorum gratiam secundam : Hæc enim sacramenta ordinantur ad conservationem vel augmentum gratiæ ; supponunt proindè peccatum deletum. Ergo Christus his sacramentis indidit vim capacitatem conservandi et augendi gratiam ; proindè gratiam secundam directè producunt.

*2<sup>o</sup> Indirectè* producunt gratiam secundam sacramenta mortuorum in eo qui ad ea accedit justificatus ; gratiam primam sacramenta vivorum in eo qui illa suscipit in statu peccati mortalis, cum solâ attritione, bonâ fide credens se non esse in statu peccati mortalis, vel existimans se esse contritum.

*Prob. Ex Concilio Tridentino* sacramenta gratiam conferunt non ponentibus obicem.

Ergo 1<sup>o</sup> sacramenta mortuorum gratiam secundam producere debent in subjecto justificato. Alioquin nullam gratiam conferrent : nec primam, cum suscipiens jam supponatur justificatus ; nec secundam, ex hypothesi.

Ergo 2<sup>o</sup> sacramenta vivorum producunt gratiam primam in eo qui ea suscipit in statu peccati mortalis cum solâ attritione, putans bonâ fide se non esse in peccato mortali, vel existimans se esse contritum. Res ita est, si 1. in casu præsentis subjectum nullum ponat obieem; si 2. obiee non existente, sacramentum vivorum debeat producere gratiam primam. Atqui 1. nullus ponitur obex; cum subjectum supponatur in bonâ fide circa indignitatem suam, et cum attritione, quæ cum sacramento sufficit ad consequendam gratiam primam; ut infra videbitur sub titulo *de Sacramento Pœnitentiæ*. 2. Obiee non existente, sacramentum vivorum gratiam primam producere debet. Alioquin nullam gratiam conferret: Non secundam, quæ supponit gratiam primam quâ privatur homo in statu peccati mortalis; non primam, ex hypothesi.

Duas partes continet propositio nostra. — Prima affirmans gratiam secundam accidentaliter produci per sacramenta mortuorum, ab omnibus admittitur. — De secundâ parte, asserente gratiam primam indirectè produci per sacramenta vivorum, variæ sunt theologorum sententiæ. 1<sup>o</sup> Generaliter admittitur propositio quoad Extremam-Uctionem, quia videtur insinuata à S. Jacobo: *Si in peccatis sit, remittuntur ei* (1). 2<sup>o</sup> Item, quoad Eucharistiam et Confirmationem, à D. Thomâ (2) et pluribus theologis, contra quosdam (3). 3<sup>o</sup> Item, quoad

(1) Itâ D. Thomas, *supplem.* q. 30, art. 1; Bellarmin. *de Extremâ-Uctione*, c. 8; Suarez, Laymann, etc.

(2) 3 p. q. 79, art. 3, et q. 72, art. 7 ad 3.

(3) Vasquez, in 3<sup>m</sup>, q. 79, disp. 203, c. 4 et alios quos refert Tourney, *de Euchar.* q. 7.

omnia sacramenta vivorum, à multis contra multos. Probabilior tamen videtur opinio affirmativa propter rationem suprà expositam.

Ad 2<sup>m</sup> q. scilicet: *Utrùm Sacramenta producant gratiam sacramentalem?*

*Præmit.* Gratia sacramentalis est jus ad gratias actuales, fini cujuslibet sacramenti accommodatas, in tempore opportuno obtinendas; jus annexum gratiæ sanctificanti per sacramentum collatæ. — Gratia sacramentalis est *jus ad gratias actuales*: non verò gratia actualis ipsa. Ad gratias actuales *accommodatas fini cujuslibet sacramenti*: v. g. accommodatas conservationi vitæ supernaturalis per Baptismum collatæ; accommodatas conservationi virtutum et perfectionum supernaturalium quæ per Confirmationem in animâ deponuntur. *Tempore opportuno obtinendas*: scilicet in his circumstantiis in quibus necessariæ erunt gratiæ prædictæ ad conservandum effectum sacramenti. *Jus annexum gratiæ sanctificanti per sacramentum collatæ*: id est, non independens et in se existens, sed inhærens gratiæ habituali. Quo posito,

*Resp.* Omnia sacramenta producunt gratiam sacramentalem.

*Prob.* Res ita est, si 1<sup>o</sup> præter gratiam sanctificantem sacramenta conferant donum speciale; si 2<sup>o</sup> istud donum speciale sit jus ad gratias actuales accommodatas fini sacramenti, obtinendas tempore opportuno; si 3<sup>o</sup> jus illud sit annexum gratiæ sanctificanti. Atqui,

1<sup>o</sup> Sacramenta conferunt donum speciale: Nam 1. instituta sunt ad fines speciales inter se distinctos, ergo Christus ipsis indidit facultatem conferendi dona spe-

cialia. 2. Si sacramenta non conferrent dona specialia præter gratiam sanctificantem, duplex sufficeret sacramentum, unum ad producendam gratiam primam, aliud ad conferendam gratiam secundam; cætera verò essent inutilia. Porro hæc propositio contradicit sapientiæ divinæ, quæ non potest instituere media salutis inutilia.

2º Donum speciale ab unoquoque sacramento collatum est jus ad gratias: Siquidem hoc donum accommodari debet fini sacramenti, alioquin insipienter egisset Christus. Porro, ut illud donum sit plenè accommodatum fini sacramenti, situm esse debet in jure obtinendi gratias in tempore opportuno, non verò in gratiâ actualiter concessâ. Nam, cum gratia actualis sit transitoria, si gratia sacramentalis esset gratia actualis, subjectum eâ privari posset eo instanti quo perutilis esset ad conservandum effectum sacramenti; quod incommodum non existit, si situm sit in jure permanenti obtinendi gratias actuales in tempore opportuno.

3º Jus prædictum est annexum gratiæ sanctificanti: Nam jus illud est facultas supernaturalis et permanens; porro facultas in se subsistere non potest, proindeque inhærere debet subjecto supernaturali permanenti. Atqui nullum aliud subjectum præter gratiam sanctificantem his proprietatibus gaudet.

Ad 3<sup>am</sup> q. scilicet: *Utrum sacramenta producant characterem?*

*Præmit.* Character est signum spirituale, indelebile, impressum animæ, quo homo ab aliis distinguitur, et ad divina deputatur.—*Signum:* id est, aliquid distinctivum; *spirituale, indelebile, impressum animæ:* quæ

verba clara sunt ; *quo homo distinguitur ab aliis* : ab hominibus scilicet, quibus idem character non fuit impressus per receptionem sacramenti ; *et deputatur ad divina* : sic, per characterem baptismalem homo deputatur ad sacramentorum receptionem ; per characterem ordinis homo deputatur ad sacramentorum administrationem ; per characterem confirmationis deputatur ad fidei professionem. Quo posito,

*Resp.* Quædam sacramenta, scilicet Baptismus, Confirmatio et Ordo characterem imprimunt.

*Prob. p. p. 1<sup>a</sup>.* Quædam sacramenta producunt characterem : 1<sup>o</sup> Ephes. 4, 30 : *Nolite contristare Spiritum Sanctum Dei, in quo signati estis in diem redemptionis.* II Cor. 1, 2 : *Qui unxit nos Deus, qui et signavit nos, et dedit pignus Spiritus in cordibus nostris.* 2<sup>o</sup> Hoc deducitur ex probationibus 2<sup>æ</sup> partis propositionis nostræ.

2<sup>a</sup> p. Sacramenta characterem producentia sunt Baptismus, Confirmatio et Ordo :

*Pr. 1<sup>o</sup> Traditione.* De Baptismi caractere sequentia docent Patres : S. Cyrillus Hierosolymitanus in præfatione ad catech. et iterum catech. 17, appellat Baptisma *signaculum sanctum et indelebile*. S. Chrysost. homil. 13 in 2 ad Cor. : *Quemadmodum nota quedam militibus, sic fidelibus Spiritus imponitur : quo fit, si ordinem deserueris, omnibus perspicuus fias. Judæi signaculi loco circumcisionem habebant, nos autem pignus Spiritus.* S. August. advers. Donatistas probat eos qui ab hæreticis fuerant baptizati non esse rebaptizandos, quia acceperant non hæreticorum characterem, sed Christi. — Confirmationem SS. Cyprianus, Ambrosius,

Augustinus appellant *signaculum spirituale*. — Quod ordinem, S. Augustinus de non iteranda ordinatione schismaticorum ait: *Non sunt rursus ordinandi; sed, sicut Baptismus in eis, ita ordinatio manet integra.*

2° *Praxi Ecclesiæ*. Baptisma, Confirmationem et Ordinem nunquam iterat Ecclesia. Ergo supponit ab his sacramentis aliquid causari perpetuum et indelebile, quod nihil aliud esse potest quam character.

3° Conc. Trid. sess. 6, can. 9: *Si quis dixerit in tribus sacramentis, Baptismo scilicet, Confirmatione et Ordine, non imprimi characterem in animâ, hoc est signum quoddam spirituale et indelebile, undè ea iterari non possunt; anathema sit.*

*Corol.* Ex dictis concludendum Baptisma, Confirmationem et Ordinem iterari non posse. Siquidem, cum character sit indelebilis, hæc sacramenta, si iterarentur, effectu suo principali fraudarentur; quod admitti non potest. Aliundè Concil. Trid. suprâ citatum concludit sacramenta prædicta iterari non posse ex eo quod producant characterem.

### QUÆSTIO III.

*Quomodo sacramenta producant effectus?*

Quatuor quæstionibus æquivalet quæstio proposita: 1° Utrum effectuum productio in sacramentis pendeat nec ne à dispositionibus subjecti; 2° utrum fiat ex opere operato, an ex opere operantis, 3° physicè an moraliter, 4° æqualiter an inæqualiter?

Ad 1<sup>am</sup> scilicet: *Utrum productio effectuum pendeat nec ne à dispositionibus subjecti?*

*Not.* Per dispositiones requisitas intelligimus contritionem, aut saltem attritionem cum suis antecedenti-



bus, scilicet fide, spe, etc., in sacramentis mortuorum; primam gratiam in sacramentis vivorum, ut suprâ explicavimus ubi de dispositionibus et conditionibus præviis gratiæ.

Quæstio esse potest, vel de characterè, vel de gratiâ.

I. Si quæstio sit de *characterè*:

*Resp.* Productio characteris non pendet à dispositionibus subjecti.

*Prob. 1<sup>a</sup>.* Si receptio characteris penderet à dispositionibus, character non imprimeretur his qui Baptismum, Confirmationem et Ordinem reciperent absque dispositionibus requisitis. Ergo nunquàm posset recipi, cum, ex doctrinâ Ecclesiæ, prædicta sacramenta iterari non possint. Porro hoc est inadmissibile: siquidem character Baptismi necessarius est omnibus, character Confirmationis perutilis est omnibus, character Ordinis necessarius est Ecclesiæ ministris.

*Prob. 2<sup>a</sup>.* Propositio nostra ab omnibus Catholicis admittitur.

II. Si quæstio sit de *gratiâ*:

*Resp.* Actualis productio gratiæ habitualis et gratiæ sacramentalis pendet à dispositionibus subjecti.

*Prob. 1<sup>a</sup> p.* Productio gratiæ habitualis pendet à dispositionibus subjecti: Res ita est, si 1. productio gratiæ primæ supponat saltem attritionem cum dispositionibus præviis; si 2. productio gratiæ secundæ supponat gratiam primam. Atqui 1<sup>o</sup> productio gratiæ primæ supponit saltem attritionem: Concilium enim Tridentinum enumerando dispositiones ad justificationem necessarias, inter quas assignatur attritio, non distinguit inter justificationem concessam extra sacramentum et

justificationem concessam per sacramentum. Proinde conditiones enumeratæ in utroque casu exiguntur. 2<sup>a</sup> Productio gratiæ secundæ supponit gratiam primam : Nam evidenter impossibile est gratiam secundam produci in eo qui caret gratiâ primâ.

2<sup>a</sup> p. Item productio gratiæ sacramentalis : Non est enim separata à gratiâ habituali. Ergo illâ deficiente, deficit et gratia sacramentalis.

*Explic.* Dicimus : *actualis* productio. Homo enim potest aliquandò, ratione sacramenti antea sine dispositionibus requisitis suscepti, obtinere, modò removeatur obex, gratias sacramentales quas primò non receperat; seu, ut aiunt theologi, gratia sacramentalis aliquandò reviviscere potest, modò amoveatur obex (1).

*Gratia sacramentalis aliquandò reviviscere potest.* —

1<sup>o</sup> Hæc propositio certa est quoad Baptismum (2). Nam, si gratia Baptismi non posset reviviscere, remissio peccati originalis et peccatorum actualium, quæ Baptismum præcesserunt, impossibilis esset ei qui Baptismum absque dispositionibus requisitis suscepisset: hæc enim peccata non remitti queunt per Baptismum, qui non potest iterari; nec per Pœnitentiam, cum peccatum originale et peccata actualia ante Baptismum commissa clavibus Ecclesiæ non subjiciantur. Porro hæc impossibilitas remissionis repugnat bonitati et sapientiæ Dei, qui vult omnes homines salvos fieri.

(1) De reviviscentiâ gratiæ sacramentalis, vid. Inter alios Collet, qui hanc materiam dilucidè exponit in tract. *de Sacram. in gen.*, cap. 5 de *subject. sacram.* art. 3.

(2) Ità communiter theologi, post S. Augustinum, l. 3 de *Baptismo*, c. 13, et S. Thomam, 3 p. q. 69, art. 10, contra Vasquez, disp. 161, et paucissimos alios.

Undè videre est peccatum originale et actualia ante Baptismum commissa in hoc casu remitti per gratiam Baptismi antea suscepti, quæ, remoto obice, reviviscit.

2º Propositio probabilissima est quoad Confirmationem et Ordinem (1). Alioquin, cum hæc sacramenta iterari non possint, dicendum foret eos qui hæc sacramenta absque dispositionibus requisitis recepissent, per totam vitam privandos esse gratiis per hæc sacramenta productis. Porro hoc videtur repugnare bonitati divinæ, cum istæ gratiæ sint ad vitam rectè instituendam perutiles.

3º Probabilis est quoad Extremam-Uctionem (2) et Matrimonium. His enim sacramentis videtur applicanda ratio propositionis immediate præcedentis; quia Extrema-Uctio iterari non potest, durante eodem morbo, nec Matrimonium, vivente comparte (3).

*Modò removeatur obex:* — Ut gratia reviviscat in casibus præcedentibus obex debet removeri. Hoc evidens est.

Porro, ad removendum obicem, sufficit ut subjectum habeat attritionem, si accessio ad sacramentum ex parte subjecti non fuerit peccaminosa, id est, si accesserit ad sacramentum bonâ fide credens se esse dispositum. Nam obex consistit solummodò in carentiâ hujus dispositionis; ergo, positâ dispositione, tollitur obex.

(1) Ità D. Thom. in 4, dist. 4, q. 3, art. 2.

(2) Ità D. Thom., loco citato.

(3) Quod ad Eucharistiam et Pœnitentiam spectat, ait Cotel., loc. cit., pauci sunt qui ea reviviscere opinentur; nec afferri possent in gratiam eorum reviviscentiæ rationes allatæ pro aliis sacramentis, cum Eucharistia et Pœnitentia facillè iterari possint.

Requiritur contritio perfecta, aut receptio sacramenti Pœnitentiæ, si receptio sacramenti fuerit mortaliter peccaminosa, id est, si subjectum accesserit ad sacramentum malâ fide, aut si peccatum mortale commiserit post susceptum sacramentum. Siquidem in hoc casu, obex non consistit solum in absentia attritionis, sed in ipso peccato mortali commisso in ipsâ receptione, aut post receptionem sacramenti. Porro, ad removendum obicem peccati mortalis, requiritur contritio perfecta, vel attritio cum receptione sacramenti Pœnitentiæ.

*Nota.* Reviviscentia gratiæ sacramenti duplici modo explicatur. Quidam dicunt characterem à sacramento productum esse incompletum, nisi ipsi adjungatur gratia, quâ fidelis adjuvetur ad implenda officia ab ipso derivantia. Unde Deus, ad perficiendum opus à se inceptum per impressionem characteris, concedit gratiam sacramentalem.—Sed ista ratio ad summum valet pro sacramentis quæ imprimunt characterem, non verò pro aliis. Unde cæteri theologi dicunt gratiam produci, non per sacramentum, quod jam non existit; sed immediate à Deo, qui eam concedit ratione sacramenti antea suscepti.

Ad 2<sup>nm</sup> scilicet: *Utrum productio effectûs sacramentalis fiat ex opere operantis, an ex opere operato?*

(*Ex opere operantis*, id est, ex merito actionis ministri aut susipientis; *ex opere operato*, id est, vi quæ sacramento inhæreat.)

Quæstio esse potest vel de sacramentis antechristianis, vel de sacramentis christianis.

I. Si quæstio sit de sacramentis antechristianis :

**Resp.** 1<sup>o</sup> Sacramenta Veteris Legis producebant gratiam legalem ex opere operato; id est, per receptionem sacramentorum veteris legis eorum effectus legalis producebatur ipso facto.

2<sup>o</sup> Quoad gratiam internam, vel agitur de sacramento per quod delebatur peccatum originale in infantibus, vel de aliis sacramentis.

Si agatur de primo: hoc sacramentum producebat in infantibus gratiam internam quasi ex opere operato, ut ait S. Thomas, quia gratia non oriebatur è dispositionibus subjecti, cum subjectum in hypothesi incapax esset dispositionum, bene verò è dispositionibus ministris.

Si de aliis: 1<sup>o</sup> Gratiam internam non producebant ex opere operato. Nam 1. hæc sacramenta erant infirma et egena, testante Apostolo, Galat. 4, 9: *Quomodo convertimini ad infirma et egena elementa*. 2<sup>o</sup> Concil. Trid. sess. 7, can. 2: *Si quis dixerit ea ipsa novæ legis sacramenta à sacramentis antiquæ legis non differre, nisi quia cæremoniæ sunt aliæ, et alii ritus externi; anath. sit.* Porro, excluso discrimine cæremoniarum et rituum, differentia inter sacramenta Antiquæ et Novæ Legis probabilissimè consistit in eo quòd priora produserint gratiam ex opere operantis, cum constet eam produci à posterioribus ex opere operato. — 2<sup>o</sup> Gratiam internam producebant ex opere operantis. Siquidem in omni tempore bona opera conditionibus debitis vestita vim habuerunt meritoriam gratiæ, seu potuerunt producere gratiam ex opere operantis.

II. Si quæstio sit de sacramentis christianis:

**Resp.** Sacramenta Novæ Legis producunt gratiam ex

opere operato ; insuper aliquandò ex opere operantis.

*Prob. 1<sup>a</sup> p.* Producent gratiam ex opere operato : Nam 1<sup>o</sup> Baptismus, Confirmatio et Eucharistia in primis Ecclesiæ sæculis infantibus administrabantur, approbante Ecclesiâ. Ergo hæc sacramenta effectus producebant in infantibus ; alioquin Ecclesia approbasset ætium inutilem, imò sacramentis injuriosum. Porro suos effectus producere non poterant ex opere operantis, cum infantes sint dispositionum incapaces ; ergo eos producebant ex opere operato. A pari de aliis sacramentis, cum nulla sit ratio discriminis. 2<sup>o</sup> In textibus citatis, ubi de productione effectuum sacramentorum, productio gratiæ attribuitur sacramento ipsi, non verò dispositionibus subjecti ; ergo. 3<sup>o</sup> Concil. Trid. sess. 7, can. 8 : *Si quis dixerit per ipsa novæ legis sacramenta ex opere operato non conferri gratiam.... anathema sit.*

*2<sup>a</sup> p.* Insuper producent aliquandò gratiam ex opere operantis : Siquidem dispositiones subjecti suum habent proprium meritum, si debitis conditionibus vestiantur.

Ex dictis in quæstione præsentī sequitur 1<sup>o</sup> sacramenta novæ legis esse, ut jam supposuimus, *causas secundas* gratiæ ; 2<sup>o</sup> dispositiones, quoad effectum sacramentalem, esse tantum *conditiones sine quibus* istæ causæ non producerent effectus suos.

Ad 3<sup>um</sup> scilicet : *Utrum productio effectuum sacramentorum fiat physicè an moraliter ?*

(*Physicè*, id est, immediatè ; *moraliter*, id est, movendo infallibiliter Deum ad concedendam gratiam subiecto sacramenti.)

*Resp.* Quidam admittunt sacramenta producere ef-

fectus suos moraliter (1). Alii verò admittunt productionem physicam (2).

Probabilior videtur *secunda* opinio. Res ita est, si Deus potuerit materiæ et formæ sacramentorum conferre vim producendi gratiam, et si modus ille sit magis conformis textibus Scripturæ Sacræ et decisionibus Ecclesiæ. Atqui 1° evidens est Deum omnipotentem, qui animam humanam cum corpore intimè conjunxit, potuisse elementis sacramentalibus conferre vim producendi gratiam. 2° Hic modus est magis conformis Scripturæ et decisionibus Ecclesiæ, quæ effectum sacramentalem attribuunt immediatè sacramento, et non Deo.

Ad 4<sup>am</sup> scilicet : *Utrum productio gratiæ in sacramento fiat æqualiter an inæqualiter ?*

*Resp.* Vel sacramenta administrata differunt numero tantum, ut v. g. duo Baptismi; vel specie, v. g. Baptismus et Eucharistia.

1° Si differant numero tantum : gratiam producunt æqualem cum dispositiones subjectorum sunt æquales; inæqualem verò, cum dispositiones subjectorum sunt inæquales. Quia sacramenta operantur ad instar causarum naturalium, quæ in subjectis æqualiter dispositis æqualem producunt effectum, inæqualem verò in subjectis inæqualiter dispositis.

(1) Ità Scotistæ post Scot. in 4, dist. 1, q. 3; Meléb. *Can. de relect. Sacram.* p. 4; Molina, p. 1, q. 43, art. 5; Vasquez, in 3 p. disp. 132; De Lugo, Becanus, Juenin, Tournely, etc.

(2) Ità Thomistæ post D. Thomam, 3 p. q. 62, art. 1; Bellarmine. l. 2 de Sacram. c. 11; Suarez, in 3 p. disp. 9, sect. 1; Estius, Maldonat, etc.

2<sup>o</sup> Si sacramenta differant specie: inæqualem producunt gratiam in subjectis, etiam suppositâ æqualitate dispositionum. Nam juxta Concil. Trid. sess. 7, can. 3, sacramenta dignitate differunt, ergo effectibus differre debent.

## II.

### PARS MORALIS.

Pars moralis exponit leges divinas de sacramentis.—  
Aliæ sunt *generales*, aliæ *speciales* ministro, vel sub-  
jecto sacramenti.

#### I.—LEGES GENERALES.

Resumuntur in propositione sequenti :

Per legem religionis quodlibet factum sacramentis injuriosum prohibetur, omnibus, sub gravi aut sub levi, pro gravitate aut levitate materiæ.

*Prob. 1<sup>a</sup> p.* Per legem religionis quodlibet factum sacramentis injuriosum prohibetur: Nam sacramento inest vis producendi gratiam, proindè sacramentum est res sacra; porro per legem religionis prohibetur quodlibet factum rei sacræ injuriosum, ut constat ubi *de lege Religionis*.

2<sup>a</sup> p. Prohibetur omnibus: Sacramentum enim est de se, ac proindè omnibus venerandum; ergo injuria ipsi irrogata est de se, ac proindè omnibus prohibita.

3<sup>a</sup> p. Sub gravi aut sub levi, pro gravitate aut levitate materiæ: Nam evidenter patet materiam præsentem admittere gravitatem et levitatem. Porro gravitas



aut levitas obligationis in legibus naturalibus proportionem habet cum gravitate aut levitate materiæ.

## II.—LEGES SPECIALES.

Aliæ spectant ministrum, aliæ subjectum.

### § 1. — DE LEGIBUS SPECIALIBUS MINISTRO.

Duplici propositione continentur, quarum prior spectat ad administrationem ipsam, posterior ad modum administrationis.

PROPOSITIO 1<sup>a</sup> (spectans ad *administrationem in se consideratam*). Minister tenetur ex charitate, si non sit pastor, ex charitate et justitiâ, si sit pastor, administrare sacramenta fidelibus; nisi adsit ratio dispensans. Tenetur autem sub gravi, aut sub levi, prout materia est gravis aut levis.

*Prob. p. p. 1<sup>a</sup>.* Minister, *si non sit pastor*, tenetur *aliquandò ex charitate* administrare sacramenta: Siquidem lege charitatis, homo tenetur opitulari in ordinem naturalem, tum supernaturalem, proximo indigenti, nisi adsit ratio dispensans. Porro fieri potest ut proximus ministri indigeat administratione sacramenti, et minister non habeat rationem dispensantem.

Tenetur ex *charitate et justitiâ, si sit pastor*: Ex charitate: ob rationem præcedentem. Ex justitiâ: minister enim functiones pastorales acceptando, se obligat quasi-contractu, ac proinde ex justitiâ, ad subveniendum omnibus suis in necessitatibus supernaturalibus.

*2<sup>a</sup> p.* *Nisi adsit ratio dispensans*: Adveniente enim ratione dispensante, lex jam non obligat.

Porro sufficientia, aut non sufficientia rationum dispensationis determinatur communi æstimatione prudentium. — Ad pronuntiandum prudenter, attendendum est 1. ad titulum obligationis ministri: gravior enim, cæteris paribus, ratio requiritur ad dispensandum pastorem quàm alium ministrum; 2. ad necessitatem subjecti: gravior enim, cæteris paribus, ratio exigitur ad dispensandum in necessitate extremâ quàm in gravi, in necessitate gravi quàm in communi.

Undè 1<sup>o</sup> minister quicumque, sive sit pastor, sive non, tenetur, etiam sub periculo vitæ, administrare sacramentum necessarium proximo constituto in necessitate spiritali extremâ. Positis enim circumstantiis, periculum mortis non sufficit ad dispensandum ab obligatione subveniendi proximo.

2<sup>o</sup> Pastor, non verò alius, tenetur cum periculo vitæ administrare sacramentum necessarium ad subveniendum individuo in gravi necessitate spiritali posito. Tenetur pastor: quia quasi-contractus hucusque extenditur. Alius non tenetur: quia vi charitatis solius nemo tenetur sub periculo vitæ subvenire individuo posito in necessitate solummodò gravi.

In hoc tamen casu minister non pastor obligaretur cum levi detrimento erga individuum qui versaretur in gravi necessitate; cum gravi detrimento erga societatem.

3<sup>o</sup> Minister, etiam pastor, non tenetur administrare sacramentum subdito irrationabiliter petenti. Sic v. g. non tenetur pastor quotidie cum scrupuloso et aliis tempus inutiliter terere, quia nec talibus personis, nec sacerdoti expedit tam frequens confessio.

3<sup>a</sup> p. Tenetur *sub gravi*, aut *sub levi*, prout materia est *gravis* aut *levis*; Evidens est enim hanc obligationem admittere gravitatem aut levitatem materiae.

Sic peccant graviter pastores animarum, qui saepe ministerium suum, etiam extra necessitatem, ovibus suis denegant; aut qui se morosos et difficiles praebent; qui subditorum confessiones excipere nolunt, nisi paucis diebus intra mensem.

Leviter autem peccaret pastor, qui extra necessitatem uni, vel alteri, aut eidem semel vel iterum petenti denegaret sacramentum Pœnitentiæ aut Eucharistiæ.

PROPOSITIO II<sup>a</sup> (spectans ad modum administrationis). Minister conficiens aut administrans sacramentum tenetur, *sub gravi* aut *sub levi*, prout materia est *gravis* aut *levis*, observare omnia quæ exigunt religio, charitas et justitia.

Quæ propositio evidens est.

Ex illa deducitur solutio quæstionum de obligationibus specialibus ministri. Præcipuas tantum exponemus.

Obligationes ministri sunt: aliæ *personales*; aliæ *relativæ* ad *elementa*, ad *subjectum* sacramenti.

#### I. De obligationibus personalibus ministri.

Quæst. 1<sup>a</sup>. *Utrum, ad licitam sacramentorum administrationem, sanctitas* (exemptio peccati mortalis) *in ministro requiratur sub levi, an sub gravi; utrum, posita necessitate sanctitatis, minister teneatur ad præviam sacramenti Pœnitentiæ receptionem?*

Ad 1<sup>am</sup> quæst. partem,

Resp. *Certum est* ministrum ad conferenda sacra-

menta consecratum peccare mortaliter contra religionem, si, conscius peccati mortalis, sacramentum solemniter administret extra necessitatis casum. Quia gravem injuriam infert sacramento, et Christo primario sacramenti ministro quem repræsentat.

*Controvertitur* autem 1<sup>o</sup> utrùm peccet graviter minister qui, conscius peccati mortalis, confert sacramentum ad cujus administrationem, non est specialiter consecratus.

De hac quæstione duplex est opinio. *Prima* negat (1). Quia obligatio ad sanctitatem in administratione sacramentorum oritur ex consecratione ministri in ordine ad sacramenta conferenda, non verò ex sanctitate Christi et sacramenti. *Secunda* affirmat, ob rationes suprà expositas (2).

S. Ligorius primam vocat probabilem; in secundam tamen magis inclinat.

*Controvertitur* 2<sup>o</sup> utrùm peccet graviter sacerdos qui, conscius peccati mortalis, administrat sacramentum, sed non solemniter.

Diceretur sacerdos administrare sacramentum *non solemniter*, quando illud conferret in casu quo laicus validè et licitè, sacerdote absente, illud administraret. Agitur ergo tantùm de baptismo in casu necessitatis.

Duplex opinio, ut in quæstione præcedenti. Opinio negans hanc ratione nititur scilicet, ministrum conferen-

(1) Ità Concina, Tournely, Nat. Alexander, Salm. cum Suarez, Bonacina, etc.

(2) Collet, Croix, De Lugo, Vasquez, etc., apud S. Lig. theol. mor. de Sacram. in gen. n. 33.

tem sacramentum non solemmniter non agere quatenus est consecratus (1).

*Controvertitur* 3<sup>o</sup> utrū peccet mortaliter qui, conscius peccati mortalis, administrat sacramentum, urgente gravi necessitate.

Vel minister exercet functiones in quibus necessitas administrandi sacramentum est obvia, vel non.

Si prius: peccat mortaliter minister. Siquidem ratione functionum tenetur semper esse paratus ad sacramenta administranda. Sic peccarent mortaliter parochus, vicarius, sacerdos ministrans in amplis nosocomiis, obstetrix in quādam opinione, etc., qui conferrent sacramenta in statu peccati mortalis.

Si posterius: *Quidam* affirmant, ob rationes supra expositas. *Alii* probabilius negant, modò periculum adeò sit urgens ut minister actum contritionis elicere non possit. Nam ex unā parte minister non tenetur ratione functionum suarum ad statum gratiæ permanentem; ex alterā parte, juxta hypothesim, periculo adveniente, non potest elicere actum contritionis (2).

Ob paritatem rationis probabilius concluditur peccare mortaliter contra religionem sacerdotem qui, conscius peccati mortalis, distribuit Eucharistiam extra Missam, eam defert, vel immediatè vel mediatè tangit; non peccare autem mortaliter sacerdotem qui concionem habet, diaconum aut subdiaconum qui functiones suas exercet in statu peccati mortalis, quia illi actus et similes non videntur sub gravi exigere sanctitatem (3).

(1) Vid. S. Lig. loco citato.

(2) S. Lig. *de Sacram. in gen.* p. 33.

(3) Ibid. à n. 35 ad n. 42.

Ad 2<sup>m</sup> q. p. scilicet: *Utrū minister sacramentū conscius peccati mortalis teneatur sacramentum pœnitentiæ præmittere administrationi sacramentorum?*

*Resp.* Vel agitur de celebratione Missæ, vel de administratione aliorum sacramentorum.

Si de Missæ celebratione: certò tenetur minister ad receptionem pœnitentiæ, saltem ex lege ecclesiasticâ, ut infra explicabimus sub titulo *de Eucharistid.*

Si de aliis sacramentis: duplex opinio.

*Prima* affirmat. Quia 1. fidelis in statu peccati mortalis tenetur ad confessionem, à fortiori sacerdos administraturus sacramentum. Quia 2. tenetur ad confessionem sacerdos celebraturus, à pari sacerdos ministraturus aliud sacramentum. Quia 3. sacerdos sacramentum administraturus debet esse conscius statûs gratiæ; porro hoc est impossibile ei qui reus peccati mortalis sacramentum pœnitentiæ non recipit. *Secunda* probabilior negat. Minister enim nullâ lege tenetur ad receptionem pœnitentiæ. Nec lege naturali: siquidem hoc unum exigit jus naturale, ut minister sit conscius statûs gratiæ; porro hæc conditio verificari potest per contritionem perfectam. Non lege positivâ divinâ: equidem controvertitur utrū receptio sacramenti pœnitentiæ lege divinâ exigatur ante communionem; sed nihil indè, nam dubium est utrū hæc necessitas sit à jure divino. Aliundè Deus potuit exigere receptionem pœnitentiæ ad sacramentum Eucharistiæ, quin eam exigat ad alia sacramenta. Nec lege ecclesiasticâ: nulla enim assignari potest (1).

(1) Vid. S. Lig. de Sacram. n. 34.

**Quæst. 2<sup>a</sup>. Utrum minister teneatur ad attentionem in actu administrationis sacramenti?**

**Resp.** Minister tenetur ad attentionem in administratione sacramentorum; sub gravi, in confectione Eucharistiæ; sub levi, in aliis sacramentis. — Tenetur: injuriam enim præberet sacramento; proinde contra religionem peccaret minister, qui cum voluntariis distractionibus sacramentum conficeret. Tenetur sub gravi in confectione Eucharistiæ, ob sacramenti dignitatem. Sub levi, in aliis sacramentis, juxta communem theologorum sententiam, nisi distractio voluntaria ministrum graviter exponat periculo errandi in formâ sacramenti.

**Quæst. 3<sup>a</sup>. Utrum minister possit accipere et exigere stipendium pro administratione sacramenti?**

**Resp.** Potest, modo stipendium non accipiat in pretium rei sacræ, aut non exigit ultra taxationem ab Episcopo vel consuetudine factam. — Potest accipere stipendium: minister enim jus habet ad convenientem sustentationem. Modo non accipiat stipendium ut pretium rei sacræ: alioquin reus fieret simoniæ, quæ est peccatum ex toto genere suo mortale. Nihil exigit ultra taxationem: alioquin reus esset injustitiæ.

## II, De obligationibus ministri relativis ad elementa sacramentorum.

**Quæst. 1<sup>a</sup>. Utrum minister possit adhibere materiam dubiam?**

**Resp.** Non potest, nisi adsit necessitas administrandi sacramentum.

Non potest: Nam 1. exponeret sacramentum nullitati, huic gravem injuriam inferret; ac proinde pecca-

ret graviter contra religionem. 2º Exponeret subjectum sacramenti privationi effectus sacramenti, ad quem jus habet promissione implicita ministri ; peccaret proinde contra charitatem et justitiam.

Nisi adsit necessitas : In hoc enim casu licet exponere sacramentum nullitati, ita permittente Deo qui, cum instituerit sacramenta propter hominum salutem, censetur potius providere fini sacramentorum, seu salutem hominum, quam medio, seu honori materiali sacramentorum. — Ut autem adsit necessitas, requiritur ut sacramentum sit moraliter necessarium ad salutem subjecti, et absit materia certa.

Quæst. 2ª. *Utrum minister possit adulterare formam etiam accidentaliter ?*

Resp. Non potest. Nam inferret sacramento injuriam gravem aut levem, pro gravitate aut levitate adulterationis, peccaret proinde contra religionem graviter aut leviter pro circumstantiis. — Si adulteratio esset substantialis, minister peccaret insuper contra charitatem et justitiam.

Quæst. 3ª. *Utrum minister possit iterare sacramentum valoris dubii ?*

Resp. Vel adest dubium prudens de valore sacramenti, vel non.

Si prius : Non solum potest, sed debet iterare ; alioquin subjectum exponeret privationi effectuum sacramenti.

Si posterius : Non potest iterare absque gravi peccato ; siquidem in hoc casu minister absque ratione sufficiente exponeret sacramentum nullitati.

Nota. Ad pronuntiandum utrum dubium sit prudens



sunt imprudens, attendendum est specialiter ad necessitatem sacramenti. Sic iterandus est Baptismus et Ordo, etiamsi pro valore administrationis militet magna probabilitas. Sic major probabilitas requiritur ad iterandam absolutionem poenitenti reo peccati venialis tantum, quam si poenitens versaretur in statu peccati mortalis.

Quæst. 4<sup>a</sup>. *Utrum minister possit administrare sacramentum cum intentione conditionali; et, in hypothesis affirmativa, utrum conditio exprimi debeat?*

Resp. Ad 1<sup>am</sup> part. Minister potest administrare sacramenta cum intentione conditionali, modò adsit causa gravis. Nam per collationem sacramenti sub intentione conditionali providetur, tum bono subjecti, qui ad sacramenta accedit, ut evidens est; tum reverentiæ sacramenti, quia, tali posita intentione, si non adsint conditiones validitatis, minister reverà non vult administrare, nec proinde administrat sacramentum.

Ad 2<sup>am</sup> part. Necesse non est ut exprimatur conditio, nisi illud præscribat rubrica, ut in Baptismo.

### III. De obligationibus ministri relativis ad subjectum.

Quæst. 1<sup>a</sup>. *Utrum minister possit administrare sacramentum indignis petentibus?*

Not. Nemini dubium est confessarium nullo modo posse uti notitiâ per confessionem acquisitâ ad dene-ganda sacramenta indignis.

Resp. Vel peccator est publicus, vel occultus.

*Publicus* censetur peccator, cujus indignitas notoriâ est jure, seu sententiâ judicis, *facto*, seu cum nullâ tergiversatione celari potest. *Occultus* est autem peccator,

si indignitas nec jure, nec facto notoria sit. Item probabilius censi debet occultus in loco petitionis, peccator cujus indignitas ibi ignoratur, quamvis sit publicus in alio loco.

1<sup>o</sup> Si peccator sit publicus : — Minister tenetur sub gravi ipsi denegare sacramentum, sive petat publice, sive occultè. Attamen adest exceptio, si agatur de sacramento poenitentiae, vel si indignitas subjecti nota sit solà viâ confessionis.

In genere tenetur denegare : siquidem, administrando sacramentum, absque ratione concurreret profanationi sacramenti, malo spirituali subjecti sacramentum polluentis, scandalo testium violationis ; peccaret proinde graviter contra religionem et charitatem.

Adest exceptio 1. si agatur de poenitentia ; illud enim sacramentum pro peccatoribus institutum est ; 2. si indignitas nota sit solà viâ confessionis ; alioquin violaretur sigillum confessionis.

2<sup>o</sup> Si peccator sit occultus : — vel petit occultè, vel publice.

Si occultè : Minister tenetur sub gravi denegare sacramentum, propter rationes superius expositas.

Si publice : Administrandum est sacramentum ; nisi, inquit S. Ligorius, agatur de sacramento Ordinis.

Administrandum est sacramentum : Nam 1. licet ponere actionem de se bonam, quamvis sit occasio mali, cum adsunt rationes sufficientes. Ergo licet administrare sacramentum indigno occulto publice petenti, si actio ministri in hoc casu sit bona, simplex occasio mali, et adsint aliunde rationes sufficientes. Atqui actio ministri, seu administratio sacramenti, est in se bona.

hoc evidens est. Est simplex occasio mali : siquidem sacrilegium non oritur directè ex actu ministri, benè verò ex malà voluntate subjecti sacramento abutentis. Adsunt rationes sufficientes : scilicet incommoda quæ sequerentur è sacramenti denegatione, scandala et perturbationes in Ecclesià, periculum amovendi à sacramentis fideles metu diffamationis, etc. 2. Rituale Romanum, titulo *de Eucharistià*, hæc habet : *Occultos peccatores, si occultè petant, et eos non emendatos agnoverit (minister) repellat; non autem, si publicè petant, et sine scandalo illos præterire nequeat.*

Nisi agatur de ordine : Nam indignus repelli debet, inquit S. Ligorius, n. 52, etiam cum infamià, ob bonum publicum privato præferendam.

Quæst. 2<sup>a</sup>. *Utrum liceat simulare administrationem sacramenti, ne indigno conferatur ?*

*Resp.* Vel agitur de simulatione in quâ minister adhiberet materiam nullam, aut formam pronuntiaret absque intentione conficiendi sacramentum, vel de simulatione in quâ minister verbis formæ alia verba substitueret.

Si priùs : Graviter illicita est simulatio. Nam 1. injuriam gravem infert sacramento. 2. Damната est ab Innocentio XI. propositio sequens : *Urgens metus gravis est causa sacramenti administrationem simulandi.*

Si posterius : licita est simulatio ad occultandam alicuius indispositionem subjecti, modò minister deceptionem non intendat. Licita est simulatio : Nam per hujusmodi simulationem, minister nec violat sacramentum, quod reverà non administrat, nec mentitur, sed solummodò præbet eum ratione sufficienti occasionem

erroris. Sic v. g. licet confessario super indispositum subjectum aliquid orare et dare crucem, ne ejus indispositio prodatur. Modò minister deceptionem non intendat: alioquin mendacii saltem formalis reus esset.

## § II.—DE LEGIBUS SPECIALIBUS SUBJECTO.

Duplici propositione continentur, quarum prior spectat ad sacramentorum receptionem, posterior verò ad modum receptionis.

PROPOSITIO I<sup>a</sup> (spectans ad ipsam *receptionem* sacramentorum). Subjectum sub gravi tenetur recipere quædam sacramenta necessitate medii, quædam necessitate præcepti.

Necessitate *medii* tenentur recipere Baptismum in re aut in voto, omnes homines; Pœnitentiam in re aut in voto, qui commiserunt peccatum mortale.

Necessitate *præcepti* tenentur recipere Confirmationem et Eucharistiam, omnes adulti; Extremam-Uctionem, qui sunt in periculo mortis; Ordinem, qui ad exercendas functiones sacras destinantur; sacramentum Matrimonii, qui volunt inire matrimonium.

Quæ omnia sub titulis specialibus de sacramentis explicabuntur.

PROPOSITIO II<sup>a</sup> (spectans ad *modum* receptionis). Subjectum recipiens sacramentum tenetur sub gravi aut sub levi, prout materia est gravis aut levis, ad omnes conditiones et circumstantias, quas exigit religio ad dignam receptionem.

Quæ propositio probatione non indiget.

Indè solvuntur quæstiones sequentes de obligationibus subjecti, sive personalibus, sive relativis ad ministrum.

I. De obligationibus personalibus subiecti.

Quæst. 1<sup>a</sup>. *Utrùm subjectum recipiens sacramentum teneatur ad sanctitatem; et, in hypothesi affirmativâ, utrùm teneatur ad sacramentum pœnitentiæ?*

*Resp.* Ad 1<sup>am</sup> q. p. Vel agitur de sacramentis mortuorum, vel de sacramentis vivorum. Si priùs, non tenetur ad sanctitatem; si posterius, tenetur.

Ad 2<sup>am</sup>. Tenetur ad sacramentum pœnitentiæ, si recipienda sit Eucharistia.

Controvertitur, si recipiendum sit aliud sacramentum. Vid. superius quæ dicta sunt de sanctitate ministri.

Quæst. 2<sup>a</sup>. *Utrùm subjectum teneatur ad attentionem?*

*Resp.* Affirm. Qui enim sacramentum reciperet cum distractionibus voluntariis ipsi injuriam irrogaret.

II. De obligationibus subiecti relativis ad ministrum.

Quær. *Utrùm subjecto liceat petere sacramentum à ministro indigno?*

*Resp.* Non licet, nisi adsint rationes sufficientes. — Non licet: subjectum enim præberet absque ratione sufficienti occasionem violationi sacramenti et peccato ministri. Nisi adsint rationes sufficientes: nam petitiò est de se bona, naturâ suâ non incitat ad malum; est ergo mera occasio mali. Porro licet ponere occasionem mali cum rationibus sufficientibus.

Gravitas rationis crescere debet pro indignitate ministri. Sic liceret recipere sacramenta à ministro indigno, sed non censurato, si urgeret præceptum con-

fessionis et communionis; si ex dilatione susceptionis immineret periculum lapsûs; si subjectum indigeret perito directore, et alium habere non posset, nisi post longum tempus, etc. Graviore requiruntur rationes, si minister sit censuratus toleratus. Gravissimæ, id est, necessitas extrema, vel saltem gravissima, si minister sit censuratus non toleratus.

### III.

#### PARS DISCIPLINARIS.

Obligationes ministro et subjecto per legem ecclesiasticam impositæ propositionibus sequentibus continentur :

1<sup>a</sup>. Minister, vi legis ecclesiasticæ, tenetur administrare sacramenta quando subjectum tenetur eadem lege ea recipere. Siquidem hæc duo sunt correlativa.

2<sup>a</sup>. Subjectum tenetur recipere sacramenta quorum receptio præscribitur ab Ecclesiâ. Ecclesia enim potest præcipere ea quæ judicat necessaria et utilia ad bonum spirituale fidelium.

Sub titulis *De Sacramentis in specie*, indicabuntur sacramenta quorum receptio ab Ecclesiâ præcipitur.

3<sup>a</sup>. Minister in administratione, et subjectum in susceptione sacramentorum, tenentur ad ritus præscriptos ab Ecclesiâ. Concil. Trid. sess. 7, can. 15, hæc ait : *Si quis dixerit receptos et approbatos Ecclesiæ Catholicæ ritus in solemnibus sacramentorum administratione adhiberi consuetos, aut contemni, aut sine peccato à minis-*

*tris pro libito omitti, aut in novos alios per quemcumque ecclesiarum pastorem mutari posse; anathema sit.*

Ritus autem adhibendi in administratione et receptione sacramentorum in libris ritualibus continentur.



# INDEX ANALYTICUS.

## DE EXPOSITIONE THEOLOGICA.

Expositio theologica versatur circa cognitionem medium, quæ Deus instituit ut homo ad suum finem dirigatur . . . . . 1

### QUÆSTIONES PRÆVIÆ.

QUÆSTIO I. *Utrum homo habeat finem ultimum, et quanam sit iste finis?* . . . . . *ibid.*

Definito sensu hujus vocis *finis*, . . . . . *ibid.*

Probatur per partes 1° hominem habere finem ultimum; 2° finem ultimum hominis esse Deum, quatenus est 2

cognoscendus per visionem intuitivam, et amandus per amorem beatificum. . . . . 3

*Corol.* Ex dictis in probatione utriusque propositionis sequitur 1. Deum, quatenus est Veritas et Bonum, esse necessariò finem hominis; . . . . . 7

2. visionem intuitivam et amorem beatificum non esse finem essentialem et debitum homini; . . . . . *ibid.*

3. perfectionem et beatitudinem homini possibiles præcipuè constitui visione intuitivâ et amore beatifico. 8

QUÆSTIO II. *Utrum Deus instituerit media ad dirigendum hominem ad suum finem; et quænam sint ista media?* . . . . . *ibid.*

Probatur p. p. 1° Deum instituisse media; . . . . . *ibid.*

2° media instituta respondere naturæ finis à Deo assignati, et triplici generi facultatum quibus Deus hominem dotavit . . . . . 9

Undè concluditur hominem ad suum finem dirigi medio regularum sive *intelligentiæ*, sive *voluntati* et *activitati* suæ impositarum. . . . . 10

Hinc dividitur expositio theologica in diversas partes, pro diversis speciebus regularum de quibus agit. — Divisio generalis in duas partes, *dogmaticam* scilicet et *moralem*. . . . . *ibid.*



# DE DOGMATICA.

## I.—DE DOGMATE

### IN GENERALE.

Definitur theologia dogmatica.—Sub titulo præsentis agendum de proprietatibus generalibus actûs fidei ejusque regularum. Undè, . . . . . 13

### CAPUT I.

De actu fidei absolutè considerato.

ARTICULUS I. *De naturâ et conditionibus actûs fidei.* . . . . . *ibid.*

§ 1.—*De Naturâ.* . . . . . *ibid.*

Definitur fides in genere.—Dividitur in divinam, ecclesiasticam et humanam.—Definitur fides *divina*, habitualis et actualis; actualis merè divina et catholica, explicita et implicita.—Definitur fides *ecclesiastica*. 14

§ 2.—*De Conditionibus.* . . . . . 15

*Punct. I.* De conditionibus fidei catholicæ. . . . . 16

I. De conditionibus *extrinsecis* et præviis: . . . . . *ibid.*

1<sup>o</sup>. Requiritur convictio legitima de veritatibus sequentibus: Deus existit, est verax, hominibus locutus est, etc. . . . . *ibid.*

2<sup>a</sup>. Requiritur causa supernaturalis excitans et adjuvans mentem ut adhæreat debito modo veritati credendæ. 17

II. De conditionibus *intrinsecis* et constitutivis: . . . . . 18

1<sup>o</sup> Ex parte *subjecti*. Requiritur adhæsiō firma, includens actum libertatis et intelligentiæ. . . . . *ibid.*

2<sup>o</sup> Ex parte *objecti*. Objectum fidei debet esse veritas in verbo Dei contenta, veritas obscura et ab Ecclesiâ proposita tanquā à Deo revelata.—Specialiter agitur de obscuritate objecti, et de propositione veritatis per Ecclesiam, . . . . . *ibid.*

3<sup>o</sup> Ex parte *motivi*. Mens debet adhærere veritati quia Deus eam revelavit et summa veritas est. . . . . 21

<i>Punct. II.</i> De conditionibus fidei simpliciter divinæ. . . . .	21
<i>Punct. III.</i> De conditionibus fidei ecclesiasticæ. . . . .	<i>ibid.</i>
<i>ARTICULUS II.</i> De possibilitate actûs fidei . . . . .	22
<i>Punct. I.</i> De possibilitate actûs fidei catholicæ. . . . .	<i>ibid.</i>
<i>Punct. II.</i> De possibilitate actûs fidei simpliciter divinæ. . . . .	24
<i>Punct. III.</i> De possibilitate actûs fidei ecclesiasticæ. . . . .	<i>ibid.</i>
<i>ARTICULUS III.</i> De proprietatibus absolutis actûs fidei. . . . .	25
<i>Punct. I.</i> De proprietatibus actûs fidei catholicæ. . . . .	<i>ibid.</i>
1 <sup>o</sup> Sub respectu originis, naturæ et finis, actus fidei est supernaturalis. . . . .	<i>ibid.</i>
2 <sup>o</sup> Sub respectu subjecti, est 1. liber, 2. certus, certitudine facti. . . . .	<i>ibid.</i>
3 <sup>o</sup> Sub respectu motivi, — præambula remota sunt 1. certa objective, 2. certa certitudine humanâ; — præambulum proximum est 1. certum, 2. certum certitudine ecclesiasticâ; — actus ipse fidei est 1. certus, 2. certus certitudine divinâ. . . . .	26
4 <sup>o</sup> Sub respectu objecti, actus fidei est verus et supernaturalis. . . . .	27
<i>Observ.</i> 1. Præambula remota et præambulum proximum posterius fieri possunt actus fidei divinæ propriè dicti. . . . .	<i>ibid.</i>
2. Analysis fidei quoâd causas et quoâd motiva. . . . .	28
<i>Punct. II.</i> De proprietatibus actûs fidei simpliciter divinæ. . . . .	<i>ibid.</i>
<i>Punct. III.</i> De proprietatibus actûs fidei ecclesiasticæ. . . . .	<i>ibid.</i>

CAPUT II.

De regulis actûs fidei.

Agitur tantum de regulis generalibus actûs fidei, quatenus est actus intelligentiæ. . . . .	29
<i>Quæst. 1<sup>a</sup>.</i> Quænam sit origo regularum actûs fidei? . . . . .	<i>ibid.</i>
<i>Quæst. 2<sup>a</sup>.</i> Quænam regulæ fluant ex præcepto et naturâ actûs fidei? . . . . .	<i>ibid.</i>
<i>Quæst. 3<sup>a</sup>.</i> Quinam sint effectus regularum actûs fidei? . . . . .	30

CAPUT III.

De relationibus generalibus actûs fidei cum suis regulis.

<b>ARTIC. I. De proprietatibus moralibus actûs intellectualis.</b>	31
<i>Quæst. 1<sup>a</sup>. Utrum dentur actus intellectuales de se indifferentes, et quinam sint?</i>	<i>ibid.</i>
<i>Quæst. 2<sup>a</sup>. Utrum dentur actus intellectuales boni, et quinam sint?</i>	32
<i>Quæst. 3<sup>a</sup>. Utrum dentur actus intellectuales mali, et quinam sint?</i>	<i>ibid.</i>
Illicita est 1 <sup>o</sup> propositio hæretica.—Exponuntur propositiones quæ sunt, et quæ non sunt de fide.	<i>ibid.</i>
2 <sup>o</sup> Propositio erronea;	34
3 <sup>o</sup> Propositio hæresi proxima, sapiens hæresim, hæreses suspecta;	<i>ibid.</i>
4 <sup>o</sup> Propositio proxima errori, sapiens errorem, suspecta de errore; male sonans, piarum aurium offensiva;	35
5 <sup>o</sup> Propositio temeraria;	<i>ibid.</i>
6 <sup>o</sup> Propositio opposita alicui revelationi privatæ certò cognitæ emissæ ab eo cui revelatio facta est;	36
7 <sup>o</sup> Propositio opposita propositioni ab Ecclesiâ definitæ, licet non contentæ in verbo Dei.	<i>ibid.</i>
Adduntur notiones de propositione scandalosâ, schismaticâ, seditiosâ, blasphemâ, impiâ.	<i>ibid.</i>
<b>ARTIC. II. De proprietatibus relativis ad meritum et ad finem.</b>	38

## II.—DE DOGMATE

### IN SPECIE.

Omnia dogmata exponenda sub ratione Dei.	39
Agendum tantum de actibus divinis tum ad intrâ, tum ad extrâ.	<i>ibid.</i>

I. — DE ACTIBUS DIVINIS AD INTRA.  
DE TRINITATE.

Notiones de Trinitate. . . . .	39
--------------------------------	----

CAPUT I.

De existentia Trinitatis.

QUEST. I. <i>Utrum existentia Trinitatis possit demonstrari per rationem; seu, quid valeat ratio circa dogma Trinitatis?</i> . . . . .	41
Refellitur 1 <sup>a</sup> solutio asserens rationem demonstrare impossibilitatem Trinitatis. . . . .	42
Refellitur 2 <sup>a</sup> solutio asserens rationem propriis viribus posse pervenire ad notionem et demonstrationem Trinitatis. . . . .	43
Refellitur 3 <sup>a</sup> solutio asserens rationem, notione Trinitatis praevis acceptata a revelatione, posse propriis viribus demonstrare existentiam Trinitatis. . . . .	48
Unde concluditur rationem, neque Trinitatis impossibilitatem probare, neque ad hujus dogmatis notionem et demonstrationem propriis viribus pervenire posse. . . . .	49
QUEST. II. <i>Utrum existentia Trinitatis possit probari per auctoritatem? id est, . . . . .</i>	<i>ibid.</i>
§ 1. — <i>Utrum possit probari traditionibus paganorum?</i> . . . . .	<i>ibid.</i>
§ 2. — <i>Utrum... scriptura et traditione judaica?</i> . . . . .	<i>ibid.</i>
I. <i>Scriptura V. T.</i> — 1. Quidam textus videntur indicare plures esse in Deo. . . . .	50
2. In aliis textibus mentio est de Patre et Filio. . . . .	51
3. In aliis apparet quaedam mentio de Spiritu S. . . . .	<i>ibid.</i>
4. Alibi numerus trium personarum insinuari videtur. . . . .	<i>ibid.</i>
II. <i>Traditione judaica.</i> — 1. Valde probabile est quamdam Trinitatis revelationem concessam fuisse patriarchis, prophetis et justis veteris testamenti. . . . .	52
2. Probabile est subobscuram traditionem viguisse inter doctos et legisperitos. . . . .	53

3. Certum est nullam, vel omnino imperfectam apud vulgum Judæorum exstitisse cognitionem Trinitatis.	53
§ 3.—Utrum... probari possit scripturâ N. T., traditione christianâ, fide et decisionibus Ecclesiæ. . . .	54
I. <i>Scripturâ N. T.</i> — 1. Textus generales. . . .	55
2. Textus speciales. . . .	57
II. <i>Traditione christiand.</i> — Constat 1. professionibus fidei, . . . .	61
2. confessionibus martyrum, . . . .	62
3. testimoniis Patrum, . . . .	<i>ibid.</i>
4. factis. . . .	63
III. <i>Fide et decisionibus Ecclesiæ.</i> . . . .	64

## CAPUT II.

### De proprietatibus.

ARTIC. I. <i>De proprietate absolutâ.</i> . . . .	66
ARTIC. II. <i>De proprietatibus relativis.</i> . . . .	<i>ibid.</i>
§ 1.—De proprietatibus sequentibus ex relationibus quas divinæ personæ habent inter se. . . .	<i>ibid.</i>
Punct. I. De proprietatibus communibus. . . .	<i>ibid.</i>
1 <sup>a</sup> . De æqualitate personarum divinarum . . . .	67
2 <sup>a</sup> . De circuminsessione . . . .	<i>ibid.</i>
Punct. II. De proprietatibus specialibus. . . .	<i>ibid.</i>
1 <sup>a</sup> . Filius à Patre solo procedit per generationem. . .	68
2 <sup>a</sup> . Spiritus S. à Patre Filioque procedit per spirationem.	70
3 <sup>a</sup> . Filius à Patre solo mittitur.—4 <sup>a</sup> . Spiritus S. à Patre et Filio mittitur. . . .	76
Corollaria. 1 <sup>o</sup> De processionibus divinis. . . .	78
2 <sup>o</sup> De relationibus divinis. . . .	79
3 <sup>o</sup> De proprietatibus personalibus propriè dictis. . .	80
4 <sup>o</sup> De notionibus divinis . . . .	<i>ibid.</i>
5 <sup>o</sup> De nominibus quæ unicuique personæ specialiter attribuantur. . . .	81
§ 2.—De proprietatibus sequentibus ex relationibus quas divinæ personæ habent cum creaturis. . . .	84
Punct. I. De proprietatibus communibus. . . .	<i>ibid.</i>
Punct. II. De proprietatibus specialibus. . . .	<i>ibid.</i>

Appendix de modo loquendi in exponendo SS. Trinitatis mysterio. . . . .	83
---	----

## II. — DE ACTIBUS DIVINIS AD EXTRA.

### DE PROVIDENTIA.

#### QUÆSTIO I.

*Utrum Deus provideat homini, quatenus homo est ens morale?*

Probatur providentia Dei erga hominem. . . . .	89
--	----

#### QUÆSTIO II.

*Quibus actibus Deus provideat homini in ordine morali?*

Indicatur triplex series actuum, scilicet actus <i>ante</i> tempus, <i>in</i> tempore, <i>post</i> tempus. . . . .	91
--	----

#### I.—DE ACTIBUS ANTE TEMPUS.

Tres actus distinguuntur. . . . .	<i>ibid.</i>
-----------------------------------	--------------

#### ACTUS PRIMUS.

Inter status possibles Deus eligit statum homini assignandum.

QUÆST. I. <i>Quinam sint status possibles?</i> . . . . .	92
--	----

Datis notionibus præviis de statibus, . . . . .	<i>ibid.</i>
---	--------------

Probatur 1 <sup>o</sup> impossibiles esse status in se, vel divinis perfectionibus repugnantes; 2 <sup>o</sup> possibles esse status nec in se, nec divinis perfectionibus repugnantes. . . . .	94
---	----

E 1<sup>o</sup> principio sequentia deducuntur corollaria:

Corol. 1. Impossibilis est omnis status in quo Deus non esset finis ultimus hominis. . . . .	95
--	----

Corol. 2. Impossibilis est status in quo homo non haberet media Deum cognoscendi et amandi. . . . .	<i>ibid.</i>
---	--------------

Corol. 3. Impossibilis est status in quo homo nasceretur vitiatus culpâ independenti à facto humano. . . . .	<i>ibid.</i>
--	--------------

E 2<sup>o</sup> principio seq. deducuntur:

Corol. 1. Possibilis est status naturalis in genere. . . . .	<i>ibid.</i>
--	--------------

Corol. 2. Possibilis est status naturæ puræ. . . . .	96
--	----



<i>Corol. 3.</i> Possibilis est status naturæ integræ. . . . .	98
<i>Corol. 4.</i> Possibilis est status supernaturalis in genere. . . . .	99
<i>Corol. 5.</i> Possibilis est status supernaturalis sine addito. . . . .	<i>ibid.</i>
<i>Corol. 6.</i> Possibilis est status justitiæ originatis. . . . .	<i>ibid.</i>
<i>Corol. 7.</i> Possibilis est status in quo elementis status supernaturalis essentialibus consociantur accidentia status naturæ puræ. . . . .	100
<i>Corol. 8.</i> Possibilis est status innocentiae. . . . .	<i>ibid.</i>
<i>Corol. 9.</i> Possibilis est status perseverantiae. . . . .	<i>ibid.</i>
<i>Corol. 10.</i> Possibilis est status naturæ lapsæ. . . . .	<i>ibid.</i>
<i>Corol. 11.</i> Possibilis est status naturæ lapsæ non reparatæ. . . . .	101
<i>Corol. 12.</i> Possibilis est status naturæ reparatæ. . . . .	102
<i>Corol. 13.</i> Probabilis possibilis est hominis reparatio absque satisfactione perfectâ. . . . .	<i>ibid.</i>
<i>Corol. 14.</i> Possibilis est reparatio per satisfactionem perfectam. . . . .	<i>ibid.</i>
<b>QUEST. II. Quinam sint status à Deo determinati?</b>	
<b>Tres numerantur.</b> . . . . .	103

## ACTUS SECUNDUS.

Deus vult hominis salutem, mediaque ad eam consequendam necessaria.

<b>Notiones præviæ.</b> . . . . .	<i>ibid.</i>
<b>QUEST. I. Utrum Deus velit salutem hominum, et quorum hominum?</b> . . . . .	104
<b>1º</b> Probatur 1º Deum voluisse salutem omnium hominum in statu innocentiae; . . . . .	<i>ibid.</i>
<b>2º</b> post peccatum originale, Deum velle salutem aliorum quam prædestinatorum; . . . . .	<i>ibid.</i>
<b>3º</b> etiam post peccatum originale, Deum velle salutem omnium et singulorum hominum; . . . . .	106
<b>4º</b> specialiter Deum velle salutem infantum sine baptismo morientium. . . . .	107
<b>QUEST. II. Utrum Deus velit pro hominibus media ad salutem necessaria, et pro quibus hominibus?</b> . . . . .	108

Probatur Deum velle media ad salutem necessaria omnibus hominibus, sive in statu innocentiae, sive in statu naturae lapsae. . . . .	108
QUÆST. III. <i>Quali volitione Deus velit salutem et media?</i>	<i>ibid.</i>
Distinctis volitionis speciebus, . . . . .	<i>ibid.</i>
Probatur 1º Deum velle media salutis in genere voluntate efficaci, absolutâ et interiore; . . . . .	109
2º Deum velle mediorum salutis applicationem 1. infantibus sine baptismo morientibus, voluntate inefficaci, conditionali sed sincerâ, 2. infidelibus adultis, ex D. Thomâ voluntate efficaci, absolutâ, sincerâ, 3. item christianis omnibus; . . . . .	110
3º Deum velle salutem prædestinatorum voluntate efficaci, voluntate absolutâ juxta quosdam, conditionali juxta alios, voluntate sincerâ; reproborum autem, voluntate inefficaci, conditionali et tamen sincerâ . . . . .	112

### ACTUS TERTIUS.

Deus prædestinat alios ad gloriam, alios ad pœnam æternam.

#### I. — DE PRÆDESTINATIONE PROPRIÈ DICTÂ.

Notiones præviæ . . . . .	113
I. <i>De existentia</i> . . . . .	114
Probatur admittendam esse prædestinationem. . . . .	<i>ibid.</i>
II. <i>De proprietatibus</i> . . . . .	117
I. De gratuitate. Quær. utrum prædestinatio sit gratuita, an verò pendeat ex meritis? . . . . .	<i>ibid.</i>
1º Quoâd effectus prædestinationis, — probatur 1. vocationem, seu primam gratiam excitantem, esse gratuitam, . . . . .	<i>ibid.</i>
2. justificationem esse gratuitam, . . . . .	<i>ibid.</i>
3. gloriam dari ex præcedentibus meritis de condigno. . . . .	118
2º Quoâd prædestinationem <i>in se</i> , — certum est 1. Deum ab æterno decrevisse donum primæ gratiæ excitantis absque ullo hominis merito, 2. ab æterno decrevisse donum gratiæ sanctificantis sine meritis, 3. ab æterno decrevisse donum gloriæ propter merita; . . . . .	<i>ibid.</i>



Controvertitur utrūm vita æterna, quæ datur ex merito, prædestinetur ex merito. . . . .	119
II. De certitudine. Quær. utrūm prædestinatio sit certa an incerta? . . . . .	122
III. DE REPROBATIONE.	
Notiones præviæ. . . . .	ibid.
I. De existentia . . . . .	123
Probatur admittendam esse reprobationis existentiam. . . . .	ibid.
II. De proprietatibus. . . . .	ibid.
Quæst. 1 <sup>a</sup> . Utrūm voluntate antecedente, an ex prævisis peccatis, Deus damnatos reprobet? . . . . .	124
1 <sup>a</sup> . Quoad reprobationem <i>positivam</i> , — probatur Deum reprobare ex prævisis peccatis. . . . .	ibid.
2 <sup>a</sup> . Quoad reprobationem <i>negativam</i> , — controversia est. . . . .	ibid.
Quæst. 2 <sup>a</sup> . A quibus peccatis pendeat reprobatio, an ex originali, an ex actualibus? . . . . .	126
Solvitur quæstio 1. de infantibus, 2. de infidelibus adultis, 3. de christianis. . . . .	ibid.

## II.—DE ACTIBUS IN TEMPORE.

Tres distinguuntur. . . . .	127
-----------------------------	-----

### ACTUS PRIMUS.

Dens constituit Adamum in statu innocentie.

Resumuntur elementa hujus actus. . . . .	ibid.
PRÆBATIO. . . . .	128
1 <sup>a</sup> Ppo.— <i>Deus constituit Adamum in statu innocentie.</i> . . . .	ibid.
Probatur per partes Deum Adamo concessisse:	
1 <sup>o</sup> elementa <i>essentialia</i> status innocentie, scilicet,	
1. finem supernaturalem, . . . . .	ibid.
2. media supernaturalia:—gratiam habitualement, . . . . .	129
gratiam actualement; . . . . .	130
2 <sup>o</sup> elementa <i>accidentalibus</i> status innocentie,	
1. intrinseca:— intelligentie, scientiam perfectam, immunitatem ab errore; . . . . .	131
voluntati, rectitudinem; . . . . .	133

corpore, immunitatem à morte, immunitatem à morbo;	133
2. extrinseca: dominium in animalia et alias inferiores creaturas;	134
habitationem in paradiso.	135
I <sup>a</sup> Ppo.—Hujus status conservatio aut amissio pendet	ibid.
Adamo ex fidelitate aut infidelitate.	ibid.
III <sup>a</sup> Ppo. — Status innocentie conservatio aut amissio pendet posteritati ex Adami fidelitate aut infidelitate.	136

EXPLICATIO.

§ 1. — Singillatim evolvuntur partes propositionum. . . 137

I<sup>a</sup> Propositionis.

I. De elementis essentialibus: (nil explicandum de fine.)	
De mediis,—1 <sup>o</sup> de gratia sanctificante, quæritur quænam sit causa justificationis Adami,	ibid.
quonam tempore concessa fuerit Adamo gratia habitualis,	138
quo modo Adam justificatus fuerit, utrùm absque præviis actibus propriis, an sub conditione actuum cum auxilio gratiæ productorum?	139
2 <sup>o</sup> De gratia actuali, quær. qualis fuerit gratia actualis Adamo concessa?	140

II. De elementis accidentalibus:

4 <sup>o</sup> Intrinsecis.—1. De dotibus intelligentiæ Adami,	
De scientiâ naturali.—Quæritur quænam objecta ordinis naturalis cognoscebat Adam?	142
quibus mediis has cognitiones acquisiverit?	143
quænam fuerint proprietates scientiæ Adami?	146
De scientiâ supernaturali.—Quær. quænam objecta ordinis supernaturalis cognoverit Adam?	147
quibus mediis has cognitiones acquisiverit?	149
quænam fuerint proprietates fidei protoparentis?	150
2. De dotibus voluntatis.—Quær. in quo sita fuerit rectitudo Adami, specialiter utrùm impossibilitatem peccandi incluserit?	151
quonam tempore rectitudo fuerit Adamo concessa?	154
3. De dotibus corporis.—Quær. quibus mediis Adamus à morbo et morte præservatus fuerit?	155
2 <sup>o</sup> De elementis intrinsecis. —1. De dominio in anima-	

lia et res inferiores, quær. quale fuerit, et quomodo Adam eo usus fuerit? . . . . .	156
2. De habitatione in paradiso, quær. utrùm ea quæ in scripturâ narrantur de paradiso intelligenda sint sensu litterali, an sensu metaphorico; et utrùm paradisu fuerit locus specialis? . . . . .	ibid.
<i>II<sup>a</sup> et III<sup>a</sup> Propositionis.</i>	
Quæst. 1 <sup>a</sup> . Utrùm Adam in primâ tentatione fidelis, deinde in gratiâ sanctificante, ac consequenter in statu innocentie confirmari debuisset? . . . . .	158
Quæst. 2 <sup>a</sup> . Utrùm in hypothesi prædictâ Adæ posterius in statu innocentie nati ac confirmati fuissent? . . .	ibid.
Quæst. 3 <sup>a</sup> . Utrùm Adam peccans post primam tentationem amittere debuerit sibi et posteris privilegia status innocentie? . . . . .	159
Quæst. 4 <sup>a</sup> . Utrùm Eva aut Adæ posterius peccatum personale committentes sibi et posteris amisissent privilegia status innocentie? . . . . .	ibid.
§ 2.— <i>Ostenduntur relationes propositionum.</i> . . . .	160
Ostenditur 1 <sup>o</sup> quomodo elementa status innocentie ad invicem coordinentur; . . . . .	ibid.
2 <sup>o</sup> quomodo naturalia pendeant quoad existentiam à supernaturalibus. . . . .	161

## ACTUS SECUNDUS.

Deus permittit lapsum hominis.

Summa dogmatis de lapsu hominis.— Errores. . . . .	162
PROBATIO.	
I <sup>a</sup> Ppo. — <i>Peccaverunt protoparentes, inde amiserunt sibi privilegia status innocentie.</i> . . . .	163
Probatur per partes	
I. Protoparentes peccavisse; . . . . .	ibid.
II. Indèque amisisse privilegia status innocentie	
1 <sup>o</sup> <i>essentialia</i> ,—1. gratiam sanctificantem, 2. finem supernaturalem, 3. gratias actuales; . . . . .	164
2 <sup>o</sup> <i>accidentalibus</i> ,—1. intrinseca: . . . . .	ibid.
intelligentie, . . . . .	165

voluntatis, . . . . .	165
corporis; . . . . .	166
2. extrinseca, scilicet dominium in animalia et res inferiores, habitationem in paradiso. . . . .	167
II <sup>a</sup> Ppo.— <i>Peccatum Adami fuit posteris transfusum, exceptis Christo et B. V. Mariæ;—indè posteriamiserunt privilegia status innocentæ.</i> . . . .	<i>ibid.</i>
Probat per partes	
1 <sup>a</sup> pars pponis, scilicet:	
1 <sup>o</sup> homines nasci peccato originali obnoxii, seu	
1. concipi in peccato, . . . . .	<i>ibid.</i>
2. quod fuit contractum in Adamo, . . . . .	170
3. quod est peccatum verum, . . . . .	<i>ibid.</i>
et 4. unicuique proprium; . . . . .	171
2 <sup>o</sup> Christum à peccato originali fuisse immunem; . . . .	172
item B. V. Mariam, seu conceptionem Virginis fuisse immaculatam; . . . . .	<i>ibid.</i>
3 <sup>o</sup> nullum præter Christum et B. V. Mariam à peccato originali fuisse præservatum. . . . .	182
2 <sup>a</sup> pars, scilicet: Adæ posteros amisisse privilegia status innocentæ tum essentialia, tum accidentalia. . . .	<i>ibid.</i>
EXPLICATIO.	
§ 1.— <i>Singillatim evolvuntur partes propositionum.</i> . . . .	184
I. Explic. de peccato protoparentum. . . . .	<i>ibid.</i>
1 <sup>o</sup> Causa.— Voluntas libera fuit causa efficiens peccati protoparentum,—tentatio diaboli fuit causa excitans immediata peccati Evæ, mediata peccati Adæ. . . .	<i>ibid.</i>
Quæritur autem 1. utrùm tentatio diaboli fuerit externa an interna? . . . . .	<i>ibid.</i>
2. utrùm cum tentatione diaboli alia causa excitans concurrerit ad peccatum protoparentum? . . . . .	186
2 <sup>o</sup> Species.— In actu peccaminoso protoparentum includuntur peccata diversæ speciei; communia Adæ et Evæ: superbia, infidelitas, gula, inobedientia, illicita peccati excusatio;—specialia, scilicet: ex parte Evæ, scandalum; ex parte Adami, illicita erga uxorem complacentia. . . . .	189

3 <sup>o</sup> <i>Gravitas.</i> — Peccatum protoparentum fuit grave;— quoad objectum non fuit omnium gravissimum, be- nè verò quoad circumstantias et effectus . . . . .	190
II. Explic. de peccato originali. . . . .	191
1 <sup>o</sup> <i>De naturâ.</i> —Præmissâ expositione et refutatione opi- nionum Origenis, Pighii, Tertulliani, Illyrici, Lu- theranorum, Magistri sententiarum de naturâ pec- cati originalis,—resumitur sententia Bellarmini, et probatum peccatum originale, quatenus <i>actuale</i> , esse peccatum actuale commissum ab Adamo prout per- sonam generis humani gerebat; quatenus <i>habituale</i> , esse habitualement aversionem animæ à Deo ex pec- cato in Adami personâ commissio ortam, proinde privationem culpabilem partis præcipuæ justitiæ ori- ginalis. . . . .	<i>ibid.</i>
2 <sup>o</sup> <i>De proprietatibus.</i> —Quær. 1. cujusnam peccati ab A- damo commissi peccatum originale sit continuatio;	197
2. utrùm peccatum illud sit voluntarium et quomodò?	198
3 <sup>o</sup> <i>De transmissione.</i> — Quomodò traducatur peccatum originale? . . . . .	201
4 <sup>o</sup> <i>De exceptionibus.</i> —Quær. 1. quare Christus, 2. quo- modò B. Virgo fuerit immunis à peccato originali?	203
III. Explic. de effectibus peccati protoparentum, pec- cati originalis. . . . .	205
1 <sup>o</sup> <i>De amissione elementorum essentialium,</i> De amissione juris ad finem supernaturalem, quæritur circa protoparentes,—utrùm amissio juris ad finem su- pernaturalem fuerit ipsis irreparabilis, seu utrùm 1. peccati sui veniam consequi potuerint, 2. conse- cuti fuerint, 3. vitam æternam obtinuerint? . . .	206
circa posteros,— quonam sensu intelligenda sit amis- sio finis, seu damnatio ex solo originali?— Contro- versie de statu infantum sine baptismo morien- tium, scilicet : 1. utrùm prædicti infantes ex priva- tione visionis intuitivæ dolorem et tristitiam patian- tur? . . . . .	207
2. utrùm pœnam sensûs subituri sint? . . . . .	209
3. utrùm perfruantur aliquâ beatitudine naturali? . . .	210

2 <sup>o</sup> De amissione elementorum <i>accidentalium</i> ,	
1. <i>Intrinsec.</i> — Intelligentiæ: Quomodo protoparentes scientiam et incapacitatem erroris amiserint? . . .	21
Voluntatis: Quonam sensu intelligendæ sint, sive quoâd Adamum, sive quoâd posteros, amissio justitiæ originalis, imminutio libertatis, subjectio erga diabolum è peccato protoparentis orta? . . .	213
Corporis: Quomodo post peccatum homo factus fuerit subjectus morbo et morti? . . .	218
2. <i>Extrinsec.</i> — Quo dominio in res inferiores privatus fuerit Adam, an dominio facti, an dominio juris, an utroque? . . .	<i>ibid.</i>
§ 2. — <i>Ostenduntur relationes propositionum.</i> . . .	219

### ACTUS TERTIUS.

Deus reparat hominem per Christum.

#### I.

*De reparatione præparatâ.*

Resumantur actus quibus Deus reparationem præparavit.	220
---	-----

#### II.

*De reparatione adimpletâ.*

Agendum de Verbo incarnato. . . . .	222
-------------------------------------	-----

I. — De existentia incarnationis.

Notiones præviæ de incarnatione. Errores.	223
Admittendam esse incarnationis existentiam	224
Probatur 1 <sup>o</sup> fide Ecclesiæ. . . . .	225

Probatur 2 <sup>o</sup> demonstrando per partes	228
---	-----

1. Christum possidere naturam divinam, . . . . .	225
2. Christum possidere naturam humanam, . . . . .	228
3. naturam divinam et naturam humanam in Christo uni-	230
ri hypostaticè in unicâ Verbi personâ. . . . .	235

Probatur 3<sup>o</sup> indirectè, seu refutatione objectionum. . . .

II. — De proprietatibus Verbi incarnati. . . . . 238

§ 1. — De proprietatibus divinis Christi. . . . .	<i>ibid.</i>
§ 2. — De proprietatibus humanitatis Christi. . . . .	

In genere Christus à primo conceptionis instanti habuit omnes proprietates essentielles et naturales humanitatis in summo gradu perfectionis naturalis et supernaturalis compossibili cum functionibus reparatoris. 238

Ex hoc principio deducuntur in specie

I. *Proprietates humanitatis*: — Christus habuit corpus humanum integrum; animam humanam spirituales, immortalem, intellectualem, appetitui sensitivo obnoxiam, liberam . . . . . 239

II. *Perfectiones humanitatis*: — Exponuntur comparative cum perfectionibus Adami. . . . . *ibid.*

I. Comparative cum elementis *essentialibus* status innocentiae:

*Quær.* 1º utrùm humanitas Christi destinata fuerit ad finem supernaturalem? . . . . . *ibid.*

Probatur Christum fruitum esse visione intuitivâ modo perfectissimo à primo conceptionis instanti. . . 240

Ad explicationem quæritur 1. utrùm per visionem intuitivam anima Christi Deum comprehenderit? . . . 241

2. utrùm cognoverit omnia creata? . . . . . *ibid.*

*Quær.* 2º utrùm Christus habuerit gratiam habituales? *ibid.*

Probatur animam Christi eam habuisse. . . . . 242

Ad explicationem quæritur utrùm Christus eam habuerit absque præviis actibus propriis, an sub conditione actuum cum auxilio gratiæ productorum? . . . 243

*Quær.* 3º utrùm Christus habuerit gratiam actuales? . *ibid.*

II. Comparative cum elementis status innocentiae *accidentalibus* intrinsecis:

*Quær.* 1º utrùm Christus habuerit scientiam perfectam à visione beatorum distinctam, immunitatem ab errore? . . . . . *ibid.*

Probatur resp. affirmativa. . . . . 244

Explicantur 1. objectum, 2. medium acquisitionis, 3. proprietates cognitionum Christi. . . . . *ibid.*

*Quær.* 2º utrùm Christus habuerit rectitudinem voluntatis? . . . . . 246

Probatur resp. affirmativa. . . . . *ibid.*

Ad explicationem quæritur 1. in quo sita fuerit rectitudo voluntatis Christi? . . . . .	246
Corol. 1. In Christo voluntas rationis semper fuit conformis voluntati divinæ. . . . .	247
Corol. 2. Christus habuit aliquantulum omnes virtutes naturales et supernaturales, dona Spiritus S., gratias gratis datas. . . . .	<i>ibid.</i>
Corol. 3. In Christo non fuit fomes . . . . .	249
Quæritur 2. quo medio Christus obtinuerit rectitudinem voluntatis? . . . . .	<i>ibid.</i>
Quær. 3 <sup>o</sup> utrùm Christus habuerit immunitatem à dolore, morbo et morte? . . . . .	250
Differentiæ inter Christum et Adamum ejusque posteros. . . . .	<i>ibid.</i>
III. Comparativè cum elementis status innocentie accidentibus extrinsecis:	
Quær. Utrùm Christus dominium habuerit in res creatas? . . . . .	251
De dominio Christi, tum in ordine naturali, tum in ordine supernaturali. . . . .	<i>ibid.</i>
§ 3.—De proprietatibus unionis hypostaticæ et ex ea in Christo sequentibus. . . . .	253
I. De proprietatibus unionis hypostaticæ . . . . .	<i>ibid.</i>
I. De ratione existendi	
Quær. 1 <sup>o</sup> utrùm incarnatio fuerit necessaria vel libera, —id est,	
1. utrùm necessaria <i>absolutè</i> ? . . . . .	<i>ibid.</i>
2. utrùm necessaria <i>hypotheticè</i> , seu,	
in hypothesi creationis? . . . . .	254
in hypothesi lapsus? . . . . .	<i>ibid.</i>
in hypothesi reparationis simplicis? . . . . .	255
in hypothesi reparationis per satisfactionem æquivalentem et perfectam? . . . . .	<i>ibid.</i>
Quær. 2 <sup>o</sup> Quodnam fuerit motivum incarnationis?—Controversia inter Scotistas et Thomistas de fine proximo incarnationis. . . . .	256
II. De duratione unionis hypostaticæ. . . . .	258
III. De modo quo natura divina et humana uniuntur in Christo. . . . .	<i>ibid.</i>



<b>II. De proprietatibus ex unione hypostatica sequentibus.</b>	
— Exponuntur per modum corollariorum. . . . .	259
<b>Corol. 1.</b> Christus habuit omnes proprietates personæ Verbi speciales. . . . .	<i>ibid.</i>
<b>Corol. 2.</b> Christus ut homo est filius Dei naturalis. . . . .	<i>ibid.</i>
<b>Corol. 3.</b> Christus ut homo est adorandus, ita ut unâ eademque adoratione adoranda sit Christi divinitas et humanitas . . . . .	260
<b>Corol. 4.</b> In Christo duæ sunt voluntates et operationes liberæ redactæ ad unitatem personæ per subjectionem voluntatis humanæ erga voluntatem et personalitatem divinam. . . . .	261
<b>Corol. 5.</b> Christus fuit capax meriti infiniti. . . . .	262
<b>Corol. 6.</b> Admittenda est communicatio idiomatum in concreto, rejicienda verò in abstracto. . . . .	<i>ibid.</i>
<b>Corol. de B. V. B. V. Maria</b> est verè Mater Dei. . . . .	263

III.—De actibus Verbi incarnati.

Indicatur eorum scopus, et juxta ordinem exponuntur . . . . .	264
<b>ACTUS PRÆVIUS.</b> —Deus constituit Christum caput hominum et Angelorum . . . . .	265
§ 1.— <i>De existentia.</i> Probatur Deum constituisse Christum caput hominum et Angelorum. . . . .	<i>ibid.</i>
§ 2.— <i>De proprietatibus hujus unionis.</i> . . . . .	267
<b>I. De terminis</b> . . . . .	<i>ibid.</i>
1 <sup>o</sup> De Christo,—Quær. 1. utrùm Christus sit caput Ecclesiæ quatenus est homo an quatenus est Deus? . . . . .	<i>ibid.</i>
Quær. 2. utrùm Christus secundum animam, an secundum corpus, an simul secundum corpus et animam sit caput Ecclesiæ? . . . . .	268
2 <sup>o</sup> De angelis et hominibus,—Quær. 1. utrùm omnes angeli et homines sint membra Christi? . . . . .	<i>ibid.</i>
Quær. 2. utrùm homines sint membra Christi quoad animam et quoad corpus? . . . . .	269
<b>II. De naturâ.</b> —Quær. quænam sit natura unionis inter Christum et sua membra mystica? . . . . .	<i>ibid.</i>
<b>III. De intensitate.</b> —Quær. utrùm intensitas unionis inter Christum et sua membra sit eadem in omnibus membris, an diversa? . . . . .	270

IV. De duratione. — Quær. quænam sit duratio hujus unionis? . . . . .	270
§ 3. — <i>De consecrariis</i> . . . . .	271
ACTUS I. — Christus Deo satisfacit. . . . .	<i>ibid.</i>
§ 1. — <i>De existentia</i> . Probatur Christum pro hominibus satisfacisse. . . . .	272
§ 2. — <i>De proprietatibus</i> satisfactionis Christi, . . . .	<i>ibid.</i>
I. Ratione valoris. — Quær. quisnam sit valor satisfactionis Christi, an finitus, an infinitus? . . . . .	273
II. Ratione auctoris. — Quær. utrùm satisfactio attribuenda sit divinitati an humanitati? . . . . .	<i>ibid.</i>
III. Ratione medii. — Quær. utrùm satisfactio operata fuerit per omnes an solum per quosdam actus Christi? . . . .	<i>ibid.</i>
IV. Ratione subjecti. — Quær. utrùm Christus pro omnibus an solum pro quibusdam satisfecerit? . . . .	274
V. Ratione perfectionis. — Quær. utrùm satisfactio fuerit perfecta — erga Patrem et Spiritum S., — erga Verbum? . . . . .	275
§ 3. — <i>De consecrariis</i> . . . . .	277
ACTUS II. — Christus meretur . . . . .	<i>ibid.</i>
§ 1. — <i>De existentia</i> . Probatur Christum per actus suos meruisse . . . . .	<i>ibid.</i>
§ 2. — <i>De proprietatibus</i> meritorum Christi. . . . .	278
I. Ratione valoris. — Quær. quisnam sit iste valor? . . . .	279
II. Ratione auctoris. — Quær. utrùm meritum Christi sit divinum an humanum? . . . . .	<i>ibid.</i>
III. Ratione medii. — Quær. utrùm Christus meruerit per omnes actus suos, an per quosdam tantum? . . . .	<i>ibid.</i>
IV. Ratione subjecti et objecti. — Quær. pro quibus et quid meruerit Christus? — Exponitur quid Christus Sibi, angelis et hominibus meruerit. . . . .	280
§ 3. — <i>De consecrariis</i> . . . . .	283
ACTUS III. — Christus influit gratiam. . . . .	<i>ibid.</i>
I. <i>De influxu gratiæ in se considerato</i> . . . . .	
§ 1. — <i>De existentia</i> . Probatur Christum hominibus influere gratiam. . . . .	284

§ 2. — <i>De naturâ et proprietatibus gratiæ.</i> . . . .	286
Quær. I. Quænam sit <i>natura</i>	
1 <sup>o</sup> gratiæ actualis? . . . . .	<i>ibid.</i>
Certum est gratias actuales esse <i>lumen</i> supernaturale, aut <i>vim</i> supernaturalem. . . . .	<i>ibid.</i>
Controvertitur <i>natura</i> hujus vis supernaturalis. Contra Jansenistas et quosdam theologos Lovanienses probatur dari motus gratiæ à motu charitatis perfectæ distinctos. . . . .	288
2 <sup>o</sup> gratiæ sanctificantis? . . . . .	<i>ibid.</i>
Exponuntur tres præcipuæ opiniones. . . . .	<i>ibid.</i>
Quær. II. Quænam sint <i>proprietates</i> gratiæ? . . . .	294
I. <i>De proprietatibus communibus</i> gratiæ actuali et habi- tuali. . . . .	<i>ibid.</i>
I. <i>De gratuitate.</i> — Gratia est gratuita	
1. in eo sensu quòd sit medium ad finem indebitum; . .	295
2. in eo sensu quòd homo non possit mereri de condigno gratiâ primam, sive actualem, sive habitualem; .	<i>ibid.</i>
3. in eo sensu quòd homo non possit mereri de congruo gratiâ primam actualem. . . . .	<i>ibid.</i>
II. <i>De supernaturalitate.</i> — Gratia est supernaturalis	
1. quoad finem, . . . . .	<i>ibid.</i>
2. quoad essentiam, . . . . .	296
3. quoad causam. . . . .	<i>ibid.</i>
III. <i>De necessitate</i>	
1 <sup>o</sup> gratiæ actualis. . . . .	<i>ibid.</i>
Q. 1 <sup>a</sup> . Utrum gratia actualis sit necessaria? sen,	
Sq. 1 <sup>a</sup> Utrum absque gratiâ actuali homo possit operari bonum in ordine supernaturali? . . . . .	<i>ibid.</i>
Probatur resp. negativa. . . . .	<i>ibid.</i>
Explicatur per corollaria sequentia:	
Corol. 1. Absque gratiâ actuali homo non potest exer- cere actus bonos in ordine supernaturali, sive agatur de actibus ex naturâ suâ supernaturalibus, sive aga- tur de actibus naturalibus quoad substantiam et supernaturalibus quoad modum. . . . .	298
Corol. 2. Homo non potest sine gratiæ interioris auxi- lio ne fidei quidem initium habere. . . . .	<i>ibid.</i>

<b>Corol. 3. Homo sine gratiâ actuali non potest velle et operari bonum supernaturale. . . . .</b>	<b>299</b>
<b>Corol. 4. Gratia, et quidem specialis, requiritur ad perseverantiam finalem. . . . .</b>	<b>ibid.</b>
<b>Sq. 2<sup>a</sup> Utrûm absque gratiâ actuali homo etiam lapsus possit operari bonum in ordine naturali? . . . .</b>	<b>ibid.</b>
<b>Certum est 1. hominem lapsum posse moraliter proinde physicè, absque gratiâ actuali, aliquod operari bonum in ordine naturali, speciatim actus faciliores adimplere; . . . . .</b>	<b>ibid.</b>
<b>Certum est 2. hominem lapsum non posse moraliter absque gratiâ actuali omnia mandata legis naturalis adimplere. . . . .</b>	<b>300</b>
<b>Undè deducuntur seq. corollaria :</b>	
<b>Corol. 1. Homo potest absque gratiâ actuali quasdam veritates speculativas aut practicas ad officia hominis spectantes cognoscere. . . . .</b>	<b>301</b>
<b>Corol. 2. Homo lapsus potest propriis viribus Deum ut auctorem naturæ diligere affectivè et effectivè in quodam gradu, non tamen super omnia. . . . .</b>	<b>ibid.</b>
<b>Controvertitur utrûm absque gratiâ actuali homo possit physicè adimplere legis naturalis præcepta difficiliora. . . . .</b>	<b>302</b>
<b>Sq. 3<sup>a</sup> Utrûm absque gratiâ actuali homo possit omnes vincere tentationes? . . . . .</b>	<b>303</b>
<b>Probatur hominem absque gratiâ posse vincere leviores, non verò graves tentationes. . . . .</b>	<b>ibid.</b>
<b>Sq. 4<sup>a</sup> Utrûm absque gratiâ actuali homo possit vitare omnia peccata? . . . . .</b>	<b>304</b>
<b>Probatur hominem absque gratiâ posse quædam peccata vitare; . . . . .</b>	<b>ibid.</b>
<b>non posse omnia vitare; . . . . .</b>	<b>ibid.</b>
<b>posse cum gratiâ ordinariâ vitare distributivè omnia peccata formalia; . . . . .</b>	<b>ibid.</b>
<b>posse cum privilegio speciali vitare collectivè omnia peccata; . . . . .</b>	<b>305</b>
<b>non posse absque privilegio speciali vitare collectivè omnia peccata mortalia; . . . . .</b>	<b>ibid.</b>

nec vitare collectivè omnia peccata venialia. . . . .	305
Q. 2 <sup>a</sup> . Qualis gratia requiratur ad operandum bonum et malum vitandum? . . . . .	<i>ibid.</i>
Certum est 1. requiri gratiam supernaturalem ad assentiendum fide divinâ supernaturali veritatibus revelatis, et ad observandas omnes leges ordinis supernaturalis, ad observandas leges naturales modo supernaturali et ad vitanda peccata his præceptis opposita. . . . .	306
Certum est 2. gratiam naturalem in se sufficere ad observandam legem naturalem et vitanda peccata huic legi opposita, si homo non fuisset elevatus ad finem supernaturalem. . . . .	<i>ibid.</i>
Controvertitur utrùm gratia naturalis sufficiat ad observandam debito modo legem naturalem, positâ elevatione hominis ad statum supernaturalem. . . . .	<i>ibid.</i>
2 <sup>a</sup> De necessitate gratiæ <i>habitualis</i> . . . . .	307
Probatur gratiam habitualement esse necessariam 1. in eo sensu quòd à Deo præcipiatur, . . . . .	<i>ibid.</i>
2. in eo sensu quòd sit conditio meriti de condigno, . . . . .	<i>ibid.</i>
3. in eo sensu quòd sine illâ homo non possit obtinere vitam æternam; . . . . .	<i>ibid.</i>
non esse autem necessariam 1. ad actus bonos, . . . . .	<i>ibid.</i>
2. ad actus supernaturales . . . . .	308
II. De proprietatibus specialibus utriusque gratiæ . . . . .	<i>ibid.</i>
1 <sup>o</sup> Gratia actualis est universalis, gratia autem habitualis non est universalis . . . . .	<i>ibid.</i>
2 <sup>o</sup> Gratia actualis est transitoria; habitualis autem est permanens, itâ ut tamen possit augeri per bona opera, amitti per peccatum mortale, minui extrinsecè non verò intrinsecè per peccatum veniale. . . . .	309
§ 3. — De consecrariis et effectibus.	
Quæst. I. Utrùm et quænam è gratiâ sequantur consecratoria et effectus? . . . . .	311
I. De effectibus gratiæ actualis solius. . . . .	<i>ibid.</i>
1 <sup>o</sup> In genere gratia intellectûs illuminat intellectum; gratiâ voluntatis movet voluntatem ut voluntas bo-	

num velit et incipiat, ut bonum perficiat, ut in bono persistat. . . . .	311
2 <sup>o</sup> In specie gratia actualis adjuvat hominem ad ultum ut possit observare totam legem naturalem, operari actus in se supernaturales, elevare actus naturales ad dignitatem supernaturalem . . . . .	<i>ibid.</i>
<b>II. De effectibus gratiæ habitualis solius. . . . .</b>	312
Homo per gratiam sanctificantem . . . . .	
1 <sup>o</sup> inseritur Christo et sit membrum vivum corporis Christi;	<i>ibid.</i>
2 <sup>o</sup> efficitur divinæ consors naturæ; . . . . .	<i>ibid.</i>
3 <sup>o</sup> simul infusa accipit — certò fidem, spem et charitatem, — probabiliter alias virtutes supernaturales, — probabiliter dona Spiritus S. (ordine suo explicantur ista dona); . . . . .	<i>ibid.</i>
4 <sup>o</sup> redditur filius Dei adoptivus; . . . . .	314
5 <sup>o</sup> intrinsecè justificatur; — diverso tamen sensu pro differentiâ gratiæ infusæ et vario statu hominum quibus infunditur; quod explicatur; . . . . .	<i>ibid.</i>
6 <sup>o</sup> fit amicus Dei; . . . . .	316
7 <sup>o</sup> jus acquirit ad vitam æternam . . . . .	<i>ibid.</i>
<b>III. De effectibus gratiæ actualis simul et sanctificantis. . . . .</b>	317
Per gratiam actualem simul et sanctificantem homo fit, sub quibusdam conditionibus, capax merendi quædam bona supernaturalia. (Undè dicendum <i>de merito</i> .)	<i>ibid.</i>
Datis notionibus de merito, ejusque diversis speciebus,	<i>ibid.</i>
<i>Probatur propositio . . . . .</i>	<i>ibid.</i>
<i>Ad explicationem,</i>	
<i>Quær. 1<sup>o</sup> Cujus meriti homo sit capax? . . . . .</i>	318
<i>Probatur hominem 1. non esse capacem meriti de condigno rigoroso; . . . . .</i>	<i>ibid.</i>
<i>2. esse capacem meriti de condigno simplici; . . . . .</i>	<i>ibid.</i>
<i>3. esse capacem meriti de congruo . . . . .</i>	319
<i>Quær. 2<sup>o</sup> Quænam sint conditiones meriti?</i>	
<i>Et 1<sup>o</sup> meriti de condigno? . . . . .</i>	<i>ibid.</i>
<i>Probatur ad meritum de condigno requiri:</i>	
<i>ex parte Dei, — ut promiserit mercedem; . . . . .</i>	<i>ibid.</i>
<i>ex parte agentis, — ut sit 1. justus, 2. viator; . . . . .</i>	<i>ibid.</i>
<i>ex parte actûs, — ut sit 1. liber, 2. bonus, 3. supernatu-</i>	

ralis: explicatur in quonam sensu actus debeat esse supernaturalis . . . . .	320
2 <sup>o</sup> Quænam sint conditiones meriti <i>de congruo</i> ? . . . .	321
Quær. 3 <sup>o</sup> Quodnam sit objectum meriti, seu quænam bona supernaturalia homo possit mereri? . . . .	322
1 <sup>o</sup> Si agatur de gratiâ:	
Q. 1. Utrùm homo possit mereri primam gratiam? . . .	<i>ibid.</i>
Probatur 1. hominem non posse mereri primam gratiam actualem nec de condigno nec de congruo, . . .	<i>ibid.</i>
2. hominem non posse mereri de condigno primam gratiam sanctificantem, . . . . .	<i>ibid.</i>
3. hominem posse mereri de congruo etiam infallibili gratiam sanctificantem primam, scilicet per actum charitatis perfectæ . . . . .	<i>ibid.</i>
Q. 2. Utrùm, obtentâ primâ gratiâ, homo possit mereri gratias sequentes? . . . . .	<i>ibid.</i>
Probatur 1. hominem non posse mereri de condigno gratias actuales efficaces, — eas posse mereri de congruo, — probabilius posse mereri de condigno gratias actuales sufficientes; . . . . .	323
2. hominem posse mereri de condigno gratiam sanctificantem secundam . . . . .	<i>ibid.</i>
Q. 3. Utrùm homo possit mereri reparationem post lapsum? . . . . .	<i>ibid.</i>
Probatur hominem 1. non posse eam mereri de condigno, 2. posse eam mereri de congruo . . . .	<i>ibid.</i>
Q. 4. Utrùm homo possit mereri perseverantiam finalem? . . . .	324
Probatur hominem 1. non posse eam mereri de condigno, 2. posse eam mereri de congruo . . . .	<i>ibid.</i>
2 <sup>o</sup> Si agatur de vitâ aeternâ:	
Q. Utrùm homo possit eam mereri? . . . . .	<i>ibid.</i>
Probatur hominem posse eam mereri de condigno . . .	<i>ibid.</i>
Quæst. II. Quomodo gratia producat suos effectus?—seu,	
1 <sup>o</sup> Utrùm homo necessariò an liberè subeat actionem gratiæ? . . . . .	325
Contra Pseudoreformatos et Jansenistas probatur voluntatem in actibus suis sequi, non necessariò, sed liberè gratiæ inspirationem. . . . .	<i>ibid.</i>

- 2<sup>o</sup> Undè repetenda sit efficacia aut simplex sufficientia gratiæ actualis, an ex gratiâ ipsâ, an ex voluntate hominis? . . . . . 327  
Breviter exponuntur tres præcipuæ sententiæ. . . . . *ibid.*

*II. De influxu gratiæ QUOAD MODUM considerato.*

*Quær.* Quomodo Christus influat gratiam? id est,

- Sq. 1<sup>a</sup>. Utrum exigat dispositiones et condiciones prævias in subjecto; et, in hypothesi affirmativâ, quasnam exigat? . . . . . 329

1<sup>o</sup> Si agatur de gratiâ actuali:

Probatur Christum nullas exigere dispositiones, — aliquandò prævias exigere condiciones, specialiter orationem. *ibid.*

2<sup>o</sup> Si agatur de gratiâ habituali:

1. Quoad homines qui usum rationis nunquàm habuerunt, probatur nullam requiri dispositionem, unam verò tantùm requiri conditionem, scilicet receptionem baptismi. . . . . 330

2. Quoad homines qui usum rationis habent,

Ad gratiam *primam*, seu justificationem obtinendam, — probatur requiri fidem; . . . . . *ibid.*

fidem non in sensu Pseudoreformatorum, sed in sensu catholico intellectam; . . . . . 332

probatur fidem solam non sufficere, sed insuper alias requiri dispositiones et condiciones: . . . . . *ibid.*

exponuntur dispositiones et condiciones requisitæ. . . . . *ibid.*

Ad gratiam *secundam* obtinendam, — probatur requiri ut subjectum recipiat cum dispositionibus debitis sacramentum vivorum, aut exerceat actus meritorios. 333

- Sq. 2<sup>a</sup>. Utrum Christus influat gratiam immediatè an mediatè, seu per causas secundas? . . . . . 334

Probatur 1<sup>o</sup> Christum aliquandò influere immediatè gratiam actualem et habitualem; . . . . . *ibid.*

2<sup>o</sup> aliquandò gratiam influere per causas secundas, seu per sacramenta et sacrificium, — de quibus infra. *ibid.*

DE SACRAMENTIS.

Definitur sacramentum. . . . . 335

Dicendum de sacramentis in genere, in specie. . . . . *ibid.*



## DE SACRAMENTIS.

### IN GENERE.

Circa quodlibet sacramentum pars triplex : dogmatica, moralis, disciplinaris. . . . .	336
Pars moralis et disciplinaris exponuntur post partem dogmaticam, licet nunc agatur tantum de dogmate : indicatur ratio hujus ordinis. . . . .	ibid.

### I.—PARS DOGMATICA.

#### § 1.—De institutione.

QUEST. I. <i>Utrum, et quot sacramenta Deus instituerit?</i>	337
1 <sup>o</sup> In statu innocentie? . . . . .	ibid.
Probatur nullâ ratione certâ affirmari aut negari posse existentiam sacramentorum in statu innocentie. . . . .	ibid.
2 <sup>o</sup> In statu nature? . . . . .	338
Probatur nullâ ratione certâ affirmari aut negari posse existentiam sacramentorum in illo statu ; — probabilius unum saltem à Deo institutum fuisse ad remissionem peccati originalis in infantibus : explicatur quodnam fuerit istud sacramentum. . . . .	ibid.
3 <sup>o</sup> In statu legis mosaice? . . . . .	339
Probatur Deum in illo statu instituisse sacramenta, quorum numerus, aliunde ignotus ad quatuor classes revocari potest . . . . .	340
4 <sup>o</sup> In statu legis novae? . . . . .	ibid.
Septem nec plura instituta fuisse sacramenta probatur contra Pseudoreformatos	
1. argum. theologico, scilicet demonstrando septem cæremonias indicatas (baptismum, confirmationem, eucharistiam, etc.) vestiri omnibus conditionibus ad constituendum sacramentum requisitis, . . . . .	ibid.
quamlibet seorsim sumptam unicum saltem genericè constituere sacramentum, . . . . .	342
nullam, præter indicatas, cæremoniam habere conditiones veri sacramenti : probatur lotionem pedum non esse sacramentum ; . . . . .	343

2. argum. præscriptionis; . . . . .	344
3. decision. Ecclesiæ . . . . .	346
QUÆST. II. <i>Quomodo Deus instituerit sacramenta; an immediatè, an mediatè?</i> . . . . .	<i>ibid.</i>
1º Si agatur de sacramentis antechristianis :	
Probatur ea immediatè à Deo fuisse instituta. . . . .	<i>ibid.</i>
2º Si agatur de sacramentis christianis :	
Q. 1. Utrùm Trinitas per se an per alium ea instituerit? . . . . .	347
Probatur Trinitatem ea instituisse per Christum Homi- nem-Deum. . . . .	<i>ibid.</i>
Q. 2. Utrùm Christus per se, an per Apostolos et Eccle- siam sacramenta instituerit? . . . . .	<i>ibid.</i>
Probatur omnia sacramenta novæ legis immediatè à Christo fuisse instituta. . . . .	<i>ibid.</i>
Q. 3. Utrùm Christus instituerit in specie materiam et formam sacramentorum, an earum institutionem Apostolis et Ecclesiæ commiserit? . . . . .	348
Certum est Christum determinasse in specie materiam et formam Baptismi et Eucharistiæ; . . . . .	<i>ibid.</i>
Controvertitur utrùm determinaverit in specie materiam aliorum sacramentorum. . . . .	349

§ 2.—De conditionibus.

Agitur de conditionibus validitatis. . . . .	350
Requiruntur ex parte 1. ministri, 2. elementorum, 3. sub- jecti. . . . .	<i>ibid.</i>
I.—Ex parte MINISTRI: . . . . .	<i>ibid.</i>
I. <i>De personâ ministri.</i> . . . . .	<i>ibid.</i>
Quær. 1º utrùm minister debeat esse viator? . . . . .	351
Probatur ministrum ordinarium sacramentorum debere esse viatorem. . . . .	<i>ibid.</i>
Quær. 2º utrùm ipsi necessarius sit character, et qui- nam? . . . . .	<i>ibid.</i>
Probatur contra Pseudoreformatos necessitas caracte- ris in ministro.—Indicatur quinam character sit ne- cessarius pro diversis sacramentis. . . . .	<i>ibid.</i>
Quær. 3º utrùm necessaria sit fides in ministro? . . . . .	352

Probatur fidem non esse necessariam. . . . .	352
<i>Quær.</i> 4 <sup>o</sup> utrùm necessaria sit sanctitas? . . . . .	353
Probatur eam non esse necessariam. . . . .	<i>ibid.</i>
<i>II. De actibus ministri.</i> . . . . .	<i>ibid.</i>
Agitur tantùm de formali actionis, seu de intentione ministri. . . . .	<i>ibid.</i>
<i>Quær.</i> 1 <sup>o</sup> utrùm requiratur intentio? . . . . .	354
Probatur ad validam sacramentorum administrationem in ministro requiri et sufficere intentionem faciendi quod facit Ecclesia vera quæcumque sit. . . . .	<i>ibid.</i>
Undè deducuntur seq. corollaria :	
Corol. 1. Non sufficit intentio mimica, sed requiritur seria. . . . .	<i>ibid.</i>
Corol. 2. Probabiliùs non sufficit intentio externa, etiam seria, sed requiritur interna. . . . .	<i>ibid.</i>
Corol. 3. Non requiritur ut minister intendat explicitè productionem gratiæ et characteris, administrationem sacramenti, ritum religiosum prout celebratur ab Ecclesiâ catholicâ. . . . .	356
<i>Quær.</i> 2 <sup>o</sup> qualis requiratur intentio? . . . . .	357
Probatur requiri intentionem determinatam, absolutam aut æquivalentem absolutæ, saltem virtualem. . . . .	<i>ibid.</i>
<i>II. — Ex parte ELEMENTORUM:</i> . . . . .	358
<i>Quær.</i> 1 <sup>o</sup> quænam sint elementa sacramentorum? . . . . .	<i>ibid.</i>
1 <sup>o</sup> Si agatur de sacramentis antechristianis :	
Probatur ea probabiliter non fuisse constituta rebus et verbis, sed tantùm rebus. . . . .	359
2 <sup>o</sup> Si agatur de sacramentis christianis :	
Datis notionibus præviis circa originem, applicationem et sensum verborum <i>materia et forma</i> , . . . . .	<i>ibid.</i>
Probatur sacramenta novæ legis duobus constare, rebus tanquàm materiâ, et verbis tanquàm formâ. . . . .	360
<i>Quær.</i> 2 <sup>o</sup> quibus conditionibus vestiri debeant elementa sacramentorum ( <i>materia et forma</i> ) ut valida sit sacramenti confectio? . . . . .	361
Probatur requiri 1. ut minister adhibeat materiam et formam à Christo determinatas, nec substantialiter adulteratas ; . . . . .	<i>ibid.</i>
explicatur quænam adulterationes materiæ et formæ sint substantiales, quænam accidentales. . . . .	<i>ibid.</i>

Probatur requiri 2. ut materia et forma uniantur debite  
ab eodem ministro erga idem subjectum; . . . 363

explicatur quænam unio requiratur inter materiam et  
formam pro diversis sacramentis. . . . . *ibid.*

III.—Ex parte SUBJECTI: . . . . . 364

I. *De personâ subjecti.* . . . . . *ibid.*

Quær. quænam conditiones requirantur? . . . . . *ibid.*

Probatur ex parte subjecti requiri conditiones

1<sup>o</sup> physicas,—generales, scilicet 1. subjectum sit viator,  
2. sit moraliter præsens ministro, quod non requiritur  
si agatur de matrimonio contrahendo aut eucharistiâ  
suscipiendâ; — speciales, scilicet subjectum sit in  
periculo mortis si de extremâ-unctione, sit masculus  
si de ordine, sit capax contractûs matrimonii si de  
matrimonio agatur; . . . . . *ibid.*

2<sup>o</sup> morales, scilicet: subjectum sit aut fuerit capax actûs  
humani, si agatur de pœnitentiâ, extremâ-unctione,  
matrimonio: quod non requiritur si agatur de aliis  
sacramentis; . . . . . 365

3<sup>o</sup> supernaturales, scilicet suscepit baptismum ut alia  
sacramenta possit recipere; non requiritur autem  
sanctitas, nec fides nisi ad sacramentum pœnitentiæ. *ibid.*

II. *De actibus subjecti.* . . . . . 366

Quær. 1<sup>o</sup> utrûm intentio requiratur in subjecto? . . . *ibid.*

1. De his qui usûs rationis sunt capaces, probatur nullam  
requiri intentionem ad receptionem sacramentorum  
quæ illis administrari queunt; . . . . . *ibid.*

2. De his qui usûs rationis sunt capaces, probatur requiri  
intentionem recipiendi quod administrat Ecclesia  
vera quæcumque sit. . . . . *ibid.*

Quær. 2<sup>o</sup> qualis intentio requiratur? . . . . . 367

Probatur requiri intentionem 1. seriam, 2. internam, 3.  
actualement aut saltem virtualem in pœnitentiâ, matri-  
monio et ordine, 4. habitualement et implicitam in  
aliis sacramentis. . . . . *ibi d.*

### § 3. — De effectibus.

QUEST. I. *Utrûm sacramenta producant effectus?* . . . 368

<b>Probatur resp. affirmatiya.</b>	368
<b>Q<small>U</small>EST. II. Quosnam effectus producant sacramenta?</b>	<i>ibid.</i>
1° Si agatur de sacramentis veteris legis:	
<b>Probatur ea producere directè gratiam legalem, indirectè:</b>	
<b>gratiam internam.</b>	<i>ibid.</i>
2° Si agatur de sacramentis novæ legis:	
<b>Q. 1. Utrùm sacramenta producant gratiam sanctifican-</b>	
<b>tem, et qualem?</b>	369
<b>Probatur 1. sacramenta producere gratiam sanctificantem;</b>	<i>ibid.</i>
<b>2. directè produci gratiam primam per sacramenta mor-</b>	
<b>tuorum, gratiam verò secundam per sacramenta</b>	
<b>vivorum;</b>	372
<b>indirectè produci gratiam secundam per sacramenta</b>	
<b>mortuorum in eo qui ad ea accedit justificatus; gra-</b>	
<b>tiam verò primam per sacramenta vivorum in eo</b>	
<b>qui illa suscipit in statu peccati mortalis, cum solâ</b>	
<b>attritione, bonâ fide credens se non esse in statu</b>	
<b>peccati mortalis vel existimans se esse contritum.</b>	<i>ibid.</i>
<b>Q. 2. Utrùm sacramenta producant gratiam sacramenta-</b>	
<b>lem?</b>	374
<b>Datis notionibus de gratiâ sacramentali,</b>	<i>ibid.</i>
<b>Probatur omnia sacramenta producere gratiam sacra-</b>	
<b>mentalem.</b>	<i>ibid.</i>
<b>Q. 3. Utrùm sacramenta producant characterem?</b>	375
<b>Datâ definitione characteris,</b>	<i>ibid.</i>
<b>Probatur quædam sacramenta, scilicet baptismum, con-</b>	
<b>firmationem et ordinem, producere characterem.</b>	376
<b>Q<small>U</small>EST. III. Quomodo sacramenta producant effectus?</b>	
<b>id est,</b>	377
<b>Sq. 1ª. Utrùm productio effectuum pendeat nec ne à dis-</b>	
<b>positionibus subjecti?</b>	<i>ibid.</i>
1° Si agatur de caractere:	
<b>Probatur productionem characteris non pendere à dis-</b>	
<b>positionibus subjecti.</b>	378
2° Si agatur de gratiâ:	
<b>Probatur actualement productionem gratiæ habitualis et</b>	
<b>gratiæ sacramentalis pendere à dispositionibus sub-</b>	
<b>jecti.</b>	<i>ibid.</i>

Per modum explicationis agitur de reviviscentiâ gratiæ sacramentalis, probatur eam aliquandò reviviscere posse, modò removeatur obex. . . . .	379
Diversæ sententiæ circa explicationem hujus reviviscentiæ	381
Sq. 2 <sup>a</sup> . Utrùm productio effectuum fiat ex opere operato, an ex opere operantis? . . . . .	<i>ibid.</i>
1 <sup>o</sup> Si agatur de sacramentis veteris legis :	
Probatur 1. gratiam legalem fuisse productam ex opere operato; . . . . .	382
2. gratiam internam fuisse productam quasi ex opere operato in infantibus suscipientibus sacramentum per quod delebatur peccatum originale,—non ex opere operato, sed ex opere operantis in aliis subjectis. . . . .	<i>ibid.</i>
2 <sup>o</sup> Si agatur de sacramentis novæ legis :	
Probatur ea producere gratiam ex opere operato, insuper aliquandò ex opere operantis. . . . .	<i>ibid.</i>
Sq. 3 <sup>a</sup> . Utrùm productio effectuum fiat physicè an moraliter? . . . . .	383
Probatur productionem effectuum probabilius fieri physicè . . . . .	384
Sq. 4 <sup>a</sup> . Utrùm productio gratiæ fiat æqualiter an inæqualiter? . . . . .	<i>ibid.</i>
Si sacramenta differant numero, probatur æqualem gratiam produci cùm dispositiones subjectorum sunt æquales, inæqualem verò cùm dispositiones sunt inæquales. . . . .	<i>ibid.</i>
Si sacramenta differant specie, probatur inæqualem gratiam produci, etiam suppositâ æqualitate dispositionum. . . . .	385

## II. — PARS MORALIS.

Exponuntur leges divinæ, generales et speciales de sacramentis. . . . .	<i>ibid.</i>
---	--------------

### § 1. — Leges generales

Resumuntur in propositione seq. scilicet: per legem religionis quodlibet factum sacramentis injuriosum

prohibetur omnibus, sub gravi aut sub levi pro-  
 vitate aut levitate materiæ. Quæ propositio probatur. 385

§ 2. — Leges speciales.

- I. — De legib. special. MINISTRO. . . . .** 386
- I. De administratione sacramentorum in se consideratd.** *ibid.*
- Probatur ministrum teneri ex charitate si non sit pastor,  
 ex charitate et justitiâ si sit pastor, administrare  
 sacramenta fidelibus; . . . . . *ibid.*
- nisi adsit ratio dispensans : explicantur rationes dispen-  
 santes; . . . . . *ibid.*
- teneri sub gravi aut sub levi, proût materia est gravis  
 aut levis. . . . . 388
- II. De modo administrationis. . . . .** *ibid.*
- In genere minister conficiens aut administrans sacra-  
 mentum tenetur sub gravi aut sub levi proût materia  
 est gravis aut levis, observare omnia quæ exigunt  
 religio, charitas et justitia; . . . . . *ibid.*
- Ex eo principio deducitur solutio seq. quæstionum:
- 1<sup>o</sup> De obligationibus personalibus ministri. . . . .** *ibid.*
- Quæst. 1<sup>a</sup>. Utrûm ad licitam sacramentorum administra-**  
 tionem sanctitas requiratur sub levi an sub gravi;  
 utrûm, positâ necessitate sanctitatis, minister teneat-  
 tur ad præviam sacramenti pœnitentiæ receptionem? *ibid.*
- De 1<sup>a</sup> q. part. Certum est ministrum ad conferenda sacra-**  
 menta consecratum peccare mortaliter contra  
 religionem, si conscius peccati mortalis sacramentum  
 solemniter administret extra necessitatis casum. . . *ibid.*
- Controvertitur 1. utrûm peccet graviter minister qui**  
 conscius peccati mortalis confert sacramentum ad  
 cujus administrationem non est specialiter conse-  
 cratus; . . . . . 389
- 2. utrûm peccet graviter sacerdos qui conscius peccati**  
 mortalis administrat sacramentum, sed non solem-  
 niter; . . . . . *ibid.*
- 3. utrûm peccet graviter qui conscius peccati mortalis**  
 administrat sacramentum, urgente gravi necessitate. 390
- De 2<sup>a</sup> q. part. Certum est ministrum teneri ad præviam**

- receptionem pœnitentiæ, si agatur de celebratione missæ; . . . . . 391
- controvertitur, si agatur de administratione aliorum sacramentorum. . . . . *ibid.*
- Quæst. 2<sup>a</sup>. Utrùm minister teneatur ad attentionem?* . . . . . 392
- Probatur eum teneri, sub gravi in confectione eucharistiæ, sub levi in aliis sacramentis. . . . . *ibid.*
- Quæst. 3<sup>a</sup>. Utrùm minister possit accipere et exigere stipendium?* . . . . . *ibid.*
- Probatur eum posse, modò non excedat taxationem. . . . . *ibid.*
- 2<sup>o</sup> De obligationibus ministri *relativis ad elementa sacramentorum*. . . . . *ibid.*
- Quæst. 1<sup>a</sup>. Utrùm minister possit adhibere materiam dubiam?* . . . . . *ibid.*
- Probatur eum non posse, nisi adsit necessitas administrandi sacramentum. . . . . *ibid.*
- Quæst. 2<sup>a</sup>. Utrùm minister possit adulterare materiam et formam?* . . . . . 393
- Probatur resp. negativa. . . . . *ibid.*
- Quæst. 3<sup>a</sup>. Utrùm minister possit iterare sacramentum valoris dubii?* . . . . . *ibid.*
- Probatur eum posse et debere si dubium sit prudens, secùs non posse. . . . . *ibid.*
- Quæst. 4<sup>a</sup>. Utrùm minister possit administrare sacramentum sub conditione, et utrùm conditio debeat exprimi?* . . . . . 394
- Probatur eum id posse cum causâ gravi; necesse autem non esse ut exprimatur conditio, nisi in baptismo. . . . . *ibid.*
- 3<sup>o</sup> De obligationibus ministri *relativis ad subjectum* . . . . . *ibid.*
- Quæst. 1<sup>a</sup>. Utrùm minister possit administrare sacramentum indignis petentibus?* . . . . . *ibid.*
1. Si peccator sit publicus, — probatur ministrum teneri sub gravi ipsi denegare sacramentum, sive petat publicè, sive occultè; — adest exceptio, si agatur de pœnitentiâ, aut si indignitas nota sit solâ viâ confessionis. . . . . 395
2. Si peccator sit occultus, — et petat sacramentum occultè, probatur ministrum teneri sub gravi denegare sacramentum; . . . . . *ibid.*



si petat publicè, probatur sacramentum esse administrandum, nisi agatur de sacram. ordinis. . . . . 395

*Quæst. 2<sup>a</sup>.* Utrùm liceat simulare administrationem sacramenti, ne indigno conferatur? . . . . . 396

Probatur illicitam esse simulationem quâ minister adhiberet materiam nullam, aut pronuntiaret formam absque intentione conficiendi sacramentum; — licitam autem esse simulationem quâ minister verbis formæ substitueret alia verba. . . . . *ibid.*

II. — De legibus special. SUBJECTO. . . . . 397

*I. De receptione sacramentorum.* . . . . . *ibid.*

Indicatur quædam sacramenta esse suscipienda necessitate mediæ, alia necessitate præcepti. . . . . *ibid.*

*II. De modo receptionis.* . . . . . *ibid.*

In genere subjectum recipiens sacramentum tenetur sub gravi aut sub levi, prout materia est gravis aut levis, ad omnes conditiones et circumstantias quas exigit religio ad dignam receptionem. . . . . *ibid.*

Ex isto principio deducitur solutio seq. quæstionum:

1<sup>o</sup> De obligationibus *personalibus* subjecti. . . . . 398

*Quær. 1<sup>o</sup>* Utrùm subjectum recipiens sacramentum teneatur ad sanctitatem, et utrùm teneatur ad sacramentum pœnitentiæ? . . . . . *ibid.*

*Quær. 2<sup>o</sup>* Utrùm teneatur ad attentionem? . . . . . *ibid.*

2<sup>o</sup> De obligationibus subjecti *relativis ad ministrum.* . . . . . *ibid.*

*Quær.* Utrùm liceat subjecto petere sacramenta à ministro indigno? . . . . . *ibid.*

### III.— PARS DISCIPLINARIS.

Leges ecclesiasticæ generales de sacramentis resumuntur in seq. propositionibus:

1<sup>o</sup> Minister tenetur lege ecclesiasticâ administrare sacramenta quando subjectum eadem lege tenetur ea recipere. . . . . 399

2<sup>o</sup> Subjectum tenetur recipere sacramenta quorum receptio præscribitur ab Ecclesiâ. . . . . *ibid.*

- 3° Minister in administratione, et subjectum in receptione sacramentorum tenentur ad observandos ritus ab Ecclesiâ præscriptos. . . . . 399

---

*ERRATA.*

---

Pag.	Lin.	
27	10	<i>loco cuilibet alio, lege cuilibet alii.</i>
47	31	<i>loco sumptos, lege sumptas.</i>
51	22	<i>loco Verbum, lege Verbo.</i>
55	19	<i>loco Ergo, lege Ego.</i>

